

Ex Bibliotheca  
majori Coll. Rom.  
Societ. Jesu

72-3-60.







MEDICINA  
MENTIS  
ET  
CORPORIS.



THE HISTORY OF

MEDICINE

IN THE  
CORRIGENDIS

# MEDICINA MENTIS,

SIVE

ARTIS INVENIENDI  
PRÆCEPTA GENERALIA.

EDITIO NOVA,

AUCTIOR & CORRECTOR,  
CUM

PRÆFATIONE AUTORIS.

*Author est Waltherus Schirnhäusen*



LIPSIÆ,

Apud J. THOMAM FRITSCH.


M DC XCV.

LUDOVICO: XI.

FRANCIE

NAVARRÆ

REGI. INCITO

 *P*ropter Majestatis tue compo-  
situm prodire, ac tum  
supplex implorare pre-  
cibus, cum precibus hic qua-  
erant tractatus non veretur: imo  
eum argumentum spectat dignum


LUDOVICO XIV.

FRANCIÆ

ET

NAVARRÆ

REGI INCLITO.



IN Majestatis tuæ conspectum prodire, ac tuum supplex implorare præsidium præsens hic qualiscunque tractatulus non veretur: sive enim argumenti spectetur dignitas, si-

ve meum in genuinâ veritatis indagandæ methodo studium, favorem pe-  
 ctoris regii non poterit non sibi pol-  
 liceri. Prius quod attinet, objectum  
 sanè ejus se in medio sistit tanti Monar-  
 chæ nomine non indignum, sincerus  
 nimirum rationis usus meritò tibi, ô  
 Rex, usque commendatus; utpote si-  
 ne cujus ope nec dextrè sceptrâ regi,  
 nec ullæ aliæ res gloriosè geri possunt.  
 Posterius quod spectat, id vel ideò non  
 displicebit, quòd id ipsum haud ob-  
 scurè à me exigere videris, dum jubens  
 me Academiæ scientiarum regiæ, quæ  
 Parisiis est, membrum esse, ætatem  
 non otio in tantâ mihi addictâ provin-  
 ciâ ut transigam, voluisse crederis; sed

ut



ut potius mentis juxtâ ac corporis malis nullo non conatu mederi & discam & doceam. Hanc enim animo tuo dudum infedisse voluntatem, ut veritati indagandæ cuncti veritatis amantes sedulò incumbant, luculentissima testantur indicia. Hinc tuus singularis favor, quo quasvis prosequeris scientias: hinc impensæ, quibus optimis studiis & experimentis succurrere dignatus es, quàm maximæ: hinc illa tua plus quàm regia & nunquam satis laudata munificentia, quâ assiduos veritatis scrutatores (non tantùm quos riit Gallia, sed etiam extraneos & inlongè diffitis degentes Regionibus) ad studia incendere non dubitasti; unde



de factum, ut nostrum seculum præteritis omnibus flore scientiarum multò reddideris clarius, te ipsum verò ob devictam in eruditorum ingeniis Pseudosophiam plus quàm ob omnes subactas hætenus Provincias & Urbes, partasque victorias gloriosum & dignum, quod omnes impofterum Monarchæ imitentur, exemplum. Benignitatis tuæ erga scientias liberales prædicarem præconia, si, quæ in ejus laudem dici possent, ullo scripto complecti liceret. Sed quid verbis opus, cùm tot numero eruditi & in Galliâ & in aliis Europæ regionibus reperiantur, qui, vel me tacente, hanc tuam in studia beneficentiam experti, condignis

dignis eam, non tamen sufficientibus, encomiis extulerint? Hoc unum silentio transire nequeo, maximos inde & præclaros particularibus non tantum collegiis, sed regnis etiam & universæ ferè Europæ prodiisse fructus, sortemque humanam inde factam esse multò ac antehac commodiorem & multò, quàm quis primo intuitu possit credere, feliciorem; adeoque eruditos scriptores vel hoc ipso fuisse adactos, ut cognoscentes, hanc tuam laudatam magnificentiam tantorum eventuum causam esse, ideo gloriosam ejus famam ad seros usque nepotes literarum monumentis propagarent: quæ omnibus aliis ex marmo-

re, metallove factis quanto minus interitui obnoxia, tanto ad laudem tuam immortalem posteritati sistendam aptiora non immeritò judicabuntur.. His ego Scriptoribus, tuæ in literas insolitæ liberalitatis præconibus, minimum me jungo socium, fidissimumque gloriæ tuæ testem, ut nec hâc in parte officio meo desim, occasione hujus meæ dedicatiunculæ, eâ, quâ par est, animi devotione offero; Deum precatus, velit suâ divinâ benignitate captis tuis clementer annuere, quò reliquas quoque peculiare animi dotes tibi à naturâ præ cæteris mortalibus concessas ejusdem rationis & intentionis ductu ad solam communis

munis boni promotionem sapienter.  
 dirigere valeas, & in omnium men-  
 tibus non tantum venerationem, ve-  
 rum etiam constantissimum apud bo-  
 nos amorem (in hoc, ut verus Mo-  
 narcha, divinum æmulatus Numen)  
 perfectè tibi concilies: cujus Numi-  
 nis directioni Te totum exoptatissimâ  
 Regiæ prosperitatis fruitione bean-  
 dum commendo

MAJESTATIS TUÆ

*humillimus & devotissimus Cultor*

E. W. D. T.



PRÆFATIO AUTHORIS  
PRÆFATIO AUTHORIS  
AD

LECTOREM.



*I* quis oculo Philosophico contemplatur infinitam præcipuè DEI potentiam, quæ innumeras easque diversissimas in tam vastò universi extenso produxit creaturas; nec minùs ineffabilem ejus sapientiam, per quam potentia hæc ita dextrè applicatur, ut omnia juxta leges ultra omnem, quàm credi potest, modum simplices fiant, & difficillima facillimis peragantur mediis; tandemque venerandam bonitatem, ex quâ eadem potentia juxta sapientiæ inexplicabilis leges adeò benignè se singulis communicat, ut vilissima æquè ac præstantissima creaturæ prospiciat: convictum certè sentiet sese, ut fateatur, mentem suam nullo gaudio ex quacunque aliâ consideratione naturali orto tam impensè tamque suaviter affici, ac eo ipso, quod rerum earundem contemplatione in nobis excitatur; qui insignis letitiæ gradus hæc ipsâ meditatione comparatus maximos inter mentis verè beatæ fructûs non immeritò numerandus est.

*His & similibus seriò perpensis colligere exindè mihi facile fuit, quanti momenti donum sit intellectus, utpote quo mediante veritates adeò profundas mente contemplari dicunturque animi voluptatem consequi homini conceditur. Et hoc quidem assertum suâ luce tantopere radiat, ut qui alioquin*

quin nullâ de re non scrupulos movent, absque ullâ hic hæsitazione fateantur ignorantes pariter & eruditi, intellectum nostrum bonorum omnium à Gratiâ divinâ naturali viâ nobis concessorum nobilissimum omninò esse: siquidem veritas hæc circa miserrimos illos, qui ejus usu plane destituuntur, longè clarissime in oculos incurrit, ut hæc in re dubitationi vix relinquatur locus, ac adeò nonnulli quamcunque injuriam æquiori fortè laturi sint animo, quàm se rationis expertes eos quis diceret.

Cùm autem hæc extra dubium posita sint, quæ quæso dignior homine inter omnes naturales erit occupatio, quàm quæ in id incumbit, ut tanti momenti donum, quoad ejus fieri potest, bene excolatur? Sanè aut malevolus, aut ineptus mihi videretur iste, qui omnia bona à DEO generi humano data optimo, quo possumus, modo nobis excolenda atque in usûs nostros adhibenda esse concederet, id ipsum, verò de intellectu, nobilissimo omnium bono, negaret. Ob has igitur aliasque similes rationes animus mihi est, in libro præsentî viam ostendere, quâ intellectus noster, quoad naturalibus mediis fieri potest, optimè perficiatur. Nulla verò in limine bujus rei utilior consideratio erit, quàm quæ benè expendit, ad quem quantumque perfectionis gradum evehi possit intellectus, ut hac ratione quilibet sapientiæ studiosus scopum, ad quem solum collimare eum oportet, semper sibi habeat præfixum. Sed ne hæc in re stabilienda fallamur, non nisi ea tanquam certa assumam, quæ jam tum per ipsam experientiam satis superque sunt comprobata.

# PRÆFATIO AUTHORIS

Qui Matheseos interiora attentius perlustrârunt, observârunt absque dubio, in eâ acquirendâ dari tres inprimis cognitionis gradûs. Primus horum est, si quis, in quot disciplinas scientia hæc dividatur, de quibus unaquæque, agat, sciverit, terminorumque omnium ibidem occurrentium notitiam similiæque sibi acquisiverit. Secundus gradus est, si quis eorum, quæ Euclides, Archimedes, Apollonius & ceteri Veteres in hæc ipsâ scientiâ invenerunt, quæque Recentiores his fundamentis superstruxere, cognitionem sibi comparaverit. Hic autem gradus licet multo præstantior sit priori, nondum tamen talis Mathematicum cultor, qui hic substiterit, nec ulterius fuerit progressus, perfectus mihi Mathematicus dicendus esse videtur, sed ille demum, qui à prioribus hisce ad tertium quoque ascendit cognitionis gradum, cujus requisitum est, ut quis non solum Veterum & Recentiorum inventa, etsi eorundem inventionis ratio ab aliis detecta nondum sit, indagare, sed & quicquid est occulti, in Mathesi suo, quod dicitur, Marte, seu propriis ingenii sui viribus, eruere valeat. Quod autem hic de Mathesi viris ingeniosis non ignotum esse scio, id meo iudicio ad universam cognitionem humanam, quæ Philosophiæ nomine venit, extendendum esse videtur. Etenim, quicumque saltem terminorum & distinctionum occurrentium significationem cognitam habet, tantumque novit, in quot disciplinas Philosophia dividi soleat, quot Sectæ in hæc à principio usque ad nostra tempora floruerint & similia; insinuum saltem philosophiæ gradum obtinuisse censendus, ac nullo modo realis Philosophus appellandus erit, sed



## AD LECTOREM.

*sed verbalis potius, quia vocabulorum magis quàm rerum notitiam habet: quanquam hoc nomen inprimis applicandum iis esse censeo, qui Philosophiam infinitis figmentis e. g. Sympathia, Antipathia, facultatum, virium, formarum substantialium, aliisque, quibus nempe vocibus nullus in mente sanus respondet conceptus, nimium quantum fœdârunt. Qui verò hac cognitione nominali, quæ vel ope Lexici acquiri potest, minimè contentus propius ad rem accedit, ipsaque Philosophia interiora cognoscere, aggreditur, quæ nimirum variarum Sectarum tam veterum quàm recentiorum genuinæ opiniones sint, quæ aliis præferendæ, quale gradatim scientia usque ad nostra tempora sumpsit incrementum & similia; hic utique ad altiorem quidem gradum ascendit, sed longè tamen adhuc meo iudicio à supremo gradu abest, cùm cognitio ejus non alia nisi historica sit, ac ideo hic ipse Philosophi potius historialis quàm realis titulum mereatur. Hoc siquidem Philosophi realis nomen illi saltem competit, qui ad tantum pervenit cognitionis gradum, ut re ipsâ observet, in suâ potestate esse, quicquid incognitum sed humano tamen intellectui pervium est, propriis ingenii sui viribus in lucem producere. Hac verò distinctio maximi momenti est, dignaque, quæ in principio hic referatur, & probè annotetur: hac enim ignoratâ vel neglectâ plerique se pejus, quàm quis sibi imaginari possit, sub nomine cognitionis philosophicæ decipiunt, & si non planè inutilibus, ad minimum tamen multis neutiquam necessariis ingenium occupant & fatigant.*

*Verum*

## PRÆFATIO AUTHORIS

*Verùm enim verò quemadmodum in Matheſi ad tertium hunc altiſſimumque cognitionis gradum perveniendi certa datur ſcientia, Analyſis videlicet ſpecioſa, vulgò Algebra dicta, & ob præſtantiam ejus ſingularem à Recentioribus perquam bene exulta, quæ genuina mihi philoſophia Mathematicorum eſſe videtur: ſic eâdem ratione generalis aliqua datur ſcientia, cujus ope quilibet eâ probè inſtruetus non ſolùm quicquid in Matheſi datur occulti, ſed omne etiam incognitum, ſub intellectum cadens, certâ & conſtanti methodo certò in lucem potis eſt deducere. Hacque ſcientia, aut, ſi mavis, Ars inveniendi, ipſa eſt genuina philoſophia, cujus quanta vel ideò ſit præſtantia, abſque prolixâ explanatione ex datâ hâc ejus deſcriptione cuius ſtatim obviũ, & vel ex hoc unico etiam perſpicuum eſſe poteſt. Aetiones quorumcunque hominum manifeſtum faciliè faciunt, eos inprimis, quicquid etiam prætendant aliud, eò collimare, ut bonum, quo utique nullum præſtantius datur, videlicet tranquillitatem mentis ſeu conſcientiæ, poſſideant: ſed ad hanc comparandam nulla alia, ratione quidem naturali parabilis, via patet, quàm quæ aetiones noſtras non in apparentiâ ſaltem ſed reverà virtuoſas exhibet. At verò virtus genuina abſque ſapientiâ verà abſolutè nequit concipi. Quo autem medio ſapientia in rebus purè naturalibus certius acquirenda erit, quàm accuratâ methodo, cujus auxilio omnes cadentes ſub intellectum veritates in lucem indubiè proferre licet? adeoque hæc omnia, ut modò deſinivi, ex genuinâ philoſophiâ unice dependent.*

*Talem*

# AD LECTOREM.

*Talem verò Philosophiam ut recluderent, illustres viri, Renatus des Cartes in dissertatione de Methodo detegendi incognitas veritates, Autor artis cogitandi, quem vulgò Dominum Arnault putant, P. Malebranche dans la recherche de la verité, Abbas Mariotte, dans l'Essay de Logique contenant les principes de science & la maniere de s'en servir pour faire de bons raisonnemens, pluresque alii hoc inprimis seculo, postquam innotuit, quanta hujus rei sit præstantia, omni studio allaborârunt. Quia verò rarò aliquid, quod in cognitione veritatis præcipuum est, in primis statim viis seu initiis ad omnimodam planè perfectionem, quæ hic considerari potest, deducere valemus, quin potius circatalia sensim & per gradûs quasi progredimur; cujus rei illustre exemplum ipsa Analysis est, utpote quæ tempore longo successivè ad tantum tandem fastigium pervenit: binc optimè sanè huic rei consuleretur, si viri plures, qui singularem præ cæteris progressum, & propriis quidem ingenii viribus, in veritatis cognitione, experti, attentè inquirerent in vias, quarum ope tam singulares profectûs fecere, illasque candidè, ceu viros generosos decet, cum publico communicarent. Negari equidem nequit, nihil nisi mera hujus methodi specimina, quæ lectores ob tam ingeniosa inventa in admirationem singularem rapiunt, edendo autorum ejusmodi propriam æstimationem multò magis stabiliri, quàm communicando ipsam methodum, quæ, origine simplici harum inventionum detectâ, ejusmodi admirationem*

## PRÆFATIO AUTHORIS

tionem potius tollit: Verùm hi, qui adeò impensè gloria student, veritatis augmento, id quod tamen boni viri inprimis officium est & esse debet, prospicere parùm videntur. Quanto damno circa Mathesin idipsum fecerint veteres, ad augmentum propriae existimationis magis quàm ad lectorum profectus respicientes, eruditatis satis superque constat. Postquam enim Vieta, des Cartes, pluresque alii ipsam Methodum luci prodiderunt, ex quo fonte antecessores olim tam ingeniosa sua inventa hauserant, majus in Mathesi veritatis augmentum hoc unico seculo, quàm per omnia antecedentia secula, exortum est.

Ad me quod attinet, tenuitatis meae quidem probè conscius sum, sed si dicendum mihi sit, quod res est, non diffiteor, me in ejusmodi vias incidisse, quibus tam feliciter in veritatis indagatione progredi licet, ut nihil magis in votis mihi sit, quàm ut otium sufficiens & commoda ab aliis negotiis vacatio aliquando mihi contingat, veritatum singularium varii generis specimina Methodo hac philosophandi in lucem à me hætenus deducta numeris omnibus ita absolvendi, ut ea publico communicare valeam. Quia verò valde dubito, num ea, quorum idea animò concepta hæret, in chartam conjiciendi & perficiendi, numque plura imposterum edendi ulla occasio mihi superfutura sit; zelus, quo bono publico inservire paratus sum, hoc effecit, ut, licèt non levia me quasi circumstent impedimenta, ipsam tamen methodum, cujus ope hætenus tam felices feci  
pro-



*progreſſus, celare nollem. Quamobrem methodum, hanc, hoc eſt, ejusmodi philoſophiam, cujus ideam, paulò antè delineatam dedi, hoc ipſo libro eâ, quâ maximè potero, perſpicuitate lectori exponere decrevi. Quia verò plerique in ſenſu, qui à meo diverſus admodum eſt, Philoſophiam accipiunt, aut etiam, quia fortè iſta, quam addidicerunt illi olim, Philoſophia, nequaquam animo ſatiſfecit, atque ideo vel ipſum vocabulum hoc nimium quàm abhorrent plurimi; facile prævidi, paucos, ſi tali titulo ſe conſpiciendum exhiberet hic liber, eum dignaturos eſſe perſolvere: idcirco nomine potiùs MEDICINÆ MENTIS ET CORPORIS inſignire eundem volui, quò amabilior omnibus redderetur Philoſophia. Et id etiam genuina præſtare debet Philoſophia, ut oſtendat luculenter, quàm malè, & plus quàm vulgò credi poteſt, non corporis ſolum valetudine, ſed ſanitate inprimis mentis omnes deſtituantur homines; pariter & evidenter doceat, quæ hiſce malis appropriata adbibenda ſint remedia.*

*Sed notari velim ante omnia, quòd, licèt hac talia tantùm libro hoc tradendi ſcopus mihi fuerit unicus, non ideo tamen integram Philoſophiam eodem complecti tibi que hac vice exponere decreverim: nihil enim hoc tempore tibi L. B. niſi primam philoſophiam offero. Hac à quibusdam appellari amat Metaphyſica; ſed quia à quamplurimis inutiles valde ſpeculationes in eâdem ventilantur, ea propter hac eruditis plerique perquam exoſa eſſe ſolet. Verùm ne nec hoc, quicquid*

# PRÆFATIO AUTHORIS

*est præjudicii, à tuo hunc librum attentè evolvendi te, iterum revocet proposito, scias velim, in primâ hâc meâ Philosophiâ omnia illa me exhibiturum, quæ homini, cui seria sapientiam sibi acquirendi mens est, omnium primò veniunt cognoscenda. Deinde quamvis utique, verum sit, utilissima in primis non nisi in fine Philosophiæ doceri posse, reipsâ tamen hunc librumvolvendo experieris, vel in ipso principio hujus Philosophiæ perquam utilia tibi exhiberi. Hisce enim expono, quâ ratione veritatem per te ipsum certò acquirere, passiones tuas sapienter moderari, sanitatem, ut ut diætam bonam non adèò exactè sequi possis, conservare, liberos prudenter educare, & similia facili negotio exequi liceat.*

*Ut autem eò meliùs judicare valeas, num viâ maximè naturali in primâ hac Philosophiâ, vel, si mecum mavis, Logicâ, tradendâ fuerim usus, te ipsum, in consilium quasi adhibere, & ex te querere placet; quasnam cogitationes præ omnibus aliis maximè necessarias esse judices, & quenam propterea quemlibet hominem primò & seriò distingere debeant occupatum? Quaquaversum respicio, à te nil aliud responsi loco accepturum fore mihi videor, præterquam hoc, istas in primis cogitationes necessarias serioque proinde ruminandas esse, quamam inter infinita hoc in mundo occurrentia negotia omnium optima sit occupatio, quæ præ cæteris eligenda veniat. Hoc ipsum autem in primâ hujus Tractatûs parte expositum dedi, certò persua-*

*suasus, te, eâdem attentè perlustratâ, sententia mea subscripturum, præstantiorem scilicet occupationem, non esse studio acquirenda veritatis per se ipsum. Quod si jam denuo ex te quæram, quidnam, stabilito hoc fundamento, necessarium putes, ut ejus ulteriùs curam habeamus; non video, siquidem acquisitionem veritatis optimum esse judicasti, te aliud quid adhuc, quàm ipsam methodum veritatem infallibiliter detegendi, considerari posse. Et hoc idem est, quod in parte hujus Tractatùs secundâ propono. Si insuper inquiram, quidnam tunc in tradendâ hâc incognitas veritates detegendi Methodo primum exponendum esse censeas; Et verò omnia, quæ circa talem Methodum exponerentur, frustranea forent, si, quid verum Et falsum sit, ignores, responsionem non aliam me recepturum video, quàm hanc; infallibile ante omnia remedium, quo verum Et falsum certò cognosci, unumque ab altero discerni queat, determinandum esse: quod ipsum, primâ ejusdem secundæ partis sectione, quàm possum, maximè, in lucem conor producere. Hoc autem, quid verum sit falsumve, perspecto si porrò interrogem, quid agendum ulteriùs existimes; respondebis utique, viam jam præmonstrandam esse, cognitionem semper nostram de veritate ad veritatem absque fine extendendi: sed hoc idem in sectione secundâ ejusdem secundæ partis fusè ostenditur. Quod si denuo instem rogando, num nihil, quod porrò peragatur, reliquum esse putes; in mentem jam tibi, qui hætenus in Methodo verita-*



## PRÆFATIO AUTHORIS

tem per te ipsum acquirendi paululum te exercuisti, ingeniumque tuum excoluisti, impedimenta venient illa, quæ procul dubio interim offendisti, quæque ingeniosis etiam viris superatu sunt difficilia: hinc inde à te haut aliud expecto responsum, quàm isthoc; hujusmodi impedimenta, ut hac ratione methodus veritatem acquirendi perquam plana & facilis reddatur, omnia removenda esse. Idipsum verò in tertiâ sectione ejusdem partis exequi conatus sum. Quia autem hæc inter impedimenta ipsi quoque corporis nostri morbi numerantur; de iis etiam, & peculiari quidem opusculo huic Tractatui annexo, egi, ne tibi fortè, quæ prolixè de his propellendis docui, tadiofa nimis viderentur. Denique ubi ita methodum veritatem per te ipsum inquirendi sciveris, & ego ex te quæsivero, quid faciendum ulterius restet; absque dubio, cum Methodus, ut ut optima, absque applicatione nihil proffit, infinitaque objecta, quibus applicari possit, extent, scire, adhuc desiderabis, quanam objecta illa inprimis sint, quorum examen juxta hanc methodum mentem tuam omnium maximè occupatam tenere apprimè referat. Et hoc ipsum tandem explicatum tibi in tertiâ parte, exhibeo, quâ totum ita opus finio, quia non video, quid à te possit queri amplius aut desiderari.

Cùm itaque omnia eo tractârim ordine, quem proprium judicium tuum ad regulam sana rationis directum expetit, atque sic ex tui ipsius animi sententiâ clarè appareat, quid in primâ Philosophiâ tractandum sit;

*fit; forsan insuper scire cupies, quibus principiis ad hac usus fuerim, siquidem ex fundamento de ipso futuro edificio præsumere atque judicare soleamus. Fateor indè, me, si ullâ unquam in re, certè etiam in hac ubique attentè circumspexisse, summoque studio præcavisse, ne hîc aberrarem. Quâ re multo labore, peractâ statui tandem, talia assumenda esse principia, quæ absque uliâ erroris suspitione vel rigorosissimo Sceptico indubia, quorumque certitudinem in me ipso vel quolibet momento per ipsam experientiam explorare, mihi facile sit. Talia autem hæc quatuor esse censeo:*

- 1. Me variarum rerum conscium esse, quod principium primum & generale totius nostræ cognitionis est.*
- 2. Me bene à quibusdam, à quibusdam verò malè affici, principium primum est, unde cognitio boni & mali, seu tota doctrina Moralis derivatur.*
- 3. Quædam à me posse concipi seu cogitatione apprehendi, quædam autem à me nullo modo posse concipi, seu, repugnare quædam, & respectu mei incogitabilia esse, principium primum est, ex quo omnis veri & falsi deducitur cognitio.*
- 4. Tandem me varia sensuum exteriorum, itemque imaginum internarum & passionum ope advertere, principium primum est, unde omnia, quæ ipsi experientiæ debemus, emanant. Hisce quatuor principiis, ceu totidem columnis, totum humanæ cognitionis adificium mihi videtur unicè inniti; quibus de principiis prolixiùs in ipsâ hujus libri conclusione dixi, partim, quò breviter, quæ præcipua hujus*

# PRÆFATIO AUTHORIS

*Tractatus capita sint, repeterem, partim, quò Lector observaret, me in ipsâ operis hujus conclusione à principio denuo quasi ordiri, ut subinnuam, quòd, mecum perlustrato fugitivis saltem oculis toto opere, tunc demum ab initio liber hic revolvendus, attentiorique lectione, si tanti videatur, donandus sit. Sed cum citato loco prolixius, uti jam dictum est, hanc rem exposuerim, Lectorem eò remitto, neque hic præterea quid addo, nisi quòd adhuc observari velim, viam hac ratione ad veritatis indagationem planam seu facilem & quasi inter omnes hæcenus philosophantes mediam, meo quidem judicio, stratam nobis esse. Etenim hic mihi opus haut est, in principio philosophandi statim explicare, quæ ipsa mentis & corporis Essentia, quæ genuina, conscientia, intellectus, voluntatis, sensuum, imaginationis & passionum natura sit, ceu more consueto horum expositione alii plerumque tam se quàm Lectorem talium adhuc penitus ignarum mirè fatigant, sequè spinis infinitis implicant. At ego econtrà ab hisce difficultatibus, extricatam hanc premendo viam, prorsus liber sum, cum, ex meâ sententiâ, in Philosophia, sive artis inveniendi, principio sufficere mihi videatur, si quis de rebus enumeratis ea saltem, quæ de iisdem, hoc loco brevius, & in ipso opere prolixius exposui, certò noverit; non secus ac Mechanicus manu suâ varia ad opus suum perficiendum extruit, licet interiorem, manûs structuram planè ignoret, cujus adeoque notitiam nec ille tunc exponere posset, nec eâ cognitione ad*  
ope-

## AD LECTOREM.

operam suam absolvendam opus haberet. Sed in hac cognitione, qualisqualis sit, non subsistendum est, quin potius eâdem postmodum ad alia atque alia incognita hinc derivanda utendum, & eò res tandem continuanda, usque dum omnium harum rerum internam quoque naturam detegere quis queat.

Quia verò præcipitania hæc in parte summo studio declinanda est, nec cautè satis hæc res institui potest, ego autem nunc temporis tali hauri abundem otio, quale studia ejusmodi apprimè requirunt; impræsentiarum Artis inveniendi generalia tantum præcepta proponam, quæ, priusquam ad specialiora progrediar, interim judicio Eruditorum liberrimo subjecta sint. Sicuti autem hac vice generalia præcepta exhibeo: ita animus est, si saltem tempus aut commoditas, quæ de re tamen valde dubito, id ipsum concesserint, specialia artis inveniendi præcepta publico quoque exponere. Et quia omnia, quæ proponi possunt, problemata ad tria genera reducuntur, quatenus nimirum inquirendæ rei natura vel solâ ratione, vel solâ experienciâ, vel utroque modo constat; de singulis etiam seorsim, DEO volente, agam. Et primò quidem peculiari ostensurus sum tractatu, quâ ratione, quicquid est occulti in Mathesi, determinare queamus; secundo peculiari itidem monstrabo opere, quâ lege experienciæ sint instituendæ, ut & hinc infinita nova & utilia possint derivari; & tandem tertiò, quomodo interiora Physices certò cognoscere liceat. His bene per-

\*\*\*

actis



# PRÆFATIO AUTHORIS

*actis existimabo, accedere me tum quoque posse ad specialissima Artis inveniendi præcepta tradenda, quæ utilitatem præprimis ex his omnibus derivandam quoad hominis mentem, corpus & utriusque potentiam, declarabunt. Quæ omnia si rerum mearum status ita, veluti horum ideam animo concepi, perficere permiserit, me utiliorem hæc ipsa operam in publicum conferre non potuisse putabo. Interim hæc providentia divina penitus committenda sunt.*

*Ex hæcenus dictis Lector attentus perspicere potuit, quid hoc in libro pertractem, quibusque principiis usus fuerim; nihil itaque superest, quam ut re ipsa, quomodo hoc ipsum exequutus fuerim, examines; cujus ad lectionem te hisce, quantum possum, amicè invito. Labor tuus hac in re susceptus, nisi admodum fallor, fructu suo non carebit, modò sequentia hæc digneris exactè exequi. Primò præcepta, quæ pauca numero, attentè pervolvās, exempla verò, quæ primâ lectione haut assequeris, ne attentionem tuam fatiges, penitus negligas, interea que temporis, priusquam ad secundam aut tertiam accedis lectionem, banc acquirere tibi aliabores cognitionem, ut hæc quoque, reiteratâ lectione, capi possint. Unde autem hæc cognitio sit haurienda, variis tibi in locis bonos citando Autores satis indigitasse mihi videor. Secundò necesse etiam est, ut eodem, quo conscriptus est, ordine librum pervolvās, quia sequentia ejusdem semper ferè priora præsupponunt. Si consilium*  
*spe-*


## AD LECTOREM.

*ſpreveris, ſecusque feceris, mirari etiam noli, ſi tibi in plurimis, ſed absque tamen culpâ meâ, videar obſcurus. Tertiò notandum quoque, ne, quæ tibi nimis ſimplicia, captuque perquam facilia videntur, perfunctoriè ſaltem & absque neceſſariâ attentione ex falſâ perſuaſione, ac ſi hac ea propter res parvi momenti forent, tranſilias: credas enim, ſi hinc inde, rationes eorum, quæ tradidi, omittere, inventionum fontes celare, exemplis que ſæpe familiaribus præcepta, non illuſtrare voluiſſem, hacce majorem fortè mihi exiſtimationem, ſed certè utilitatem tibi minorem, attuliſſent. Quare ſi talia offendas, firmiter tibi potiùs perſuadeas, cauſam, quæ eadem exhibere me permovit, non aliam eſſe, niſi quòd multâ experienciâ edoctus fuerim, hac certè, ut ut perquam ſimplicia & ideo intellectu facilia, omnium tamen illorum, quæ cognoverim, utiliſſima, adeoque etiam attentione tua, atque meditatione multò, quàm quidem in principio exiſtimaveris, digniora eſſe. Caterùm ſpes mea eſt, fore, ut quantò ſincerior tibi ad bona ſtudia promovenda ſcopus fuerit, tantò gravior ſemper ac ſuavior tibi hujus libri lectio ſit evaſura. Nec enim hic ingeniù fœtus ex meris ſpeculationibus, ſed è continuâ potiſſimùm praxi, quæ viva irrefutabilique ratione, quid utile ſit nec ne, indubitanter nos convincit, enatus eſt.*

*Hæc libuit in hac ſecunda Editione ideo præfari, quia ex objectionibus quorundam privatis facilè con-*

PRÆFATIO AUTHORIS AD LECTOREM.

*stare potuit, à pluribus, quis hujus mei Tractatûs scopus genuinus sit, non satis perceptum fuisse. In ipso autem tractatu errores, qui in primam Editionem irrepserant, passim, quantum per alia negotia licuit, emendare, nec minus sensum, ubicunque obscuritatem aliquam inesse eidem ab aliis intellexi, ubique planiorum reddere studui: quam operam eò libentius in me recepi, quia à non paucis, atque inprimis ab ingeniosis viris, quorum judicio multum defero, primam hujus tractatûs Editionem propensiori, ac ipse spem conceperam, favore acceptam fuisse reapse compertum habeo. Vale optimè, hoc est, cura sanitatem corporis & precipuè, quod tua maximè interest, mentis sanitatem, conatibusque meis favere*  
*perge.*





# MEDICINA M E N T I S,

Sive

TENTAMEN GENUINÆ LOGICÆ,  
ubi differitur

De

METHODO DETEGENDI INCOGNITAS  
V E R I T A T E S.

## PARS PRIMA.

*Quâ occasione & methodo inciderim in viam, quam præstantis-  
simam judico omnium, quas in hac vitâ inire licet, quæ-  
que est Inventio Veritatis per nos ipsos.*



Ulm ad meipsum attentè respiciens omnia illa animo volverem atque re-  
volverem, quæ mihi à primis annis  
occasione fuerint, ut genuinum vitæ  
iter, quod faciendum videtur, feli-  
cissimè ingrederer; tria potissimum,  
hac re exactius examinata, perspexi,  
quæ mihi videntur inter præcipuas  
tam salutæ directionis causas meritò censendæ esse. Ob-  
servavi siquidem ab ineunte ætate in meipso primò ani-  
mum nemini nocendi, quin potius benè cuique & cupien-  
di & quantum in me esset, faciendi; deinde ardorem sem-  
per aliquid novi & curiosi addiscendi non mediocrem; &  
denique conatum vitam, quàm possem, felicissimè tradu-  
cendi.

*Tria, ex qui-  
bus omnis mea  
felicitas, qua-  
tenus lumino  
naturali po-  
tèst acquiri, or-  
tum præcipud  
duxit.*

*Primi effectus.*

Primum effecit, ut faciliè bonos à malis distinguerem.

*Bona.*

Hi enim ferè de nullo alio cogitant negotio, quàm de damno aliis inferendo, proximumque se astutià circumvenisse delectantur, plenoque ore, facta ejusmodi recensendo, gloriuntur. Quod genus hominum dum fugerem, ac interim mei similium societatem quàm maximè quærerem, in bonorum ut plurimum notitiam & consuetudinem perveni, magno animi mei ea desiderantis emolumento. Quia verò non omnes, qui animum ad bonum inclinantem obtinent, ideo omnium rerum adæquatam veritatem cognoscunt, sed è contrario haud rarò à tali cognitione longissimè remoti, & eam ob rem magnis & quamplurimis præjudiciis præoccupati sunt; hinc accidit, ut suâ hâc ignorantia animum alterius sub specie boni & veri magnis sæpe imbuant erroribus, non faciliè postea eluendis.

*Mala.**Secundi effectus.*

Quapropter ardor ille sapientiæ acquirendæ (qui me magis incitavit ad scientias curiosas addiscendas, quàm ulla præceptorum exhortatio, aut lucri spes apud alios unquam efficere potuit,) causa fuit, ut in cognitionem præstantissimorum virorum, tam eorum, qui ante nos vixere, quàm sapientissimorum hujus seculi pervenirem. Unde sat ampla occasio animo meo curioso satisfaciendi exorta est, quæ effecit, ut non tam facile à rectâ viâ aberrarem, aut, si aliquantulum ab ea divagatus essem, ad eam non difficulter reverterer. Cum sic interea mihi aliorum placita compararem, parum aut nihil in studiis proficiebam, quò aliquid proprio Marte invenirem, quod in publicam posset cedere utilitatem, atque ita augendi vel provehendi antecessorum inventa vix mihi acquirebam ullam aptitudinem, imò potius deterrebar à conatu quicquam per me ipsum invenendi. Dumenim tam ingeniosa aliorum opera videmus, rarissimè consideramus, quantum operæ iis conficiendis, quantum temporis iis ritè ordinandis impensum, quâ occasione ad ea perventum fuerit, quàm simplicia habuerint initia,

*Bona.**Mala.*

initia, quæ dein successu temporis, cum similis ad talia inclinatio adesset, resumpta, cultiora atque ita pedetentim, perfectiora evasere, donec tandem illum perfectionis gradum attingere, ut luci publicæ destinarentur; hæc, inquam, & his similia rarò consideramus. E contrario, cum adeò præstantia in ejusmodi operibus invenimus, tacitè apud nos ipsos, & pro certo supponimus, authoris ingenium tanto opere excelluisse, ut his mediis ordinariis, jam recensitis, non fuerit usus, sed opus statim eà, quæ nobis exhibetur, accuratione, vel ipsis primis delineationibus absolverit. Ad quod præjudiciū fovendum ipsi authores non parum contribunt, multi quidem præter voluntatem, dum doctrinæ causâ omnia ita ordinare coguntur, ac si statim à principio ita disposita & inventa fuissent, pleraque verò reticent: quæ scilicet occasione, quibus mediis, quanto tempore &c. profecerint, quia hæc ad materiam, quam tractant, sæpe neutiquam spectant; maxima tamen eorum pars culpâ certè haud caret, dum gloriæ cupiditate moti non rarò jactitant, se solos omnium meditationum illarum esse authores, se exiguo labore, brevissimo tempore, &c. talia sibi acquisivisse; ac plurimi tam vafri sunt ad æstimationem sibi conciliandam, ut, licèt quasdam veritates ope demonstrationum perquam faciliū detexerint, eas tamen lectoribus non communicent, verum magno sæpe labore difficiliores quærant, quas nobis in suis operibus obtrudunt. Quæ omnia sanè efficiunt, ut ejusmodi authores plerumque multis sint admirationi, eorum ingenia divina, non humana, credantur, & quod pessimum, alii permulti, qui nullas nisi humanas communesque qualitates in se ipsis observant, de propriâ facultate, tale quid suo Marte præstandi, plane desperent; atque sic nunquam *scientiarum omnium nobilissimam, ope cujus, quicquid est occulti, revelatur*, sibi comparare annitantur, sed potius quendam sibi ducem, quem sequantur, eligant, & eum quidem, quem maximè admirati

sunt, cujusque ingenium divinum, non humanum, existisse credunt. Atque propterea illum omnibus aliis præferunt, ejusque opinionibus tam strictè inhærent, ut potius veritati vim inferre, quàm ab ejus præceptis vel minimum recedere, aut ulla nova proprio ingenio investigare conentur.

*Tertii efficta.*

Omnium maximè itaque mihi profuit, me, ad consuetas hominum cupiditates respiciendo, non minùs ac illi, imprimis desiderasse, ut quàm felicissimè, quantum quidem humanitus fieri potest, vivere possem, & ad id obtinendum hoc potissimum egisse, ut, quantum possem, optimè vitam instituerem, atque ita inciperem, propriam potius inclinationem, quàm aliorum ductum, sequi. Verùm enim verò maxima hîc latet difficultas, quænam nimirum genuina sit via nos eò ducens; tot enim, si ulla in re, hîc certè sunt sententiæ, quot capita, sive ad diversissima & innumera fere consilia ab eruditis publico communicata, sive ad vulgi disputationes de bono & malo respiciatur; præcipuè si insuper attendatur, tam inter hos, quàm illos, paucos tales reverà existere, quales sese jactitant. Quæ omnia maximo-pere spem genuinæ indagandæ viæ mihi adimebant; cum probabile non videretur, me in tot millenis variè sentientibus præ omnibus aliis optima hîc semper detecturum esse.

*Difficultas id  
obtinendi.*

*Ablatio hujus  
difficultates.*

Hiscæ non obstantibus, seriò ad similia respiciens observavi, difficile esse, ut quis quovis momento secum habet, & semper sibimet ipsi invigilet: versamur enim in perpetuâ mutatione; & cum non planè in hominum potestate sit, naturam suam & actiones ab eâ procedentes æquè facile, ac verba mutare: hinc si quis magis ad actiones quàm verba aliorum attenderit, tum & occasionem diu cum aliis conversandi invenerit, ac denique ipse probæ fuerit indolis; nã ille haud difficulter quasvis vel artificiosissimas hominum dissimulationes detegit. Atque ita incepti interiora rerum omnium, & prout reverà existunt, perpende-

re,



re, non quemadmodum externè oculis se offerunt, & sæpe splendidam, ut dicitur, miseriam, hoc est, magnum malum sub boni magni specie repræsentant. Habent etenim res mundanæ binas facies, quarum una patet, altera latet, & quæ semper à se invicem quasi diversissimæ sunt. Hæc dum sedulò examinarem, non tantùm facilè intellexi, quid reverà bonum, quidve malum ab aliis censeatur, licèt interim aliud ore, sapissimè etiam contra propriam animi sententiam, proferrent; sed etiam ab aliis ad me ipsū conversus magnā delectatione observavi, nos, si modò propriæ conscientiæ deditā operā contradicere nolumus, melius à nobis ipsis quàm ab ullo alio posse discere, quid benè aut malè nos afficiat, difficile aut facile nobis appareat, tristitiam lætitiave nobis adferat, & id genus alia; deque eo nos adeò certos esse, ut, quamvis omnes nobis adversentur, nihil interea efficere valeant ad nos à propriâ experientiâ dimovendos: non aliter ac ego ipse multo certius scire, quo, quàm quisquam alius, an, verbi gratiâ, cibus aliquis meo palato gratus sit, nec ne; ubi aliorum quorumvis à me hâc in re dissensus apud me nequicquam valet. Quod ad eò evidens est, ut licèt haud mirandum sit, homines de vero & falso, cùm eorum quædam valde occulta sint, disputare, ultra modum tamen mirum videatur, plerasque hominum disputationes, quîn rixas quandoque, occupari circa perceptiones, quas habent de iis rebus, quæ ipsos benè aut malè afficiunt, faciles aut difficiles apparent, commoditatem aut molestiam pariunt &c. quibus tamen vix quicquam manifestius est; nec credo, quenquam in talibus studio errare posse, etsi vel maximè voluerit. Imo ipsi Sceptici, licèt de omnibus dubitârint, & putârint, omnia fortè se ita non habere, quemadmodum apparent, non potuerunt tamen negare, nisi apertè propriæ contradicendo conscientiæ, sibi omne istud sub certâ ratione ita vîsum esse apparere, & inter illas apparentias (concedamus enim illis, omnia



nobis fortè videri ita esse, non autem sic reverà existere, ) quasdam lætitiā, quasdam tristitiā peperisse; quarū prior ipsos benè, posterior malè affecerit. Nam si quis scepticus vapulet, utut dubitarit, an verum sit, se tam indignis tractari modis, aut etiam existimarit, hoc fortè potuisse sibi tantummodo apparere: attamen non poterit inficiari, se dolorem percipere, & ex eo sese malè habere. Quæ hic non aliam ob rationem profero, nisi ut pateat, quàm firma hæc sint, quæ attulimus, cum hominum vel præfractissimorum rationes contra ea nihil valeant. Ac propterea in inquirendā vitæ feliciter instituendæ ratione nullatenus necesse erit ad aliorum consilia confugere, sed è contrario nihil magis securum erit, quàm ad propriam hoc in negotio conscientiam unicè attendere.

*Fundamentum, sublati difficultatibus, acquiritur totius nostræ felicitati; & quomodo hinc posuerim esse certum, quòd hac via omnibus aliis, quas respici, melior sit, ostenditur.*

Firmum itaque ac stabile constitui hisce fundamentum hoc, seu certam quandam & indubitatam notitiā, cui totam meam felicitatem, quatenus ea lumine naturali potest acquiri, inædificavi. Cum enim per me ipsum magis, quàm per quemvis alium certior fierem, num me quædam benè afficerent, an secus; id mihi clarè ostendebat, quid factu mihi difficile, quidve facile esset: prius enim me malè, posterius verò benè afficiebat. Ex quo non minus indubitato per idem fundamentum scire licuit, (nisi contra propriam conscientiam agere voluerim,) quidnam inter plura facilia & bona, uti modò ostensum, facilius & melius fuerim expertus; nec proinde me latere potuit, quod exhinc necessario sequitur, quænam ex diversis viis, quas omnes ingressus eram, melior fuerit, ea nimirum, quæ optimè omnium me affecerat. Id quod etiam speciatim magis ita mihi cognoscere licuit. Nihil magis adversum novi vitæ feliciter producendæ, quàm passiones animi: siquidem hæ quorundam potentiam seu virtutem, etiam singularem, adeò quandoque superant, ut meritò conqueri cogantur:

*Video*

*Videō meliora proboque,*

*Deteriora sequor.*

Porro nihil nostræ felicitati augendæ huc usque magis necessarium agnoscere potui, quàm ignotas posse detegere veritates, & ex iis, quæ ad istum scopum quàm maximè conducunt, seligere. Bona enim omnia, quæ jam possidemus, nobis aliquando snere incognita; ac proinde his solis gratia debetur, qui eadem in nostri utilitatem primi detexerunt. Nec quicquam ad felicitatem nostram quoque conservandam salutaris scio, quàm sano corpore & anxiiis sine curis posse degere. Hæc namque cunctorum aliorum bonorum bases sunt. Cùm verò hæc omnia, convincente me conscientia, huic viæ, quam elegeram, præcipuè convenirent, quia eandem calcans passionibus meas facilius superare, expeditius ignotas veritates detegere, eaque, quæ quàm maximè à fortunâ pendere videbantur (uti bona valetudo, securitas ab inimicis, æmulis, & id genus aliis) magis in meam potestatem redigere poteram; hæc, inquam, cùm conscientia convictus observarem, me facilius hac, quam ingressus eram, viâ posse exsequi, quàm ullâ aliâ mihi notâ; nullatenus perspiciebam, quâ de causâ mihi dubitandum esset, me earum, quas noveram, præstantissimum iniisse.

Neque ullus hic timendus est error, si modò non credamus, quæ nobis sic apparent, aliis quoque necessario ita apparere: nam quod mihi facile, id alii forsitan poterit esse difficillimum, quod mihi jucundum, id alii molestum, quod mihi bonum, id alii fortè malum videri poterit. Hinc est, quòd homines alterius naturam cum suâ confundentes sæpe mirentur, aliis placere, quæ sibi displicent, quodque eo errore ita obcæcentur, ut potius credant, res ejusmodi aliis reipsâ non esse oblectamento; sed ex certo saltem & singulari animi statu aut pertinaciâ, quam forte habeant ad propriam sententiam, quam semel amplexi fuerunt, defendendam, eos id tantum falsò fingere. Quæ quàm falsa sint, haud

*Quâ ratione  
hoc fundamen-  
to utendum  
sit, ut nun-  
quam decipia-  
mur.  
Prima cuncta.*

haud difficulter perciperent, si animadvertenterent, neminem certè ad ea, quæ sibi molesta sunt, nisi coactum accedere, adeoque ea nequaquam sectaturum fuisse, ni benè ab illis afficeretur.

*Secunda cau-  
sela.*

Caterùm ab errore quoque tuti erimus, si caverimus, ne, percepta cum nondum perceptis confundentes, quicquam his tribuamus, quod illis tantùm erat attribuendum: quale quid tunc fieret, si rem, quam omnibus aliis rebus hætenus perceptis faciliorem, meliorem, suaviorem &c. observavimus, mox etiam judicarem us absolutè omnium, atque adeò necdum perceptorum esse facillimam, optimam &c. Id quod cum de omnibus nondum perceperimus, nullà ratione de omnibus affirmare nobis licebit. Et hoc ipsum est, quod multos hoc pacto lapsos impedit, ne eà, quæ par est, attentione attenderent ad ea, quæ alii, se de similibus detexisse, tradunt. Cum enim supponant, se optimam viam jam acquisivisse, & eo ipso impossibile esse quicquam meliorem adinvenire, haud opus esse judicant, aliorum circa hæc inventa, ita ut requiritur, considerare; atque ita sibi viam ad majorem ulterioremque perfectionem præcludunt.

*Quomodo ipse  
credam me i-  
stiusmodi er-  
rores optime  
evitare.*

Ne quis ergo credat, memere ea, quæ in aliis improbo, hic committere, hoc est, viam, quæ mihi fortè soli convenit, aliis obtrudere, evincam in sequentibus, hanc viam, quæ ad summam nostram in hac vitâ felicitatem obtinendam tendit, communiter etiam aliis convenire, idque experientiis semper clarissimis firmabo. Hac enim ratione non minùs ero certus, alios hisce de rebus easdem mecum habere perceptiones, ac si quædam aliorum gustui admodum convenire judicarem, dum eos sese ab iisdem, magno licèt & sæpe suo damno, vix abstinere potuisse vidi. Hic tamen sanctissimè testor, nemini me succensere, etsi credam me fortè optimam non præscripturum (hoc enim aliorum indagatoni relinquendum) neque me hoc ipsum quidem,

ut

ut viam meam omnes parent optimam, efflagitare posse, utpote qui ipsemet omnes, quas hic excogitare licet, vias non fuerim expertus. Interim tamen earum optimam, quam ipsemet expertus fui, hic aperire non negligam, ubi monuero, me, dum aliis optima dare studeo consilia, hac eum in finem non conscribere, quasi aliis sapientior videri velim: nam omnia, quæ hic tradam, clarissima, ac proinde intellectu adeò erunt facilia, ut à quovis me etiam rudior potuissent observari. Si, exempli gratiâ, in quendam locum inter infinita avia unica tantum ducat via, difficulter cavetur, ne à rectâ aberretur: facilè interea accidere poterit, ut, si multi eandem prosequantur, eorum unus, fortunâ sic volente, semper in genuinâ persistat, atque ita destinatum attingat locum, licet excellentius propterea non obtineat ingenium. Verùm hoc remoto scrupulo pergo demonstrare, quâ ratione, jacto inconcussæ veritatis fundamento, plura hinc, & eâdem certitudine derivaverim.

Cùm itaque harum rerum certitudinem perpendens; ad proprias perceptiones attenderem, &, quænam me bene aut malè afficerent, observarem, atque sic inciperem in omnes delectationes, quarum capax sum, inquirere, ut ex iis summas, & constantissimas secernerem, in limine mihi sese obtulerunt sensuales delectationes.

*Fundamenti  
hujus vero usufic ostenso, ut  
eo abnti sit impossibile, omnia  
hinc derivare,  
pergo & observo.*

Hæ quidem vitam perquam jucundam nobis reddunt: nec hic dubitandum, numne alii idem sentiant. Vultus enim iis adeò captum & occupatum videtur, ut ad alias solidiores delectationes vix respiciat; ac proinde haud mirum, si eas summas, quæ hac in vitâ occurrunt, judicet. Sed adhuc magis hic decipiuntur, qui, cùm in principio rei alicujus delectationem incipiunt sentire, existimant, quò magis eâ fruuntur, eò plus delectationis se percepturos; cùm tamen harum delectationum natura planè eorum opinioni adversetur: quò enim rarius iis fruimur,

*I. Sensuales delectationes, h. e. quæ solum corpus concernunt; ubi proponuntur*

*Veritas hujus rei, &*



*Errores, qui hic  
committuntur.*

eò magis nos afficiunt. Hoc autem patet exemplo cibi ac potùs, qui summopere nos afficiunt, ubi valde esurimus & sitimus; sed nauseam in nobis excitant, ubi satiati cogimur eos contra appetitum sumere. Sic comœdia, licet elegantissima, sat magnum tamen tædium afferret, ni in certos divideretur actûs, aut si sæpius eadem spectaretur. Hinc etiam fit, ut, qui splendidissima inhabitant palatia, aut hortos cultissimos possident, tantopere iis non afficiantur (ob usum eorum continuum) quàm quidem alii, qui tantum spectandi gratiâ eò tendunt, præsertim si vel raro vel nunquam talia viderint. Narrationes historicæ, quas Galli *Romans* appellant, multos admodum delectant semel tantum perlectæ, vel longo post tempore relectæ; Nonnulli hunc errorem quidem tacitè in se ipsis animadvertunt, sed utuntur varietate ac novis semper delectationibus, sicque huic incommodo sese obviam ire & id emendare credunt, verùm quia tamen impossibile est, res suas cunctas ita ad arbitrium ordinare, ut unius delectationis pertæsi cum quavis aliâ eam statim pro lubitu permutare, queant, (est enim ea rerum humanarum conditio, ut sese delectationibus nostris varia, & sæpe satis acerba misceant;) nunquam vel ideo optatum finem hi assequuntur. Mirum fortè videbitur, si dixerò, eas nos non solum multò magis afficere, si eis rariùs fruamur, sed etiam quàm maximè, si iisdem potiùs resistamus. Id quod vulgo planè ignotum fuisset, (quippe quod potiùs credit, quòd delectationes eò magis nos afficiant & lætitiâ pariant, quòd eisdem magis indulgemus, & plus tristitiæ afferant, quòd eis magis resistimus) nisi cogeretur, iis quandoque resistere. Nam vel idcirco nos cibus ac potus magis afficiunt, si appetitui nostro statim non fiat satis, sed si ad excessum usque eidem repugnemus. Propterea qui sensualibus delectationibus rarò fruitur, (iis præcipuè, quæ nos omnium maximè afficiunt) & si, dum eis uti statuit, nihil eorum,

*Quomodo in  
utendum, ut  
nos quàm ma-  
ximè afficiant.*

per



per quæ appetitus maximas acquirit vires, intermiserit, obiecta etiam, quæ ipsum alliciunt, sensibus objiciendo; suis interim inclinationibus ita repugnârit, ut corpori eas non indulserit, nisi quando per pugnam auctæ ad magnum excessum pervenere; nâ is in ipsis sensualibus tantas experitur suavitates, quantas pauci homines experti sunt.

Ubi verò perceptionibus nostris ita indulgemus, & corpori omnia illa, quæ illud benè afficiunt, largimur; sæpe fit, ut, quod nos quàm maximè delectat, nobis interim maximè noxium sit: non aliter ac bestiis, deliciis ciborum deceptis & captis, accidit. Hoc autem, quia, quàm primum advertimus, nobis tristitiam parit, conamur tanquam incommodum aliquod nos malè afficiens, quantum in nobis est, declinare. Et ô felices nos, si, quæ tristitiam gignunt seu dolorem, semper nobis noxia, & contrà, quæ lætitiâ seu voluptatem pariunt, nobis semper utilia forent! hoc dato sanè ad malum tam proclives haud essemus, quàm jam sumus; nec dubitandum, quin tunc, quæ nobis bona & innoxia sunt, proprio naturæ motu eligere-mus. Hinc ego, cum in delectationes summas & perpetuò duraturas sedulò inquirerem, illas verò econtrà, quæ post rem patratam tristitiæ causa sunt, vitare conarer; observavi, maximam in nobis excitari lætitiâ, si rei alicui, quæ quidem nos summopere delectat, sed nobis interim, quantum damni secum ferat, ratione aut experienciâ constât, obfirmato animo resistamus, inclinationesque, quæ nos in contrarium perducere conantur, superemus.

Est autem delectatio hæc multò major delectationibus sensualibus; quod facilè exemplis probari potest eorum, qui mundo & sensualibus delectationibus maximam partem valedixerunt, ac vitam austeram ordinariisque hominum cupiditatibus contrariam agunt. Hi enim dulcedinem delectationesque internas, quas in se ipsis experiuntur, nobis explicare & satis extollere nequeunt, uti eo-

*II. Transcur ad delectationes, quæ ex actionibus bonis seu virtutibus, h. e. ex consuetudine mentis & corporis oriuntur, ubi ostenditur*

*Veritas hujus rei, quod nos non solum bene, sed & melius afficiant, quàm sensuales.*

*Erroris, qui  
hic commit-  
tuntur.*

rum scripta abunde testantur. Idem verò adhuc efficacius per eos probatur, qui quævis suppliciorum genera passi, etiam in mediis flammis plena delectationis indicia exhibuere; idque non falsò: fictioni enim hic non datur locus. Verùm enimverò hic permagni errores possunt committi, nempe si ratio nostra non satis in veritate instituta sit. Homines namque sumus, hoc est, infinitis obnoxii erroribus, qui efficiunt, ut sæpe credamus, aliquid esse bonum, quod tamen maximum nobis damnum parit. Licet verò non negaverim, si absolutè superemus inclinationes, quæ nos ad ea, quæ mala judicamus, perpetranda seducere conantur, eam victoriam magnam subsequi delectationem: ejusmodi tamen interim delectatio seu animi tranquillitas, quanta quantà sit, neutiquam est indubitatum signum, actiones nostras ideo bonas esse. Nec enim minus lætitiæ experiemur, si posito hoc, qui priori contrarius est, casu, falsissimas perceptiones, sub specie tamen veritatis nobis apparentes, secuti superemus contrarias hisce inclinationes, quæ quidem in se optimæ, nobis verò pessimæ videntur. Satis multa quoque in historiis occurrunt exempla eorum, qui æque constanter, & summâ animi tranquillitate maximos suppliciorum cruciatûs ferre non dubitaverunt pro pessimâ licet causâ; si verò successu temporis major intellectui affluerit lux, & hinc apparuerit eorum, quæ ante credideramus vera esse, falsitas, damnumque, cujus nosmet ipsos auctores judicamus ac inculpamus, non potest non acerbis inde subsequi dolor.

*Quæ ratione  
efficiendum, ut  
mas. ejusmodi  
delectationes  
nunquam de-  
cipiant.*

Ut itaque tale quid præcaverem, nec ulla nisi utilia, hoc est, ea, quæ esse meum conservant, seu conservationi meæ conducunt, amplecterer, & contrà, quæ mihi nocent, hoc est, quæ esse meum destruunt, seu conservationi meæ obsunt, declinarem, ac sic efficerem, ut felicitas mea esset durabilis, & absque continuâ interruptione, quantum fieri potest, conservaretur; ingenium meum excolere de-  
crevi,

crevi, quantum humanitus fieri potest, quò verè utilia ab iis, quæ talia duntaxat videntur, certò dignoscerem.

Dum hac in re totus essem, expertus sum summam & purissimam delectationem omnium, quæ modo naturali in homines in hac vita videntur posse cadere, eam nimium, quæ ex acquisitione veritatis oritur, & cui æquiparandam nunquam sensi aliam. Hoc autem facilè concedent ii, qui multarum veritatum magni momenti notitiam adepti sunt; inprimis verò illi, qui eò usque progressi sunt, ut eam proprio Marte sibi acquirere queant: hi enim sine dubio reipsâ experti sunt, quantam hoc sibi delectationem pepererit, si nova inventa vel theoremata, quæ singulares veritates includunt, & admodum utilia sunt, per seipsos detexerint. Et hæc delectatio tanta est, ut, cum plures, qui alios à nimio sensualium delectationum usu abducere conantur, id successu parum felici præstent, quibuscunque etiam coloratis persuasionibus utantur; hi econtrà, delectationibus hisce, quæ ex veritatis acquisitione percipiuntur, degustatis, facillimè summas vulgi voluptates pro nihilo reputarint, nec rarò omnium externorum, quasi oblici vixerint, ac cibo potuque, somno, & cæteris, quæ inprimis homines voluptatum nomine insigniunt, facilè abstinerint, quò liberius veritatis inquisitioni vacare possent. Quinimò fuere, qui cum essent eo in statu, & ejusmodi ornati dotibus, ut comparare sibi non difficulter potuissent honores, divitias ac delicias hujus mundi (licet hujusmodi res omnium ferè hominum præcipua quasi idola sint;) non dubitârunt tamen iis planè nuncium remittere, eò quod præviderent, hæc fortè futura esse impedimento, quò minus in acquisitione veritatis, uti inceperant, possent progredi. Nec mirum; qui enim majores delectationes reipsâ gustavit, minores facilè relinquit.

Nequit autem hic fieri, ut unquam decipiamur, licet hoc admodum facilè fiat in cæteris delectationibus: id quod

*III. Delectationes, quæ ex acquisitione veritatis oriuntur; quæ solum mentem respiciunt: ubi ascenditur,*

*Eo omnium maximè nos afficere.*

*Has delectationes esse constantissimas, ac proinde nunquam*

*nos decipere, seu in tristitiam, uti priores, converti; sibi risatem nobis acquiramus ob solam delectationem, quam illa nobis præstat: & quinam errores ab aliis, eò quòd hoc non observant, committantur.*

levi negotio constabit, si attendamus, ex veris non nisi vera sequi, ac proinde omnibus, quæ ex iis fluunt, necessariam quoque & indubitatam veritatem inesse. Nec deinde hic verendum est, fore, ut sententiam hujusmodi fundamentis semel stabilitam ob certas fortè rationes mutare cogamur, aut ut censor aliquis futuris seculis inventa nostra falsitatis arguat, & demonstratis erroribus nostris, ex hominum memoriâ ea deleat. Verum namque falsum fieri nunquam potest: quod Mathematici inprimis experientiâ addidicere. Dummodo enim hoc solum observatum fuerit, ut cuncta non ex probabilibus, sed tantum ex iis, quæ cuivis manifesta, & in quæ ne minima quidem falsitatis suspicio cadere potest, deducantur, aliter fieri nequit, quin hodieque extent Theoremata, quæ ante duo annorum millia sunt inventa, eaque talia, ut, licet primo intuitu prorsus incredibilia videantur, adeò tamen certa sint, ut, ad hoc usque tempus à nullo potuerint convelli, aut unquam metuendum sit, ut ab aliquo, quamvis ingeniosissimo, falsa esse demonstrantur. Nec mirum: sola enim veritas immutabilis est, quæ proinde sola sui amatores bonis, quæ nunquam pereunt, aut mutantur, beare potest; adeoque hæc sola quoque nobis potest adferre delectationes, quæ unicè solidæ sunt, seu quæ in tristitiam nunquam convertuntur. Si autem hic omnem prorsus errorem vitare cupimus, in primis necessum erit, ut, quod maximè notandum, nullum alium in finem, quàm ob meream delectationem, quæ ab eâ profluit, veritatem acquirere studeamus; ideoque gloriæ cupiditas summopere hic fugienda est, nec ulla laus propterea apud homines nostri ævi aut posteros aucupanda. Etenim quicumque ejusmodi cupidine capiuntur, næ ingentes sibi animi perturbationes atque anxietates conciliant. Veritates enim detectæ, quoniam ab initio sæpe non tam utiles apparent, quàm reverà aliis rebus applicatæ postmodum cognoscuntur, dediti



diti illi vanæ gloriæ subitò tristitiâ anguntur, si suorum inventorum non statim appareat insignis utilitas, quia vident, se propterea eos, quos sectantur, honores consequuturos apud alios non esse. Inprimis autem supra modum anguntur, si in disquisitionibus suis in ejusmodi incidant inventa, quæ licet sint utilissima, interim tamen ab aliis jam dudum fuerunt in lucem edita; atque ita perspicunt, gloriam, quam impense sectantur, sibi ab aliis esse præreptam. Si porro observaverint, alios ad similia studia, quæ ipsi tractant, feliciter promovenda idoneos esse, eosque nactos occasionem, ea ex voto prosequendi, summo opere timent, ne ab illis sibi gloria præripiatur, & eâ de causâ, quantum possunt, (clanculum tamen, ne insatiabilis gloriæ cupiditas, aliis animadversâ, in turpem ignominia pudorem desinat) iisdem adversantur. Denique si egregia ingenii aliorum specimina viderint, ac audiverint, ejus authorem eorum summis extolli encomiis, mallent ea non audire, atque invidia exesi orationem aliò deflectentes ægerrimè ferunt, se solos suo Marte ista non aperuisse. Econtra verò, qui veritatem solius delectationis, quam præbet, gratiâ detegere studet, ex omnibus hisce circumstantiis sibi voluptatem quærit. Hic, siquidem uti ob innumeras rationes, ita præprimis propter has, gloriam parvi facit, tum quòd, cum ipse sit solius veritatis amans, melius se ipsum, quàm quisquam alius, noscere, & quanti sint dotes suæ faciendæ, scire queat, ac proinde existimationem, quam apud alios obtinet, semper aut justo majorem, aut justo minorem esse videat; tum, quòd nullo non tempore & multis fautores & multos invidos præter institutum sibi conciliet, qui utrique ipsi multum temporis eripere valent, atque ita efficere, ut eò minùs illà fruatur delectatione, quam ex veritatis acquisitione percipit. Quantum ad inventorum utilitatem attinet, licet ea non statim appareat, delectatio tamen, quâ afficitur, ipsi sufficit. Ad hæc



hæc nihil novit utilis esse hæc dote, quâ semper nova detegit: hæc enim ratione aptior evadit ad utilissima quæque producenda. Nec opinandum est, eos, qui hominibus utilissima aperuerunt, statim ab initio in tam utilia incidisse, sed, tentatis primò multis inutilibus. Licet quoque inventa sua cum aliorum cogitatis congruant, multum tamen delectationis ex eo capit, se tantum scientiæ nactum esse, ut etiam valeat ea detegere, quæ à magnis viris summâ cum laude publicæ luci jam pridem exposita fuerunt. Quoniam verò infinita detegenda supersunt, neque solus iis omnibus ex tenebris eruendis par est, meritò letatur, alios etiam ignotarum veritatum indagacioni aptos inveniri: ita enim absque ullo labore suo multo in animo possunt excitari delectationes ob tot nova & curiosa, quæ ab aliis inveniri queunt. Et proinde si sui esse officii unquam crediderit, aliis inservire, hoc præcipuè tum sibi incumbere judicabit, cum occasio similium rerum inventoribus grata officia præstandi sese obtulerit: quandoquidem sic aliis inserviens sibi ipsi inserviet: perinde ut omnes, si non nisi ductu rationis veritatem ambirent, nec quicquam aliud agerent, quàm ut sibi ipsis hac in re prodesse conarentur, nec aliud nisi sibi ipsis pro viribus prodesse cogitarent, ex ipso etiam aliis necessario & quàm optimè inservirent, hoc est, & sibi, & aliis prodesse eodem rediret, nec alterum absque altero existeret. Ita omnes verè generosi essent; cum è contrariò, si solum, quod è re nostrâ esse videtur, ductu affectuum quæramus, atque hinc mundi gloriam, aut ejusmodi alia, præter solam veritatem, sectemur, necessario aliis adversemur. Denique solius veritatis cultor aliis nova inventa in lucem publicam edita nullatenus invidet, hinc siquidem voluptates aliquas percipit, quibus aliàs caruisset, quæque ad difficiliora detegenda, & propterea ad majores sibi creandas voluptates adjumento esse possunt. Misce verò omnibus, quæ modò dixi, bene pensis,

*Quam notabilis sit differentia inter sapi-*

pensis, non poterit urique dubitari, quòd sapiens infinito  
 intervallo ignaris sit beator. Quòd etenim hi nunquam  
 solidam animi tranquillitatem sibi acquirant, ejus genuina  
 hæc est causa: partim quòd ferè semper unicè ad id atten-  
 dant, quod ipsis deest, cùmque hoc magni æstiment, (li-  
 cèt sapissime non nisi ad mutabilia bona spectet) ac, in  
 quocunque statu vivant, necesariò contingat, ut ipsis sem-  
 per aliquid desit, frequentissima etiam tristandi datur oc-  
 casio: partim quòd nunquam aut rarò ad id, quod ipsis ad-  
 est, seu, quod reverà possident, sat bene respiciant. Et  
 quia quoque, quanti hæc sint æstimanda, ignorant; læticia,  
 quam eam ob rem animo concipiunt, aut non nisi puerilis,  
 aut stulta est. Adeoque utrobique, tam cùm bonis carent,  
 quàm cùm ea possident, nunquam animo perfectè hilari  
 fruuntur. Econtrà sapiens non attendit, sibi aliquid dees-  
 se; scit enim, hoc perquam necessarium esse in ente finito,  
 in quocunque etiam statu vel gradu perfectionis existat;  
 multò minùs propterea tristatur, cùm bene ipsi perspectum  
 sit, hoc ipsum idem esse, ac si tristaretur, tres angulos in tri-  
 angulo æquari duobus, & non potiùs tribus rectis. Sed præ-  
 sentissimæ ejus cogitationes sunt circa bona, quæ possidet,  
 ac quanti ea sint facienda. Quæ consideratio nonnisi soli-  
 dam læticiam in mente ejus potest excitare. In hac enim  
 dum versatur, observat

*entem & igna-  
 rantem, seu,  
 qua bona ex  
 acquisitione ve-  
 ritatis ad nos  
 redundant; hæc  
 ad tria genera  
 reducuntur:  
 quatenus nimi-  
 rum sapiens  
 habes*

Primò, quòd sapiens animi multò liberioris sit, seu  
 infinitis gradibus majorem præ ignorantibus potentiam ha-  
 beat, tum propter majorem noticiam, tum propter infi-  
 nita impedimenta sive præjudicià, à quibus proin sapiens  
 liber est, & quæ alios ita detinent, ut propterea in cogni-  
 tione veritatis minùs progredi, nec quàm plurima, etiam si  
 vel maximè conentur, effectum dare possint: Cùm hic e-  
 contrà infinita incognita possit detegere, quæ alii potius  
 mirari quàm imitari queunt. Adde, quòd permulta si-  
 possit dirigere experimenta, ut plerumque magnam adfe-

*Majorem po-  
 tentiam, &*

rant utilitatem, cùm alii quàm plurima tentent, quæ nullius sunt usus cum temporis & expensarum dispendio, nisi illis contingat, quod gallo gallinaceo apud Æsopum, ut margaritam inveniant, quam tamen, quanti sit, æstimare nesciunt. Sapiens quoque multò facilius suas superabit passiones, & animum quietiorem conservabit, quoniam, passiones semper ex falso supposito oriuntur; quòd cùm ab ipso bene detegatur, nec ille falsis acquiescat, eò facilius eas superabit, quò majores progressus in acquisitione veritatis fecit: cùm ex adverso alii ob mera falsa supposita seu præjudicia in maxima vitæ pericula & infortunia suâ culpâ sapissime sese conjiciant. Licet verò alii quoque, suas cogantur suppressere passiones: via tamen, quâ hoc ab illis obtinetur, admodum est operosa, &, quòd pessimum, semper incerta. Iis enim remediis, quibus pœnæ metus, aut spes præmii sæpe inculcatur, vera passionum origo minimè tollitur. Magno igitur labore, eoque frequentius repetito, opus est ad easdem tam obliquâ viâ sistendas. Quia autem ipse earum fons & scaturigo, unde novæ continuo derivantur, sicut dixi, nullatenus obstruitur, quid mirum, si hi, datâ occasione à novo passionum torrente rursus abripiantur atque penitus obruantur? Econtrariò sapientis ad passiones sedandas via multò est præstantior: partim quia faciliior; (dum enim genuinam passionum originem novit, hanc tollendo multò facilius eas coërcet,) partim quia constantior; radice namque earum genuinâ sæpe quasi extirpatâ & evulsâ, non tantopere timendum, eas datâ occasione tam levi de causâ excitatum iri. Ultimò sapiens quoque ob majorem veritatis cognitionem multò facilius efficiet, ut saniori corpore, imò tranquillius vitam transigat, quàm alii, qui actionibus suis circa similia clarissimè demonstrant, non majus dari supplicium stultorum ipsâ stultitiâ; prout econtrâ priores reipsâ cognoscunt, majus sapientibus solatium dari non posse ipsâ sapientiâ.

Secun-

Secundò animadvertet, quòd sapiens minus habeat *Minorè vi-*  
tristitiæ, hoc est, infinitis desideriiis, curis & anxietatibus *silitiam,*  
solutus sit, quas alii ob solam ignorantiam, & præjudicia,  
quibus eorum mens occupata & obsessa est, tam de præte-  
ritis & præsentibus, quàm futuris sibi formant. Quæ enim  
hominum mentes præcipuè ultra modum turbant & in-  
quietas reddunt, plerumque non nisi mala purè imagina-  
ria sunt. Sic multa, per noctem pro terrore habita, dies  
vertit in risum. Cui igitur mentem à tam vanarum solli-  
citudinum pœnis liberasse datum est, quique hæc attente  
meditando cum aliis, quæ in communi vitâ vulgò occur-  
runt, confert, huic tantæ felicitatis præstantia (seu quanti  
sit, sibi talia acquisivisse) ignota amplius esse non potest.  
Hujus cogitata procul dubio non absimilia erunt illi Lu-  
cretii dicto, idem sic exprimentis, sub libri secundi ini-  
tium:

*Suave, mari magno turbantibus æquora ventis,*

*E terrâ magnum alterius spectare laborem.*

*Non quia vexari quemquam est jucunda voluptas,*

*Sed, quibus ipse malis careas, quia cernere suave est.*


Et quæ plura ibi præclara ulterius sequuntur.

Tertiò perspiciet, quòd sapiens plus lætitiæ habeat, *Ac majorem*  
hoc est, potestatem, innumeras delectationes, quæ aliis *lætitiâ.*  
incognitæ manent, in animo suo (si vel maximè solitariam  
vitam cogatur degere,) excitandi, quibusque animus, con-  
trà quàm fieri in sensualibus solet, nunquam potest exsa-  
tiari, sed quòd plures majorisque momenti veritates ipsi  
sunt cognitæ, eò plus delectationis percipit, idque omni  
tempore, quotiescunque quàm certum, & quanti momen-  
ti sit, talia scire, aut sibi acquisivisse, & quàm pauci sint,  
quibus eò usque pervenire concessum est, seriò secum ex-  
pendit. Cæterum hîc quoque opus non habet, ut incli-  
nationibus suis tantopere resistat, (quod aliàs in praxi com-  
muni circa actiones bonas seu virtuosas ob tot animi pas-



siones, quæ sanæ rationi adversantur, perquam difficile, est) quin imo non magis, quàm par est, tam nobili inclinationi, quæ ipsum incitat ad studium veritatis, poterit indulgere, quoniam omnia, quæ in bonum tendunt, quo vehementiora, eò meliora, delectationesque hinc exortæ tam solidæ sunt, ut nullus in iis excessus metuendus, nulla interturbans tristitia timenda, nullumque earum tædium expectandum sit. Quia verò nec melior, nec ex virtute magis fluens actio à nobis potest fieri, quàm si toti in indagandâ veritate occupemur, tam illustrem actionem jucundissimæ ac omnium suavissimæ delectationes nequeunt non subsequi; cum ex eâ cognoscamus tanti momenti veritates, quæ actionibus nostris, in tenebris hujus vitæ absque lapsu dirigendis, instar splendidissimæ facis prælucent, inò sine quarum cognitione aliorum actiones tunc, cum maximè credunt, eas se optimè instituisse, sapientibus, quasi in densissimis tenebris oberrantium aut ebriosorum titubationes videantur. Tandem ratio bene exculta efficit, ut etiam sensuales delectationes, & quæ, dum virtutum opera exercemus, oriuntur, magis nos afficiant, ac vulgò fieri solet, & nunquam in tristitiam (ut vulgò sapissime accidit,) commutentur, atque etiam animum omni ex parte tranquillum nobis (quod vulgò nunquam contingit,) reddant. Hæc siquidem mens bene exculta genuinam nobis exhibet normam, quâ ratione omnibus delectationibus (hoc est non solum illis, quæ sensuales sunt aut ex virtutis praxi, sed & his, quæ ex ipsâ veritatis cognitione oriuntur,) ita sit utendum, ut nobis nunquam noceant: eatenus nempe tantum utendum, quatenus nobis eas prodesse comperimus ad nos aptiores reddendos in detegendâ incognitarum rerum veritate, sed iis abstinendum, quatenus culturæ ingenii obsunt. Quæ omnia bene perpenſa nos certos reddunt, ex solâ veritatis cognitione talem virtutem, quæ suò meritò virtutis titulum meretur,






retur, originem ducere, & ex eâ denique perfectam animi tranquillitatem, vulgò nimis ignotam, necessariò oriri, seu, hæc tria, sapientiam, virtutem ac animi tranquillitatem perfectè in nullo homine, nisi conjunctim, existere; & in his tribus, ita conjunctis, summum hominis bonum, quod in hac vitâ viâ naturali possideri potest, solum consistere. Si itaque omnia hæc jam in medium allata justâ animi attentione examino, non video, quicquam posse excogitari, quod omnibus majus calcar addat solidis illis bonis sibi comparandis, & quorum acquisitio quasi à nobis ipsis dependeat, quæve via facilior, & expeditior sit his impetrandis, quàm illa, quæ ad omnium tristitiam nobis afferentium declinationem, & delectationum cum tantâ utilitate conjunctarum acquisitionem nos perducit.

Ex hisce omnibus jam satis superque constare credo, quâ occasione & methodo præcipua delectationum genera observaverim, earum abusum notaverim, & legitimum usum determinaverim; adeò ut sanè haud difficulter & absque errore hinc potuerim judicare, quæ me omnium maximâ & constantissimâ latitiâ affecerint, quodque per consequens, *præstantissima via, quam in hac vitâ inire licet, sit veritatis per nos ipsos inventio.*

*Conclusio partis primæ.*

# MEDICINA M E N T I S,



Sive

TENTAMEN GENUINÆ LOGICÆ,

ubi differitur

De

METHODO DETEGENDI INCOGNITAS  
V E R I T A T E S.

## PARS SECUNDA.

Artis inveniendi generalia præcepta.

*His adjuti, fieri non poterit, ut unquam in falsa incidamus, sed potius veritatem semper certò assequamur; adeò ut hisce mediis absque ullo errore ulteriùs progredi possimus, continuò, & quantum nobis libuerit, semper nova detegendo, si modò adsit animus, & satis temporis nobis supersit ad nosmet ipsos ad id studium applicandos, idque exiguo labore.*

*I. Præcognita  
quædam; &  
quidem,*



Mnibus jam accuratè perpensis, planè quidem persuasus eram, nihil dari præstantius ad vitam beatissimè traducendam acquisitione veritatis: verùm quia hanc rem nosse tantum nondum sufficit, sed nostrà etiam plurimum interest, ut ipsam hanc veritatem acquirendi possideamus scientiam, cujus ope id certò præstare possimus: quibuscunque tum temporis hujus mundi deliciis, mihi impedi-  
mento

mento futuris, posthabitis, omni studio (fidem ferè superat) in id incubui, ut ejusmodi scientiam, quàm median-  
te omnis generis veritas certò acquiri posset, & ut verbo  
dicam, ipsam inveniendi artem mihi compararem. Hanc  
ut possiderem, mirum in modum incitabar, penitiùs con-  
siderando, quanta homini accederet perfectio ex tantibo-  
ni possessione. Hac etenim scientià, quandoquidem ea  
se ad omnia, quæ mens humana scire potest, extendit,  
nulla universalior dari potest. Exhinc hominum inven-  
ta, quanta & qualiacunque sint, seu omnes aliæ scientiæ or-  
tum duxere. Unde reverà via regia seu ars universalis ad  
omnes scientias & artes nulla alia (quicquid aliud præten-  
dant alii) datur, quàm hæc ipsa ars inveniendi. Quem-  
admodum verò omnes hæc scientiæ, cum circa singularia  
objecta versantur, nos tantum aptos reddere queunt in  
certis quibusdam perficiendis: ita hæc è contrario efficit,  
ut in omnibus excellamus, seu æque apti ad omnia evada-  
mus. Imò propterea omnes aliæ scientiæ non tam pro-  
pter se, quàm quia ad hanc quicquam conferunt, sunt æ-  
stimandæ. Cæterum dum semper novas novasque dete-  
gimus veritates, eò usque hâc ratione progredimur, ut  
tandem habitum acquiramus, immutabilia bona, & quæ  
æterna haut falsò dicimus, nobis certò comparandi. Quid  
enim veritate immutabilius, quid antiquius? Hinc autem,  
cum omne id, quod verum esse demonstratione evincitur,  
Deo etiam, qui tamen cuncta & unico quidem intuitu per-  
spicit, ab æterno fuerit notum, colligo, nos ope ejusmo-  
di scientiæ cum Deo, utpote à quo solo omnis veritas,  
tanquam ab ipso veritatis fonte, originem unicè ducit,  
quasi colloqui, ac proinde nobis, etiam hoc naturali mo-  
do, concedi certà quâdam ratione mentem divinam co-  
gnoscere. Quinimò si scientiam hanc pro dignitate suâ  
æstimare liceat, longè adhuc ulteriùs ope ejusdem progre-  
dimur. Ea namque nostram naturam quasi in supra-hu-  
manam

a. De præ-  
stantiâ ejus-  
dem artis in-  
veniendi.

manam transmutat, quin in talem, quæ haud parum de divinâ naturâ participare videtur. Quâ enim quæso ratione poterimus ipsi Deo magis magisque similes evadere, quàm eâ, quâ nostra natura eò perfectionis evehitur, ut planè sit arbitrii nostri, quandocunque & quomodocunque nobis placuerit, non tentando, non laboriosè & hinc & inde vagando, sed cerrâ ac constanti methodo, alia aliaque ignota absque errore semper detegere? Poteritne præstantior in homine potentia, insignior voluntas, aut sublimior intellectus concipi? Quî, quæso, melius exemplar divinitatis exhibere naturaliter aut exprimere possemus, cum hac ipsâ ratione in nobis tanquam in imagine potentia DEI unicè juxta leges æternæ sapientiæ omnia ad commune omnium bonum dirigens eluceat? Quâ re attentè consideratâ nil planè video, quod naturam humanam ope luminis naturalis ad majorem evehere queat perfectionem; ac proinde hic utique ultimus perfectionis gradus est, ad quam intellectus adminiculo non solum nobis, sed & quibuscunque aliis hujus universi creaturis, si ex mente aliorum tales fortè darentur, eæque longo alioquin intervallo nos intellectu superarent, pertingere datum. Nihil enim præstantius potest concipi, quàm Deo, enti perfectissimo, ita veritatis auxilio uniri. Quemadmodum verò sapientis mens DEO, divinisque seu immutabilibus rebus, magis magisque semper in hac viâ unitur: ita & mentis ejusdem tranquillitas exinde constantior usque evadit; cum contrâ mens ignorantis, seu homo saltem naturalis (de quo statim plura) non nisi cum corpore suo, terrenisque seu mutabilibus rebus magis magisque semper conjungatur, atque adeò ab externis hisce mirum quantum agitetur & tûrberetur. Quodsi autem maximum hujusmodi dulcissimumque fructum conciliet tibi scientia hæc, quantas delicias tibi allaturam eam esse existimas, cum non solum hac mediante omne id, quod ab Antecessoribus



foribus ingeniosè excogitatum, quodque non semel admiratus es, ac fortè credidisti, ipsos ad illud inveniendum ingenium plusquàm humanum possedisse, per te ipsum perfacilè inveniri posse ipsà experiencià cognoveris, sed etiam quotidie nova & nemini adhuc cognita semper menti tuæ ejus ope comparaveris? Quia verò hæc omnia raro ab hominibus bene, & ut rei dignitas exigit, considerantur, ac multò minùs, quanti sint præ omnibus aliis (quæ multi summà laude efferunt) facienda, satis seriò perpenduntur; non mirum est, paucissimos ullo unquam talem sibi scientiam acquirendi amore aut ullà ejusdem curâ trahi. Et cum porro omnia quæ excellentia, rara non minùs sint; non est, quod miremur, occulta per se ipsum eruendi aptitudine nullam ferè rariorem virtutem inter homines reperiri. Plurimi dantur, qui circa varias artes & scientias eadem & æquè bene perficere valent; sed rarissimi sunt, qui occultarum rerum genuinas causas detegere norunt. Numerus eorum, qui huc usque scriptis publicis circa hæc innotuerunt, exiguus admodum est, habità scilicet ratione temporis, quo tot hominum millia vixere.

Nolim autem quis existimet, me hisce annumerare, *b. Quenam cognitio hæc non sit resenda, & quam ideo hic explicari neglexim.* vulgares Philosophos. Vix enim isti tali titulo sunt digni, cum potius verbales quàm reales sint dicendi. Tota quippe illorum scientia nil ferè aliud comprehendit, quàm, quod cuivis obvium est, juxta ac magnam farraginem obscurorum terminorum, qui ignaris nescio quid sublimioris scientiæ promittere videntur. Quid, quæso, discriminis est inter rusticum, qui rogatus, cur e.g. acus magnetica se potius septentrionem versus, quàm versus aliam mundi plagam vertat, candidè ignorantiam suam fatetur; & inter talem Philosophum, qui profitetur, id per sympathiam aut occultam quandam qualitatem fieri? nullum sanè, nisi quòd hic finxerit vel ab aliis didicerit vocabulum sym-

D

pathiæ,

pathiæ, aut occultæ qualitatis, ad suam ignorantiam colore quodam inducendam. Nullus artificum ignorat rationem, quare aliquod opus perficiendum in se recipiat, nec ipsi latet, ad id elaborandum materiam industriamque suam requiri; licet ipsi non constet, Philosophos istiusmodi res appellare causas, nempe finalem, materialem, efficientem & formalem. Unde haud mirum est, istos profiteri, rusticos etiam habere naturalem, ut amant loqui, Rhetoricam, Logicam, &c. imò addere potuissent, inter rustici notitiam & istorum Philosophiam (cum pleraque eorum, quæ hi sciunt, non minus iste noscat, exceptis subtilibus nugis, quæ nullius sunt usus,) nihil aliud discriminis esse, nisi quod illi præcipuè rebus omnibus certa imposuerint vocabula, & entia imaginabilia, non realia, in certas redegerint classes. Quin nec rusticus quidem Trôpis abstinet, quamvis ipsum fugiat, eos nominari Metonymiam, Metaphoram, Synecdochen, Ironiam & quatuor tantummodo istorum species apud authores dari. Hinc apparet summum & præcipuum scientiæ, quam proficentur, splendorem, quo se magnificè efferunt, & in simplicium animis tantum excitant admirationis, solum in eo consistere, quod de re oblata per aliquot horas differere, aut ingens de eadem volumen conscribere valeant: admiratio verò ejusmodi scientiæ absque dubio apud omnes cessaret, modò attentè secum considerarent, totum illorum artificium in hisce paucis consistere. Qui in variâ hominum celebritate versatus est, multorum libros perlegit, ac diversa in hoc mundo observavit; is de quacunque re per plurima, utut ipse vix advertat, novit, ut vel ideo, si aliqua de re colloquendum sit, sat multa, etiam ex tempore, in medium proferre queat, saltem cuncta, quorum notitiam habet, ipsi tunc suggerat memoria. Talium ergo Philosophorum classes perlustrando (qualia non pauca in arte magnâ Lullii, Logicâ, Metaphysicâ &c. occurrunt,

aut

aut insuper quis sibi pro lubitu in usum quotidianum universalia his similia excogitare potest) cum universales sint, ac propterea ad omnem materiam applicabiles, brevi adhibita meditatione facile pleraque, quæ sibi aliàs hac de re innotuere, in memoriam revocabit. Tædet ferè, me tot hoc de negotio fecisse verba, adeò ut exemplis supersedeam. Si cui tamen placet hujus experimentum capere, thema quodcunque, ut dicitur, simplex sumat, idque per locos ejusmodi universales, prædicamenta, verbi causâ, Logica deducat, videbit, quantam de re quâcunque, etiam vilissimâ, dicendi materiam memoria ipsi supeditatura sit. Si præterea ordinarias disciplinas, prout omnia referuntur ad prædicamenta, adire, vel authorum indices, vel locos communes, ut vocant, proprio compilatos labore, consulere non recuset, tanta ipsi materiæ copia accrescet, ut levi negotio magnum quâvis de re propositâ volumen compingere queat. Si verò thema sit compositum, loca topica, ope canonum ibidem relatorum, haud difficulter quàm plurimas rationes, quas recordatur aliis in materiis sibi aliisve ad alia probanda inservivisse, ipsi suggerent, & si has syllogistice disponat, majoremque ut & minorem iterum novis probet rationibus, similibus, exemplis, apophthegmatibus &c. ex Polyanthea aut Florilegio aliquo conquisitis, sat ampla nugas quoque serio & operose tractandi non deerit materia. Profectò, si rem exactè & absque partium studio pensitennis, quænam, quæso, nova omnes illi, qui operam suam in his perdunt, in medium proferunt? Sanè nulla. Illa enim tantum, historicorum more, recensent, quæ jam pridem & sibi & aliis cognita fuere, ut ignorantibus sint admirationi, quibus, utpote hujus artis prorsus ignaris, tot res sine magno labore in memoriam redire non potuissent, licet omnes in se jamjam non ignotæ iis fuissent. Nonne igitur istiusmodi Philosophus cum pulchrâ hac suâ scientiâ æque igno-

rans permanebit? num propterea suo Marte ignoras e. g. causas naturalium phenomenonum, iridis scilicet, tonitruum &c. licet diu de iis differuerit, unquam deteget? & annè eas in lucem producendi ullam sibi potentiam hoc ipso acquireret? Hac enim arte, veluti ad nauseam usque ostendi, jamdudum cognita tantum in memoriam revocantur, nulla verò eorum, quæ adhuc sunt cognoscenda, revelantur. Interim ad hæc omnia clarius explicanda atque demonstranda verbis est parcendum, tum quia nolim videri disertus in iis refutandis, quod levi negotio posset peragi, tum quia hæc ab aliis sunt ostensa, & tot seculorum experientiâ abunde jam comprobata, hujus methodi ope haud ita magnos in indagandâ veritate progressus fuisse factos. Obstupesco ferè, tantam hucusque inveniri hominum multitudinem, qui, licet eruditorum sibi vendicent nomen, adeò claræ tamen veritati assensum negantes tam pertinaciter in hunc usque diem similibus adhærent. Qui hæc considerabunt, mirari desinent, me hunc tractatum Logicam appellasse, & ne minimam quidem interim de syllogismo similibusque in aliorum libellis Logicis magnâ copiâ occurrentibus mentionem fecisse: quippe multos (ut hoc unicum supra dictis addam) novi, ad quorum aures nomina Syllogismi, Soritis, Dilemmatis, Enthymematis &c. vix pervenerant, quique multò minùs, quidnam rerum essent fallaciæ Logicæ, (de quibus quamplurima Logici,) sciebant; ratiocinandi tamen artem tam perfectè callebant, ut non solum subtilissimas demonstrationes, idque multo feliciùs, quàm exercitatissimi quique in vulgari Logicâ, eruere valerent, sed & nullo sophismate se decipi paterentur. Nec mirum: Quis enim non multò faciliùs percipiet, si dixerò, sapientiam omnium primò esse quærendam, & addidero hanc rationem, quòd sola menti perfectam largiatur tranquillitatem (omnes ita ratiocinantur,) quàm si idem hoc modo syllogisticè proponam:



ponam: Quodcunque efficere duntaxat potest, ut menti perfecta animi tranquillitas concilietur, id primò est quærendum. Atqui sapientia sola efficit, ut perfecta menti tranquillitas concilietur. Ergò sapientia omnium primò est quærenda. Investigetur deinceps à Logico tali, in quâ figurâ & modo hic sit syllogismus, num forte peccet in materiâ aut formâ, similibusque phantasiis moræ nectantur: Ego nihil hîc aliud requiri video, quàm, ut quis sapientiæ & animi tranquillitatis genuinas definitiones, seu utriusque conceptum formare norit. Etenim exinde è vestigio cognosceat, num in prioris naturâ seu conceptu necessariò includatur posterius, ut suo loco sat fusè explanabo. Si hætenus dicta considerassent isti, qui hisce inutilissimis student subtilitatibus, animadvertissent utique, Philosophorum nomen sibi neutiquam competere, quum ne quidem illi, qui historialis solum, seu, ut voce magis solitâ utar, historicus est Philosophus, hoc est ei, qui reales bonasve scientias quidem non ignorat, sed eas tamen non proprio Marte, quin-potius alius cujusdam realis Philosophi industriâ & scriptis sibi comparavit, jure possit attribui. Quandoquidem enim scientias reales tantum historicè possidet seu novit, nihil quicquam verò novi suo Marte detegendi sibi habitum paravit; quomodo de hoc ipso, utut alioquin paulò antè dicto Philosopho, quem nominavi verbalem, longè præferendus sit, nomen Philosophi in sensu adæquato jam tum prædicari possit, cum illi tantum, qui probè inveniendi artem callet, quique solus mihi dicendus esse videtur Realis Philosophus, debeatur? Hic verò, quia inveniendi artem cognitam habet, quæcunque ab aliis traduntur, haud magni æstimat, ni simul inventionum fontes, unde ea omnia derivata sunt, lectoribus communicentur; aut nisi observet, hæc inservire posse ad artis inveniendi leges melius indagandas, quâ etiam in re insigne ejus artificium consistit, ut bonos au-

thores dignoscat, ab aliis minùs bonis eas discernat, & brevi, quicquid boni ab illis præcipitur, sibi notet. Nec alium ob finem ullas in scientiis particularibus difficultates solvere conatur, quàm ut eo ipso magis magisque in inveniendi arte confirmetur. Verbo: ejusmodi Philosophi Philosophia, sive unicum studium, est ars inveniendi. Si hæc, de quibus modò sum locutus, animadvertissent, qui titulo hoc abutuntur, Philosophi, simul vidissent, non tot dari disciplinas, quot ipsi profitendo enumerant, sed tantummodo unicam, unde omnia, quæ scire datum est, derivantur, quæ est sæpius memorata ars inveniendi cuncta per nos ipsos. Hanc quì sibi comparavit, omnes alias bonas scientias unà cum eà sibi acquisivit, aut eas absque alterius adjumento semper sibi acquirendi potentiam habet: quin omnes utiles scientiæ, quæ ab aliis præter hanc statuuntur, non nisi hujus artis specimina sunt. Ab hac scientiâ vulgares Philosophi longius remoti sunt, quàm vulgus existimat. Qui de scientiarum vanitate scripserunt, non in eo errarunt, quòd istorum Philosophorum scientias ad catalogum vanarum sive inutilium relegarint, sed in eo maxime, quòd ex mera ignorantia (uti perfacile quis videbit, modò eos authores vel paululum perlustraverit) omnes omnium Philosophorum scientias sine ullo discrimine eadem censurâ notarint. Illas etenim procul dubiò scientias, quæ solidè veritatem in apricum proferunt, debebant eximere, cum veritas sanè non sit res vana, verum æterna ac divina eaque hominibus nihil omnino sit utilius. Existimarunt fortè, nullas tales dari, ac proinde maluerunt reverti ad superstitionem, solatium stultorum, credentium, has in somniis sibi revelatum iri. Nec mirandum foret, hominum animos eò inclinare, si tam facili negotio res expediretur.

*c. De magnâ et  
am indagandi  
difficultate.*

Nam omnes naturâ à labore ad quietem admodum proclives sumus; talem verò scientiam, quæ veritatem

cerrò

certò eruere docet, indagare non est exiguæ difficultatis, tantumque laborem habet exantlandum, ut paucos sese negotiis humanis ita subducere posse credam, quò rebus tam arduis, quantum par est, vacare queant. Nec enim hic vulgus tantum, verum etiam doctissimi quique maximo-  
pere inter se dissident, & sæpe duo, quæ maximè sibi op-  
posita videntur, à viris magni cæteroquin ingenii æquali-  
ter defensa fuere, quolibet eorum asserente, à suis parti-  
bus stare veritatem, quæ tamen ab alterutra tantum parte  
stare posse videbatur. Quis igitur horum iudex arbiterve  
erit? Tamen si verò ex hæcenus dictis videatur, nîl quic-  
quam tali Methodo, quâ veritas acquiri potest, repertu  
difficilius esse; nihilominus tamen alii fortè in contrariam  
sententiam ibunt, certisque rationibus sibi persuadebunt,  
hanc eruendæ ejusmodi Methodi operam tantâ difficultate  
minimè laborare: siquidem infinitis experienciis convicti  
simus, ea, quæ vera sunt, semper esse simplicissima, ac  
proinde intellectu quoque facillima, adeò, ut ne unica-  
quidem in contrarium (detectam putà veritatem intellectu  
esse difficilem) produci possit: hinc dicuntur potius vi-  
deri, methodum indagandi veritatem, hoc est, rem, quæ,  
in lucem saltem prolata, captu adeo facilis est, nullo mo-  
do debere esse difficilem. Sed, quod notari velim, quem-  
admodum rem quamlibet aliam occultam, priusquam ea  
detegatur, difficilem, detectam verò eandem facilem vide-  
mus: sic etiam hac præprimis in parte plurima difficultas  
tum saltem occurrit, antequam hanc scientiam, quam in-  
dagamus, obtinuerimus, quia tot se methodi in principio  
offerunt, quæ omnes primo intuitu idem præstare viden-  
tur; ac proinde difficile est præcavere, ne à genuinâ aber-  
reamus. Eà autem acquisitâ, nullius utique difficultatis ul-  
terior poterit adesse causa, quàm, quòd quandoque dete-  
ctæ veritates certæ nequeant, nisi multis aliis ante detectis,  
unde istæ dependent, crui. Contingit hic profectò idem,  
quod

quod iter facienti, cui à diversis ducibus variæ ostenduntur, in quendam tendentes locum, viæ; quorum unus asseverat, certam illam viam nos præ omnibus aliis in desideratum perducere locum, & alter de eadem prorsus diversum quid statuit, suam nobis tanquam regiam non minori confidentiâ commendans. Hæc consideranti, & deprehendenti, nullibi certum existere indicium, cur hæc via illi præ omnibus aliis potius sit præferenda & eligenda, sanè perdifficile erit hac ratione præcavere, ne fallatur, ac evitare, ne fortè ingressus deviet multum & in vanum laboret; ubi verò certò novit, se in genuinâ versari, exigua progrediendi restat difficultas, nec ullum tedium, nisi a viæ longinquitate, oriri potest. Eapropter cùm mihi idem hæc in re accideret, anxieque quærerem, numne signum quoddam certum possem detegere, quò certior fierem, quænam via præ omnibus aliis esset eligenda; maxime ad id attendi, omnes in eo consentire, solos Mathematicos, uti ipse probè noveram, nullas in sua scientiâ fovere controversias, & si quæ exsurgant, eas ocysimè dirimi. Cùm verò insuper audirem, hos solos ejusmodi methodum possidere, quâ abstrusa, non tentando, aut per incerta hinc inde vagando, verum certa & constanti ratione, detegere queant, certum hoc mihi videbatur indicium, hos solos exoptatam methodum (saltem ex parte) attigisse. Magno proinde flagrabam desiderio; hæc mihi parandi scientiam, ut viderem, num idem, mutatis mutandis, in omnibus aliis posset obtineri. Hoc autem mihi quàm felicissimè successit. Cùm enim, quam veteres Algebram, recentiores verò Analysin speciosam vocant, mihi comparâssem, magnâ meâ delectatione non tantum observabam, ea, quæ ibi promittuntur, haut falsò jactari, sed & reverâ plus in illâ præstari, quàm antehac de eâ ullam spem conceperam. Licet verò statim non potuerim perspicere, quomodo idem in omnibus aliis scientiis posset effici;

quia



quia tamen me hæcenus præstantior latebat methodus, in hac, ingenium meum excolendo, multum fui occupatus. Ubi eò denique progressus essem, ut quendam adverterem habitum, tam in solvendis difficultatibus ab aliis mihi propositis, quàm præcipuè in iis, quas mihi ipse formaveram; intimius secretam hujus methodi naturam perlustrando, notavi, quicquid ignotum est, eadem prorsus ratione non solum in Mathematicis, sed & in omnibus aliis scientiis, posse detegi.

Huc enim respiciendo signum erui, ope cujus verum à falso sine errore potest dignosci: quo observato accidere nequit, ut quis imposterum in falsa incidat, aut veritatem semper non cognoscat. Hoc autem primo demonstrabo loco; secundo, quâ ratione etiam aliquis procul ab omni errore in perpetuum queat progredi, nova ac nova continuò detegendo; tertio, quomodo exiguo id possit perfici labore. Cum in hæc tria, quæ maximopere nunquam non scire desideravi, bonis auspiciis videar mihi incidisse, statui ea tribus hisce sectionibus aperire, omnia, quantum necesse videbitur, ita exemplis illustrando, ut nulla superfutura sit obscuritas. Licet autem aliquanto forsitan prolixior sim futurus, nulla, opinor, displicebit hic prolixitas, cum talia coner tradere, quæ omnes veritati acquirendæ operam dantes summopere scire cupiunt, atque eâ claritate, ut nullus, quoad fieri potest, in re tam arduâ mansurus sit scrupulus. Hoc unum rogo Lectorem, ne præcipitanter hoc de negotio, nisi omnibus perfectè attenteque perlectis, judicet. Æquum etenim mihi hinc spondeo judicium, nec fore confido quenquam crediturum, uti quidem aliàs fieri frequenter assolet, plura me hic promississe, quàm reapse præstitisse.

2. Ipsa artis invenientiæ præcepta generalia, quæ tribus diversis sectionibus declarabuntur.

## SECTIO PRIMA.

*Continet humanæ certitudinis fundamentum, quo verum & falsum certò dignoscere, & alterum ab altero discernere licet.*

*s. ipsum Veritatis & falsitatis criterium, ubi præcipuè intellectus operatio manifestatur.*

**J**uvat jam, DEI gratiâ, in cœpto feliciter cursu & eâ quidem, quâ decet, & quâ apud animum meum omnia tractare statui, evidentiâ pergere. Aggrediar igitur primò signum verum à falso dignoscendi.

Quisquis mentis aciem ad propriæ conscientiæ dictamen candidè direxerit, & ne sibi ipsi videatur injuriâ facere, omne prorsus illi contradicendi studium longè à se removerit (quod primum & unicum postulatum, nunquam non observandum, Lectoribus etiam atque etiam commendo;) is inter alia apud se ipsum advertet, se, quàm certò scit, quid se bene aut malè afficiat, (scit autem hoc ipsum, uti parte primâ abundè & evidentiâ explicatum est,) tam certò profectò etiam, quid verum vel falsum sit, ex seipso melius, ac quovis alio, cognoscere posse. Hoc ut fiat clarum, talia nobis proponamus, quæ indubiè judicamus esse falsa; baculum, verbi causâ, integrum minorem esse parte ab illo avulsâ, circuli radios esse inæquales, corpus motum ab alio ad motum non esse incitatum, & his similia; ac videamus, num rationem possimus detegere, propter quam talia asserta tam indubitanter falsa esse pronunciamus: hoc ex eo tantùm oriri observabimus, quòd nullatenus sit in nostrâ potestate, & ideo planè fieri non possit, ut talia à nobis concipiuntur. Quis, quæso, totum suâ parte minus, radios in circulo esse inæquales, corpus motum absque alicujus motoris impulsu, aliaque id genus, concipiat? Ac proinde non video, quodnam falsitatis signum præstantius unquam posimus desiderare, quàm quod jam se nobis obtulit adeò clarum, adeoque

que tutum, ut vel Scepticorum pertinacissimus, licet verbis contradiceret, internè tamen, velit nolit, ei certè cedere cogeretur. Proponamus porro nobis talia, quæ certò judicamus esse vera, baculum, exempli gratià, integrum fracto esse majorem, in circulo omnes radios esse æquales, corpus quoddam è loco expelli, ubi corpus aliud locum ejus ingreditur, & his similia; ac videamus eodem modo, numne genuinam posimus rationem detegere, cur ea indubitanter pro veris agnoscamus: Observabimus attentè circumspicientes, hoc ipsum indè tantùm procedere, quòd absolutè in nostrà sit potestate, quodque ideo omnino possit fieri, ut ejusmodi res à nobis concipiantur. Quis enim totum suà parte majus esse, in circulo omnes absolutè radios esse æquales, corpus aliquod loco moveri, ubi alterum corpus ejus locum occupat, & his similia, non concipiat? Ac proinde præstantius veritatis signum, quod hoc ipsum superet, non video. Quis Scepticorum tam impudens est, ut ore tantum, se ea non posse concipere, audeat profiteri? Hinc ergo efficitur, falsitatem quidem consistere in eo, quod non potest concipi; veritatem verò in eo, quod potest concipi. Quod cum sciamus, & insuper hanc certam & constantem esse veritatem, quædam à nobis posse concipi, quædam verò non, uti ex modò exhibitis exemplis est evidentissimum, supponamus, sequitur necessariò, nos utique in nobis ipsis habere normam seu regulam, quà verum à falso discernamus, & faciem quasi, quà lucem à tenebris distinguamus, quaque prælucente fieri non poterit, ut quis in falsà incidat, aut ullo tempore veritatem non detegat. Hinc etenim clarissimum est, ex vero non nisi verum, sed nunquam falsum; ex falso autem non nisi falsum, sed nunquam verum, sequi, de quo tot hominum disputationes. Nam si primum potest concipi, pariter & secundum, quod ex eo sequitur, poterit concipi; & dehinc tertium, atque ita porro: &

contrà, si primum non potest concipi, eò minus secundum, quod ex primo sequi debet, nec porro tertium, atque ita deinceps, concipi poterit. Idque adeò tutò sine ullo unquam errandi periculo peragitur, ut, quamvis principio aliquid supponeremus tanquam verum, quod tamen falsum, aut è contrario tanquam falsum, quod verum esset; inde ulteriùs veritates deducendo, hoc est, nullas alias adhibendo operationes, quàm quæ perfectè concipiuntur, prodirent statim è primò vel mera impossibilia, seu absurda, è secundò vel mera possibilia, seu, quæ concipi queunt; tertium quippe non datur, seu, concipi nequit. Si priora prodirent, manifestum esset, eam, quæ primò assumpsimus, non posse concipi, atque ideo falsa esse; & per consequentiam, ex vero ne hac quidem ratione falsum sequi, sed ex solo falso primum assumpto, quod tanquam verum considerabamus. Si posteriora, possibilia nimirum, inde sequerentur, primum utique suppositum sic verum erit, licèt id tanquam falsum ab initio supposuissemus, & per consequens, nec hac ratione ex falso sequeretur verum, sed ex solo vero primum assumpto, quod ut falsum considerabamus, licèt falsum non esset. Quæ omnia iis, qui Mathèsi, ac præcipuè Algebræ, operam dant, ex innumeris experièntiis clara sunt. Quoquò ergo nos verramus, dummodo unicè hoc innitamur fundamento, ab omni errandi periculo sumus immunes, nec ullibi nostra notitia potest terminari. Caterùm hinc manifestum est, omnem conceptum, seu, ut alii vocant, Ideam non esse aliquid muti, instar picturæ in tabulâ, sed eum necessariò aut affirmationem, aut negationem semper includere. *Affirmare* siquidem & *negare* nihil aliud sunt, quàm voces externæ, quibus indicamus, nos aliquid internè seu in mente vel posse, vel non posse concipere. Nulla quoque alia est differentia inter ens & non ens, quàm inter possibile & impossibile, seu inter id, quod potest,



test, ac inter id, quod nequit concipi. Manifestum porro, ea, quæ vulgò pro axiomatibus habentur, nempe ex nihilo nihil fieri, non entis nullas esse proprietates, statim hinc clarissimè derivari. Idem enim est, ac si dicas, ex eo, quod non concipitur, nequit aliud, quod concipitur, deduci. Quin etiam quod pro principio ac omnium primo habent, videlicet, impossibile est idem simul esse & non esse; hinc statim & veluti per consequentiam deducitur; perinde enim est, ac si diceretur: Impossibile est eandem rem posse simul concipi & non concipi, quod manifestam certè contradictionem involvit, ac multò notius, & proinde quoque prius est illo axioma. Atque ita in sequentibus suo loco videbimus, cætera omnia ex hinc, nos scilicet quædam posse, quædam nullo modo posse concipere, tanquam ex unico & omnium primo circa verum & falsum principio, manifestissimè derivari.

Restat adhuc id quod maximè notandum, neminem hanc ob rationem amplius de existentia illius facultatis in nobis posse dubitare, quàm conamur quicquam concipere, idque etiam concipere possumus, & quàm econtrà conamur ejus contrarium concipere, nec tamen id concipere possumus. Hanc autem actionem, vel conatum, in nobis *intellectum* imposterum nominabimus. Nihil enim possumus concipere, quin eo ipso facultatis hujus existentia probetur: ac proinde, cum infinita pene concipere liceat, nulla ferme res erit, cujus existentia tam multis rationibus, quàm hæc ipsa, evincatur. Hanc autem facultatem etiam in omnibus hominibus sanæ mentis existere ex eo evidenter cognoscitur, quòd omnia, quæ possunt demonstrari, reducuntur vel ad *aliquid cognitum*, de quo nemo potest dubitare, seu, ut meis id eloquar verbis, ad tale quid, quod omnibus obvium est, posse concipi, vel ad *Absurdum vel impossibile*, seu, quæ mea dicendi ratio est, ad tale quid, quod non posse concipi cunctis patet. Quo-

niam autem experientia testatur, omnes homines demonstrationibus ad assensum cogi, rectè colligimus, hanc facultatem in omnibus æqualem esse; omnibus alioquin non esset æque obvium, num aliquid concipi possit, nec ne; neque omnes simul alterutrum tantummodo æquali consensu statuerent, quod tamen unanimiter ab omnibus fieri, ipsa, ut dixi, experientia satis superque comprobatur. Unde non mirabimur, cur hætenus soli ferè Mathematici omnem omnibus disputationibus locum præciderint. Hi enim ferè soli tales hucusque demonstrationes formârunt, quibus eò cuncta rediguntur, ut ab unoquoque vel concipi vel non concipi possint. Atque ita clarè cognoscitur, quo artificio sit utendum, ut homines, quantumvis pericines, ad assensum internum, seu ut convicti taceant, cogere valeamus. Poteritne præstantior ad omnium hominum controversias, quæ quidem rationi naturali subjacent, decidendas exoptari iudex? poteritne fortior: cum nullus hominum se ejus authoritati absolutè subducere possit? poteritne denique melior: cum nec ullis muneribus, nec quibuscunque humanis artificiis possit corrumpi? Quæ omnia si attentè considero, non video, quâ ratione ullus hominum eâ de re queat dubitare. Nam si fortè generale hoc pronunciatum (nimirum nos quædam posse concipere, quædam non,) haud ita clarum esse videatur, ceu omnia generalia habentur; certè si ad speciales conceptus, quorum exempla dedi, respiciamus, erit hæc utique res evidentissima. Statuamus enim aliquos esse, qui eâ de re subdubitent; hi sanè erunt vel ignari, vel Sceptici, vel denique ii, qui alia principia circa hæc amplexi sunt. Ignorantes quod attinet, non aliam ob rationem hæc de re poterunt dubitare, quàm quia huc usque pauca conceperunt: non tamen existimarem, eos, modò ad data exempla attenderent, evidentibus adeò veritatibus assensum posse denegare. Quantum ad Scepticos, facilè quidem mihi, quia  
de

de omnibus dubitant, concedent, me quādam nullo modo, imò nihil concipere; nullatenus verò, me aliquid posse concipere. Verum enim verò credo, ipsos non posse negare, totum suis partibus æquale esse; imò & figuram quatuor laterum & angulorum æqualium, quæ quadratum dicitur, ac infinita talia, concipi posse. Quod si verò dixerint, se talia concipere non posse; cum iis nihil erit habendum negotii, quandoquidem aut apertè propriæ contradicunt conscientiæ, id quod repugnat primo meo postulato; aut necesse est, ut ipsi mente præditi sint humanæ dissimillimā, adeoque ut amentes considerandi sint. Verum regerent fortè, hæc quidem à se concipi, at Mathematica esse. Esto ita: sed interim hi mihi concessere, me quādam posse concipere. Atque hoc ipsum jam demonstrare mens mea erat, quamvis suprā quoque ejusmodi, quæ ad Mathesin haut spectant, exempla protulerim. Sed quicquid sit, hæc duo hominum genera non nisi experientiā convinci posse judico. Id ipsum autem suo loco, & in hoc Tractatu, & in aliis (DEO mihi vitam ac opportunitatem largiente) præstabo, ostendendo innumera esse, quæ à nobis optimè concipiuntur, & in his talia quoque, ad quæ humanum ingenium ullo modo posse pertingere pauci existimant. Reliquos denique quod spectat, qui egregia ingenii sui specimina nobis dedere; nullam planè causam video, quare isti dato huic humanæ certitudinis fundamento nolint subscribere. Nam quæ nobis tradiderunt, ea procul dubio non falsa, sed vera esse affirmabunt. Si vera, unde quæso sciunt, eadem esse vera? Poteruntne aliud criterium magis securum, magisque solidum proferre, ex quo sua hæc vera, contraria autem falsa esse norunt, quàm istud: se sua posse concipere, sed iisdem repugnantia neutiquam? Indubitatum igitur est, in his ipsis fundamentum totius humanæ certitudinis, eā ratione, quā idem hic exhibeo, comprehendi. Opinor autem,

tem, hoc omnibus quidem semper fuisse notum, sed à nullo, quod sciam, concessum, hoc ipsum scilicet, nec ullum aliud, genuinum veritatis & falsitatis tantummodo esse criterium.

2. Quâ cautela  
hoc fundamen-  
to sit utendum,  
quodque ii, qui  
eam hactenus  
observarunt, in  
veritatis acqui-  
sitione ideo fe-  
lices fecerint  
progressus: ubi  
imaginationis  
operatio praci-  
pue manifesta-  
tur.

Atque hæc omnia quidem sine dubio ita se habent, ac in iis adeò acquiesco, ut, licet totus mundus, si fieri posset, in re tam clarâ mihi impudenter contradiceret, nihil omnino tamen communi suo dissensu ad me ab hac dimovendum sententiâ proficeret. Imò, si omnia hactenus in hujus rei probationem allata non sufficerent, (placere autem sufficiunt,) diffiteri tamen, lumine naturali convictus, nequeo, me longè certius, ac quisquam alius, posse scire, num actio illa, manum, verbi causâ, quovis ferè momento, & quotiescunque placuerit, extendendi, sit mei arbitrii. Nemo profectò hoc me ipso melius experiri poterit. Quanto magis ergò ex me ipso certus ero, quàm ex quolibet alio, num aliquid concipere valeam, necne? Et hæc quidem ita, ut dixi, sunt. Verùm enim verò non possum non candidè fateri, ea (videlicet, me quædam posse, quædam non posse concipere) utut æque certa sint, non tamen æquè perspicua esse. Hoc enim multò evidentius mihi videtur, me quædam nullo modo posse concipere, ac illud, me quædam concipere posse, quâ in re unictique propria conscientia validissimus erit testis. Hinc quoque perspicere licet, omnes demonstrationes ad absurdum seu impossibile deducentes omnium maximè nos ad assensum adigere. Ac proinde Mathematici in rebus obscuris, aut ubi prævidebant, adversarios aliquid difficulter accepturos, (exemplo sit Archimedes) ejusmodi potiùs demonstrationibus, quæ hujus similisve sunt formæ, sunt uli. Quantitas aliqua aliâ quædam aut major, aut minor, aut æqualis est: quantum non datur. At impossibile est, seu nequit concipi, eam esse quâvis aliâ propositâ quantitate vel majorem, vel minorem. Æqualis



qualis igitur erit. Qui demonstrandi modi, etsi menti non æquè faciant satis, ac ii, qui ostensivi dicuntur, (quia nobis acceptius est, aliquid posse, quàm non posse concipi; prius enim potentiam, posterius nostram indicat impotentiam.) multò interim fortius adversarium ad assensum, qui unicus eorum est scopus, cogunt. His ritè perspectis, tum hujus diversitatis genuina causa determinanda, tum huic difficultati præsens inveniendum est remedium. Hoc ut fiat, notandum, nemini in omnes suas cognoscendi facultates accuratius inquirenti, fore observatu difficile, non tantùm per externos, visum, auditum &c. sed etiam per internos sensus, quando nullum externum objectum adest, hoc est, tam per absentium rerum imagines, quàm nostros appetitus plurima nobis innotescere. Unde patet, alias insuper cognoscendi dari facultates. Quia verò hæ facultates aliquid commune habent, & omnes à re quasi externâ (sæpe enim præter voluntatem in nobis excitantur) originem ducere videntur, eas omnes quoque tanquam unicam considerabo, & quia harum facultatum opera sub specie imaginum pleraque nobis exhibentur, hac de causâ eandem imposterum dicam *Imaginationem*. Qui igitur attentius hanc facultatem, quam modò Imaginationem vocavi, considerat, eum latere non poterit, hanc cognoscendi facultatem non videri ita à nostrâ naturâ dependere, ac priorem illam, de quâ ante dictum est, quamque *intellectum* nuncupavimus. Ubi enim intellectu quædam concipimus, vel concipere non possumus, ea omnia quasi à nobis ipsis peragi videntur; at per hanc posteriorem, imaginationem putà, omnia potius quasi extrinsecus, uti comœdias spectantibus accidit, adveniunt seu repræsentantur, adeoque tantummodo *percipiuntur*, non verò *conciipiuntur*: quoniam nobis invitis sæpe numero occurrunt, ut sunt, dolorum perceptiones, absentium rerum imagines, quæ nobis observantur, externa item omnia, & his similia, quæ visu, auditu &c. percipiuntur.

Advertimus præterea eorum quædam, quæ nos imaginari ac à nobis percipi diximus, esse, quæ possumus concipere, quædam verò esse, quorum infinitus est numerus, de quibus nullum conceptum formare licet. Ita quævis mechanica, facilè à nobis concipiuntur; cum contrà, exempli gratiâ, de colore rubro, quamvis ejus perceptio clarissima, hoc est, talis sit, ut eum nunquam cum alio colore, aut aliâ quâvis perceptione confundamus, nullum prorsus conceptum, quemadmodum mox clarè demonstrabo, formare queamus. Priusquam progrediar, quædam hic bene notanda sunt. Primò quidem, quòd plerique vulgò duos hos loquendi modos, aliquid non posse concipi, & nullum nos de aliquâ re conceptum habere, pro iisdem habeant: sed ne hac in parte confusio apud lectores oriatur, utpote qui duo hæc ab invicem probè distinguo, observandum est, me, quando dico, aliquid non posse concipi, non alio in sensu id intelligere, quàm qui apud omnes Mathematicos in usu est, nimirum, duos quosdam conceptus non posse conjungi; atque ubi hoc ipsum contingit, ibi falsam rem esse enuncio. Cum verò dico, nullum me de aliquâ re conceptum habere, idem hoc mihi est, ac si dicerem, nescire me, num aliquis de re quâdam conceptus possit formari, nec ne; atque cum hoc ipsum accidit, tum rem mihi incognitam esse profiteor. Verùm hac de re prolixius differendi infra pag. 57. dabitur locus. Interim secundo notandum quoque bene est, me nunc non indagare, quâ ratione hæc omnia in suâ naturâ spectata se habeant. Pertinet hoc ad alium locum, & in iis explicandis, quæ prolaturus sum, non requiritur. Certum tamen est, has duas cognoscendi facultates, *conciendi sub formâ actionis, percipiendi sub formâ passionis*, nos diverso modo afficere; & me id, quod concipere nequeo, verbi gratiâ, baculum integrum suâ parte ab eâdem abscissâ minorem esse, nullatenus posse imaginari: econtrâ me ea, quæ percipio seu imaginor, partim posse concipere,

veluti

veluti, baculum integrum fracto esse majorem, partim verò de quibusdam eorum me nullum conceptum habere, veluti de coloris rubri, aut etiam, ut modò dictum est, doloris perceptione, de quibus utique nihil concipio; cum de his ne quidem ullam possim imaginem formare.

Hinc advertimus, quare in certitudinis acquisitione ea, quæ concipere nequimus, nos plùs afficiant, & devictos teneant, quàm quæ concipere nobis datum est; nempe, quia ea neque concipere, neque imaginari valemus. Adeoque perinde est, utrum illa capiendi impossibilitas intellectui, an imaginationi sit adscribenda, cum objectum tale nobis utroque modo sit quasi aliquid incogniti: sed è contrariò, quia quæ imaginamur, quandoque possunt concipi, quandoque nullus de iis habetur conceptus; magni refert, ne, quòd tantùm imaginamur, cum eo, quod concipimus, confundamus. Quippe hinc facillè poterit fieri, ut quædam à nobis concipi putemus, quæ reverà tantùm imaginamur, hoc est, ut credamus, nobis quædam esse nota, quæ tamen ignota sunt. Ac proinde non pari afficimur certitudine, seu, non ita fortiter ad assensum cogimur in rebus, quæ concipiuntur, præ metu, ne, si minus circumspècti sumus, fallamur, quàm quidem in rebus, de quibus conceptum nullum habemus, cum in his nullum unquam deceptionis periculum sit metuendum, ut jam antè clarè demonstratum est.

Hinc porro certum remedium elicitur, in quo omnes periculum faciant, num, aliquid concipiant, nec ne, si nimirum addiscant multa, frequentè exercitio concipere; atque ita ipsà experientià sapissimè cognoscant differentiam inter facultatem concipiendi seu *intellectum*, & inter facultatem percipiendi seu *imaginationem*, quas ideo deinceps faciliore negotio discernere poterunt. Ita qui bene concepit, quâ ratione Neoterici omnia naturæ phænomena, quæ vulgò ob metum vacui fieri dicuntur, explicent per solam corporum pullionem; facillè agnoscit, alios de horrore vacui, quem

dicunt naturæ inesse, de attractione ac similibus, nullum planè, veluti prætendunt illi, formare posse conceptum; nec tam facilè imposterum à similibus se decipi patietur. Unde etiam clarissimè patet, cur nulli ferè magnos hactenus in Physicis fecerint progressus, quàm qui valde in Mathesi fuerunt exercitati. Mathematici quippe, repetito sæpe experimento, didicèrunt, quanta sit differentia inter concipiendi & imaginandi facultatem. Patet quoque, cur quibusdam, quæ de cognitione intellectus traduntur, difficillima videantur, inò, cur potius autument, se aut nihil, aut parum didicisse; cum tamen tam præclara exhibeantur, tantæque perspicuitate tractentur, quantum hujus rei natura in philosophandi initio postulat; Imaginationis scilicet operationes hactenus nos totos ita occupârunt, ut ferè ea, quæ intellectus sunt, non animadverterimus, & quamvis ostendantur, nobis tamen quasi non entia appareant, nisi hæc res multis exemplis ad intellectus cognitionem faciliorem reddendam bene declaretur. Verùm ejusmodi exempla in disciplinis aliis, præterquam in Mathesi, rarissima sunt, cujus tamen elementa pauci vix à primo limine salutarunt. Patet denique, quare ipsa veritatis investigatio adeò sit difficilis, ut nostra mens non sine aliquo labore ac defatigatione possit ad ullas res attendere. Id quod sanè non aliunde accidit, quàm quia extrinsecus quasi continuò tot in nostram naturam operationis sunt impressiones, quibus actus intellectus, seu, qui à nobis immediatè peraguntur, ultra modum impediuntur; tum etiam, quia, cum otium labore gratus sit, ab ineunte ætate curiositate quâdam allekti potius ad ea attendimus, quæ nobis absque labore ac difficultate, qualia dantur in imaginatione, cognoscenda offeruntur, quàm ut multo continuoque labore, multis insuper ingruentibus impedimentis, ac tantâ, quanta in intellectus usu requiritur, curâ, scientiam acquiramus. Unde innumeri errores, quos paucissimi postea maturis annis valent depo-



deponere, quin assidue redeant, & eorum credulitatem tanquam longo usu & familiaritatis jure sibi devinctam occupent, nili ipsis juxta legem & hujus remedii, ut dixi, ductum frequens has duas operationes bene à se invicem discernendi detur occasio.

Licet autem hujus remedii ad prædictam difficultatem tollendam haud spernenda mihi innotuerit præstantia, utpote cujus solius ope præclari viri singulares fecere progressus; fateor tamen, id accuratius examinans, hoc non nisi iis usui esse posse, qui multum in detegenda veritate sunt exercitati, qui commodè sese parum concipientium confortio subducere queunt, & inprimis,<sup>3.</sup> quibus tantum contingit otium, ut satis ad rem, in qua occupantur, sint attentī. Deprehendimus enim, quosdam eò plures & utiliores percepisse fructus, quò majores ad has res oblata illis fuerunt occasiones. Verum enimverò, cum ex raro offerantur, paucis hoc remedium poterit multum prodesse. Hanc ob causam, eò quòd res magni momenti, imò præcipua est, de qua nos certos securosque initio philosophandi esse oportet, investigandum erit tale criterium, quo notum redditur, an res quædam concipiatur, nec ne; ut minùs exercitati perpetuò ab omni errandi periculo sint liberi, si animus sit omnem hic tollere difficultatem.

Hunc in finem notandum primò, concipiendi sive intelligendi facultatem in omnibus æqualem esse, uti parte primà hujus sectionis ostensum. Si ergo verum est, me aliquid concipere, poterò sine dubio efficere, ut eundem conceptum, qui mihi est, aliis etiam eandem mecum concipiendi potentiam habentibus notum facere possim, & vice versà procurare, ut, quod mihi conceptu impossibile est, alii idem quoque se concipere non posse animadvertant. Demonstrationes Mathematicæ hujus rei præsentissimi sint testes. Has, utut prolixas captuque admodum difficiles, quando aliquis intelligit, æquè bene, ac Mathematicorum

*3. Quà ratione  
eo optimè sit u-  
tendum; ubi  
inprimis sum-  
ma illa nota sit  
differentia, qua  
inter intelle-  
ctum ac imagi-  
nationem in-  
tercedit.*

subtilissimus, nec plus nec minus, eas concipit. Notandum secundò, percipiendi seu imaginandi facultatem in hominibus inæqualem esse, ut dictum est parte hujus sectionis secundâ. Unde consequitur, non semper nos posse præstare, ut, quam ipsimet de quâdam re habemus perceptionem, eandem & alii, sicuti nos, habeant. Sic enim cæcis, exempli causâ, naturâ factis, qui nec de coloribus, nec de ullo visis objecto quicquam sentire possunt, nullis verbis, ita ut hi æquè ac nos percipiant, quid insigniamus nomine coloris rubri, luminis, tenebrarum, explicare valeamus: perinde ut surdis, quid nobis veniat nomine soni, quò eandem ii, quam in nobis experimur, perceptionem habeant, neutiquam exponere possumus.

Ex hisce duabus notis seu positionibus, quas indubias esse nostra testatur conscientia, regula derivatur, quâ observatâ quilibet in veritatis investigatione necdum exercitus, certò distinguere poterit, num rem suo Marte concipiat, anne verò eandem imaginetur. *His enim suppositis tanquam certissimis, certum etiam erit, si statuam, aliquid mihi notum, alii verò planè ignotum esse, & observem, in meâ esse potestate, illo saltem mihi hanc, obstante, solis verbis eandem, & æquè perfectam, ac ego ipse eâ de re habeo, notitiam in ejus mente excitandi; certum, inquam, erit, me istam tunc rem non imaginari, sed concipere. Si contrâ adverto, me alii, ejus prorsus ignaro, nullis verbis talem notitiam impertire posse, ita ut non minus ac ego eandem cognoscat; tunc ex posteriori positione liquet, me rem tantum imaginari, non verò concipere. Si ultimò observare vero, me potestatem habere cum alio, quem planè meâ latet cognitio, aut quem saltem eam latere pono, quædam communicandi, quædam verò cum eodem me communicare non posse, ita ut ei æquè ac mihi innotescant; hinc certò concludo, me tantum bujus rei partem cognoscere, eam, nimirum, quam cum alio poteram communicare, reliquam verò, quam non poteram, solùm imaginari.*

Quàm

Quam facilis autem hæc sit regula, quilibet tum ipso usu potissimum addiscent, tum ex eadem fiet planum, ipsos Philosophiæ tyrones hujus ope levi negotio plurima observare, & jam feliciter assequi posse, quæ subtilissimos Philosophos, ad eam non satis attendentes, ac ideo incognita, pro cognitis sæpe assumentes, deceperunt, & mirè vexarunt, ut suo loco luculentis ostendam exemplis. Certitudo insuper ejus innumeris posset firmari experimentis. Norunt quidam, verbi causâ, quòd, licèt machina quædam valde composita & proluxa sit, quia tamen illam perfectè concipiunt, ideò quoque dato tempore ad id requisito efficere, valeant, ut alii, qui alioqui de eâ ne quidem cogitarunt, eandem æquè perfectè, ac illi ipsi, assequantur sive concipiant. Fingamus eodem modo, me ex aliquâ regione, in quâ solâ ignis usus innotuerit, devenisse ad quandam terræ plagam, cujus incolis hoc elementum planè ignotum foret, quò accersitus id propter fuerim, ut ipsos naturam ignis, proprietates, effecta, ac è variis rebus eum eliciendi rationem docerem; nihil aliud hoc in negotio ad cognoscendum illum possum præstare, quàm docere eos, ignem rem esse extensam, diversimodè mobilem, variæ magnitudinis, modò majorem, modò minorem, diversissimas & novas quovis ferè momento induentem formas, istum integrum de loco in locum posse transferri, & his similia: quia nihil non horum concipio, & nullus dubito, quin illi ex meis verbis eum in tantum æquè bene sint concepituri. Quæ verò porro de igne dici queunt, sermone meo, ut illi non minus ea ac ego intelligant, efficere hanc poterò; nempe quid id sit, quod lucem ac calorem nominò, quomodo in loco obscuro, simul atque accenditur, omnia illico objecta conspiciamus, quomodo membra nostra frigore rigida calore suo foveat & recreet, quomodo pleraquæ destruere, & quasi penitus absumere videatur, quomodo nostrum attingens corpus acerbissimum pariat dolorem, quàm repente exstin-

extinguatur &c. Hæc quia tantummodo imaginor, qui quæso veram illis horum perceptionem, qui ea nunquam videre, absque monstratione sensibili persuadere possem? Pari ratione hujus regulæ modò datæ, eadem facilitate ad omnes res physicas translata, auxilio discemus, nos nullam ferè notiitiam de sonis, coloribus, aquâ, aëre, metallis &c. habere, imò (ut actiones, quæ ad nos multò propius spectant, proferam,) nos ignorare, quid sit, hos ridere, illos plorare, alios sternutare, alios oscitare, quin etiam, quâ ratione ipsimet manum, linguam, aliave membra moveamus, & infinita alia his similia.

Hinc luce clarius est, quid idipsum sit, quod ignaris tantæ est admirationi, ubi audiunt, Physicos de hisce philosophantes candidè fateri, se nihil horum, aut certè valde pauca intelligere, quæ tamen isti quàm perfectissimè se scire, nihilque physicâ scientiâ evidentius esse posse arbitrantur: quia scilicet omnia tantum imaginantur, & imaginari ac intelligere pro uno eodemque habere non dubitant; siquidem haud rarò fiat, ut admodum vividè ab iisdem afficiantur, & inde existiment, se nihil adeò perfectè ac ea ipsa intelligere; cum tamen hi nullam rem minùs eâ intelligant; sicuti ex iis, quæ de luce & tenebris traduntur, perquam est manifestum, utpote quibus, juxta prædictam regulam, nihil ferè ignotius: sed quia tamen hic imaginatio omnium vividissimè afficitur, alii hæc econtrariò sibi adeò cognita esse existimant, ut plurima, quæ se difficulter intelligere opinantur, hisce, quasi notissimis, declarare conentur. Nec amplius porro mirabimur, apud plerosque locum habere, ut quascunque formas absque ullâ mentis repugnantia in alias quascunque mutant; (jucunda hujus rei exempla enarrat Lucianus in Dialogo, qui inscribitur incredulus) quia scilicet res, uti easdem imaginantur, conjungunt aut etiam disjungunt, cum contrà, si earum tentarent formare conceptus, ipso eventu perspicerent, se eas vel posse tantum,  
vel



vel non posse conjungere, licet summiâ ope anniterentur; atque ita à fictâ dubiâque cognitione liberarentur. Ultimò mirum nobis haud erit, quare multi intellectum, licet tam præstans sit bonum, omni modo spernant, & ei valde iniquas adscribant operationes; quia nimirum imaginationem cum intellectu confundunt, & quæ soli homini naturali, hoc est, ei, qui imaginationem tanquam ducem sequitur, erant tribuenda, & qui propterea per sensûs innumera præjudicia seu falsâ hausit, atque per internas imagines seu Phantasiâ fovit, ac solis passionibus autoribus, quicquid agit, perficere molitur: quæ, inquam, homini naturali, hoc est, ita constituto, quemadmodum omnes sumus naturâ, tantum erant imputanda, ea homini intellectuali, qui non nascitur, sed ope demùm intellectûs & genuinæ Philosophiæ talis evasit, quique præjudicia, ab ineunte ætate hausta, sic emendavit, ut novum quasi hominem induerit, falsò adscribunt, cui tamen ista omnia minimè sunt attribuenda.

Hæc regula denique tam evidens est, ut, licet ea initio quibusdam aliter se habere forsân videatur, nulla tamen hujus diversitatis alia futura sit causâ, quàm quòd rarissimè supponant, eos, quos instituunt, istorum planè ignaros esse. Hac de causâ aliquando petii ab iis, qui jactitabant, se artem quandam callere, ut me docerent, simulans me eam penitus ignorare: ubi desiderio meo conabantur satisfacere, levi negotio præter opinionem eorum demonstravi, illos eandem non perfectè intelligere. At hi non erant ex obstinatorum & pertinacium hominum numero, ad quorum desperatum morbum nullum à Philosophiâ remedium. Hoc igitur, si & ab aliis probè observaretur, nempe ut alios, quibus quædam aperire animus est, semper eorum planè ignaros esse supponerent, uestigiò hujus regulæ evidentiam notarent; adeò ut omnis ferè lis inter homines de scientiis orta, nî saltem propriæ reluctarentur conscientiæ, ejus ope semper ipsâ experienciâ posset dirimi, & tunc nullus am-

plius de iudice inter disputandum, hoc negante, illo affirmante, ut fieri plerumque amat, sollicitus foret. Nam si quis, juxta superius dicta, prætendat, se quandam rem concipere, & alteri tamen vel ejus planè ignaro aut nullam de eâ perceptionem habenti, vel saltem pro ignorante habito, suo tempore (nam res quandoque prolixa est) nequeat meris verbis, nihil ad oculum monstrando aut ad certa remittendo, nisi id fiat brevitatis causâ, eò quòd jam tum nota sint, ita explicare, ut eandem æquè concipiat; certum erit, se hanc rem non concipere, sed imaginari, quicquid in contrarium ille regerat: atque ita lis experientiâ commodissimè definitur. Omnem hoc pacto difficultatem, quæ circa hoc humanæ certitudinis fundamentum (nos scilicet quandam concipere, quandam non concipere posse, & eam, quæ possunt concipi, vera, quæ non possunt, falsa esse) exoriri potest, me tam perfectè sustulisse confido, ut planè non videam, quid præstantius ad æquè faciliè detegenda falsa & vera desiderari possit. His ergò ritè, nec contrà, quàm decet, animadversis nunquam in falsa, sed semper in vera incidemus: id quod hâc primâ sectione indicare mihi propositum erat. Neque his quicquam adderem, nisi quandoque observassem, aliquos etiam in rebus plus nimis, ut ita dicam, evidentibus scrupulos movisse. Adhæc non possumus in primis jaciendis fundamentis, stabiendiæ veritatis ergò, nimis esse accurati.

4. Aliorum objectiones contra hoc humanæ certitudinis fundamentum, & ad eas responsiones.

Me ideo aliquatenus coactum video, ut iis etiam, quæ aliqui, licèt fortè pauci, objicere hic possent, occurram, quò, peracto hoc, & veritas & præstantia hujus principii, nimium alioquin simplicis, ac proinde, quod quibusdam fortasse videtur, haud tanti faciendi, tunc demum eò majori luce refulgeat; ubi hoc cum aliorum fundamentis collatum, ejusque usus reapse magis ac magis fuerit perceptus. Quæquaversum igitur respicienti objectiones adversariorum ad quatuor capita redigi posse videntur. Vel enim dicent, I. hoc

hoc fundamentum, utut certissimum, nullum tamen nobis ad veritatem indagandam usum præbiturum, vel II. admodum probabile esse hoc genuinum non esse fundamentum, vel III. id non esse ex omni parte certum, vel IV. meliora hoc fundamento ab aliis antehac monstrata esse. Et sanè si quicquam horum illi certò demonstraverint, non negandum foret, fundamentum meum ab iisdem haut parum labefactatum esse. Verùm ipsorum audiamus rationes, & quàm validum sit responsum meum.

Prima quod attinet, dicent adversarii, hoc fundamentum, licèt certum esset, nulli tamen usui in veritate, perquirendâ nobis futurum; quia omnia, quæ ex eo deducuntur, forsitan tantùm in conceptu nostro vera erunt, non autem absolutè in re ipsâ; adeoque illa absolutè loquendo fortè falsa esse poterunt. Verùm respondeo,

I. Licèt concedam, id nondum hic loci in philosophandi principio esse demonstratum, instituto tamen meo nihil obesse scio, quò minùs usui nobis sit futurum. Quamlibet enim illi, omnia nobis tantùm sic apparere, non autem fortè absolutè ita existere, cum Scepticis supponant; fateri tamen coguntur, quasdam harum apparentiarum (ut ita cum ipsis loquar) firmas seu constantes, quasdam verò inconstantes esse, hoc est, nonnullas nobis constanter sub specie veri apparere, qualis illa est: quæ eidem sunt æqualia, inter se sunt æqualia &c. nonnullas inconstanter, qualis hæc: crastino die ero superstes, & infinita talia. Quæ quandoquidem ad utilen vitæ directionem æquè sunt necessaria, ac visus ad gressus nostros dirigendos, non minùs etiam firmæ & constantes apparentiæ ab infirmis seu vagis erunt secerendæ, licèt absolutè loquendo essent falsæ, ut e. g. dicam, visu utendum esse, quoties nobis constanter apparet, nos obambulare, quantumvis fortè, juxta absolutam rei veritatem, falsum esset. Magnus igitur antiquorum Scepticorum, quorum dogmata inprimis Sextus Empiricus conscri-

psit, error est notandus. Nam licet omnia mera essent apparentiæ, quemadmodum illi opinabantur, propterea tamen non minus philosophandum, hoc est, nihil tamen secius apparentiæ firmæ ab infirmis ob infinitam, quam inde percipimus, utilitatem secernendæ essent. Tantum ergo abest, me arbitrari, hoc meum fundamentum inutile fore; ut potius ex eo usus non pœnitendos sperem, quod ejusmodi rebus quàm optimè hoc inservire supra ostenderim. Accedit, me quoque observasse, ea, quæ mente verè concipimus, in rerum naturâ possibile esse; & quæ non possumus concipere, esse impossibilia. Nullam certè hisce contrariam proferre licet experientiam. Hæc prima meæ responsionis pars esto.

II. Maximè notandum, nullo modo initio philosophandi opus esse, ut inquiratur, num veritas in conceptu meo eadem sit cum rebus extra me existentibus; partim 1. quia hoc ipsum, meo quidem judicio, ad alium locum pertinet, in quo natura intellectus à priori eruetur & explicabitur, ubi etiam aliquando, verumne an falsum sit, definitur. Si prius sit, scilicet id, quod in conceptu verum est, etiam necessariò in rebus ipsis verum esse, quod me demonstraturum spero, quid opus hic loci hoc ostendere, cum id ibidem longè aptius fieri possit? Sed ponam posterius, id videlicet, quod in conceptu meo verum, non tamen id propter in rebus ipsis extra me existentibus verum esse, numne idcirco, ut modò in primâ responsionis parte notatum, minus philosophandum, cum inde tantâ utilitas sequatur, nec ulla experientia in contrarium possit afferri, sed omnia, prout à me concipiuntur, etiam per experientiam confirmantur, ea quoque in rebus ipsis ita sese habere? partim 2. ejusmodi inquisitio hic non requiritur, eò quod initio philosophandi nos eâ notitiâ non indigere comperimus. Nam quoniam jam perfectè scio, me quædam bene, quædam non posse concipere, uti ex supra dictis manifestum, quid quæso impe-



impedimento est, quo minus omnia, quæ scire datum est, hinc æquè derivem, ac quisquam alius, cujus animus de internâ rerum & ratione & constitutione quàm maximè est informatus. Nihil his utilius, nihil evidentius, nihil denique à curâ remotius. Ita is, qui intimam manûs structuram ignorat, æquè tamen perfectè, ac alius quisquam in hac scientiâ versatissimus, eadem manu quævis possibilia, seu utilissima, potest perficere.

Objicient secundò, admodum probabile videri, hoc non esse genuinum fundamentum. Si enim veritatis & falsitatis essentia in eo sita esset, quòd aliquid possit, aut non possit concipi, & quidem positione tam simplici; mirum sanè videretur, quomodo acutissimi & ingeniosissimi viri gravissimos commiserint errores. At enim vulgò dicitur, nihil tam absurdè dici posse, quòd à quibusdam Philosophis non propugnetur. Ejusmodi profectò viri rectè concepisse supponuntur sua, inprimis simplicissima; veluti sunt ipsa principia: & tantus tamen hic eorum est dissensus, ut sibi quisque peculiaris sinxerit principia. Ad hanc objectionem respondeo,

I. Nos sæpissimè judicare, gravissimos errores in aliorum libris existere, seu permagna absurda, quæ tamen non nisi in proprio cerebello latent. Committuntur autem hi errores partim Lectorum, partim Authorum vitio. Lectores quod spectat, maxima eorum pars, quamprimum se lectioni dedit, non lecta percipiendi, sed studio eis contradicendi animum adfert, potissimum ad conclusiones ibidem positas, quarum contrarium dudum credidit, ac professus fuit, respiciens. Hinc accidit, ut hi tantum temporis sibi non sumant, quò aliorum meditationes bene percipiant, ex quo fit, ut ob tot vocabulorum æquivocationes sensum auctori, cujus tamen mentem non assequuntur, affingant, aliamque ex ejus lectione sententiam, quam auctoris ipsius etiam esse credunt, hauriant: qui sensus cum à mente auctoris valdè

sit diversus, & illa tamen interim omnia, quæ author suo conceptu exprimere vult, huic suo conceptui, quem inconsideratè legendo hauriunt, quemque auctoris esse falsò putant, adscribant; non mirandum est, innumera falsa, ac non raro maximè absurda, authori injustissimè imputari. Alii, qui verò admodum rari, licèt sese lectioni ad aliorum scripta bene percipienda, quamvis suæ, primo aspectu, opinionioni adversa ibidem doceantur, accingant; quia tamen sat temporis ea cum authore meditandi aut bis terve ad minimum relegendi ipsis non suppetit, accidit etiam, ut, se ibidem absurdissimas opiniones invenisse, credant; siquidem sibi de quibusvis quasi vocabulis aut loquendi formis peculiare formare conceptus. Et licèt author suis definitionibus satis declaret, id quod tamen non semper fieri videmus, in quâ significatione sua velit intelligi vocabula; quia tamen in mediâ lectione hæc occurrunt, nobis non advertentibus, consueti potius nostri quàm authoris, quibus non ita assuevimus, conceptus cum iisdem vocabulis redeunt: Ubi ergò diversi conceptus, utut utrinque veri, confunduntur, fieri nequit, quin arbitremur, authorem falsa docere dogmata, etiamsi prorsus contrarium obtineat. Videamus porro, quâ in re ipsi Authores peccent. Hi de aliorum loquentes opinionibus eas nobis sincerà non recensent fide, earumque recensione quandoque nil aliud intendunt, quàm ut videantur multos legisse authores, quos tamen reverà sæpe haut ita, ut par est, evolverunt, præcipuè si iidem sint adversarii, quibus absurditates pro viribus ut plurimum asfingere studium ipsorum est; quam inprimis fortunam veterum illorum, quorum scriptis caremus, opiniones subire præsumuntur. Si verò de suis sermonem habent opinionibus, eas plerumque ita proponere conantur, ut mera videantur esse admiranda, licèt, si verè concipiantur, sicuti veritatis natura est simplex, ingeniosorum fortè nemini sint admirationi, nihilque paradoxum in se contineant. Qui itaque

que talia ipsa experientiâ probè cognovit, sibi potius persuadebit, ingeniosorum virorum opiniones nihil prorsus absurdi includere, si saltem eorum genuina mens nobis reveletur.

II. Secundò pro certo habendum est, magnorum etiam virorum errores nunquam adeò graves & absurdos, ac quidem apparent, sed contrà non raro vulgi cogitatis multò saniores esse: impossibile quippe ferè videtur, eos, qui longâ exercitatione, crebrisque meditationibus toti in eo fuere, ut veritatis semitas indagarent & noscerent, & quidem in rebus hujusmodi, quæ ingenii captum haud superant, à rectâ viâ tantopere posse aberrare, quantopere ii, quibus & diu & multum meditari est difficillimum, solamque consuetudinem, cæcum sæpissime ducem, sequuntur. Et proinde si vir ingenii valde subtilis erravit, necessum est, non levem, sed magnam potius probabilitatem, quæ eum decepit, in causâ fuisse. Hoc ipsum eruditiores crebrò experientiâ addiscunt & proprio & aliorum exemplo, quòd, quamvis cujusdam sententia quandoque absurdissima videatur, quamprimum tanten genuinam saltem auctoris mentem atque probabilitatem, quâ delusus ille fuerat, perceperunt, falsam quidem illam, sed valde tamen probabilem esse, seu à bono sensu non adeò abhorre, eo ipso faciliè observent. Videmus quoque tales viros sibi multos conciliare sectatores: quod sanè non eventurum esset, nisi ipsorum errores magnam veritatis speciem præ se ferrent, aut nisi autores, postquam ritè intellecti, probabiles seu non adeò absurdi viderentur. Absurda enim ne rudioribus quidem persuaseris. Adeoque salutare admodum est, subtilium ingeniorum scire errores, quaque probabilitate decepti errarint, quia eorum lapsus non adeò, ac plures sibi falsò persuadent & obijciunt, facilis est, seu eorum errores haut ita graves & absurdi sunt, quàm quibusdam apparent, & vel ideo nos, qui minus ingenio valemus, & minus exercitati sumus, in

eos-

eosdem, ni bene detegantur, sæpius incidere possemus. Cæterum inter doctos, etiam circa Philosophorum principia, non adeò magnum esse dissensum, demonstrare conati sunt celeberrimi viri, J. B. du Hamel in Consensu Vet. & Nov. Philosophiæ; item in Philosophia Vet. & Nov. ad usum Scholæ accommodatâ; Thomas Cornelius Consentinus in suis physicis progymnasmatibus; Sturmîus in Physicâ suâ conciliatrice, aliique.

III. Nec mirum alicui videatur, ingenia vel præstantissima quandoque errasse, utut veritatis cognitio sit simplicissima: nam præter modò dicta, *conciendi* facultas, ut supra exposui, non sola in nobis est, veluti hæc sola absque imaginatione existit in mente infinitâ seu DEO, qui vel ideo errare non potest; sed etiam *imaginandi* facultas, quemadmodum mentium finitarum conditio se habet, nobis inest, ac proin ab externis impressiones patimur. Quàm verò præclive sit hac de causâ in errores prolabi, in principiis præsertim physicis, aliquo modo supra ostendi. Verùm id præcipuè in tertiâ sectione videbimus, ubi ex hoc solo veram ac primam errorum generationem oriri indicabo. Quàm tenacia ea quoque sint, quibus diu assuevimus, vel ex eo apparet, quod illis, qui scholasticæ Philosophiæ nimis fuere dediti, diu multumque illa philosophandi ratio adhæreat, ita ut, licet postea meliora edoceantur, istius tamen vestigia in scriptis eorum deprehendamus. Nos quod attinet, ipsam imaginationem ibidem loci ita reducemus ad leges intellectûs, ut illam solam sequendo æquè ferè impossibile futurum sit errare, ac si solâ concipiendi facultate uteremur. Quia autem hoc à paucis observatum est, quemadmodum videbimus, mirandum non erit, cur multi, quamvis dictorum haut nescii fuerint, hæc reipsâ tamen accuratè non attenderint, & propterea quandoque in simplicissimis errarint.



Objicient terriò, hoc fundamentum omni ex parte, non esse certum, quandoquidem infinita dentur, quæ nullo modo à nobis concipiantur, quæque nihilominus non falsa, sed potius certissima, sive ea sint naturalia, indefinitus c. gr. stellarum & partium materiæ numerus, &c. sive supernaturalia, quorum certitudo fidei nostræ christianæ per revelationem absque dubio constet.

Notandum idcirco, me ista, quæ superius dixi, quædam non posse concipi, & propterea falsa esse, eo sensu intellexisse, quòd quædam, hoc est talia, de quibus in se spectatis formare possumus conceptum, si ea nequeant concipi, hoc est, si nullatenus possint inter se conjungi, falsa sint. Hoc constat tum ex intellectus definitione, qui, ut dixi, actio est, quâ conamur quædam concipere, & possumus; & quâ conamur iis contraria concipere, hoc est, ea, quæ jam in se concepimus, jungere inter se invicem, & non possumus; tum ex omnibus exemplis hac de re prolatis, ubi semper quædam v. c. circulum & radios in eo æquales esse exhibeo, quæ per se seorsim quidem concipiuntur, sed nullâ ratione à me inter se conjungi seu concipi posse observantur. Patet autem hinc

1. Ea, quæ à nobis non concipiuntur tali ratione, quâ modò explicui, non ideo juxta me falsa esse, verum potius incognita. Quæ enim planè non concipimus, de eisdem quoque non poterimus scire, numne queant conjungi, nec ne, hoc est, nobis ignotum est, ea non posse concipi, & per consequens etiam ignoramus falsa esse, sed ea pro ignotis habemus.

2. Omnia, quæ per solam revelationem certò scimus, uti omnes fatentur Theologi, intellectui sunt impervia, nullumque de iis conceptum naturalem seu philosophicum formare valemus. Jam verò, meâ sententiâ, saltem de his, quæ concipere possumus, in potestate nostrâ est scire, quænam concipi, seu, num ea conjungi possint nec ne; sed

nullo modo ea scire datum, de quibus nullum planè merè rationalem conceptum formare possibile est; & ideo quoque intellectus ope hic sciri nequit, queantne illa conjungi, nec ne, hoc est, anne possint concipi vel non: & per consequentiam nullatenus dico, ea ex meâ doctrinâ falsâ, sed intellectui saltem impervia esse. Nil interim obstat, quin infinita dentur, quæ certissima sunt, licèt solius intellectus ope non possimus cognoscere, vera ne an falsa sint. Accedit adhæc, ea, quæ à DEO, qui solus, ut modo dictum, nulli obnoxius est errori, revelantur, pro omnium certissimis habenda nobis esse.

3. Me hoc tantum de conceptibus admodum simplicibus, vel de ejusmodi valde compositis, qui tamen in simplices semper numero finitos resolvi possunt, intelligere. Examen enim horum omnium, num possint, vel non possint concipi, poterit institui. At verò hoc non intellexi de conceptu adeò composito, qui sortè ex indefinitis aliis constat, uti est omnium stellarum, aut omnium partium materiæ numerus. Hunc enim concipere, nullius utique finiti, sed actu infiniti intellectus est opus. Attamen quænam de infinitis, finito licèt intellectu, absque errore concipere possumus, & quæ non item, suo loco infrâ clarissimè explicabo.

*Quartus.*

Obijcient quartò, meliora longè hoc fundamento ab aliis jam antè monstrata fuisse; talia videlicet ad veritatem acquirendam assumenda esse principia, quæ efficiant, ut, quocunque nos vertamus, de iis nequaquam dubitemus; vel talia, in quibus conscientia nostra sine ullo scrupulo, aut internâ quâdam difficultate plenè acquiescat; vel tandem, quorum semper clara & distincta sit cognitio.

Verum & ad hanc objectionem respondeo:

1. Non ambigendum, nos, si ejusmodi fundamenta obtinuerimus, semper veritatem esse acquisituros. At in eo sita præcipuè est difficultas, unde talia eruamus. Adeoque illi præcipuum, quod hic erat ostendendum, penitus omit-

tunt.

tunt. Sed hoc ipsum à me haut esse neglectum confido: quâ de re ut omnes judicare rectius valeant, ac, ad quæ circa superiùs exposita velim ut vel maximè respiciatur, facilius observare; mentem meam, quam suprà prolixiùs exhibui, hic insuper quasi in synopsi exponere non gravabor. *Primo* itaque notandum est, si corpus quoddam moveat aliud, facillimè concipitur, corpus illud movens oportere quoque in motu esse; econtrà verò, quicquid conemur, concipi nequit, corpus aliquod ab alio posse moveri corpore, si movens absque motu sit. At enim quia simile quid experimur in speciali quâlibet cognitione, verum aut falsum includente, hinc primò conclusi; quòd, quia hoc ipsum, cum aliquid concipitur, effectus quidam in nobis realis est, necessariò etiam causâ quædam ejusdem realis, qualis qualis illa sit, existat; quam causam, seu facultatem, quæ hanc experientiam concipiendi aliquid aut non concipiendi constanter in omnibus circa similia producit, intellectum vocavi, usitatam retinendo vocem, quâ Autores alii hanc intelligendi facultatem exprimunt, & quò vocabulum concipiendi adhibentes inprimis respiciunt: præstat enim meo iudicio (qui & eâdem de re in tertio hujus responsionis membro plura dabo) usitatas aliorum, quantum fieri potest, expressiones retinere, quàm novas præter necessitatem effingere. Porro hinc conclusi, hanc facultatem, quam intellectum dixi, in omnibus æqualem esse hominibus, quia in exemplo jam dato similibusque eadem in rustico æquè ac Philosopho, & cujuscunque homo sit conditionis aut nationis, æqualiter se exerit; adeoque si sola concipiendi facultas in nobis existeret, non viderem sanè, quid ampliùs ad cognoscendum verum aut falsum restaret explicandum, quia unusquisque hâc ratione circa talia semper constantem sibi regulam in seipso experiretur. Verùm intellectus seu concipiendi facultas, non sola nobis inest, sed etiam percipiendi facultas seu imaginatio, cujus ope objecta omnia nos cir-

cumstantia variam in nobis, sed ab extra quasi oriundam, excitant cognitionem. Quatenus igitur intellectus & imaginatio eâdem ratione conveniunt, nullum quoque circa veritatem & falsitatem suboriri potest periculum, sive hac sive illo utamur, (quâ de re in tertiâ sectione prolixius:) verum quia sæpissime imaginatio intellectui planè contraria nobis persuadet, infinita nimirum nobis cognita esse, quæ tamen cognita neutiquam sunt, hæque duæ facultates facillimè etiam inter se confundi possunt; ideo cuidam philosophari incipienti nec ea, quæ supra annotatione primâ in eâdem hac sectione exposui, nec quæcunque alia ab aliis circa hæc in publicum edita extant, sufficiunt, sed necesse est, ut certum insuper signum exhibeatur, quo certiores reddamur, num rem concipiamus aut imaginemur. Hinc *secundo* ostendi, præstans admodum in hoc negotio consilium esse, ut quis scripta ejusmodi aucthorum, qui omnia sua bene conceperunt, sedulo attenteque pervolvat, quia hinc inde duas hæc facultates sæpe à se invicem per ipsam experientiam optimè distinguendi datur occasio, atque sic haut difficultet præcavetur, ne ab eo saltem, quod verum est, abertretius; id quod clarissimè per experientiam confirmatur. Etenim qui in Mathematicorum demonstrandi arte versati sunt, certè evidentius plerumque & firmioribus rationibus, quàm hujus scientiæ ignari, omnia nobis explicare solent. Unde & liquidò patet, quæ ratio sit, cur Cartesium sequentibus notio hæc, in clarâ & distinctâ perceptione solum veram cognitionem consistere, evidens admodum videatur. Nimirum quia Dominus Cartesius in Mathesi singulari se ipsum ratione exercuerat, eo ipso duas has facultates optimè ab invicem distinguere didicit, ut adeò imaginatio tam facili eum negotio, quàm allos, fallere non posset; quâ etiam ratione in Physicis talia, quæ optimè sanè concipiuntur, & tanto quidem numero, quanto ante ipsum nemo, exhibuit: quæ cum ejus sectatores sæpe legerint, seriòque



riòque meditati fuerint, non mirum est, si ad detegendam postmodum veritatem nihil aliud sibi opus esse arbitrentur, *quàm, quid sit clara & distincta perceptio, probè intelligere.* At verò in hoc error admittitur, quòd sibi persuadeant, id omne, quicquid est cognitionis suæ suique ducis, ex solà hac notione ortum habuisse. Quamlibet enim hanc ipsam notionem tantum ignoranti sufficienter proposueris, videbis tamen indubiè, hanc solam ad veri falsique cognitionem eisdem minimè suffecturam, eumque proinde nihilominus sæpe à veritate aberraturum esse. Id quod etiam Cartesius variis in locis expressè fatetur, innuens, hæcce melius exemplis & usu, quàm descriptione ullà, addisci. Si itaque vel hac vel istis notionibus, quarum in hac objectionem fit mentio, alii videntur in veritate indagandà magnos fecisse progressus, hi ipsi certè ex earum merà notitià enati non sunt, sed potius ex eo, quod viri illi alioquin in acquisitione veritatis per ejusmodi rationem, quæ suprà numero secundo initioque terti, ut & hic loci tradita est, valde essent exercitati; qui adeoque reipsà in semetipsis compertum habent, hoc, quod subministravi, consilium, serium putà Autorum probè concipientium lectionem ad prædictam difficultatem curamque illam, num concipiamus rem an imaginemur, tollendam perquam præstans esse remedium, & propterea nullo modo negligendum. Hoc evidentius adhuc futurum esset, si quis laborem in se susciperet, & sequentia in hoc ipso libro, qui ad manús est, seriò atque diligenter pervolveret. Quemadmodum enim hæctenus de facultatibus concipiendi & percipiendi generalia quædam & admodum pauca in primà hac sectione attuli: ita in secundà deinceps & tertià sectione multò fustius exemplis compluribus illustrata eadem persequor: & ita quidem, ut in secundà sectione solam concipiendi facultatem, omnes illius operationes particulatim recensendo, & quam plurima, quæ optimè concipiuntur, exhibendo, considerem; in tertià verò sectione

solam percipiendi inprimis facultatem expendam, speciatim illius impedimenta & quàm multorum errorum causa existat imaginatio, referendo, adeò ut mihi certò persvadeam, quòd, si quis hæc attentè perlustrare, atque sic experientiã in se ipso duarum harum operationum differentiam addiscere voluerit, his perlectis id negotii tam feliciter ipsi postmodum cessurum sit, ut absque ullã difficultate certus secum in hoc esse valeat, num affirmare verè possit, se rem aliquam concipere, aut saltem imaginari, nunque unum cum altero confundatur. Verùm quia hoc remedium, quod intellectus & imaginationis confusionem præpedit, quodque usque huc exposui, à posteriori saltem, ut ita loquar, deducitur; exhibere etiam aliud volui à priori, seu ex ipsã rei naturã, derivatum; idque inprimis hanc ob causã, quia consilium jam exhibitum multam ejusmodi authorum, qui sua bene conceperunt, lectionem præsupponit, propterea-que in principio philosophandi optimum remedium esse nequit, utpote in quo potius ex ipsã intellectus & imaginationis naturã leviter, & in quantum saltem tum necesse est, cognitã remedium statim quoddam, seu certum aliquod has duas facultates à se invicem distinguendi signum derivari debet. Quapropter nec adhuc tum circa superiora acquiescere, sed *tertio* certum quoddam & infallibile signum, quo quilibet absque morã imaginationem ab intellectu distinguere possit, producere lubuit. Perhibent e.g. omnes, cæcum de coloribus non posse judicare; quod utique verissimum, quia, quod ab imaginatione dependet unicè, nec ad intellectum ullo modo spectat, non nisi per imaginationem solam addisci potest. Et quia infinita talia exempla circa colores, sonos, sapes &c. exhiberi possunt, qualia & nos suprã dedimus non pauca; exhinc primò conclusi, clarissimum esse, quòd imaginatio in omnibus hominibus non sit æqualis. Postea exinde deduxi, si cognitionem aliquam habeamus, scireque velimus, num cognita res perfectè à nobis

bis concipiatur, nihil aliud ad hoc opus esse, quam ut eandem consideremus tanquam planè ignotam, ac si nempe eà de re nihil unquam comperti essemus, hoc est, quasi nil quicquam hujus cognitionis à rebus externis nobis adveniret, (sic enim hanc ab imaginationis operationibus optimè separabimus;) atque si hoc non obstante tum clarè cognoscimus, nos nihilominus cum alio quopiam cognitionem eam certò communicare posse, ita ut ille æquè ac nos eandem cognoscat; certum erit, nos istam rem reverà cognoscere. Sed, mentè tuà in hoc ipso nondum acquiescente, magis tutus adhuc atque certus ibis, si alium, qui hanc cognitionem sibi prorsus ignotam esse supponit, tibi quæsiveris, viderisque, num, hac conditione rigorosè observatà, efficere valeas, ut ille non minus ac tu rem eam cognoscat; atque si hoc peragere possis, (quod ipsum, si alter rem à te expositam expositione reciproca bene explicet, statim innotescet,) certissimum erit, te rem concipere: nam concipiendi facultas in omnibus æqualis est, ac proinde efficere etiam poteris, (requisitis ad hoc necessariis, quæ in sequentibus exponuntur, adhibitis,) ut hanc eandem experientiam, quam in te experiris, alter quoque æquè ac tu in seipso experiat. Re itaque eà ratione exposità, ut & suprà prolixius id egi, non video, mihi jam posse objici, quod omnibus ferme aliis, affirmantibus, se rei alicujus claram distinctamque cognitionem, aut veram sive adæquatam alicujus rei ideam obrinere &c. opponi solet, unde nimirum certi sint, rem ita se habere, uti fidenter asserunt. Hæc, inquam, mihi objici nequeunt. Nam si quis mihi statuenti, me rem quandam perfectè concipere, objiceret, unde scirem, me eam perfectè concipere; exhiberem ipsi signum certum, ex quo cognosci facilè posset, quā ego de causà hac in re certus sim, alius verò non item: nimirum quia tunc in potestate meà est efficere, ut alter, hujus scientiæ planè rudis, æquè mecum rem concipiat. Ita Mathematici verè aliquid concipi-

concupientes levi negotio præstabunt, ut & alii prorsus idem, licet ab humanâ cognitione remotum quid esse primâ facie videatur, in se ipsis deprehendant. Pariter & Mechanici artificiosam detegentes machinam, si ipsi eandem verè concipiant, utique etiam efficere poterunt, ut certitudinem successûs, quem prætendunt, multisque promittunt, alius quoque hujus rei ignarus æquè ac illi mente suâ videat. Nec conjicio quicquam amplius, quod à me, vel ab accuratissimo, queat hic exigi. Judicent interim alii ex his omnibus, quæ differentia sit inter illa, quæ ab Autoribus aliis, & inter hæc, quæ à me hac de re luci publicæ sunt exposita. Judicent etiam, num res tam paucis, quàm quidem alii hac suâ objectione affirmant, absolvi possit, & an non potiùs plura adhuc præcognoscenda veniant, quæ ipsa tamen à me sufficienter exposita esse spero.

2. Licet aliquis præjudiciis suis impeditus de re quâdam nequeat ambigere, (quamplurimos enim videmus in falsissimis ita acquiescere, ut satius ducant mortem subire, quàm ab iis vel tantillum discedere,) hoc ipso tamen nondum habet certitudinem, quippe quæ dubitationis privationem non involvit, sed, ut ita loquar, conceptibilitatem, aut inconceptibilitatem, quam verò possidet omnino hic, qui in se ipso & securè novit rem quandam vel posse vel non posse à se concipi. Quinimò hic ob eandem rationem summam habet certitudinem, quâ major dari nequit. Ubi enim notum est, rem posse concipi, aut non posse, nil amplius poterit desiderari ad rem eam melius intelligendam, seu concipiendam: ac proinde nullatenus de rei veritate, aut falsitate amplius hic ipse poterit dubitare; sed necesse est, ut conscientia ejus absque ullo scrupulo, seu internâ animi difficultate, planè in eâ acquiescat. Nec ullâ ratione video, quid clarius, quidve distinctius tali cognitione esse possit; nec etiam conjicio, quare melior veritatis aut falsitatis noscendæ sit exoptanda norma. Nam certè, sicuti lux



se ipsam tenebrasque manifestat, sic veritas & sui & falsi est norma, hoc est, quod verè concipitur, non tantum affirmat, id eo ipso esse possibile seu verum, sed simulac ostendit, ejus contrarium eo ipso non posse concipi, & per consequens, impossibile seu falsum esse.

3. Eadem prorsus ratione, qui voluerit aliorum circa hæc meditationes, ubi de intellectu, ideâ verâ, essentiâ rei, naturâ rei, luce mentium &c. loquuntur, cum meis hisce conferre, insignem, nî fallor, differentiam semper observabit, imprimis verò hanc; quòd, licèt illi differentes de vero & falso opinioniones habeant, & hæc ipsa certis definitionibus, aut, si mavis, descriptionibus, determinare fuerint conati, nunquam tamen videantur, si tale quid occurreret, ad eas respexisse, verum potiùs ad has illasve formulas, quæ meis apprime conformes sunt, relapsos fuisse, qualis v. c. hæc est: *Et quamvis fortè nonnulli aliud profiteantur, non existimo tamen, ipsos aliud eâ de re concipere. Quisquis eorum ad suas attenderit cogitationes, nullo alio intelligibili modo id posse explicari observabit: neque enim ullius mentis dimidiam possumus concipere partem, quemadmodum cujuslibet, ut ut exigui, corporis.* Verbo: Quod verum est, id intelligibile, cogitabile, conceptibile &c. quod falsum, id non intelligibile, incogitabile, inconceptibile &c. esse affirmabunt; & per consequens in idem prorsus mecum concurrent, quicquid etiam alibi loquentes de vero & falso statuerint. Cum verò peculiare loquendi formas adhibere moris mei non sit, utut ostenderim, has, quibus utor, istis, quæ apud omnes in usu sunt, consimiles esse, non tamen renuam, si ita ferat occasio, aliorum quoque formulas usurpare, quoniam non judico, has aut illas alicui obscuras videri posse, maximè, postquam genuinus earum sensus à me, ut spero, satis superque hæctenus fuerit enucleatus.

Licèt igitur magni, meo judicio, sit momenti id obtinuisse, quod hisce paucis in primâ sectione exhibui, ge-

*Transitus ad  
secundam se-  
ctionem.*

nuinum nempe omnis nostræ certitudinis fundamentum, quo verum à falso certò dignoscere, alterumque ab altero discernere licet; hoc tamen nondum sufficit. Etenim opus quoque est, ut sciamus, quâ ratione in instituto ita procedendum sit, ut omnem veritatem nostro Marte detegamus, hoc est, semper absque errore progrediamur continuò nova detegendo. Hoc autem in secundâ sectione summâ perspicuitate explicaturus sum.

## SECTIO SECUNDA.

*Quâ ratione quis semper absque errore possit progredi  
plura continuò nova detegendo.*

*Quâ ratione  
Definitiones  
condendæ, A-  
xiomata in-  
veniendæ, &  
Theoremata  
novæ novæque  
obtinendæ  
sint, explica-  
tur.*

**I**Nfinitam rerum multitudinem dum mente volvo, ac summo desiderio ad intimam earum noscendam naturam feror, hoc est, dum meam scientiam ulteriùs, quantum fieri potest, promovere annitor, nihil aliud opus esse animadverto, quàm ut, juxta traditam regulam, observem, quid possim concipere, quid non. Nam solum attendens ad ea, quæ Sect. 1. num. 1. sunt dicta, nempe quid queam concipere, eo ipso mihi videor rectam veritatis viam ingredi. Hæc ulteriùs juxta regulæ ejusdem Sectionis num. 3. præscriptum ad examen revocans, experior, me de eorum plurimis, quorum conscius sum, nullum planè conceptum habere; adeoque ne à rectâ viâ semel initâ unquam aberrem, hæc ipsâ, de quibus conceptum nullum habeo, ab aliis, quæ verè concipiuntur, accuratè distinguo, nullus dubitans, quin hâc ratione tutissimè procedam. Ut autem in viâ hac, quàm poterò, longissimè progrediar, levi negotio colligo, nil magis hic è re fore, quàm ut omnes possibiles conceptus, quos mentem meam posse formare observo, mihi acquirere studeam. Quæ res ne nimium accrescat, ac finitæ meæ mentis potentiam longè exsuperet, & interim tamen omnia ita  
adæ-

adæquatè ac omnino complectar, ut certus sim, nihil à me esse prætermissum, primò omnes possibiles primos conceptus, ex quibus formantur reliqui, redigam in ordinem, eosque imposterum *Definitiones* nominabo: secundò has ipsas definitiones in se considerabo, & hinc deductas proprietates appellabo *Axiomata*: tertiò definitiones inter se omnibus modis, quibus id fieri potest, jungam, ac veritates inde derivatas *Theoremata* dicam. Cùmque his ita positis, pro viribus attentissimè circumspiciens non videam, ad quam aliam actionem naturà apta sit mentis meæ potentia, ac ad quæ alia cognoscenda extendere ea se porro queat; hinc absque dubio statuam, quòd his ritè peractis tantum scientiæ, quantum humanitus fieri potest, nobis comparaverimus. De his tribus ideo solum parandis hic loqui animus est.

Et circa *definitiones* quidem notandum in principio venit, Definitionem, juxta dicta, *esse primum alicujus rei conceptum*, seu *primum, quod de re concipitur*. Hinc clarum, De definitionibus; ubi consideratur, quid sint: unde patet

Primò, tales à nobis posse formari conceptus, seu, nostri planè arbitrii esse definitiones condere. Nam unusquisque in se ipso, quid prius, quid posterius sit concipiendum, semper observare potest, nec minùs experietur, quid tandem omnium sit primum; id nimirum, quo aliquid prius concipi posse repugnat. Ita observamus, motum non posse concipi, nisi mobile concipiatur, nec mobile posse concipi, nisi antè extensum quid concipiatur, at denique verò, nil extensione prius concipi posse. I. in nobis esse facultatem eas formandi.

Secundò patet, omnem rei singularis definitionem semper ejusdem rei primum formationis modum oportere includere, quem alicujus rei *Generationem* nuncupabo. Rem enim quandam verè concipere nihil aliud est, quàm actio seu formatio mentalis alicujus rei; atque ideo id, quod de re aliquà concipitur, nil aliud est, quàm illius rei primus formationis modus, vel, si mavis, generatio. II. Eas semper generationem alicujus rei debere exhibere.

finitio est primum, quod de re concipitur, & quò aliquid prius concipi posse repugnat, generatione verò etiam nihil prius de re ullà concipi queat, omnis sanè legitima seu bona definitio includet generationem. Habebimus itaque hic regulam infallibilem, secundum quam non solum definitiones certò bonæ, vel, ut aliis dicuntur, scientificæ, hoc est, quæ scientiam pariunt, semper proprio Marte condi, sed etiam, quanti aliorum definitiones æstimandæ sint, dignosci possunt. Quicunque ad hanc normam aliorum examina-verit definitiones, errorum inibi occurrentium copiam mirabitur. Liceat nonnulla saltem ejus rei exempla commemorare, & è paucis hisce de pluribus aliis colligere. Quod enim ad Mathematicos attinet, si Euclidis de proportionalitate definitio esset bona, hoc est, si ea generationem proportionis includeret, tot de eà disputationes procul dubio non fuissent ortæ. Quod ad Ethicos spectat, si illorum definitiones forent genuinæ, animi passiones statim in nobis excitarentur, simul ac ea adessent, quæ ad eas excitandas earundem definitiones requirunt. Sic, si definitio, quæ naturam risus explicat, proba esset, subito datis tantum iis eadem definitione ad ridendum requisitis, in aliis risum moveremus; quemadmodum idipsum futurum est, si quis profiteatur, se quicquam vel consuetudini vel sanæ rationi admodum apertè adversum commisisse: veluti econtrà unusquisque mirabitur, si certò statuatur, aliquid posse fieri, quod sanæ rationi apertè repugnare videtur. Nec erit cui, qui saltem novit tum aliorum consuetudines usitatissimas, tum ea, quæ alii præcipuè pro veris falsisque habent, difficile efficere, ut hi rideant, isti in admirationem conjiciantur. Ita risu iste exciperetur ab omnibus, qui se ignem ex glacie suscitaturum promitteret; sed omnes eum admirarentur, si idem præstaret: posse autem id fieri, notum est, si quis scilicet glaciei figuram convexam, qualis causticis vitris est, dederit, atque eadem etiam ratio est in cæteris.

Quod



Quod Physicos concernit, bona sanè apud illos definitione nihil rarius. De Domino des Cartes quid dicam? Equidem in incomparabili viro id nunquam satis æstimari posse puto, quòd ab innumeris præjudiciis, quibus nos omnes ab ineunte ætate nimium quantum imbuti sumus, se omnium primus adeò feliciter liberaverit, ut anno hujus Seculi XXXVII. præstantissima ingenii sui specimina edere posset, quæ ipsum à multis retro annis in meditationibus ejusmodi versatum fuisse satis probant, cum tamen ferè omnes alii circa has res in crassissimis ignorantiae tenebris tum temporis versarentur. Sed quamvis hæc se ita habeant, atque inter alia in physicis ea præcipuè præstiterit vir ingeniosissimus, ut profectò illis paria à quoquam edita hactenus non viderim: ambigendum tamen non est, motus definitionem, quam tradit ipse, non nisi ejus proprietatem declarare, genuinam verò motus naturam sive generationem non includere; unde magnæ ortæ sunt difficultates. Nam si, ad ejus mentem, motus nihil aliud est, quàm separatio corporis à contiguo corpore, quis inde non concludet, utrumque tam quiescens, quàm motum corpus moveri? Si manum, exempli causâ, separavero à mensâ, mensa itidem eo ipso separabitur à manu, adeoque juxta ejus definitionem & mensa & manus movebuntur; id quod sanæ rationi ac planè manifestæ repugnat experientiæ: nam sola certè manus movetur. Licet verò alio loco explicet motum per vocabulum translationis, non autem separationis, quisque tamen attentus facile perspicit, motus effectum sic saltem describi, sed causam efficientem non exhiberi. Hanc si monstrasset, dubio procul haud statuisset, corpus à manu motum & ab eadem separatum continuò, nî corpora obstarent, motum iri; quod, me judice, falsissimum est, quemadmodum hoc amicis ante aliquot annos per literas clarè demonstravi. Optimè deinde noravit, Philosophos omnes, qui ante eum vixere, aliquid pro principio posuisse, quod ipsis plenè cognitum non

fuerit, e. gr. gravitatem. Sed quantumvis & in hac re egerit cautissimè, effugere tamen non potuit, quin in similem incideret errorem. Nam nullam quietis definitionem proferens, durum ideo vocat durum, quòd ejus partes quiescant, hoc est, obscurum per æquè obscurum explicat: quæritur enim, quare partes sint in quiete. Hæc clariùs suo loco explicata & refutata invenientur.

III. De his  
non possè  
dubitari.

*Tertiò* patet, ejusmodi datà definitione, nullum amplius dubitationis locum de rei definitæ certitudine relinquì. Nam re quâdam conceptâ, quisnam eam concipiens dubitabit, an concipiatur? aut quis, monstratâ sibi rei alicujus generatione, ejusdem possibilitatem desiderabit? Ut taceam, nos ut plurimum ipsâ experienciâ esse cognituros, num ex datis iis, quæ definitio requirit, necessariò talis sequatur effectus. Sic Ethici nil præstantius aut amabilius virtute, hanc omnibus præferendam esse, hanc nos reddere felices, seu solam nobis sufficere ad beatè vivendum, ac his similia, clamitant. Sed videant alii, num harum rerum veritas ex datâ ab illis virtutis definitione statim nota futura sit, id quod mihi minimè videtur; num verò virtutis hæc prædicata melius sint cognituri, si eam ita definirent. Virtus est potentia in homine ex legibus sanæ rationis suam naturam conservandi, hoc est potentia omnes reales perfectiones mentis & corporis sibi comparandi, seu naturæ nostræ ex legibus sanæ rationis realis perfectio, vel si mavis melioratio. Regeres equidem, virtutem ejusmodi multò ratiùs fortè inter homines reperiri, ac bona apud Ethicos tales inveniat, ejus descriptio; sed negare interim non poteris, hæc, quæ alii tantopere de virtute prædicant, ex hac ipsa definitione cuivis statim perspicua esse. Nam si virtus reverà nihil aliud est, quam naturæ nostræ ope Intellectus (non præoccupati sed à præjudiciis purificati) realis (quam quilibet possidens in seipso percipit, non imaginaria) perfectio seu naturæ nostræ melioratio; Quid quæso præstantius aut amabilius

lius erit virtute? hæc utique omnibus tunc præferenda erit, nos omnimode ( quantum per naturam possibile ) reddet felices, ac sola nobis sufficiet ad beatè vivendum?

Ex hisce verò perspicuum, haud magni momenti esse, quod vulgares præstiterunt Philosophi, dum bonam definitionem volunt constare ex genere & differentiâ. Datâ enim rei generatione, uti hic postulo, hoc ipso, & quid ea cum aliâ re habeat commune, & in quo ab eâdem differat, scire datur; atque ita semper vera differentia, quæ dicitur specifica, indicatur. Præcipiunt quidem boni hi magistri, hanc differentiam esse assumendam, sed verò medium, quo ea obtineri possit, & quod hic primum est, ne minimo quidem digito monstrant. Nec video, quenquam in veritatis inquisitione multum progressurum iis, quas vulgò habent, definitionibus. Videamus, quæso, definitionem, quam nobis tanquam perfectissimam isti Philosophi obtrudunt, nempe hominem esse animal rationale. Hic certè non invenio, cognitâ hac definitione aliquem multò eruditorem, ac antè fuit, evasurum peculiaremque sibi, quam non rudior quivis rusticus jamjam habeat, cognitionem comparaturum esse, nisi quòd fortè hic, se animal esse, dubitare videatur. At si quis mea secutus vestigia, primum, ut dixi, conceptibile, seu primum possibile, rei definitæ definitione completatur, hoc ipso se illi ejusdem rei generatio necessariò patefaciet, nec adeò deerit occasio, vel de homine, vel de aliis animalibus talia inveniendi, quæ rustico haut ita erunt nota, & ex quibus, se magna & præclara deducere posse, comperiet. Equidem non diffiteor, ad meam sententiam illos aliquanto propius accedere, qui dixerunt, bonam quamque definitionem causam efficientem debere includere; hoc tamen magis experientiâ, quàm à priori, uti nos deduximus, didicisse videntur. Nec deinde satis est id ipsum affirmare, nisi etiam, quâ viâ omnium rerum causas efficientes certò per te ipsum assequi possis, clarè ostenderis. Quod, quâ

quâ ratione fiat, nisi evidenter explicetur, non adeò levi negotio primo statim aggressu patere id existimandum est. Ad hoc autem explicandum me jam accingo: ubi si talia, quæ Lectores non omnes statim assequuntur, tibi occurrant, auctor sum, ut ea interim transeas, & absque nimîa attentionis defatigatione continuò in lectione pergas; quoniam alia quoque exempla magis vulgaria semper miscere, aut præcepta tam evidentia dare animus est, ut prioribus neglectis ea, quæ summam ad detegendâ veritatis per nos ipsos methodum pertinere videbuntur, hinc æquè, ut spero, haut difficulter tibi acquisiturus sis.

II. Quâ ratione  
sint inveniende:  
ubi tres  
regulae exhiben-  
tur, dubia cir-  
ca hæc expla-  
nantur; & de-  
nique, quicquid  
restitat obscuri,  
exemplis illus-  
tratur.

Secundò. Hisce observatis jam videndum est, ut mihi omnes definitiones, hoc est omnium primorum conceptuum seriem acquiram. Eâ enim serie detectâ potero, quousque placuerit, pergere, & ubi locorum libuerit, gradum iterum sistere: atque hoc perinde erit, ac si omnes, licet numero essent infinitæ definitiones, possiderem. Quæ omnia tibi quoque, Lector Benevole, non nimium difficilia erunt imitatu; sed ne opineris tamen, ea statim vel primâ lectione posse addisci. Hac enim vice nihil aliud necessarium est, quàm id saltem, *quâ ratione definitiones formande sint*, (quod ipsum vel ex paucis hisce sub titulo, *quid sint* definitiones, hætenus expositis innotescit,) bene assequi, ac insuper, sed perfunctoriè saltem, ea perlustrare, quæ ad titulum, *quâ ratione sint inveniende* definitiones, inpræsum sum traditurus. Videbis etenim reipsâ, hæc pauca sufficere, non solum ad omnia sequentia bene intelligenda, sed etiam ad infinita problemata solvenda, prout in fine hujus sectionis aliquando perquam manifestum erit. Quod verò ad seriem omnium definitionum, seu primorum conceptuum, determinandam attinet, etiamsi illam unâ & eadem operâ claris tribus præceptis explicaturus, dubiaque circa hæc, quantum necesse videbitur, remoturus, & exemplis tandem perspicuis omnia illustrare allaboraturus sim; attamen res hæc



hæc profectò tam ardua est, ut fieri vix posse credam, cam statim ab unoquoque captum iri: præsertim quia nonnulla hujusdem rei partim à satiori experienciâ, partim quoque à reliquorum istorum, quæ in toto hoc opere explicantur, cognitione dependent. Quapropter non opus erit, in primâ lectione, quòd jam antè etiam monui, his ipsis te multum fatigare, liquidem pervia tibi non statim videbuntur. Ut autem nihil eo minus hoc institutum jam nunc, quoad ejus fieri potest, à me perficiatur, tres hæ generales notentur regulæ, quarum prima hæc est:

Quando aggredimur rem quamcunque tractare, primò cogitationes, quas de eâ habemus, absque ullo ordine percurrento, Regula generalis prima. nulle specialiter, sed omnes potiùs, quantum fieri potest, generalissimè sunt consideranda: deinde ad illas erit attendendum, quæ nos diverso modo afficiunt, & hic tot eorum genera, quot nimirum ejusmodi observamus diversitates, sunt constituenda: tandem maximopere, ne aliquid talium generum prætermittatur, cavendum erit. (2.) Unumquodque porro nostrarum cogitationum genus, rursus eadem ratione, hoc est, triplici respectu nominato considerandum; & si novâ hic exsurgant diversa genera, quodvis eorum eodem etiam modo erit tractandum. (3.) Atque hic processus eò usque continuandus, donec ad ejusmodi perventum sit genera, cum quibus reliqua entia nihil commune habent, sed quæ singula diversam naturam, seu diversam generationem habere observantur vel concipiuntur; & ita horum generum cognitio penitus erit exhausta.

Notanda verò circa primam hujus regulæ partem veniunt

1. Si quis ex me quærat, unde cognoscere liceat, quænam sint generalia; quænam non, respondeo: si quis reipsâ observavit, quasdam cogitationes sub se alias completi seu includere, priores sive includentes utique erunt generaliores, posteriores autem sive incluse specialiores. Hinc liquet, me intelligere per genera entium ea, quæ plura

tia, diversam quidem generationem, sed communem tamen habentia naturam, sub se comprehendunt.

2. Si verò quis sciscitetur, unde sciri possit, utrum aliqua inter plures cogitationes diversitas sit, nec ne, hoc loco nihil aliud respondere licet, quàm hoc ex eo colligi, si, propriâ teste conscientia, diversitatem vel aliquam vel nullam percipimus. Verùm maximè notandum est, hic inprimis ad alicujus rei diversitates non externas, sed internas, quantum fieri potest, respiciendum esse, quod ipsum clariùs in sequentibus explanabitur.

3. Si quis interroget, quid observandum sit, ut certò noscamus, plura diversa cogitationum genera non dari, responsi loco accipiat, id hinc evidenter sciri posse, si observetur, vel à posteriori, omnes meas particulares cogitationes in hisce cogitationum generibus ita includi, ut nullam earum omissam esse appareat; vel à priori, si impossibile sit, plura diversa genera concipi posse. Verùm ne quid hic desideretur, omnia hæc ad pleniorē rei intelligentiam exemplis declarabo.


Omnes meas cogitationes, hoc est, quicquid ab ineunte ætate videndo, legendo, vel audiendo cognovi, per aliquot tempus eo ordine, quò in eas incidi, perquam generaliter seu summatim recolligendo, hinc confusum satis oriri video chaos. Ad quod si perlustratione denuò inità atrendo, indagans præcipuè, num hinc quædam sint, quæ me diversimodè afficiant; comperio, me triplicem præsertim ac singularem in iis diversitatem observare.

I. Etenim observo, quarundam harum cogitationum objectum esse ejusmodi entia, quæ percipi potius à me, quàm concipi, videntur. Hæc enim non rarò menti, ubi prorsus aliud quid cogito, etiam præter meam voluntatem, sese ingerunt, eamque planè occupant; qualia sunt omnia entia, quæ mihi tanquam externa se repræsentant, adeò ut mens, harum cogitationum respectu, se saltem passivè habeat, quem-

quemadmodum hæc in primâ Sectione fusiùs declaravi. Et quanquam etiam non diffitear, quædam harum cogitationum objecta me concipere, ita ut horum respectu mens etiam aliquo modo activè se habeat; semper tamen aliquid, quod à mente non dependet, iis admixtum esse deprehenditur. Talia itaque entia, quæ mihi hæc ratione repræsentantur, *Imaginabilia*, aut *sensibilia*, vel, si mavis, *phantasmata* imposterum appellabo.

2. Observo, quædam talia esse, quæ non solum optime, sed etiam variè à me concipiuntur, veluti ea sunt, quæ de Figuris, Numeris, Motibus ac similibus novi. Sit, exempli gratiâ, linea recta A B, cui applicetur perpendicularis D E, æqualis ipsi A D. Fiat hoc idem in omnibus punctis, quæ in lineâ A B possunt concipi. Figura hinc orta A B C erit triangulum aliquod. Hanc figuram variis aliis quoque modis ortum habuisse, fingi potest. Ponantur enim A B & B C æquales & ad angulos rectos, ducaturque linea A C, hic dubitari nequit, quin idem formetur triangulum. Dividatur item quadratum A F C B per lineam A C dividentem angulos oppositos, & idem hinc triangulum exsurget. Idem quoque triangulum ex numerorum naturali ordine crescentium progressionem originem ducere concipi posset, ita ut D E referat unitatem, G H binarium, I K ternarium &c. Non minùs idem ut mobilis alicujus æqualiter sive uniformiter accelerati velocitates concipi posset, referentibus A D, A G, A I &c. tempora, D E verò, G H, & I K &c. velocitates illis temporibus acquisitas. Atque ita idem infinitis adhuc aliis modis variè concipere licet. Talia autem entia, quæ sic variè concipiuntur, quæque nullam extra me videntur habere existentiam, cum in iis nihil concipiam, præter puram extensionem abstractissimè sumptam, seu ab

Fig. 2.



omni materiâ secretam, *Rationalium* sive *Mathematicorum*, nomine impoſterum inſigniam.

3. Denique obſervo, me quorundam entium habere cogitationes, quæ quidem à me optimè, non tamen inſtar præcedentium rationalium variâ, ſed unicâ tantum ac conſtanti ratione concipiuntur; adeoque deprehendo, ejusmodi cogitationes nullatenus variè ad libitum formari poſſe, ſed abſolutè à propriâ eorundem entium naturâ dependere, ut non à me formandæ, ſed potiùs quaſi mecum formatæ dici poſſe videantur, harumque objecta non niſi ut exiſtentia poſſint concipi, cum, ſicubi ea exiſtere concipiam, eo ipſo ſemper omnis alterius entis exiſtentiam ibidem excludant. Cujus generis, exempli gratiâ, ea omnia ſunt, quæ ut materialia concipimus, hoc eſt, quæ extensionem, non puram ſeu penetrabilem, qualis eſt Mathematica, ſed impenetrabilem, qualis omnium corporum eſt, præſupponunt. Hæc verò entia *Realia* ſeu *Phyſica* appellabo.

Video itaque tria diverſa mearum cogitationum dari genera, nempe circa vel *Imaginabilia*, vel *Mathematica*, vel *Phyſica*. Attendendum jam probè, annon his plura concipiuntur. Ad hæc reſpiciens, obſervo, omnia, quæcunque unquam hætenus cogitavi, ita ad hæc tria reduci, ut niſi quicquam planè, quod prætermiſſum ſit, queat oſtendi. Id ex eo quoque evidenter cognoscitur, quòd, ubi quis ad ſe ipſum ſedulò attendit, non niſi tres intellectûs operationes obſervet. Quæ enim à nobis intelliguntur, ea concipiuntur (1.) vel ut extrinſecus advenientia: atque hunc concipiendi modum eo præſertim in loco, quo hæc accuratiùs paulò tractaturus ſum, vocabo *Imaginationem*, quæ reſpectu noſtræ mentis activè ſe habet, ut diſtinguatur ab alio cogitandi ſeu imaginandi modo, ad quem mens noſtra ſe merè paſſivè habet, de quo ſuprà locutus, ſtatimque circa explicationem partis ſecundæ hujus regulæ plura dicturus ſum: (2.) vel concipiuntur ut quædam abſtracta ab omni materiâ, quem



quem concipiendi modum *ibidem*, nimirum ubi hæc accuratius, ut dixi, tractabuntur, *Rationem* appellabo: (3.) vel ut realia, & hunc concipiendi modum tunc *purum intellectum* nominabo. Nec sanè plurium intellectus operationum mihi sum conscius, quæ his tribus non includantur. Imò fingatur, plures dari, planè tamen non video, quamdiu earum nullo modo conscius fuero, quid mihi vel prodesse vel obesse queant: idem ergò erit utique, ac si reverà plures non existerent. Jam vero tot hinc entia oriuntur, quot intellectus sunt operationes, quarum cum tantummodo, velut jam ostensum, tres dentur, tria quoque ejusmodi entia, & non plura, dari colligendum est. Unde & clarè patet, quòd, etiamsi tria hæc entia non nisi unicum quoddam ens sint, habito tamen respectu ad triplices, qui de hoc unico ente formantur, conceptus, hic tanquam tria considerentur. Id, quà ratione semper in quâlibet re accadat, exemplò speciatim declarabo.

Sit aliquod quadratum hic juxta positum: hoc unicum tantum ens est, verum consideratur ut triplex, ob tot intellectus operationes, I. ut extrinsecus adveniens, quomodo visui repræsentatur, quando meas concipimus lineas, quæ latitudinem habent inæqualem, & numero sunt quatuor, quæque non adeò æqualibus junguntur angulis & quæ ejus generis plura: atque hæc quidem mens nostra ope imaginationis, hoc est passivè, percipit. Quia verò hæc omnia perfectè etiam concipiuntur, eapropter paulò antè hoc nuncupavi *imaginari*, quod se quodammodo activè, respectu mentis nostræ, habet. Sed quod & quadrati hujus ambitus niger, & area interior alba sit, de his nullum prorsus conceptum habemus, & ideo dixi, ea ad modum imaginandi passivum spectare, quò hæc à prioribus probè distinguerentur. 2. Idem hoc quadratum concipitur

Fig. 2.



ut abstractum quid ab omnibus inæqualitatibus, & tunc id ipsum penitus diversum est à quadrato, quod antea mihi extrinsecus per sensus oblatum concipiebatur: ibi enim lineas inæqualis longitudinis, seu quadantenus æquales, hic verò perfectè æquales concipio; deinde lineæ ibi habent latitudinem pro apicis calami eas describentis latitudine, hic contra lineas nullius concipio latitudinis; tertio ibi lineis inæqualis latitudo est ob calami apicem, qui tenui crenâ pro variâ ejus pressurâ jam crassiores, jam graciliores efficit lineas, quò etiam facit inæqualis atramenti & fluiditas & affluxus, papyri asperitas, ac id genus alia, unde hæ lineæ latitudinis seu crassitie valde inæqualis figuram nanciscuntur, hic è contrario ubique tali ratione concipiuntur, ut hæ inæqualitates penitus absint; tandem ibi nec illi quidem quatuor anguli ob hanc linearum, de quâ dixi, inæqualem delineationem perfectè æquales esse queunt, cum hinc econtra omni ex parte æquales esse concipiantur; ut adeò hoc quadratum abstractè conceptum ab eo, quod tanquam extrinsecus adveniens concipitur, toto genere differre sit perspicuum. 3. Idem quoque quadratum, ut in se reapse est, poterit considerari. Nam si omnium eorum, quæ atramenti, quo describitur quadratum, compositionem ingrediuntur, veram intelligeremus naturam, comperiremus etiam, tale quadratum, quatenus nimirum in se ipso tanquam materiale quippiam, seu ex atramento constans concipitur, non solum à quadrato per sensus extrinsecus repræsentato, sed & ab eo, quod abstractè concipitur, planè diversum esse. Cum itaque quadratum hoc reipsâ unicum saltem sit, & triplici tamen modo concipiatur, clarissimè exinde patescit, unum idemque ens physicum ob triplicem cogitandi modum ut triplex spectari. Hinc addiscimus, ad scientiam nostram, augendam tres inprimis veritates esse acquirendas, rerum scilicet *Imaginabilem*, *Rationalium* ac *Realium*; sed existimo tamen, id ipsum non in præsentem, verum eo demum loco

loco expofitò effe agendum, ubi de hifce in fpecie tractaturus fum. Hic enim loci generalia tantùm artis invenienti trado præcepta, & ex confequenti, quid omnibus fit commune, determino.

Quantum ad fecundam fuperioris regulæ partem, ubi dicitur, unumquodque diftinctarum harundem cogitationum genus iterum eâdem ratione, quâ hactenus ufus fum, pertractandum effe, attinet, eam quidem jam fatis juxtâ cùm ipfâ primâ parte explicatam effe credo; fed eandem tamen exemplis etiam, utut quædam huc referre neceffe non habuerim, ultrò illuftrare animus eft.

*Explicatur  
pars hujus  
regulæ fecundæ, circa  
entia*

Obtinuimus jam tria entium genera, *Imaginabilem*, *Mathematicorum* & *Physicorum*: quodli verò omnia fub his generibus comprehenfa cognofcibilia diftinctiùs determinare vellemus, eorum unumquodque in alia rurfus genera, quantum fieri poteft, distribuendum effet.

Sint exemplum entia primùm imaginabilia. Sedulò hic circumfpicientes obfervamus

*Imaginabilia.*

1. Horum nonnulla talia effe, quæ, ut percipiantur, externorum præfentiam exigunt; qualia funt, quæ vifû, auditu, tactu &c. percipimus.

2. Quædam, quæ & à prioribus, fenfu fcilicet perceptis, unicè defumpta videntur, effe talia, ut, licet longè abfint, interim tamen tanquam objecta præfentia à nobis confiderari poffint: cujusmodi funt omnium abfentium internæ repræfentationes, vel, fi mavis, imagines.

3. Quædam nullo modo nobis repræfentari poffe, quandoquidem ne ullam quidem eorum imaginem formare licet, quanquam ea vividiffimè percipiamus: cujus generis ea omnia funt, quæ placent aut difplicent, ut, doloris, voluptatis, odii, amoris perceptio, edendi bibendique appetitus &c. verbo: omnes noftræ paffiones. Nam etfi objecta & occafiones, unde hæ oriuntur, itemque actiones, quæ ex ejusmodi producuntur paffionibus, ferè femper imaginari  
lici-

licitum sit, id ipsum tamen, quod hinc in nobis excitatur, & quo ita afficimur, sub nullius imaginis ratione percipitur.

Quòd autem hisce tribus generibus omnia entia imaginabilia complexi simus, patet partim ex hæcenus in explicatione partis primæ hujus regulæ, ac passim alibi dictis, partim ex jam dicendis. Cum enim mens nostra ens sit finitum, ac eapropter ab externis dependeat, considerari potest vel ut agens, vel ut patiens: quâ agit, eam *concupiendi, seu intelligendi*; quâ patitur, *percipiendi, seu imaginandi* facultatem voco. At verò intellectus operationes tres novimus: prima peragitur, quatenus intellectus ens physicum admodum remotè concipit, quemadmodum fit per imaginationis nostræ activæ operationes; secunda, quatenus ille propinquiùs idem ens abstractè per rationem concipit; tertia, quatenus illud per se, seu immediatè, prout in se est, per purum intellectum concipit. Eadem planè ratione imaginationis functiones tres tantum dantur. Nam impressiones externæ agunt in mentem vel admodum remotè, quod ipsum per sensus efficitur, quam imaginationis functionem dicemus *sentire*: vel propinquiùs, quod peragitur per absentium rerum internas repræsentationes, quodque propriè *imaginari* appellabimus: vel omnium proximè seu immediatè per passionem, quod aptiori destituti vocabulo, *percipere* seu *affici* vocabimus. Plures impressionum gradus nec possum concipere, nec eorum ullo modo sum conscius, ac idcirco constat ex iis, quæ suprà de intellectus operationibus ratiocinatus sum, plures imaginationis functiones non dari, hoc est, omnia entia imaginabilia hisce tribus generibus comprehendi. Hic iterum facili negotio possem demonstrare, quâ ratione hæc, quamvis ob tres istas imaginationis functiones tanquam tria diversa considerentur, nihilominus tamen suo modo semper quasi conjuncta sint, seu unicum idemque ens imaginabile constituent. In re enim visu percepta tria obveniunt, primò nimirum ens sensibile, dein-



deinde, quod interne repræsentatur, ac demum, quod gratum aut ingratum est; quæ tria tamen unum & idem esse videntur. Impressio enim hæc uno & eodem instanti peragitur, atque ita unica est, licet à nobis, ac si tres diversæ impressiones forent, spectetur. Quia verò accuratior horum tractatio huc non pertinet, eatenus saltem hæcce declaro, quatenus sequentibus explicandis inserviunt.

Acquisivimus nobis jam tria nova entium imaginabilium genera: adsumamus autem denuo primum, illa nempe entia, quæ *sensu* percipiuntur, & hæc eadem, quæ in regulâ generali præscribitur, ratione tractando debitâ attentione adhibitâ observabimus; 1. eorum quædam talia esse, ut nulla planè conceptu possibilia mihi repræsentent; unde nullos omnino de iis conceptus formare possum, ita ut nesciam, sintne entia, an variæ entium repræsentationes: cujusmodi sunt colores, soni, lux, tenebræ &c. adeò ut, si ex conscientiæ sensu velim loqui, prorsus nihil aliud nôrim, quàm quòd diversimode me afficiant.

2. Quædam eorum esse, quæ, licet de genuinâ illorum naturâ mihi quoque non constet, possibilia tamen plurima mihi repræsentant, & se itidem tanquam entia realia sistunt: unde multi conceptus de hisce queunt formari, ut sunt, exempli gratiâ, figuræ rerum, varia earum magnitudo, motus diversi, diversus situs &c. Quis enim in igne & aquâ varium motum, magnitudinem in arboribus variam, in lapidibus varias figuras, varios in animalibus motus, & diversum in iisdem membrorum situm, formam solis rotundam, lunæque vicissitudines &c. non observat, atque advertit, se hæc omnia optimè concipere, utut interim de totâ harundem rerum naturâ nullum fortè conceptum habeat?

3. Permulta ejusmodi entia observo, quæ, tametsi nihil de materiâ, ex quibus constant, intelligam, tamen omnia possibilia mihi repræsentant, adeò ut hinc perfectè ea possim concipere, qualia, verbi causâ, sunt omnia, quæ di-

cuntur arte facta, machinæ diversæ, structuræ item ædificiorum, navium & similibus.

Atque ita facilè video, me iterum hic nihil omisisse. Quicquid enim extrinsecus sentio exhiberi, id ad aliquod horum generum reduci posse deprehendo. Quia verò hæc demonstratio à posteriori tantum, ut dicitur, est desumpta; satius erit, unam ex iis, quas à priori nominant, adhibere, quâ liquidò constet, impossibile esse, his plura ejusmodi posse concipi. Paret autem facilè, aliquod ens imaginabile mihi repræsentare possibilia vel nulla, vel quædam, vel omnia ea, ex quibus componitur; quantum concipi nequit. Ex quibus tria nova genera obtineo, quorum unumquodque eadem methodo tractandum. Sumamus ex. gr. secundum genus imaginabilium modò inventorum. Hinc rursus observo nova genera exoriri, eorum nimirum, quæ vel lucem emittunt, ut lucida: vel transmittunt, ut pellucida: vel remittunt, ut opaca. Ad quæ D. des Cartes videtur maximè respexisse.

*Mathematis*


Explicemus porro eandem hujus regulæ secundam partem de entibus *Rationalibus*. Omnibus hic exactè perpensis, quæ in quibuscunque particularibus Matheſeos objectis mihi nota sunt, obtulit se in hisce nihil aliud considerandum, quàm

1. Quòd ejus objecta vel æqualia vel inæqualia; quodque ea, si inæqualia, vel majora vel minora sint. Adeoque haud opus erit plura hic considerare objecta, sed hæc eadem in uno eodemque objecto, quod hoc admittit discrimen, spectare: ex quibus tale præ cæteris eligendum est, quòd facillimè imaginationi respondet, & ad quod particularia quævis Matheſeos objecta levi negotio reducuntur: non aliter ac suprà triangulum vel ut figuram, vel ut numerorum progressionem, vel ut mobilis alicujus velocitates considerabamus.

2. Quòd ideo nihil hìc haberi possit ad propositum convenientius rectis lineis. Has enim solas facillimè imaginamur, atque ad easdem omnia Matheseos objecta levissimò reducimus negotio. Nam hæ universas, quotquot in quibuscunque aliis scientiarum Mathematicarum objectis occurrunt, proportionès seu relationes commodissimè repræsentant. Sit enim vel quæcunque progressio, sive ea sit Arithmetica, sive Geometrica; vel omnium successivè partium in solido, figurà curvâ, aut curvâ superficie &c. dimensio, seu quadratura; vel alicujus mobilis, quomodo libet accelerati, velocitates &c. hæc omnia profectò quàm aptissimè poterunt repræsentari per rectas  $bg, ch, di, e k, fl$  &c.

3. Quòd talium rectarum extremitates  $g, h, i, k, l$  &c. curvam formare incipiant. Hinc ergò clarè colligo, ad omne id, quod in totâ Mathesi rarum aut absconditum est, detegendum requiri tantum, ut omnes curvas possibiles, quotquot concipi possunt, consideremus. Hâc enim ratione omnium Matheseos objectorum relationes possibiles nos exhibituros esse confido;

adeò ut, si postea difficultas aliqua in particulari quâdam ejus scientiâ occurrat, nihil aliud ad eandem solvendam opus sit, quàm curvam illam, quæ rei isti respondet, ostendere: atque ita eadem operâ semper infinita, ob totidem curvæ puncta, solvemus. Scientiarum idcirco, in quâ omnia continentur, quæ quidem ad talium objectorum, seu curvarum, noticiam tantum pertinent, hauri incongruè *Mathesin universalem* dicemus, & hoc loco entia rationalia nobis ejusmodi lineæ curvæ erunt. Si itaque has, juxta regulam modò exhibitam, in sua diversa genera colligere conabimur, deprehendemus; infinita earum genera dari.



1. Dantur curvæ omnium simplicissimæ, nimirum lineæ rectæ.

2. Curvæ, in quarum formatione priores seu lineæ rectæ adhibentur, uti sunt Sectiones Conicæ, Cissois, Conchoïdes, aliæque infinitæ. Has D. *des Cartes* Geometricas, reliquas verò omnes Mechanicas vocat.

3. Curvæ, in quarum formatione priores curvæ, seu geometricæ, iterum usurpantur, quales sunt spiralis Archimedeæ, Quadratrix, Cycloides &c.

4. Curvæ, in quarum formatione Mechanicæ adhibentur, quæ jam in tertio genere formatæ sunt.

5. Curvæ, in quarum formatione curvæ adhibentur, quæ in quarto genere sunt formatæ. Atque sic eodem modo in infinitum progredi licet.

*Physica.*

Sed elucidemus jam paucis secundam hujus regulæ partem quoad entia quoque realia. Notandum hic est, quævis corpora duorum tantum esse generum: vel enim sunt corpora, quæ moventur, vel, quæ quiescunt. Nam corpus extra alterutrum statum, quod neque motum nèque quiescens foret, concipi nequit.

*Tertia hujus  
regulæ  
pars expli-  
catur.*

Tandem explicanda etiam est tertia hujus regulæ pars, quæ dicebatur, hunc procedendi modum eò usque continuandum esse, donec ad talia perventum fuerit entia, quæ singula diversam naturam, diversamque generationem habere observantur & concipiuntur. Hæc autem genera tunc omnino exhausta esse hinc patet, quia ab entibus hisce generationem diversam habentibus ad alia iterum diversa entia non datur progressus: nam si progredi ulterius esset animus, tot sanè genera, quot entia, constituenda forent, quæ tamen omnia eandem generationem communemque haberent naturam, ac ideoque genera non essent. Sed hic maximè notandum, me, ubi in hac regulâ loquor de entium diversitate, præsertim intelligere diversitatem, ut suprà quoque dictum est, internam, & in oculos non semper incur-

rentem,



rentem, sed talem, quæ vel ex anatomia, vel aliâ quâcunque viâ, interiorem corporum constitutionem pro viribus detegendo addiscitur. Exigui igitur momenti ad scientiam augendam magnæ illæ entium imaginabilium sunt tabulæ, quas quidam depictas exhibent, & in quibus externæ tantum varietates notantur, ut, cum animalia in cornuta & non cornuta dividuntur. Sed verò inprimis hîc notari velim, quòd, quò magis ad particularia descendimus, non solum internæ constitutionis, sed & organorum generationi inservientium varietas, ac diversa eorum applicatio quàm maximè sit consideranda. Qui enim scientiam, quantum potis est, augere studet, de nullo alio debet esse sollicitus, quàm initio de omnium rerum definitionibus, hoc est, primis possibilibus, quibus datis omnium entium generationes habentur. Quia itaque eò omnia tantum diriguntur, necessum est res quasvis saltem in tot discescere genera, quot diversæ generationes observantur. Atque ideo in entibus imaginabilibus omnia, quorum generatio iisdem legibus absoluitur, ad idem genus reduco, & hoc modo innumera, superflua, in quæ alii ad hæc non attendentes prolapsi sunt, præcido, nec tamen quicquam, quod necessarium, prætermitto. Ex quibus discere est non tantum, quàm necessaria ad bene in his philosophandum sint experimenta, sed etiam qualia esse debeant, seu in quem finem sint instituenda, ne frustra in infinitis occupemur.

Credo primam nunc regulam, quâ omnia possible prima, seu primi conceptus acquiri, ac in ordinem generali cognitione redigi possunt, plenè & planè expositam esse: progrediamur jam ad regulam generalem secundam.

*Omnibus ad ultima genera reductis, veluti in precedenti* *Regula generalis secundæ*  
*regulâ explicatum est, (i) omnia denuò hæc diversa genera eo*  
*ordine, quo se invicem subsequuntur, consideranda, & in quo-*  
*vis eorum omnia entia particulatim perlustranda; Et quem-*  
*admodum antea ad diversitatem, ita nunc ad id, quod habent*

*commune, respiciendo, observandum erit vel ratione vel experientia, quam in quolibet genere ea sint, quæ in omnibus singularibus seu concipiendis seu formandis requiruntur, seu semper adsunt. (2.) Acquisitis iis, quæ definitionum Elementa voco, accuratè, ne quadam eorum omittantur, cavendum, ac ex iis solis definitiones formanda sunt, & eà quidem ratione, ut quadam eorum tanquam fixa seu immobilia, quadam verò tanquam mobilia considerentur, atque ex iis ritè junctis alicujus rei generatio deducatur: (3.) Hæc denique elementa, quibuscunque fieri potest modis, inter se sunt combinanda, ut ita hinc definitiones, seu omnium primi conceptus, efformentur.*

*Prima secundæ regulæ pars explicatur.*

Notanda hic circa primam hujus regulæ partem veniunt sequentia. Si quis ex me quærat, quo pacto ea, quæ in ejusmodi entium formatione occurrunt, ratione aut experientia sint determinanda, respondeo,

1. Hoc ipsum bene attendenti non fore difficile. Id enim, quod in plurimis, imò in infinitis penè rebus occurrat, non potest non alicui debitam attentionem adhibenti innotescere.

2. Nos posse in entibus, quæ perfectè à nobis concipiuntur, plurima talia proprio Marte formare, vel etiam ut minuatur labor, authores, qui ejus generis plurima jam formata exhibent, consulere: quæ bene perpensa ac ponderata hujus rei indagationem perquam facilem necessario reddunt. Cum enim talia formare haut datum sit, nisi quæcunque possibilia ad hoc requisita noverimus, poterimus utique etiam pluribus communia sine dubio semper observare.

3. In entibus imaginabilibus experimentis accuratè factis id addiscendum: experientia autem certas ad regulas instituendæ sunt. Quanvis verò hæc ipsa ad alium pertineant locum, haut tamen inconsultum erit, nonnihil eorum hoc loco prælibare.

Primò considerandus est locus, in quo aliquid ens formatur, partim ut externorum seu circumstantium corporum naturam, & quid ea in illud valeant, consideremus, cum cujusque rei externa figura in entibus physicis à rebus etiam externis seu circumjacentibus potissimum formata sit, v. c. quæ rotunda & dura sunt, formata fuere vel in fluido, materiam undique æqualiter comprimente, vel in duro, internam superficiem habente rotundam; partim loci quoque habenda est ratio, ut, quo ordine experientiæ sint instituendæ, cognoscamus, quia ex iis, quamam prius, quamam posterius sint formata, nobis innotescit: res enim, quæ rei formandæ locum præbet, prius est formata. Horum quædam habet D. Steno in pererudito tractatu de solido intra solidum.

Secundò, hoc peracto, experimentis postea cognoscendum, quæ necessariò & sola quidem ad rei alicujus generationem juxta hanc regulam requirantur: *illa scilicet omnia ad rei generationem necessariò requiruntur, quibus sublatis, cæteris licet ut ante dispositis, res generanda non provenit.* Et si jam istiusmodi processus, omnibus modis, quibus id fieri potest, auferendo unum, duo, tria &c. tentetur, eo ipso præcavebitur, ne inutilibus tempus perdamus, more vulgarij Empiricorum, qui ad jam dicta, in experientiis suis magno sæpe numero facilis haut attendentes, laborem & difficultatem rei investigandæ non minuunt, quin potius multiplicant, dum permulta adhibent vel saltem admiscunt, quæ ad rei naturam intelligendam minimè necessaria sunt. Quæ, dum interim (aliis putà rebus juncta) alia effecta producant, nova hæc iterum explicanda illis restant: atque ita mirum in modum rebus tam multis variisque implicantur, ut neque exitum, neque genuinam progrediendi viam amplius videant, sicque modò huc modò illuc confuse nullà constanti methodo, sed prout fert casus, progredientes exclament, naturam esse imperscrutabilem, & quæ cætera plura,

ra, quibus multos alios, pariter ac seipfos, à talium investigatione non parum deterrent.

Tertiò : in hisce jam experiētiis continuò ulteriùs procedendum est, donec accessus oculis (iisque, si forè nudi non suffecerint, vitrorum dioptricarum subsidio adjutis) pateat. Nec sanè hinc, plurimis ejusmodi detectis, observare difficile erit, quæ hic communia in pluribus generationibus adsint; quin & ipsum quandoque generationis primæ modum animadvertemus, cum semper eadem in quâvis formatione oculis ita offerantur, & corporum naturalium formatio nihil ferè aliud sit, quàm continua primæ generationis quasi reiteratio. Nec opus habebimus, ut ea, quæ his mediis non inveniuntur, aliâ quâcunque viâ detegere laboriosè conemur. Sed hic interim consistendum, & antequam rem quandam, cujus generatio hætenus ope regularum modò ostensarum nondum innotuit, ulteriùs prosequamur, omnium priùs rerum generationes à priori ope elementorum physices sunt investigandæ. Ubi verò eò perventum est, ut intellectui impossibile sit, præ nimia rerum particularium varietate, progredi; tunc demum juxta hos generales canones, qui ope veræ Physices conduntur, & secundum quos omnia hujus universi, ubi ubi extiterint, aut quocunque tempore fuerint formata, constanti semper & eadem lege sunt, experimenta rursus instituenda sunt, quæ tunc non poterunt non singularia producere: taliaque inde determinabuntur, qualia præstare omnibus Empiricis, utpote absque ratione experimenta sua dirigentibus, absolutè est impossibile. Atque horum quædam, ne quid hic deesse videatur, exemplis illustrabo.

In omnibus *imaginabilibus*, quæ sensu percipiuntur, generatim consideratis prima elementa, seu quæ in omni formatione occurrunt, sunt fluida & dura: in plantis aqua & semen durum: in animalibus semen fluidum ac ovum; quod ultimum omnino ac unicè Neotericorum industriæ debemus.

In




In entibus *rationalibus* elementa sunt puncta, rectæ atque curvæ. Nihil ampliùs hîc concipi potest.

In *realibus* nil aliud est præter materiam, &, quæ hîc fiunt, necessario per motum fieri concipiuntur. Sunt autem duæ motûs operationes, nimirum congregare, seu compellere corpora: hinc quies & disgregare, seu ea propellere: hinc Motus vulgò sic dictus; ac per consequens tria tantùm in physicis erunt elementa: *Materia, Motus ac Quies*. Hæc etiam primæ definitiones, seu primi sunt conceptûs, quorum ope dein omnium formationem explicamus; adeoque hæc hoc loco coincidunt. Id quod pauci videntur attendisse: aliàs, si genuinas horum trium duntaxat definitiones, seu naturam, nobis explicuissent, multas facilè & per magnas difficultates superassent, quibuscum plurimi, diversa sequentes principia, etiamnum inter se conflictantur. Atque ex hoc ipso Dom. du Bernier, qui ex edito scripto, cujus titulus: *L'Abregé de la Philosophie de Monfr. Gasfendi*, non incelebris est, ea, quæ erudito orbi proposuit, dubia non difficulter solvere ipse posset. Sed cur hoc à paucis tentatum sit, nec cuiquam, etiamsi idem tentaverit, feliciter omnimodè cesserit, ejus causas inferiùs in sectione tertiâ indicabo.

Si quis porro circa secundam hujus regulæ partem quæserit, quare horum elementorum quædam ut fixa, quædam ut mobilia consideranda, eorumque conjunctione generationes perficiendæ sint, hoc responsi ferat: cum omnia per motum fieri concipiantur, & absque eo nihil; motus autem absque mobili non concipiatur; sed mobile nihil efficiat, nisi fixo junctum aliquid novi formet; sequitur omnino, omnem bonam, quæ alicujus rei generationem

*Secunda  
pars secundæ  
hujus regulæ  
explicatur.*

Fig. 4.



M

debet

debet includere, definitionem necessariò hæc tria aut his similia, semper involvere oportere. Sic, verbi causâ, fixum punctum in circulo est A, mobile linea AB, quæ dum circa centrum movetur, circulum BCD describit.

*Tertia pars  
secundæ re-  
gulæ expli-  
catur.*

Si circa tertiam hujus regulæ partem quærat, quâ ratione hæc elementa omnibus modis, quibus fieri potest, sint combinanda, respondeo, omnia fixa tot, quot concipi possunt, modis, ac omnia itidem mobilia assumenda esse, atque si hæc tandem omnibus, quibus fieri potest, modis, hoc est iis, qui ex fixi & mobilis naturâ deduci possunt, motibus moveri concipiantur, obtinebimus ita primos omnium rerum conceptûs, hoc est, definitiones, prima possibilia, principia seu elementa, seu qualicumque nomine aliis dicantur. Quæ autem hinc vel in obviâ re circa entia imaginabilia utilium experimentorum, si ritè instituantur, numerus exsurgat; item, quâ ratione ex tribus datis definitionibus in physicis, de quibus paulò antè, omnia hujus universi corpora à priori deducantur, suo loco apparebit. Jam verò ut exemplum, quod hanc rem omnimodè explicet, suggeramus, omnium entium rationalium definitiones juxta has regulas formare conabor. Quia verò hoc per modò indicata elementa infinitis fermè modis succedit, duas præ aliis methodos, quæ omnium horum entium simplicissimas exhibere videntur generationes, in medium proferam; quarum prior hæc est.

Statuamus secundum genus curvarum, quas D. des Cartes geometricas vocat, formandum esse, poterimus loco fixorum, seu immobilium, sola puncta assumere, loco verò mobilium rectas lineas, sive fila punctis illis affixa. Hæc jam tali motu tam diu moveantur, quamdiu & quousque possibile fuerit, unâ interim & eadem semper manente æqualitate harum rectarum. Ut ergo omnes ejusmodi describamus curvas, unum, duo, tria, quatuorve puncta assumantur, atque ita in infinitum, dictisque conditionibus cur-

væ formentur omnibus, quibus fieri potest, modis, prout exemplo statim docebimus. Quum autem hinc infiniti prodeant primi conceptûs sive definitiones, quidam dubio procul inquierent: quis ad tot & talia capienda capax erit, &, quis insuper ea, quæ hinc deducuntur, omnia capiet? sed huic difficultati in tertiâ regulâ remedium aliquod invenietur. Interim hæc secunda regula, cujus ope omnia prima possibilia seu primi conceptûs, cognitione multò specialiori, quàm antea, acquiruntur, satis superque & omnibus itidem dubiis remotis erit explicata. Sequitur jam regula generalis tertia.

*Postquam nobis sufficienter perspectum, quâ ratione omnes primi conceptûs omnibus, quibus possibile est, modis sint for-* *Regula generalis tertia.*  
*mandi, jam (1.) isti conceptûs sic sunt ordinandi, ut sibi invicem succedant juxta numerum, quo plura possibilia seu elementa succedere exposcunt, vel prout alia aliorum existentiam præsupponunt, & ut, quæ in prioribus extant possibilia, eadem quoque, si fieri potest, in omnibus posterioribus præstò sint; & quæ eundem elementorum numerum continent, ad eundem etiam gradum referantur. (2.) Omnia hæc tantisper continuentur, donec horum omnium progressus in infinitum pateat; ac tandem (3.) demonstratione ad impossibile deducente semper evincendum est, plures, seu ab his diversos, præter hos conceptûs formari non posse.*

Quantum ad hujus regulæ primam partem explicandam attinet, notandum est, me dixisse, *Prima hujus regulæ pars explicatur.*

1. hos primos conceptûs ita esse ordinandos, ut sibi invicem succedant juxta numerum, quo plura possibilia succedere postulant &c. Et hoc quidem intellectu facile est, ac ex iis patet, quantum ad curvas attinet, de quibus modò dictum, eas formandas esse primo loco, quæ unicum habent punctum; secundo, quæ duo; tertio, quæ tria, atque ita deinceps.

2. Eadem possibilia seu elementa, quæ in prioribus sunt, etiam in posterioribus debere adesse : quod ipsum quoque

Fig. 5.





Fig. 6.



nullâ difficultate laborat. In entibus rationalibus rem sic exemplo declaro. Assumantur puncta, in 5. fig. unicum A, in 6. fig. duo A & B, in 7. fig. tria, CAB, in 8. fig. quatuor CAB & D &c. sive in eâdem rectâ existant, sive non ; sive æquali distent intervallo, sive inæquali, perinde est. Assumatur jam in 5. fig. filum AB, alligatum ad A, & continuetur in B; in 6. fig. filum alligatum ad A, per C continuetur in B, ubi denuò alligetur ; in 7. fig. filum ad A alligatum continuetur in D, abhinc in B, postcâ retrorsum in D, & deinde in C, ubi etiam alligetur ; in 8. fig. con-

tinuetur ex A per E. B. E. C. E usque in D, atque ita in infinitum : concipiantur jam stylo quopiam in 5. fig. ad B ; in 6. fig. ad C ; in 7. fig. ad D, ac in 8. fig. ad E. &c. omnia fila æqualiter in rectas extendi, stylumque moveri : hâc ratione in cœpto ejusdem motu, eoque, quousque fieri potest,



test, continuato, curvæ BCD, CDE, DEF, EFG, &c. delineabuntur. Hinc jam facillè patet, semper in posterioribus etiam contineri, quæ in prioribus aderant. Si enim in fig. 8. supponamus duo puncta coincidere, curva 7. fig. describetur; & si in 7. fig. rursus duo puncta coincidant, curvam 6. fig. habebimus; coincidentibus verò in hac fig. duobus quoque punctis, circulus delineabitur.

3. Ea, quæ eundem possibilium numerum continent, ad eundem etiam gradum esse referenda. Sic, verbi causâ, in fig. 9. duo puncta A & B triplici modo poterunt assumi; vel ita, ut CB concurrat cum rectâ AB, & ita Ellipsis describetur, in quâ AC & BC simul sumptæ sunt æquales lineæ ED; vel alterum punctorum, exempli causâ, B semper ut remotius ab altero, adeoque & A ut

Fig. 7.




Fig. 8.



Fig. 9.






Fig. 10.



distans poterit concipi, usque dum distantia quâvis assignabili sit major; adeo ut CB tunc rectæ AF sit parallela (vid. fig. 10.) & hinc describetur parabolâ, in quâ AC & CB simul sumptæ continuò æquantur ipsi AE; vel tandem in fig. 11. punctorum alterum B poterit esse in H, ita ut BC divergat à rectâ AR, tunc describatur radio HE arcus ER, & erunt AC & CB simul acceptæ æquales AE, & hinc formabitur Hyperbola DCE, aut ejus opposita

Fig. 11.




GKI. Has autem tres curvas sub eodem gradu comprehendendo, quia hic eadem elementa adsunt, vel subintelliguntur. Plures verò, secundum horum punctorum situm variatio-

riationes concipi; adeoque plures in hoc gradu curvæ, quàm tres, formari nequeunt. Volui hic jam tum notum exemplum proferre, quò ex cognitis ad incognita facilior progressus fiat, atque hac ratione appareat, quomodo in his curvis sit procedendum, ubi plura duobus puncta fuerint assumpta.

Hæc omnia eisdem prorsus vestigiis insisterendo, tria, *Secunda hujus regula pars explicatur.* quatuor &c. puncta assumendo omnibus, quibus fieri potest, modis efformanda, ac tam diu sunt continuanda, donec pateat numerorum progressio, exhibentium, quot in gradu quolibet ejusmodi sint curvæ: atque sic definitiones omnium curvarum, quas sub secundo genere suprà sumus complexi, erunt exhibitæ.

Tertium genus quod attinet, duæ novæ infinitarum curvarum hic exsurgunt series. Prior, ubi loco fixorum curvæ secundi generis, una, duæ, tres &c. loco autem mobilium rectæ assumuntur. Sumatur, exempli gratiâ, in fig. 12.


circulus ACF, concipiatur ei filum, cujus principium in C, circumvolutum esse. Hoc evolvarur, ita ut hinc filum in rectas FK, MG, AB, &c. continuò extendatur; atque ita per extremitates CK GB nova curva delineabitur.



Sint porro in fig. 13. duo circuli A & B, quibus circumvolutum filum DCF. Hoc extendatur in C, & designabitur curva GH. Eâdem ratione jam tres, quatuorve circuli, veluti

veluti suprâ tria quatuorve puncta, possunt assumi, atque ita in infinitum. Hoc autem, quod dixi de circulo, de omnibus secundi generis curvis intelligendum, & quod antea de punctis dictum, (nimirum ob varium eorum situm accidere, ut quandoque plures ad eundem referantur gradum,) idem hîc prorsus de curvis, quæ loco centrorum seu fixorum assumuntur, cogitandum est atque efficiendum. Hisce omnibus, quibus fieri potest, modis efformatis, ac,

Fig. 13.



quousque earum progressio patet, continuatis, novam infinitarum curvarum seriem habebimus, quæ ad tertium genus pertinent. Secunda ejusdem generis series hinc oritur, quòd, observatis modò dictis, loco fixorum puncta & simul curvæ assumantur secundi generis. Si exempli causâ, in fig. 13. loco circuli A putemus esse punctum, ac loco B quancunque curvarum secundi generis, sumendo

unum, duo, tria puncta & quocunque curvarum secundi generis libuerit, alia denuo series novarum curvarum hinc exsurgit. Quantus autem inde curvarum numerus hac ratione producatur, vel ex eo est perspicuum, quòd ex unigâ, quæcunque fuerit curvarum, quas *D. des Cartes* vocat geometricas, infinitæ, respectu duplici, curvæ oriantur.

Ulterius, quod ad quartum genus curvarum spectat, si hæ curvæ tertii generis formatae, denuo ut fixa seu centra assumantur, iisque filâ circumvoluta esse intelligantur, aliæ de novo curvæ possent designari, atque hoc est quartum curvarum genus. Hic iterum variæ infinitarum curvarum series



series proveniunt, prout curvæ ex tertio genere, vel solæ inter se, vel cum iis, quæ in secundo genere inveniuntur, vel cum punctis combinantur; atque ita rursus curvarum quælibet quarti generis multiplici respectu infinitis novis curvis efformandis inservit. Hæc autem omnia, quousque placet, sic indefinitè possunt protendi, & hinc eadem ratione quintum, sextum &c. curvarum genus produci. Et hoc medio tantâ rerum varietate aucta esset Geometria, ut dici vix possit, quàm exiguam harum partem cùm veterum, tum recentiorum cogitata constituent. Verùm de his suo loco. Ne quis autem hic existimet, ista ne quidem digna videri, quibus recensendis huc usque tantam dederim operam; (communis enim hæc est faciliū plerumque omnium fortuna, ut parvi ab omnibus habeantur) eapropter hoc loco singularia enumerabo, quæ ex hac curvarum formatione, statim derivantur, ut adeò descriptionis hujus, præ omnibus aliis simplicissimæ, præstantia reipsâ cognoscatur. Suo verò loco ex his dictis ostendam.

1. Hinc omnes æquæ curvas geometricas ac eas, quas *D. des Cartes* vocat mechanicas, æquali & constanti generatione, nec minori facilitate, quàm ipsum circulum efformari, atque mechanicè delineari.

2. Earum proprietates facillimè explicari.

3. Tangentes ex ipsâ statim descriptione, sine ullius ferè calculi ad eas inveniendas usu, determinari. Quâ de re hæc pauca prælibare placet. Sit 1. descripta curva, quæ unicum habeat centrum; sive hoc sit punctum A, uti in *fig. 14.* sive quæcunque curva G in *fig. 15.* Si jam ad extremitates radiorum, AB in




Fig. 15.




Fig. 16.




Fig. 17.






Fig. 18.



14. fig. & DE in 15. fig. curvas illas describentium, erigantur perpendiculares BC & EF, hæ curvas descriptas tangent. Sint 2. curvæ ex duobus centris descriptæ, sive hæc centra sint puncta, uti in fig. 16. sive quæcunque curvæ, veluti in fig. 17. sive tandem curva quæcunque & punctum, quod fig. 18. exprimitur: Si angulo ACB bifariam per lineam CD diviso, ad hanc excitetur perpendicularis CE, hæc curvam hac ratione descriptam in C tanget. Sint 3. in fig. 19. tria centra B, C, D, seu sint sola puncta, seu solæ curvæ, seu quævis curvæ & puncta, quæ omnibus modis, pro nostro arbitrio, situm variant. Arcu FG, qui MC secet in H, ex centro M descripto, dividatur recta FH bifariam in I, & ducta recta IG denovo bifariam dividatur in K. Ducatur tandem KM,

K M, & in hujus extremitate M statuatur perpendicularis M N; hæc curvam AME in puncto M. tanget.

Fig. 19.



Hic autem notandum est, circa figuram hanc 19. errorem aliquem in primam editionem irreplisse, quem animadvertens ingeniosissimus & in hisce studiis apprimè versatus *Dominus Fatio de Duilliers* eundemque corrigens in egregiam & universalem incidit regulam, ope centri gravitatis simile quid præstandi; quâ de re, si ita placet, videri ea possunt, quæ ejus causâ nos inter acta fuerunt, insertaque tractatui, qui inscribitur *Bibliothèque universelle Ann. 1687. Tom. 5. pag. 25.* Quia autem, dum in demonstrationem alicujus theorematismis inquirimus, circa figuras Mathematicas occupati non facile ad pondera & gravitatem respicimus, inde factum est, ut nullatenus tale quid hic subesse suspicarer; sed per laudatum illum virum admonitus attentè rem considerando illicò demonstrationem hanc detexi, credidique etiam, eam ipsam procul dubio esse, in quam iste incidisset. Ast ex ultimâ ejus responsione percepi, demonstrationem meam multò adhuc esse faciliorem, ac quæ ab Eodem publicata extat, prout suo loco ostendam. Verùm quia res hæc non mechanicè solùm, sed & purè Geometricè considerari potest, opportuno tempore & loco Regulæ, quæ hic datur, facillimæ ac universalissimæ, & quam non nisi solius Geometriæ principiis innixus inveni, demonstrationem publici juris faciam. Interim Regulam ipsam saltem in curiosorum gratiam jam absque

Fig. 20.




Fig. 21.





Fig. 22.



demonstratione hic aperiam. Sit in *figuris* 20, 21, 22, ABC curva ejus conditionis, ut numerus rectarum, Quadratorum, cuborum, quadrato-quadratorum &c. linearum HB, IB, KB, LB &c. sit semper æqualis constanti quantitati. Sit deinde numerus omnium dignitatum linearum  $HB = p$ ,  $BI = q$ ,  $BK = r$ ,  $BL = s$ , ducantur rectæ in *fig. 20*, DE, in *figurâ 21*, DF, in *figurâ 22*, DG ad libitum, & fiant  $DB = a$ ,  $EB = b$ ,  $FB = c$ ,  $GB = d$ : jam sit BM perpendicularis ad curvam, & sit  $DM = f$ ,  $EM = g$ ,  $MF = h$ ,  $MG = i$ . Si jam in curvâ ABC *fig. 20*, qua duo centra H, I, obtinet, constanti quantitati sit æqualis

nume-



$$\text{numerus} \left\{ \begin{array}{l} \text{linearum} \\ \square\text{torum} \\ \text{cuborum} \\ \text{quadrato} - \square\text{torum} \\ \square\text{to} - \text{cuborum} \end{array} \right\} \text{HB, IB, crit} \left\{ \begin{array}{l} pbf = qag, \\ pf = qg, \\ paf = qbg, \\ p\alpha af = qbbg, \\ pa^3f = qb^3g, \end{array} \right.$$

Quodsi verò in curvâ ABC *fig. 21*, quæ tria centra H, I, K, obtinet, constanti quantitati semper æqualis sit

$$\text{numerus} \left\{ \begin{array}{l} \text{linearum} \\ \square\text{torum} \\ \text{cuborum} \\ \text{quadrato} - \square\text{torum} \\ \square\text{to} - \text{cuborum} \end{array} \right\} \text{HB, IB, KB, crit} \left\{ \begin{array}{l} pbcf = qacg + rabb \\ pf = qg + rb \\ paf = qbg + rcb \\ p\alpha af = qbbg + rc cb \\ pa^3f = qb^3g + rc^3b \end{array} \right.$$

Si autem in curvâ ABC *fig. 22*, quæ quatuor centra habet H, I, K, L, numerus omnium dignitatum linearum HB, IB, KB, LB sit semper constanti quantitati æqualis,

$$\text{erit} \left\{ \begin{array}{l} pbcdf + qacdg = rabdb + sabci, \\ pf + qg = rb + si, \\ paf + qbg = rcb + sdi \\ p\alpha af + qbbg = rc cb + sddi \\ pa^3f + qb^3g = rc^3b + sd^3i \end{array} \right.$$

Ex quibus attentè consideratis perfacile progressus horum in infinitum pater. Atque sic ope horum theorematum, quæ tam brevî tempore inveniuntur; ut vel quadrans horæ sufficiat ad hæc omnia in lucem deducenda, millium millionum curvarum tangentes facillimè determinantur. Quàm singularia autem corollaria, eaque magno numero, deducere hinc inde liceat, ingeniosus Lector haut difficulter perspiciet. Jam in singularibus, quæ ex hac curvarum generatione sequuntur, proprietatibus recensendis pergere lubet; nimirum

4. Statim ex tali curvarum generatione posse dignosci, quænam earum oppositas, ut Hyperbolæ accidit, suas habeat.

5. Hinc statim asymptotos derivari, atque etiam in quarum curvarum formatione locum eæ habeant, apparere.

6. Exinde patefieri, quænam curvæ parallelas ejusdem generis curvas admittant, & quæ secus.

7. Quot cujuscunque gradûs extent curvæ: Id quod à nemine hætenus, ne quidem in curvis geometricis, determinatum est. Et hoc si fortè à quodam factum fuerit, certè ego nihil hac de re publicatum vidi.

8. Hinc quoque patet, secundi gradûs curvas duo habere cèntra; tertii tria, quarti quatuor, atque sic consequenter.

9. Liquet porrò, de quo tamen alii vix cogitaverint, curvas quoque mechanicas centra seu focos habere, unum, duo, tria &c. usque in infinitum.

10. Ex hac ipsâ infinitarum curvarum descriptione dimensio geometrica, seu absoluta curvarum in rectas transmutatio, eaque vel millenis novis iterumque novis modis habetur; cum econtrariò hætenus fuerit difficile unicam ejusmodi methodum in lucem edere; atque anni necdum quadraginta sint, ex quibus id primum inventum & editum est.

11. Hinc quoque eadem curva, vel ipse, exempli causâ, circulus infinitas diversas sortitur constructiones. Adeoque jam hoc ipso cujuscunque curvæ infinitas exhibui definitiones.

12. Hinc quoque eadem prorsus ratione, ac quæ in Ellipsi nota est, duos scilicet dari diametros, quibus curva superimposita bis congruit, facilè concluditur, dari etiam curvas, tres, quatuor, quinque, sex &c. diametros habentes, quibus superimpositæ toties semper perfectè congruunt.

Quantum autem hinc infinitis novis inventis omnes Matheseos particulares scientiæ locupletentur, attento lectori conjectu haut erit difficile. Sic enim Geometria innumeras novas superficies, solida, ac his similia, & Arithmetica

tica infinitas novas progressionem formare poterit. Astro-  
nomia verò novas hinc perspiciet curvas, quæ repræsentabunt  
planetarum suorum vias, sive concipiantur in epicyclis,  
sive aliâ quavis ratione moveri. Dioptricam quod attinet,  
ut & Catoptricam, innumera quoque in iis nova oriuntur.  
Unum quoddam horum in *Actis Eruditorum*, quæ Lipsiæ e-  
duntur, *Mense Junio A. 1682. pag.* publicè exhibui speci-  
men, cujus etiam demonstrationem viris ingeniosis privatim  
communicavi. Atque ejusmodi novorum jam fontes ge-  
nuinos aperio, & ex quibus hæc infinitis modis diffundi po-  
terunt, magisque indies locupletari. Successu temporis de-  
inde & alia adhuc specimina A. 1690. subsecuta fuerunt, quæ  
singulari postmodum ratione aucta & promota sunt per vi-  
ros ingeniosissimos *Dn. Leibnitium & Bernoullium*; quibus  
suo tempore singularia adjiciam.

Hinc quoque innumera nova exsurgunt circa corpo-  
rum physicorum varie motorum vias, quas post se relin-  
quunt, abstractè conceptas. Quod autem hæc eadem ra-  
tione ad omnia Matheseos objecta transferri, ac propterea  
haud immeritò *Elementa Matheseos universalis* dici queant,  
suo loco prolixius docebitur.

Quanta itaque inter has nostras definitiones, & illas,  
quas alii hætenus exhibuerunt, sit differentia, quantaque  
paretur scientia, ex dictis perspicax lector non difficulter  
conjeciet. Et si hoc quidem certum optimæ methodi si-  
gnum est, si per eam ope principiorum pauciorum, ac quæ-  
vis alia requirit methodus, plura, quam per aliam quam-  
cunque methodum, derivari possint, id utique huic nostræ  
curvas delineandi methodo cumprimis competere videtur.

Supereff nunc tertia hujus regulæ pars, ubi dicitur, *Tertia pars*  
semper evincendum esse, non plures dari conceptus primos *hujus regula*  
demonstratione quâdam, & quidem tali, quæ rem ad im- *explicatur.*  
possibile deducat; cum hæ demonstrationes convictos nos  
maximè reddant, atque res sit magni momenti, ne hic de-  
cipia-

cipiamur. Si verò quis ex me quærat, quomodo hæc sit investiganda, notet sibi, eam colligi cum ex ipsius rei, cuius definitiones formantur, naturâ generaliter acceptâ, tum ex naturâ definitionum in specie efformatarum. E duobus enim hisce, an quid ulterius possit concipi, nec ne, statim concludetur. Si quis, exempli causâ, cujuslibet curvæ in genere, quæ in geometriam potest recipi, habuerit definitionem, ac viderit aliquam curvam, juxta eam quâcunque methodo formatam, hisce modò inventis curvis annumerari, poterit certò concludere, omnes hisce definitionibus, quæ possunt concipi ad cunctas proportionem geometricas repræsentandas, absolute comprehendendi, prout idem de jam exhibitis suo loco evidenter demonstrabo. Hoc autem hæctenus ab omnibus, ipsis quoque Mathematicis, circa definitiones penitus omissum, quo scilicet ultimò semper debuissent ostendere, se hisce datis necessario complexos fuisse omnes, quæ in eadem materiâ tractandâ requirebantur definitiones seu quoscunque primos conceptus. Quanti verò hæc res sit, mox ulterius explicabo.

Interim ad regulam hanc tertiam, quæ jam exposita est, adhuc unicum & perquam utile adjiciam exemplum, quo pleraque, quæ in tribus hisce regulis requiruntur, clarius illustrabuntur. Notandum enim est circa superius datas curvas; alicui, qui omnia, quæ in Mathesi determinanda obveniunt, solvere studet, nondum sufficere, omnes conceptibiles curvas exhibuisse, quia ratio est habenda non tantum harum curvarum, sed etiam rectarum, quarum relationes seu proportionem exhibent istæ, quemadmodum suprà dixi, quandoquidem hæ curvæ non nisi harum proportionum determinandarum causâ considerentur. Adeoque hîc quàm maximè inquirendum, an in tali curvarum delineatione rectarum etiam, ad quas illæ referuntur, longitudines geometricè determinentur. Hoc autem per modò exhibitam delineationem peragitur, tantum in curvis, quas




quas *D. des Cartes* geometricas, non verò in illis, quas vocat mechanicas. Ut igitur huic rei omninò satisfiat, aliam hinc curvarum genesin proferam, quæ nec minùs singularis, nec minùs utilis erit, quàm præcedens, quia huic rei unicè satisfaciet. Cùm verò hæc nonnisi peritis Mathematicis scribam, haud necessum est, ut nimis prolixus sim.

Ut itaque hinc omnes has curvas, quarum ordinatim applicatæ determinantur geometricè, proferam, opus est scire 1. quid intelligendum sit per determinatum esse geometricè. 2. quot sint primariæ operationes geometricæ hujus determinationis, & 3. quâ ratione hinc curvæ, hanc habentes conditionem, omnibus modis & simplicissimâ viâ efformandæ sint.

Quod ad 1. attinet, intelligo per geometricè aliquid determinatum esse, cùm aliquod punctum determinatur per lineam rectam, cujus longitudo non nisi per operationes solarum rectarum efformatur.

2. Datis lineis duabus rectis, ut hinc tertia, nova nimirum aliqua longitudo, determinetur, nullæ aliæ hinc dantur operationes omnium primæ, ad quas reliquæ omnes reducuntur, & quæ idè Elementa omnium geometricarum operationum sunt, quàm *Additio*, *Subtractio* & *Proportionalitas*. Ope enim duarum datarum rectarum, quarum priorè *a* seu 1, hoc est, unitatem, posteriorem verò *x* vocabo, poterunt continuè proportionales inveniri, quarum tertiam *xx*, quartam *x³*, quintam *x⁴* &c. nominabo. Jam verò hæ lineæ vel variè ad se invicem possunt addi, quod per signum  $+$  designabo, vel variè à se invicem subtrahi, quod signo  $-$  denotabo. Compositum autem, quod exinde invenitur, appellabo *y*, vel *yy*, vel *y²* &c. prout compositio geometrica per gradus ita assurgit.

Fig. 23.



3. Sint v. c. in *fig. 23.* duæ lineæ rectæ indefinitæ AC & AB, angulo recto ad A conjunctæ: lineas AE, AD, AF &c. *abscissas* vocabo, & per litteram *x* notabo: lineas EG, DH, FI &c. seu AK, AL, AM &c. dicam *ordinatim applicatas*, & per *y* designabo: datam aliquam rectam vocabo latus rectum & denotabo per *a* seu 1.

Hiscæ ita constitutis dividatur recta AC bifariam in D, & lateris recti ope, ac dimidiæ AC fiat per compositionem aliqua geometrica tertia AL: ductis jam perpendicularibus DH & LH determinabitur punctum H geometricè. Porro dividatur denuo AD & DC bifariam in E & F, ac ope lateris recti, atque linearum AE, AF fiant, eadem compositione geometricâ AK & AM, ductisque perpendicularibus EG, KG, item FI & MI erunt puncta G & I geometricè determinata. Quodsi ergo semper eodem modo bifariam abscissarum differentiæ indefinitè dividantur, nec non ope recti lateris & harum abscissarum, novæ lineæ seu ordinatim applicatæ per eandem compositionem inveniuntur; & denuo perpendiculares, prout sibi respondent, demittantur; alia ac alia puncta geometricè determinabuntur, quæ lineam aliquam curvam AGHI delineabunt.

Quo verò omnes ejusmodi curvas nobis acquiramus, fiat compositio primarum operationum geometricarum omni-

mnibus, quibus fieri potest, modis, nec non viâ, quantum potest, simplicissimâ; & observabimus, hinc sequentes oriri compositiones, quæ omnium istiusmodi curvarum naturas exhibent, & ad quas omnes curvæ geometricæ *Cartesii* reducuntur, quemadmodum suo loco clarè demonstrabo.

TABULA CURVARUM.

Series					
I.	II.	III.		IV.	
$y = x$					
$yy = xx$	$yy = x$	$yy = x + xx$			
$y^3 = x^3$	$y^3 = x$	$y^3 = x + xx$	$y^3 = x + xx + x^3$		
	$y^3 = xx$	$y^3 = x + x^3$			
		$y^3 = xx + x^3$			
$y^4 = x^4$	$y^4 = x$	$y^4 = x + xx$	$y^4 = x + xx + x^3$	V.	
	$y^4 = xx$	$y^4 = x + x^3$	$y^4 = x + xx + x^4$		
	$y^4 = x^3$	$y^4 = x + x^4$	$y^4 = x + x^3 + x^4$		
		$y^4 = xx + x^3$	$y^4 = xx + x^3 + x^4$		
		$y^4 = xx + x^4$			
		$y^4 = x^3 + x^4$			
$y^5 = x^5$	$y^5 = x$	$y^5 = x + xx$	$y^5 = x + xx + x^3$	$y^5 = x + xx + x^3 + x^4$	VI.
	$y^5 = xx$	$y^5 = x + x^3$	$y^5 = x + xx + x^4$	$y^5 = x + xx + x^3 + x^5$	
	$y^5 = x^3$	$y^5 = x + x^4$	$y^5 = x + xx + x^5$	$y^5 = x + xx + x^4 + x^5$	
	$y^5 = x^4$	$y^5 = x + x^5$	$y^5 = x + x^3 + x^4$	$y^5 = x + x^3 + x^4 + x^5$	
		$y^5 = xx + x^3$	$y^5 = x + x^3 + x^5$	$y^5 = xx + x^3 + x^4 + x^5$	
		$y^5 = xx + x^4$	$y^5 = x + x^4 + x^5$		
		$y^5 = xx + x^5$	$y^5 = xx + x^3 + x^4$		
		$y^5 = x^3 + x^4$	$y^5 = xx + x^3 + x^5$		
		$y^5 = x^3 + x^5$	$y^5 = xx + x^4 + x^5$		
		$y^5 = x^4 + x^5$	$y^5 = x^3 + x^4 + x^5$		

Tabula Variationis Signorum.

[illegible]


Jam notandum est, curvas quasdem hic bis reperi, quas interim eapropter, ut harum quarum progressio melius pateat, expresse addidi. Clarum autem ex his duabus tabulis est, hasce curvas ita nunc æquè facile ac numeros, quousque placet, posse designari. Liquet porro exinde, primam seriem nullo latere recto opus habere, secundam unico, tertiam duobus, quartam tribus. Supponimus autem, hæc latera hic esse æqualia, ad simplicissimas harum curvarum naturas designandas. Manifestum quoque est, has curvas hisce seriebus comprehensas numerorum instar, quos figuratos nuncupant, multiplicatorum per seriem continuè proportionalium 1, 2, 4, 8, 16. &c. progredi. Tandem notum est, *Dominum des Cartes* ostendisse, curvas, quarum ordinatim applicatæ per *yy* designantur, tres tantum esse.

Quot



Quot verò superiorum graduum sint curvæ, nempe  $y^3$ ,  $y^4$ ,  $y^5$ , ex hisce quoque perspicuum, & si quis hæc attentè perspexerit, animadvertet, harum curvarum progressionem esse instar numerorum 3, 12, 39, 120, &c. quæ ipsa fit ex additione continuâ progressionis continuè proportionalium 3, 9, 27, 81, &c. Licet autem hic circa curvarum numerum errassem; methodus tamen circa locorum doctrinam, cujus opera postmodum demonstratur, impossibile esse, ut plures illis hoc loco enumeratis dari possint, adeò bona, quemadmodum sua patebit loco, est, ut evestigio mihi admissos fortè monstraret errores, saltem quietioris status, hæc, ut decet, accuratè retractandi, mihi præberet occasionem.



Hiscæ ita peractis progrediamur ad novum curvarum genus formandum. Sint omnia in *fig. 24.* ad instar *figuræ 23*, lineæ verò rectæ AB loco sit hic ex modò formatis curva quæcunque AKLMB. Deinde, ut in *antecedenti figurâ* facta esset geometrica AL ad LB: sic fiat etiam in hac præsentī AL ad LB. Item, ut ibi AK ad KL, & LM ad MB: ita & hic AK ad KL & LM ad MB ducantur, & hæc, quousque placuerit, continuentur; atque ita tandem, demissis perpendicularibus & parallelis sibi respondentibus, puncta G, H, I, &c. geometricè, ut antè, determinabuntur. Hæc ratione infinitas rursus novas curvas AGHIB promemus, ubi omnes ordinatim applicatæ EG, DH, FI, &c. geometricè erunt determinatæ. Quàm immensâ autem harum curvarum hinc derivetur multitudo, vel ex eo patet,



quòd unica curvæ geometricæ natura infinitis hoc pacto novis delineandis inserviat.

*Fig. 23.*

Nam repræsentet e. gr. in *fig. 23*, AGHI lineam rectam ejus naturæ, ut  $y = x$ , quia hinc AL & LB sunt æquales, item AK, KL, ut & LM, MB, atque ita in infinitum. Assumantur nunc curvæ geometricæ infinitæ, AKLMB in *fig. 24*, & juxta unicam hanc conditionem, (quòd scilicet AL & LB, nec non AK, KL, LM, MB, atque sic porro in infinitum, æquales sint) hinc infinitæ novæ curvæ formabuntur. Idem fiet secundum naturam  $yy = x + xx$ , aut quamcunque aliam positionem. Vel econtrariò assuma-



tur quævis curva geometrica AKLMB in eadem *fig. 24*, ac juxta æquationes infinitas  $y = x$ ,  $yy = x + xx$ ,  $y^3 = xx$ , &c. in hac eadem curvâ infinitæ formabuntur novæ.

Si præterea loco curvæ AKLMB in *fig. 21*, quandam ex modò formatis accipiamus, novum iterum curvarum genus hoc pacto provenit, ubi eadem ratione qualibet priorum curvarum infinitis novis formandis inserviet. Atque ita in infinitum nova curvarum genera formare in nostrâ est potestate,

testate, quæ hanc omnes habent proprietatem, ut universa eorum puncta geometricè delineentur, non secùs ac accidit in sectionibus conicis, aut aliâ quâvis curvarum, quas *D. des Cartes* vocat geometricas; neque adeò ego ullam rationem video, quare tanquam mechanicæ ex geometriâ eliminandæ, nec potius geometricæ sint dicendæ. Quanta autem earum sit utilitas, suo loco apparebit, ubi ostendero, problemata, quæ hætenus neutiquam potuerunt solvi, hinc unicè & posse & debere solvi; atque ita mihi videor admodum paucis sat multà comprehendisse.

Existimo nunc hanc tertiam quoque regulam, eadem, quâ duæ priores, perspicuitate, explicatam esse; per quam tandem non solum primos omnium rerum conceptus, sed eorum etiam ordinem, idque cognitione specialissimâ, obtinemus, qui etiam unicus noster erat scopus.

Ex his omnibus bene perpensis perspicuum erit.

I. Quid hætenus ad scientias, quantum humanæ quidem potentia est, augendas potissimum defuerit. Expedivimus enim, ad scientiam aliquam perficiendam à definitionibus, vel, ut alii loquuntur, à principiis esse incipiendum. Sunt autem horum principiorum, meâ sententiâ, tria requisita. Primum est, ut sint tam clara & evidentiâ, ut mens humana, dum ea animo suo attentè volvit, de illorum veritate nequeat dubitare. Quâ verò ratione hanc assequamur evidentiâ, clarè suprâ demonstravi, tam in antecedente sectione, quàm in præsentî, utpote quâ ipsâ declaravi, quomodo definitiones, quò de earum certitudine nulum possit esse dubium, sint formandæ. Secundum requisitum est, ut aliarum rerum cognitio ab iis ita dependeat, ut cognosci quidem illa possint non cognitis istis, sed istæ non vicissim absque illis: cujus requisiti obtinendi potestatem feci, dum omnes omnium rerum primos conceptus, qui per se optimè concipiuntur, sed sine quibus prorsus nihil potest concipi (nam alioqui non essent primi rerum

*Tertiâ  
Considera-  
ria.*

con-


conceptus,) formare docui. Tertiò denique requiritur, ut certi simus, nos ea omnia, quotquot sunt eorum, habere. Quomodo verò hæc certitudo clarà semper demonstratione sit evincenda, antequam progrediamur omnem ex hisce, principiis possibilem notitiam deducere, satis luculenter docui; adeò ut nihil eorum, quæ ad scientias in totum perficiendas necessaria possunt existimari, mihi videar prætermisisse. Hæc verò quàm parum ab aliis observentur, attendenti clarum erit, ubi aliqua huc facientia breviter aperuerò. Nam patet

2. vel ipsos Mathematicos, qui tamen maximos hæcenus fecere progressus, hæc minimè observasse. Hi enim, cum viderent, omnia problemata ope intersectionis curvarum solvi, loco elementorum nobis curvarum omnium debuissent tradere definitiones. Sed in elementis tamen non nisi lineam rectam & circularem tradidère. Abhinc autem deducta sunt, ut sic loquar, elementata, non elementa. Alii, cum observarent, rectam & circularem omnibus solvendis problematibus non sufficere, alias quidem lineas, sectiones nimirum Conicas, Conchoidem, Cissoidem &c. descripsère; Verùm & illi quamplurima, ad elementa non spectantia, hinc deduxerunt. Adeoque *D. des Cartes* omnium optimè infinitas novas curvas exhibuit, ac præclara multa ad intimam earum cognoscendam naturam quidem adjecit; sed sanè uti egregiam hic portam aperire inceperat, per quam ad amplissimum speculationum campum exspatiari licet: ita prorsus eandem quasi iterum occlusit, vel saltem non eam tantum, quantum potuit, aperuit, dum eo ipso omnes reliquas curvas, quæ talem non habent naturam, qualem eas, quas geometricas vocat, habere deprehendit, exclusit, idque meo judicio ob rationes nullatenus sufficientes. Licet enim harum curvarum natura, quas sic à Geometriâ eliminavit, ad unicam æquationem, omnia illorum puncta respicientem, nequeat reduci, si nimirum



in hanc æquationem solæ rectæ admittantur, poterit tamen hoc optimè & semper fieri, si hanc æquationem curvæ arcus ingrediantur. Sed hoc ipsum in omnibus curvis, quas suprà in primâ methodo formare docui, fieri potest; atque hoc unum etiam ad omnes illarum proprietates perfectè cognoscendas, non minus ac in curvis geometricis, sufficit. Hic verò Philosophi cujusvis inprimis debet esse scopus, ut nullâ habitâ utilitatis ratione veritatem detegat, quâ de re in tertiâ parte prolixius. Sic utique *D. des Cartes* infinitis nos, quæ tamen præstantissimæ in geometricis sunt, speculationibus privaret; prout ei aliquâ ex parte erit manifestum, qui tantum consideraverit, quàm singulares proprietates vel in unicâ Cycloide à *Torricellio*, *Pascalio*, *Hugenio*, *Wrennio*, *Wallisio*, *Leibnitio*, aliisque detectæ sint, quæ nihilominus curva ex mente *Cartesii* in Geometriam non foret recipienda. Deinde clarè patet, causam, cur *D. des Cartes* suas solum curvas in Geometriâ tolerandas judicet, nullam aliam esse, quàm quia ordinatim applicatarum eo pacto semper obrinetur dimensio geometrica. Atqui ob eandem sanè causam nullo modo ex curvæ, quas ego protuli per hanc secundam methodum, rejici poterunt, cum illam ipsam omnino etiam possideant proprietatem. Assumatur enim quæcunque *D. des*

*Cartes* in *fig. 25*, curva *AFGHI*, ductâ lineâ *AI* eâque in *N* bifariam divisâ, erigatur perpendicularis *NG*; tum ductis *AG* & *GI*, ut patet, æqualibus, si hæc denuo dividantur bifariam in *O* & *P*, ad easque ducantur perpendiculares *OF* & *PH*, erunt rursus *AF*, *FG*, *GH* & *HI* inter se æquales, hæcque pro-






Fig. 25.

lubitu continuare licet. Haud absimili ratione bisecetur AE in C, tum AC & CE in B & D & sic porro. Si jam perpendiculareres ad puncta B, C, D, erigantur, & rectæ FK, GL, HM parallelæ ipsi AE ducantur, puncta K, L, M æquè geometricè, ac in parabolâ, aut quâvis aliâ *D. des Cartes* curvâ, determinabuntur. Dividatur, ut magis speciatim in *fig. 26.* res exponatur, quadrans AMR, & radius AI continuò bifariam, ut in *fig. 25.* factum est: ductis postmodum perpendicularibus BS, CT, DV &c. ac rectis KS, LT, MV &c. radio parallelis, puncta S, T, V, W &c. geo-




Fig. 26.

metricè & æquè accuratè, ac in ullâ *Cartesi* curvâ, determinantur. Si itaque problemata, quæ per *Dni. des Cartes* curvas solvuntur, geometricè soluta esse affirmas, sanè rationem non video, cur non illa quoque problemata, quæ harum curvarum ope solvuntur, geometricè soluta esse dicam; & per consequens, cur non fidenter asseverare possum, me docuisse angulum in datâ ratione, idque geometricè,

tricè, secare, cum hoc expedite satis, & multò melius, quàm per veterum quadratricem in præsentì figurà per exhibitam modò curvam peragatur: in hac enim linearum interfectiones fiunt ad angulos rectos, in illà ad obliquos, in hac omnia curvæ puncta geometricè determinantur, in illà verò quâ ratione ultimum punctum sit determinandum, neutiquam ab ullo fuit ostensum. Nec hæc curva minùs singulares, ac ulla ex geometricis *D. des Cartes*, habet proprietates: spatium siquidem ASTVRI ad circumscriptum quadratum eam habet rationem, quam radius AI ad quadrantem AMNR; item solidum, quod constituitur hac figurà circa axeni AI rotatâ, est ad cylindrum circumscriptum ut 1. ad 2. &c. Porro hujus curvæ ope infinita spatia curvarum mechanicarum absolute quadrantur, tam quoad se tota, quàm quoad omnes suas partes, idque non vulgari, sed singulari planè quadrandi methodo. Verùm hæc in suum locum reservantur.

3. Patet tandem haud difficulter ex suprâ traditis, quid causæ fuerit, cur quidam hætenus tam exiguos fecerint progressûs, quidam contrà multò majores, & quid de iis, qui accuratè hæc observaturi sunt præcepta, sit sperandum. Nam 1. quidam hucusque eâ assumpserunt principia, quæ nullatenus poterant concipi, atque sic ne passum quidém valere progredi, quàm falsâ nobis exhiberent. Talia sunt, quæ antiqui Philosophi crediderunt, de origine mundi, animalium, &c. & quæ sibi pervaserunt illi, qui omnia animalia vel ex putredine, vel ex solo semine, non verò ex ovo nasci putârunt. Huc referenda etiam sunt principia Astrologiæ, Chiromantiæ, & his similia infinita, passim apud authores occurrentia. Licèt autem 2. plerique non semper talia; quæ non poterant concipi, assumpserint, ea tamen fuère, quorum nullos planè conceptûs habebant, sed quæ tantùm sibi imaginabantur: qualia sunt quatuor elementa, sal, sulphur & Mercurius, calidum, frigidum, hu-

midum & siccum, Alkali & acidum, Materia, Forma & Privatio, Atomi seu indivisibilia, eorumque gravitas, *Helmontii* Archæus, *Mori* principium Hylarchicum, notio quietis, quam *D. des Cartes* exhibet, aliaque plura, quæ hic refutare negligo: tum quòd ex superius dictis, quid de hisce sit sentiendum, satis jam constet, tum quòd ea alterius sint loci. Dicam tamen hoc in genere, eis, qui hæc principia fuerunt secuti, absolutè impossibile fuisse, vel unicam in scientiis solvere difficultatem. Si enim principia verè non concipiuntur, quâ, quæso, ratione illa, quæ ex illorum conjunctione producuntur, concipientur? Regerent aliqui; nonne hinc infinita derivamus? Equidem haud ambigo: nam si satis aquæ igni affundam, is certè exstingvitur, atque ita novam quoque inde derivo veritatem; quia verò, quid sit ignis & aqua, initio philosophandi non concipio, sed tantùm imaginor, quemadmodum fusè suprâ explicui, multò itaque minùs potero concipere, quâ ratione ejusmodi ex eorum conjunctione effectus sequatur. Non invitus ergò concesserim, novas hinc posse derivari veritates, nullo autem modò eas posse explicari seu intelligi. Quod ultimum in scientiis, genuina habentibus principia, palmarium est requisitum, & dubio procul acquiritur, si illa fuerint genuina. 3. Multos hætenus exiguos valde fecisse progressus, in causâ quoque est, quòd, etiamsi talia, quæ non tantùm imaginatione percipiuntur, sed & quæ verè concipiuntur, asciverint, primos tamen rerum conceptus non habuerint, adeoque multis, quorum notitia debebat præcedere, non adeò scrupulosè examinatis, infinitis particularibus nimium sese intricârint; ubi ejusmodi necessariò subnatæ iisdem sunt difficultates, quibus solvendis eandem ob causam fuere impares: quo factum est, ut immensè & inutilis, qui ex eo oriebatur, laboris tadio confecti, minori industriâ, ac par erat, rem tractârint, aut planè intactam reliquerint. Est 4. exiguorum progressuum causa, quia, utut primos habue-

runt



rint conceptûs, nullo tamen ipsis certo constabat argumento, an nimirum omnes sibi primos conceptûs acquisivissent; adeoque, an omnia & singula ex suis principiis cognoscibilia certò possint derivari, incerti semper erant. Ex quibus omnibus, si bene considerentur, clarum erit, quare alii e contrariò multò feliciori successu rem gesserint: inprimis, quare Mathematici præ omnibus aliis tantopere in scientiis profecerint? Causa in promptu est: hi enim explicata modò præcepta aliquantò accuratiùs secuti, scopum propiùs, quàm ulli alii, non potuerunt non attingere. Et hinc ultimiò quoque clarum est, quid sit agendum, ut impostertum maximis fruamur progressibus: quod partim in antecedentibus fusè declaravi, partim in primo corollario breviter sum complexus. Atque ita arbitror, me ex voto determinasse omnium utilissimam ac maximè arduam quæstionem, in quam initio philosophandi mentis aciem unicè defigere debemus: unde nempe indubitato scire queamus, nos talia habere principia, quæ certa, & quæ omnium prima sint, quorumque operâ omnes omnino, quæ in quibusvis particularibus occurrunt scientiis, solvere nobis liceat difficultates; & quòd per consequens exinde ea, quæ humanitus sciri possunt, cognoscibilia deducere certò in nostrâ potestate sit. Hoc insuper ipsum me circa Mathesin particulatim reverà præstitisse confido; adeò ut de hisce jam traditis principiis audeam spondere, hinc omne id, quicquid quoad hanc scientiam humanâ mente sciri poterit, certò posse determinari. Absolutis itaque iis, quæ spectant ad definitiones, transeamus jam ad Axiomata.

Genuinis jam omnibus definitionibus, quæ tanquam elementa sunt seu principia eorum omnium, quorum veritatem indagare nobis proposuimus, inventis, primum, quod nunc venit suscipiendum ad magis magisque nostram augendam scientiam, est, ut ipsas consideremus definitiones in se, hoc est, ut omnes probè respectûs, qui haberi

*De Axiomatibus; ubi inquiritur,*


*l. quid sint.*

possunt inter omnia elementa definitionis alicujus, hoc est, inter fixa, mobilia, & motum, sive ea ut sola, sive ut inter se comparata exhibeantur, consideremus; deinde ut semper videamus in unoquoque diverso respectu, quæ ex eo nova sequantur. Veritates verò hinc deductas appellabo *Axiomata*.

2. Quæ ratione investiganda.

Quod igitur tantopere à multis est quaesitum, id jam ex ipsâ hac axiomatis definitione ultro addiscimus; in nostrâ scilicet esse potestate non solum talia, sed & omnia, quæ nobis sunt necessaria, certò acquirere, si nempe circa omnes respectus, qui inter ipsa elementa definitionis alicujus dari possunt, consideremus, quot & quænam semper ex ipsâ generatione nova alia ac alia subinde resultent. Quæ, ut magis fiant perspicua, exemplis illustrabo.

Fig. 27.



Sit ex. gr. in *fig. 27.* circulus.

Si in ejus formatione respectus ad fixum seu centrum A habeatur, observabitur

1. *Axioma*, nimirum motum eò tardiozem esse, quò centro propior, & eò velociorem, quò ab eo remotior est.

Si respiciatur mobile seu radius AB, dum is delineatur, notabitur


2. *Axioma*, omnes in circulo rectas à Centro ad circumferentiam ductas, sive radios AB, AE, inter se esse æquales.

Si respectus ad solum motum habeatur, observabitur, cum esse uniformem, seu idem prorsus efficientem. Hinc

3. *Axioma*, omnes tam arcus EB, quàm sectores BAE sibi similes esse, & sibi superimpositos ubique congruere.

Si jam inter fixa & mobilia fiat comparatio, varia rursus hinc concludentur. Si enim in *fig. 28.* longitudo mobilis

Fig. 28.



bilis seu radii AB, AC, AD, diversa, centrum verò idem statuatur, observabitur

4. *Axioma*, circulos, eodem centro descriptos, esse parallelos.

Si verò in *fig. 29.* diversa sint centra, & longitudo radii varia, notabitur

5. *Axioma*, circulos tales, vel se tangere, vel secare, vel neutrum horum contingere.





Fig. 29.

Si autem respectus habeatur unius mobilis ad aliud, verbi gratià in *figura 30.* AB, quod ut primum considerabimus: hoc poterit conferri cum AG, vel quatenus liberè recedit ab AB, vel quate-

Fig. 30.




nus in quodam loco subsistit. Si prius, gignitur inde

6. *Axioma*, hinc oriri angulum majorem ac majorem, prout AG magis ac magis recedit ab AB, nempe angulum BAG, BAF, BAE.

Si posterius attendatur, radium

Fig. 30.



dium scilicet AB conferri posse cum AG, quatenus nimirum alicubi motum suum sistit, vel ad perpendicularem FA, vel ad rectam AD, quæ eandem rectam cum AB constituit: originem inde, juxta prius, ducit

7. *Axioma*, angulum BAF æquari angulo FAD; juxta posterius verò

8. *Axioma*, lineam BD, quæ diameter dicitur, per centrum A transeuntem, semper duplam esse radii AB. Atque ita alia adhuc possent observari.

Si quis eâdem ratione in *Mathesi universalis*, de quâ supra, consideret primò quantitatem in genere, tunc, quia omnia in *Mathesi* reducuntur ad æqualitatem, quâ, tanquam simpliciori conceptu, omnes etiam inæqualitates facillè deinde advertimus, porro quantitas considerari poterit, vel in se, tanquam fixum quid, nullam patiens variationem, vel in se, ut mobile quid, patiens aliquam variationem, vel denique, quatenus reipsâ quasi movetur, seu rerum novarum generationes efficit, hoc est, prout cum aliis quantitatibus comparatur; Si quis hæc & similia consideret, tria primaria totius *Matheseos* haberi axiomata observabit, à quibus omnia, quæ in eâ concluduntur, unicè derivantur. Horum

1<sup>um</sup> est, omnem quantitatem sibi esse æqualem. Unde patet, totum suis partibus simul sumptis æquari. Etenim totum & omnes partes sunt eadem quantitas, quæ idcirco sibi ipsi æqualis est. Hinc sequitur: si totum omnibus suis partibus est æquale, ipsum etiam quibusdam saltem esse majus, hoc est, totum suâ parte esse majus, aliaque id genus.

2<sup>dum</sup> *Æ-*



2<sup>um</sup> *Æquales quantitates ope aliarum quantitatū æqualium æqualiumque operationum in alias transformari quantitates non minùs æquales.* Unde sequitur, si æqualibus æqualia addas, vel ab æqualibus æqualia auferas, vel æqualia per æqualia multiplices, aut dividas &c. producta illa etiam fore æqualia.

3<sup>um</sup> *Quæ eidem æquantur, inter se quoque æquari.* Hinc clarum est, ea, quæ ejusdem dupla, tripla &c. aut subdupla, subtripla &c. sunt, etiam fore inter se æqualia.

Patet autem, plura his tribus axiomata non dari, nec pluribus opus esse, tum à priori, cum quantitatū cum æqualitate in genere consideratæ, ut modò dixi, non plures dentur relationes, tum à posteriori, per Analysin speciosam. Omnia enim theoremata, seu quicquid in Mathesi absconditum est, nota fiunt ope æquationum ejusdem Analyseos. Est autem æquatio talis, in se considerata absque ullà variatione, nihil aliud, quàm quantitas eadem diverso modo expressa, ac proinde per axioma primum sibi ipsi æqualis; adeoque quælibet talis æquatio est primi hujus axiomatis asseveratio. Deinde omnes variationes, quas eadem subit æquatio, cum aliqua ex quantitatibus ad alteram æquationis partem reducitur, nihil aliud sunt, quàm affirmatio continua secundi axiomatis. Denique, cum eadem quantitates ex diversis æquationibus sic ad alteram æquationum partem redactæ inter se æquantur, indeque novæ æquationes exoriuntur, quid hoc aliud est, quàm tertiū axiomatis applicatio? Quum verò ex solis hisce tribus æquationum operationibus, ut Algebræ peritis notum, omnia ex quibuslibet subjectis eruantur theoremata, hinc vel à posteriori manifestum est, seu ipsā experientiā comprobatur, non pluribus, quàm tribus his ipsis, nos indigere axiomatibus ad occulta quæcunque in Mathesi determinanda, utit maximè simplices, seu nullius momenti veritates primo intuitu esse videantur. Nec ergò mirum est, omnia Matheseos adeò

perspicua esse, cum tam manifestis, tamque paucis cuncta superstruantur axiomatibus. Spero itaque me, ut præceptis, ita exemplis satis declarasse, quâ ratione axiomata sint inveniendâ; circa quæ denique quàm optimè notandum, maximi interesse, quo ordine ea, si nempe his opus habemus, deducantur. Etenim hîc definitiones haud adeò compositæ, quæ nimirum pauca elementa in suâ generatione, requirunt, priori loco sunt considerandæ, ut ita à simplicioribus ad magis compositarum rerum cognitionem gradatim progrediamur.

3. *Considera-  
vis.*

Ex his omnibus patet 1. Licet ejusmodi axiomata, si-  
ve, ut ab aliis appellantur, communes notiones, vel æterna veritates, non semper ad certum redigi queant numerum, id quod difficulter in primis peragitur, si definitio admodum compositam generationem habeat; ea tamen, ubi de iis cogitandi se offert occasio, non posse ignorari. Sunt enim omnibus, è quibus oriuntur, definitionibus sic inclusa, ut unicè ab iis dependeant. Si itaque circa alicujus difficultatis enodationem ad illas definitiones attendimus, non possunt non axiomata quoque, cum usu veniunt, nobis esse manifesta.

2. Patet, hoc ipso nullam ampliùs de axiomatibus fore disputationem, qualis antehac erat, quando definiiebantur ea, quòd essent sententiæ omnibus manifestæ: item tales, quæ à nemine possent in dubium vocari: cum tamen, sæpe fieret, ut quædam à nonnullis tanquam nota assumerentur, quæ ab aliis pro talibus non agnoscebantur, verum potius ut dubia rejiciebantur. Nam si axiomatum veritas à solis pendeat definitionibus, dato aliquo axioma, illicò definitiones, quæ ingrediuntur, exhibendæ erunt. Si igitur istæ definitiones, juxta superiùs tradita, validæ fuerint, non magis de axiomatibus, quàm de ipsis definitionibus, ex quibus ortum suum duxere, erit dubitandum, adeoque illa æquè manifesta erunt, ac hæ. Si contrâ definitiones minus  
fue-

fuerint probæ, verorum etiam axiomatum vicem supplere non poterunt. Atque ita habebimus genuinam normam accuratè examinandi, quàm in axiomatum numerum possint referri, quàm non. Ut taceam, has definitiones, nimirum axiomata esse sententias omnibus manifestas, nullius esse usûs, cum neutiquam ostendant, unde nos eadem proprio Marte invenire queamus, quod tamen ex suprà traditis mox obvium est.

3. Patet quoque hinc, quâ ratione non necessaria declinentur. Quod fit, si alia non assumantur, quàm quæ ex definitionibus originem ducunt, & ad rem quandam tractandam necessario requiruntur. Sic multi hujus rei ignari, quò sibi de re quâdam scientiam aliquam parent, per multa primum talia coacervant axiomata, quæ tamen, an sibi usui sint futura nec ne, planè ignorant. Alii verò non quidem alia, quàm quibus ad suas demonstrationes usi fuerunt, in catalogum referunt, hæsitant tamen, annon alia fortè dentur axiomata, quibus res meliùs ac expeditiùs demonstraretur. Nesciunt utrique, quæ solùm sint necessaria, quæque ratione, ubi opus, ejusmodi omnia determinanda, antequam certæ se accingant disquisitioni. Hæc autem omnia ex hætenus ostensis clarè & securè, meo quidem judicio, addiscere licet. Multa ex. gr. in *Euclidis elementis* occurrunt axiomata, quæ nullibi adhibentur, & quibus nullatenus erat opus: quædam recensentur, quorum definitiones, quæ ipsa ingrediuntur, à principio non fuerunt adhibitæ: quædam tanquam theoremata proponuntur, cum tamen mera sint axiomata. Quantopere verò ab aliis Mathematicos ignaris hîc aberratum sit, ab iis præcipuè, qui Archæologias, seu ejusmodi scientias condere voluerunt, in quibus similia axiomata, seu juxta illos, prima principia, vel omnium scientiarum canones contineantur, non sine singulari delectatione perspiciet ille, qui & hæc pauca à me tradita probè perpenderit, & nihilominus tamen, per ea à

tantâ confusione penitus liberari se posse, reapse viderit Confido igitur, me etiam hic satis declarasse, quomodo axiomatum ope tali ratione promovenda sit scientia, ut nihil eorum omittatur, quæ scitu sunt necessaria.

*De Theore-*  
*matibus: ubi*  
*notan-*  
*dum,*

Postquam ergo omnes rei tractandæ definitiones formavimus, easque in se ipsis quoque spectavimus, ultimum, quod ad augendam ulteriùs scientiam efficere poterimus, est, ut ipsas definitiones inter se etiam jungamus. Junctis ita duabus pluribusve invicem definitionibus, hoc est, diversis naturis, accidit, ut, quæ antea separatam constituebant naturam, jam accipiant naturas à se mutuò dependentes; atque ita accidit, ut inde nova natura, seu novum possibile oriatur, vel, si mavis, nova veritas. Et has veritates tali ratione deductas

*1. Quid sint.*

imposterum *Theoremata* vocabo. Sic ex diversâ rerum naturalium junctiōe alia aliæque proveniunt nova. Idem etiam in diversis machinis perspicuum est, compositis ex aliquibus rotulis, quæ, prout variè junguntur, alium atque alium exhibent effectum. Globus D in *fig. 31.* plerumque vi gravitatis per rectam DE versus inferiora ad E tendit: Sed si plano AB obliquè ad horizontem FB inclinato in C jungatur, novam tunc conficiet per CB viam. Curva item AHDK in *fig. 32.* curvæ BDF in D jungatur. Jam ex curvæ AHDK definitione seu naturâ omnes rectæ GH, CD &c. certam naturam seu relationem







Fig. 32



tionem ad rectas AG, AC &c. habebunt. Itidem in curvâ BDF omnibus rectis CD, EF &c. juxta hujus curvæ definitionem, certa ratio erit ad omnes rectas BC, BE &c.

Quum verò curvæ jungantur in D, natura rectarum AC, CD dependebit tam à naturâ curvæ AHDK, quàm à naturâ curvæ BDF, adeoque novam acquireret naturam, quæ ab utriusque curvæ naturâ dependebit, hoc est, novum hinc inde produceretur Theorema.

Ex tali traditâ Theorematum definitione, ipsam eorum generationem involvente, facillimè colligitur, quâ ratione ea sint invenienda. Si ex.gr. in adductis modò exemplis rotarum natura seorsim nota sit, & earum conjunctio, deinde attendatur, tunc è vestigio constabit, quis motus ex itâ compositâ machinâ oriturus sit. Sic ex naturâ gravis D, deorsum ad perpendiculum tendentis, item plani AB, nec non globi D, statim colligitur, ipsum, ubi ad C pervenerit, per rectam CB esse rotaturum. Nec quoque ignorare poterimus theorema, quod ex conjunctione curvarum AHDK & BDF inter lineas AC & CD ortum habet, modò istarum curvarum naturam seu definitionem sciamus. Quemadmodum verò docui omnes definitiones primùm acquirere circa priora: ita ostendi deinceps, quomodo hinc omnia axiomata sint derivanda. Quodsi jam porro omnibus modis, quibus possibile est, has conjungamus definitiones, hoc est, modò binas, modò ternas, modò quaternas &c. sive diversam, sive eandem habuerint naturam, fieri certè nequit, quin hac procedendo viâ omnes

2. Quâ ratione inveni-  
enda.

etiam veritates, quas per naturam scire datum est, hoc est, cuncta cognoscibilia, seu theoremata, nobis acquiramus. Atque ita nova alia atque alia detegere semper in nostrâ erit potestate, modò & animus & tempus nobis fuerit talia detegendi. Hoc ostendere secundâ hac sectione meum omnino fuit propositum. Est autem hic loci apprimè notandum, omnia, quemadmodum de definitionibus & axiomatibus suprâ notavi, certo semper ordine esse conjungenda; incipiendo nimirum à simplicissimis, hoc est iis, quorum definitiones paucissima continent elementa, seu possibilitia, & ascendendo gradatim ad magis composita, hoc est ea, quæ subinde plura pluraque requirunt possibilitia. Hoc pacto enim derivatæ hinc veritates seu theoremata certum servabunt ordinem, ut adeò tribus quatuorve cognitis eorum ordo in infinitum pateat, atque sic eâdem methodo infinitas semper veritates impetremus. Quin ex duabus tantum definitionibus assumptis, si vel maximè eâdem fuerint, variè junctis, infinita prodibunt; cujus exempla dederunt *Euclides* alique Mathematici, qui ex solâ lineâ rectâ ac circulo quamplurima formavere theoremata. Ego ipse jam multos ante annos exercitii gratiâ ex iisdem subjectis infinita eduxi theoremata, quæ generaliora, pulchriora & magis admiranda, quàm illa omnia, quæ à veteribus fuerunt demonstrata. Simile quid speciminis loco desiderantibus quædam theoremata, istas habentia condiciones, aliquando communicavi. Quinimò ex solâ rectâ, si integra cum suis partibus conferatur, prout ea in tres, quatuor &c. partes divisa supponitur, infinita, & si ritè procedas, planè singularia resultant theoremata. Nec arbitror, quenquam jure conquesturum esse, viam ad infinita nova inveniendi sibi satis præmonstratam non fuisse; sed existimo, potius me meam omnino in hac sectione secundâ fidem liberasse, ubi post omnia nec ordinem quidem, quo progrediendum in veritatis inquisitione, reticui, hoc est, docui, quæ facilia primum

primùm quærenda sint, & quo pacto paulatim atque per gradus ad difficiliora transeundum. Equidem optimè & ab aliis dictum est, nullam in veritatis indagatione utiliore posse dari Regulam illâ ipsâ, quâ semper à facilioribus ad magis composita gradatim adscendere jubemur: Verùm, nescio, an etiam modum, quo sequi eandem haut difficulter liceat, adeò perspicuè ostenderint, ac quidem à me præsentibus hisce factum esse jam manifestum est. Antequam tamen hanc concludam sectionem, necesse adhuc est, ut ad alia quoque transeam, quæ hinc sequuntur, certè non minoris, quàm hætenus dicta, momenti.

1. Notandum, theoremata aliquando admodum esse <sup>3. Considera-</sup> generalia, & proinde multa specialia ex iis concludi posse; <sup>ria.</sup> aliquando etiam alia hinc immediatè sequi, licèt speciales eorum casus non sint: quas veritates, ita deductas, distinctionis gratiâ *Corollaria* vocabo. Ex hac corollarii definitione, quòd scilicet theorematis alicujus aut specialis sit casus, aut consequentia, facilè patet, id quandoque demonstratione, quandoque nullâ indigere. Etenim si fuerit casus specialior, tunc necessum est, eum, qui generalem demonstravit casum, eo ipso omnes quoque speciales casus demonstrasse; & ideò nullâ utique indigebit demonstratione: Si verò fuerit consequentia saltem, certè corollarium tale erit demonstrandum, nempe per ipsum theorema, cujus est consequentia. <sup>Circa corollaria.</sup>

Notandum præterea hoc loco est, quòd, cum ea, quæ hic de theoremate dixi, tam axiomati, quàm problemati, de quo mox, accidere quoque possint, his ipsis etiam eadem ratione Corollaria convenient.

2. Aliquis fortè ex hætenus ostensis, qui viderit, me <sup>Circa sibi-</sup> huc usque de definitionibus, axiomatibus, theorematibus, <sup>his.</sup> corollariis &c. locutum esse, colliget, me in eà esse opinione, ad alios notitiâ quâdam imbuendos omnia eo modo, quo

quo solent Geometræ, demonstranda, hoc est, synthésin adhibendam esse. Quod ad hanc rem attinet, fateor equidem, me satis capere non posse, cur viri ingeniosi hanc præ cæteris viam non fuerint amplexi. Quid enim præstantius hac in parte est, quàm adversarios, quantumvis pertinaces, ita posse convincere, ut, velint nolint, ad assensum cogantur? Et quid magis necessarium, quàm in veritatis inquisitione ea, quæ jam certò sunt determinata, ab aliis, quæ nondum certò determinata, sed probabilia tantùm esse deprehenduntur, evidenter distinguere, quo sic tandem inutilium ac dubiorum finis cum omnium acquiescentiâ oritur. Ast interim tamen via hæc discere cupientium animis non satisfacit: hâc siquidem ratione veritatem jam inventam solùm cognoscimus, invictamque eam facimus, quod ipsum etiam veterum Mathematicorum unicum erat intentum, nimirum ut alios de veritatibus suis, quas detexerant, convincerent: illam autem similia proprio Marte invenienti viam, quam Analysin vocant, quamque isti Geometræ planè reticebant, eo ipso non addiscimus. Mea hæc est mens, analysin synthési semper esse jungendam: quemadmodum & in hisce attentus lector potuit observare, me vias has ambas eâ methodo, quâ huc usque ita constanter processi, tam intimè conjungere, ut in unam coalescant, atque hac ratione una quali eademque evadat methodus. Semper enim tam in definitionibus, quàm axiomatibus ac theorematibus genuinam exhibui viam, quæ, quo pacto res methodicè & tanquam à priori fuerit inventa, ingenuè ostendit, nec nudum saltem, quemadmodum alii faciunt, definitionum, axiomatum &c. exhibet numerum. Hæc ipsa verò, quibus veri inventionum ita aperiuntur fontes, ac ordinis ratio, seu quomodo omnia continuo nexu cohæreant, ostenditur, quibusque singula ubique ad faciliorem intelligentiam necessaria continentur, ubi opus erit ea bene distinguere, *Scholìa* appellabo.



Si itaque quævis ad scientias spectantia hoc etiam modo ab aliis tractarentur, explicari sanè vix posset, quantam lectores utilitatem indè percepturi essent. Verùm enim verò paucissimæ mentem verè generosam habent, parùm de lectorum utilitate augmentoque scientiarum solliciti, multùm autem in hoc occupati, ut alios in sui admirationem rapere, atque sic propriam, quam impense sectantur, gloriam quovis modo magis magisque stabilire queant; proptereaque investigandi viam non tantùm nullo modo aliis aperiunt, sed etiam, quantum possunt, occultare omni industriâ student, cum tamen factò hoc & sibi ipsis, (eò quòd perituris ac maximè instabilibus fortunæ bonis, cujusmodi gloria est, inhient,) & scientiarum augmento minùs utiles sint, si non planè noxii.

3. Tandem, quia omne id, quod efficitur, ope alicujus veritatis detectæ in effectum deducitur, idè ille, qui veritates quascunquè seu theoremata, eruendi viam cognovit, omnia quoque necessaria hinc efficere procul dubio potest, hoc est, cuncta eo ipso PROBLEMATA sibi acquirendi habet potestatem. Deinde, qui didicit omnia effecta per causas sic à priori deducere, uti hactenus ostensum, is poterit quoque, modo inverso, ex datis effectis causas investigare. Quæ methodus non, ut plerique credunt, diversa, sed eadem prorsus est, licèt ex applicatione duplici ut duplex spectetur, priorque posteriori multò sit excellentior, & qui priorem novit, posteriorem quoque in potestate necessario habeat, sed non semper è contrario. Ipsa autem quæcunque solvendi problemata methodus, si, quæ modò suprà demonstravimus, repetam, in hisce paucis consistit.

1. Omnium, quæ sic conjuncta, aut conjungenda ad ali-  
quid præstandum, natura seu definitiones cognoscenda sunt, juxta illa quæ circa definitiones superiùs prolata: quâ in re quædam hic veniunt notanda ad faciliorem solutionem conducentia.

*Circa problemata: ubi ostenditur,*

*1. Quid sint.*

*2. Quâ ratione solvantur.*

Si plures unâ conjunctiones fiant, hæ omnes speciatim enumerandæ, & eo, quo fiunt, ordine considerandæ: in quâlibet earum autem omnia ad hanc conjunctionem instituendam utilia speciatim quoque sunt enumeranda: & si neque harum conjunctionum catalogus seu series, neque ea omnia, quotquot in unaquâque conjunctione occurrunt, ipsum problema exhibeant, ista, quæ restant, ratione vel experientiâ prius erunt determinanda, antequam progrediamur.

Porro non semper particularis cujusdam rei naturæ prænosceda venit, sed ea saltem, quæ pluribus aliis est communis, si nimirum idem effectus illa solum, quæ ita conjunguntur, non præcisè requirat, sed & alia admittat; atque tunc ea seliguntur, quorum natura vel intellectui simplicior, vel sensibus evidentior videatur. Nec quoque hic semper omnium, quæ hoc pacto conjunguntur, natura à priori cognoscenda est, modo hæc per experientiam claram à posteriori sit nota. Hinc oriuntur hypotheses, quas quidem ad sua demonstranda adhibeant.

Tandem, si quid jungatur effectui, non ut causa, sed ut impedimentum, effectui certo modo resistens, aut saltem nullo modo inserviens, tunc ejus natura, ut sit nota, nullatenus desideratur, sed abstrahimus potius à quocunque tali, quantum fieri potest: in praxi verò ejusmodi causæ assumuntur, in quibus impedimentum non est adeo sensibile.

2. *Unaquaque harum rerum, quæ sic junguntur, natura, seu definitio, uti supra in axiomatibus, erit in se spectanda, cum in finem, ut, quinam seorsim ab unaquâlibet earum producat, effectus possit observari.*

Hic notari velim, quod, si rei alicujus natura solâ experientiâ innotuerit, effectus ejus ad certum tantum locum, ubi de successu certiores sumus, non autem sine discrimine ad quemlibet, sit restringendus.

3. *Tunc hæc omnia conjunctim spectanda, ut supra in theorematibus, & attendendum erit, qualis effectus ex harum causarum conjunctione necessario sequatur.*

Notanda hic sunt: Si problema quoddam, etiamsi ad aliquid præstandum non omnium exhibitorem specialis natura fuerit adhibita, solvi nihilominus possit, tunc conclusio ejusmodi erit generalior; ac proinde inserviet ad plura similia effecta explicanda: si verò non possit solvi, certum est, vel non omnia, quæ ad aliquid efficiendum ita conjunguntur, speciatim esse enumerata, vel veram omnium istorum naturam non esse exhibitam, vel problema tale, si hæc singula, ut par erat, ritè fuerint peracta, solutu esse impossibile.

Quando autem idem problema variis modis potest solvi, tunc in id laborandum, ut omnium simplicissimas naturas seu generationes obtineamus, quò solutio etiam fiat facillima.

Ex his patet, quâ ratione quorumvis problematum solutio cum illâ omnis generis theoremata eliciendi methodo, quam supra prolixè exposui, consentiat. Ut tamen hæc eò melius intelligantur, ad magis particularia transibo, eaque exemplis illustrabo, in quibus solvendis non adeò circumspectus ero, atque à nonnullis efflagitari posset: quod ipsum & fortè necesse factu esset, si his accuratè solvendis unicè intentus forem. Sed quia horum solutionem eatenus tantum profero, quatenus dictis modò præceptis declarandis & percipiendis inserviunt, exactam magis enodationem eorundem, quò evitetur prolixitas, hic loci omitto. Addo & hanc neglectæ solutionis accuratioris causam, quòd hæc in tyronum præcipuè gratiam hic commemorarentur; ut generalia præcepta, aliquam semper obscuritatem involventia, iisdem clariora reddantur. Et hoc quidem ideo hic maximè præmoneo, ne fortè quis existimet, his talibus me ejusmodi specimina, è quibus eluceat, quid methodo

hac præstari possit, exhibiturum esse. Quicumque enim talia desiderat, illum expectare oportet, usque dum ad alia aliquando, si DEUS vitam occasionemque commodam concesserit, progrediar: ubi difficillima in Mathesi & Physicâ hac ipsâ methodo solvere conabor; ut aded ejusdem præstantia attendentibus exinde perquam manifesta futura sit. Impræsentiarum verò quædam saltem, ut dixi, in tyronum gratiam conscribere volui, proptereaque talia elegi exempla, quæ sæcunda valde sunt ad plurimas, easque utilissimas conclusiones inde derivandas. Et utut pleraque ab aliis jam demonstrata extent, opera tamen nostra non erit supervacanea; siquidem illi authores inventionum fontes, seu, quâ viâ aliquis proprio Marte à priori, & quidem unâ eâdemque methodo constanter talia detegere queat, non aperuerunt, quod tamen peragere mihi semper est primum.

## I.

Descendat, in *fig. 33*, globus A liberè versus terram E vi gravitatis suæ: jam observamus, ejus motum magis magisque semper accelerari, quærimusque causam, quare hæ velocitates crescant, & qualis quantaque horum spatiorum ad certa temporis momenta emensorum sit progressio?

Hic 1. nulla alia circa effectum hunc conjunguntur, quàm globus A, gravitas, & ær circumstans; quorum natura jam investiganda est. Quod ad globum attinet, quia, quod in hoc observatur, idem in alio quovis corpore accidit, particularis ejus definitio hic non requiritur, sed generalis saltem cujuscunque corporis moti. Quod gravitatem spectat, per experientiam de ejus naturâ notum est, omnia gravia ad perpendicularum versus inferiora ten-

Fig. 33.




dere.



dere. Aërem quod concernit, quia hic potius resistit, seu impedimento est, nec quicquam ad hunc effectum producendum confert, eum ita considerabimus, ac si nec adjuvaret nec impediret, hoc est, ac si planè abesset, abstrahendo ab omni exteriori resistentiâ.

Hæc ipsa 2. separatim spectemus, ut videamus, quid unumquodque eorum seorsim agat. Et primò quoad globum, superimponatur globus A in *fig. 34.* tabulæ politæ ac




planæ FG, nec externa aëris aut tabulæ resistentia attendatur; globus hic versus E pulsus semper æquabili motu progredietur: si denuo in B eadem vi impellatur, duplo celerius

movebitur: si in C eadem rursus vi urgeatur, habebimus motum ejus triplo celeriores, & sic consequenter. Quod gravitatem spectat, si grave quoddam manui impositum, illudque eâ ratione, quâ vis gravitatis solet grave versus inferiora deferre seu premere, deorsum actum fuerit, observabimus, grave illud omnibus locis intermediis semper majorem æquali vi esse pressurum. Quia autem nos fugit, an res etiam in quâvis altitudine ita succedat, supponamus interim gravis illius pondus in certo altitudinis gradu, de quo nimirum per accuratam hujus rei experientiam confirmati sumus, non variari.

Hisc 3. sic animadversis, haud difficulter liquet, quid ex iisdem ita conjunctis, hoc est, globo gravi versus inferiora descendente, tum accidat. Dum enim globus in A, (*vid. fig. 33.*) certam vim gravitatis obtinet, ea vis sola hunc versus inferiora motu æquabili premet: quia autem in locis B, C, D &c. nova continuo superadditur gravitatis vis seu pressio, etiam motum suum globus accelerabit; atque

ita primum explicatum est, quare scilicet gravia velocius semper moveantur. Deinde quia vis gravitatis seu pressionis semper æqualis superadditur, non tantum in locis B, C, D motum accelerabit, sed etiam globus ad æqualem superadditam vim ubique uniformiter accelerabitur, hoc est in B duplo, in C triplo, atque ita porro in singulis instantibus movebitur velocius, non aliâ ratione, ac antea globus in tabulâ FG fig. 31, pulsus celerius movebatur; & ita secundum quoque expositum vides, quomodo nimirum gravium velocitates augeantur. Ad tertium tandem, quò id non minus solvatur, requiritur tantum, ut aliquam linearam superiorum seu curvarum consideremus. Designent in *fig. 35.* AB, AC, AD &c. tempora, quibus mobile ita descendit, ut AB, BC, CD &c. sint æquales: deinde BF, CG, DH repræsentent velocitates, quas singulis temporibus acquirit: atque sic quoque spatia ABF, ACG, ADH &c. optimè referent spatia à quovis mobili ad tempora AB, AC, AD &c. emensâ. Quia autem velocitates BF, CG, DH, secundum modò monstrata æquabiliter, hoc est, ita, ut BF, KG, LH &c. semper sint æquales, augentur, idque non nisi in spatio, in quo rectam AFGHI habemus, accidit; hinc manifestum est, hæc spatia ABF, ACG, ADH &c. esse triangula. Quoniam autem triangula hæc ejusmodi proportionem semper servant, veluti quadrata AB, AC, AD &c.



exinde clarum est, spatia illa, quæ grave casu suo absolvit, esse inter se ut quadrata temporum AB, AC, AD, hoc est, ut 1, 4, 9, 16. &c. Si verò spatia, quæ mobile æqualibus temporibus AB, BC, CD, conficit, inter se conferantur; patet, ea esse tanquam spatia ABF, BCGF, CDHG &c. hoc est, ut spatiorum ABF, ACG, ADH differentiæ; adeoque & tanquam differentiæ quadratorum 1, 4, 9, 16. &c. id est, tanquam 1, 3, 5, 7, 9 &c. seu, ut numeri impares.

Fig. 36.


Hinc si A in *fig. 36.* certo tempore per spatium AB, decideret, certè tempore æquali secundo absolveret spatium BC, quod spatio primo jam dicto triplo majus est, tertio æquali tempore absolveret spatium CD, quod quintuplo majus primo &c.

II.

Descendant duo globi A, A, per perpendicularem AD, & planum inclinatum AE, in *fig. 37.*


Alter perpendiculariter per AD devolvatur, alter per planum AE, ita ut eodem tempore incipiant moveri. Quæritur jam, ubi ad lineam BC

horizonti in B & C parallelam pervenerint, quamnam acquisiverint velocitatem?



I. Notandum, globorum, plani inclinati, ut & gravium naturam notam esse debere: cætera verò, quæ hic tanquam impedimenta adsunt, non attendenda veniunt. Glo-

Globum quod attinet, novimus, eum circa centrum rotari. Plenum autem AC efficit, ut globus C semper magis magisque ad perpendicularem FH accedat, qui aliàs ex naturâ gravis ad solam lineam DE continuò versus inferiora descendendo tenderet.



2. Hæc seorsim in se considerando videmus, (1.) globum C rotatione suâ, seu motu circulari in se spectato, nihil sibi velocitatis acquirere. (2.) Globum, quatenus à plani AE situ disponitur, ut ad perpendicularem FH accedat, hoc est, quatenus horizontaliter movetur, nullam quoque majorem velocitatem versus inferiora acquirere. (3.) Eundem globum C tantum, quatenus vi gravitatis versus inferiora pergit, velocitatem sui motûs augere. Hinc


3. Sequitur, quia globus C nec rotando circa centrum, nec etiam, quatenus horizontaliter semper versus FH movetur, sed solum, quatenus movetur versus inferiora DE, majorem sibi acquirit velocitatem; quod idem & in globo B accidit, hoc est, nulla quoque velocitas nova acquiritur globo, nisi quatenus etiam versus inferiora descendit: hinc, inquam, clarum est, acquisitas velocitates in lineâ horizontali BC semper esse æquales. Quod erat inveniendum. Hic notandum: cum rectæ lineæ AE natura non sit inclusa, sed talis tantum, ut globum ita horizontaliter removeat, & verò hæc natura quoque cuicunque curvarum, sive earum convexa, sive concava sit, respectu perpendicularis AD con-



conveniat; ideoque hæc propositio universalior est, & quibuscunque curvis generatim competit. Ex duobus hisce, quæ in 1. & 2. problemate determinavi, cognitis omnia à Galilæo olim (qui primus hæc egregiè detexit) circa mobilia in planis inclinatis quibuscunque exhibita facillimè deducuntur.

III.


Fig. 38



Sit quæcunque curva ABC DE in *fig. 38*. Quæritur, quam habitura sint proportionem tempora descensuum per plana AB, AC, AD &c. sive per FE, GE, HE &c. si globi ex A, H, G, F eodem tempore demittantur? Hæc jam haud difficulter deteguntur. Requiritur enim mobilium natura in diversis planis inclinatis, per priora facillè determinandis; tumque curvæ ABCDE natura dari quoque debet. Ex his solis, quicquid desideratur, in quâcunque curvâ poterit inveniri. Ita ex his datis ostendit *Galilæus* in curvâ ABCD circulari, tempora descensus globorum super hæc plana esse æqualia, hoc est, globum æquali tempore descendere ex A in B, quo cæteri globi ex A, H, G, F, descendendo veniunt ad C, D, E.


IV.

Fig. 39.



Si quis aveat scire, quamnam proportionem tempora in *fig. 39*, quibus globi ex A, B per ipsam curvam ABE versus inferiora E decurrunt, habitura sint; attendenda tantum erit natura planorum inclinatorum AC, BD, curvæ ABE, & tangentium AC, BD, cum curvæ in ejusmodi dis-


quisitionibus, in quibus mensura requiritur, tanquam infinitorum laterum polygona considerentur. Atque ex hisce solis utique quis determinaverit non propositum solum problema, sed quicquid etiam hac in parte humanitus potuerit erui. Eâdem viâ, si quis exemplum velit, *Nob. Dom. Cnr. Hugenus* in pererudito *tractatu de Horologio oscillatorio* egregiam in Cycloide proprietatem detexit, nimirum globos quosvis A & B &c. quocunque loco in curvâ ABE positi sint, eodem instanti ad E pervenire.



## V.

Sit in *fig. 40*, quæcunque curva BD: quæritur linea AD ipsam in puncto D tangens? Si cui anîmus est, omnia, quæ possunt inveniri, detegere, eum trium hic occurrentium scire oportet naturam; linearum

Fig. 40.




nempe rectarum, curvarum, & demum tangentium: Ex his tribus datis necessariò hic invenitur, quod quæritur. Verùm quia in Mathesi sæpe unius rei diversa natura, seu definitio, hoc est, diversa generatio fingi potest; hinc quoque diversæ admodum curvarum tangentes determinandi viæ ab aliis fuerunt excogitatæ. Quæcunque verò istæ se habeant ratione, eò cogitationes potissimum sunt dirigendæ, ut generationes, quæ concipi possunt, omnium simplicissimæ formantur, quò simplicissimâ etiam viâ quæsitum determinemus. Quum ergo eam curvarum genesin exhibuerimus, quâ

quā nulla hactenus data fuit simplicior; methodum simplicissimā id ipsum determinandi viā hinc ideo etiam suprà derivavimus.

## V I.

Fig. 41.




Ponatur globus G in fig. 41. supra tabulam. BE: si globus hic ad A paulò infra verticem, H in quadrante HD ita prematur, ut digitus

eundem moveat versùs inferiora ad C, globus per rectam BE provolvetur: ubi verò ad determinatum venit locum, putà ad F, ultrò in libero aëre incipiet retrogradi versùs I, sine ullius quidem corporis ipsum ad contrarium disponentis attactu. Quæritur hujus rei causâ?

Manifestum est, tria hic conjungi, nempe digitum, globum & planum; quorum si spectemus, & seorsim consideremus naturam, apparebit, globo ex digito elapso pressione ex A in C effici, ut is profiliat versùs F; quia tamen idem digitus simul premit in A, loco inter verticem H & punctum D quadrantis DAH medio, eo ipso efficitur, globum suâ naturâ circumagi: quòd verò motùs hos horizontaliter continuare possit, planum BE in causâ est. Hinc extemplò hujus rei effectus explicatur. Dum enim digitus locum globi occupat, necesse est, ut globus ex eodem loco quasi elisus propellatur motu per planum BE continuato: sed quia simul rotationis motum, & quidem versùs CB recepit; eo instanti, quo prior elisionis motus, qui fortior erat, cessat in F, alter mox vires resumit, atque ita ex F versùs I motu retrogrado rotatur.


## VII.

Sint in *fig. 42*, ubi ABCD & EFGH, licet diameter EH sit quâvis ratione major ac AD; notum tamen est, aquæ massam in ampliori tubo EFGH æquali vi versus inferiora premere cum exiguâ aquæ massâ in angustiori tubo ABCD, hoc est, altitudinem ejus semper terminari horizontali lineâ ADEH. Quæritur genuina ejus ratio?



Quia hoc loco nec vasis, nec aquæ specialis natura, exigitur, cum in quocunque vase, & in quocunque fluido idem accadat, nil aliud considerandum est, quàm, quæ communis cujuscunque gravis corporis natura sit, & quâ vi, ratione alterius corporis gravis, versus inferiora nitatur. Sit ergo in *fig. 43*,

corpus seu cylindrus CD, & quidem aliquoties longior cylindro AB, sed ejusdem tamen crassitie, & materiæ, & in eodem etiam situ:




ostenditur autem levissimo negotio, corpora AB & CD eodem tempore descendere ad terram lineâ KS repræsentatam, ex quâcunque ruant altitudine. Nam corpora AB & CE inter se æqualia eodem certè tempore decident ad terram KL & MN. Idem demonstratur per eandem rationem de quibuslibet Cylindri CD partibus, eas nimirum

EF,



EF, FG &c. eodem tempore ad NO & OP, esse perventuras, quo cylindrus AB ad KL; adeoque & omnes simul partes, hoc est, totus cylindrus CD eodem, quo AB, tempore terram contiget, & per consequentiam, corpora duo, dummodo ejusdem materiæ sint, diversæ licet magnitudinis, æquali nisu tendent versus inferiora. Ex detectâ ergo tali gravium similium naturâ evidens est, quare tam exigua aquæ portio ABCD æquilibris sit, seu in æquipondio consistat cum tantâ aquæ EFGH massâ: nempe quia id, quod de unoquoque ejusdem materiæ corpore ostensum est, etiam aquæ competit. Cum itaque aquæ EFGH massa æquali nisu versus inferiora ruere conetur cum massâ ABCD, hinc æquali illo conatu inferiora versus se mutuò impediunt, & idcirco pari altitudine ADEH terminantur.

VIII.



Pendeant ex funiculis AD & BE in *fig. 44*, recto bacillo AB annexis, duo globi, D 10, & E 2 librarum. Quæritur punctum C, in quo bacillum sustentaculo CHF superimpositum situ horizontali æquilibrium servet?


Facilè patet, meditationi nostræ obijci bacillum AB; funiculos AD, BE; pondera D & E; & tandem æquilibrî naturam super sustentaculo CHF. Hæc enim omnia hic conjunguntur ad hunc effectum producendum.

Quod ad bacillum & funiculos attinet, quia specialem non requirunt materiam, ut ab omni impedimento, quod à materiâ provenire possit, abstrahamus, ea hic tanquam meras lineas rectas putemus. Globos quod spectat, cum,


parum intersit, qualis fuerint figuræ, modò graves sint, summamus eorum loco simplicissima corpora ex. gr. parallelepipeda, (vid. *fig. 45*) quæ omnium facillimè ad mensuram reducuntur. Quod

spectat ad æquilibrii naturam, si corpus tale ita suspendatur in K, ut linea LK sit æqualis KM, manifestum est, id horizontalem situm retenturum, eò quòd utrobique & æqualia pondera, & æquales distantie LK, KM sunt.

Fig. 45.



His benè perpenſis, cùm omnium, ad hunc effectum producendum, naturæ sint notæ, ipsa res haud difficulter determinabitur. Nil enim aliud exigitur, quàm ut hæc parallelepipeda longius longiusque extendantur, usque dum, uti in *fig. 46*, unum idemque parallelepipedum con-



stituunt, quod problema est perfacile. Ut autem hujus solidi longitudinis, hoc est, lineæ LO media inveniatur, bisecetur hæc in R, &, ut æquilibrii punctum ipsius solidi LO determinetur, linea PQ in C bifariam dividatur, eritque hoc punctum C punctum æquilibrii quæsitum. Hinc facil-

facillimè illud *Archimedaum* derivatur: parallelepipedum LM & MO, & per consequens, quævis corpora, cum inter se habent rationem, quam reciprocè distantia BC ad distantiam ejusdem AC.

Possem insuper tria, quatuorve corpora eadem ratione suspendere, & eadem methodo horum omnium æquilibrii centrum invenire; vel etiam centrum æquilibrii primum assumere, & assumptis quibuscunque gravibus determinare distantias, ex quibus suspensa, æquilibrium servant: Verum qui modò dicta intelligit, quæcunque facillè talia ipse præstabit.

IX.

Immergatur in *fig. 47*, globus E aquæ F, in vasculo ABCD contentæ: hic pro diversitate materiæ, è quâ compositus est, vel petet fundum, vel aquæ innabit, aut intermedio loco consistet. Quæritur hujus rei causa?



Primò si meditemur, quænam ad ejusmodi producendos effectûs hîc loci conjungantur, perfacilè liquet, nil præter aquam & globum adesse. Jam quia in variis corpo-

ribus ac fluidis eadem prodeunt effecta, neque globi neque aquæ natura speciatim prænoscenta venit, nec quid aliud, nisi hæc perquam generalia: quòd scilicet corpus quodcunque, ubi alterius in locum ingreditur, illud alterum necessario expellat, & quævis fluida omnes sui partes in perfecto retineant æquilibrio. Hæc

Secundò seorsim considerando videbimus, globum E eo ipso, quo sub aquam deprimitur, nihil aliud efficere, quàm ut omnem aquam, quæ erat antea in spatio E, ex eo excludat; atque sic aqua in vasculo contenta necessario aliquan-

quantulum elevabitur. Deinde, quia omnes aquæ partes, dum nullâ externâ vi agitantur, inter se æquibres sunt; ideo alia aliam non protrudet, seu, ex loco suo expellet, sed unaquæque in eo, quo est, loco subsistet. Ex his

Tertiò sequitur, quòd globus E in aquam F projectus, & intracantansper detentus, donec aquæ superficies, ob aquam ex spatio E expulsam, magis elevata, ad quietem & æquilibrium redierit, postmodum verò hoc in statu sibi ipsi liber relictus; hic, inquam, globus, si ejusdem cum aquâ in spatio E contentâ fuerit gravitatis, ibidem necessario stabit; quia scilicet nulla aquæ pars, propter perfectum æquilibrium, loco suo exturbatur, ideo nec globus, qui eundem locum, eandemque gravitatem cum aquâ, in spatio E ante immersionem contentâ, habere supponitur, ex suo loco deturbabitur.

Fig. 47.



Idem, eandem ob causam, fiet, quocunque intra aquam F spatio globus E ponatur. Si verò globus E sit tantâ aquæ quantitate, quanta spatio E capiebatur, vel levior, vel gravior, necessario aut summam aquæ superficiem, aut fundum petet: quia hâc ratione vel à partibus aquæ circumstantibus gravitate superabitur, atque ita globus ab ipsis aquæ particulis inferiora versus ruentibus ad superiora propelletur; vel à particulis aquæ eum cingentibus non poterit ob minorem harum gravitatem in æquilibrio retineri, atque ita globus, ipsis aquæ partibus superiora versus tendentibus, necessario descendet.

Quoniam autem isthæc admodum generalia sunt, & quibuscunque corporibus & fluidis circa terram constitutis æquè competunt, hinc manifestum quoque est, quare oleum super



super aquam natet, levia sursum tendant, nubes, utut valde magnæ, nullisque fermè ventis agitatae absque ullo lapsûs metu in libero aëre præter miraculum suspendantur, & id genus quàm plurima alia.

X.

Possẽm non minùs per eandẽm mẽthodum æquẽ facillẽ solvere Opticorum regulam, nimirum angulum incidentiæ æqualem esse angulo reflexionis, itemque ea, quæ de refractione traduntur, non spectando ullas causas finales, sed meram genesin. Quia autem hæc in alium reservantur locum, hic reticebo.

Fig. 48.




Fig. 49.



XI.

Sit in vase BCDE portio aquæ FCDG in *fig. 48*, cui immergatur vasculum HI, apertum in K, clausum in L; accensâ intra ejus cavitatem papyro, videbimus, aquam sat subitò vasculum HI intrare, & contra naturam suam superiora petere, usquedum (vide *fig. 49*.) si illud sat capax, nec aquæ nimia fuerit copia, omnis aqua eò intraverit. Quæritur causa hujus tam inexpectati effectûs?

Omnia, quæ hic conjunguntur, sunt vascula, ignis, aqua, aër. Vascula quod attinet, quia, qualiacunque ea sint, idem sequitur effectus, generalis istorum notitia sufficit. De igne per experientiam constat, eum esse actionem vehementem, quamdiu satis pabuli habet, omnia alia

T

cor-

corpora è loco, quantum potest, expellentem. Quod a-  
quam concernit, quia idem in quovis fluido non nimium  
ponderoso fieri videmus, fluidorum hic natura in genere,  
quod puta duris corporibus facilè cedant, tantum venit con-  
sideranda. De aëre nos docet experientia, eum in omnia  
loca ab aliis corporibus sibi relicta cum impetu ruere. Quod  
si jam hisce datis effectus propositus explicari non posset,  
tum alia aëris, ignis &c. natura, quæ per experientiam nota  
assumenda, aut earundem harum rerum natura à priori co-  
gnoscenda foret; & si tunc quoque nondum explicaretur,  
id omnino indicium esset, adhuc aliud quid præter aërem  
ad hunc effectum concurrere, cuius natura ideo prius foret  
determinanda: atque hoc modo certò semper in potestate  
nostrâ erit id omne determinare, quod potest inveniri. Sed  
videamus, num ex his evidenti experientiâ cognitis effectus  
ille queat explicari.

Hæc itaque omnia, uti præscribitur, conjungendo, cla-  
rum est ex naturâ ignis, eum in A accensum inde esse ex-  
pulsurum omnem aërem quaquaversum, vase verò aquæ im-  
merso ignem tum statim extinctum iri; cuius vi cessante,  
aër pro naturâ suâ magno conabitur impetu spatium sibi in  
vasè relictum occupare, ac aquam obstantem, sed secundum  
suam naturam facilè cedentem, eò loci magnâ vi trudet;  
atque sic aqua propelletur in vas, quo spatium ab extincto  
igne vacuum occupet.

Notandum hic est: quia perquam generales naturæ  
multis aliis convenientes assumuntur, generalior etiam po-  
terit formari conclusio ad talia plurima naturæ effecta expli-  
canda. Si ex. gr. corpus aliquod magnâ vi effluvia emit-  
tens aërem ex toto illo spatio, in quo atmosphæra similium  
est effluviarum, expulerit, hac paululum actione remitten-  
te, aut penitus cessante, aër maximo rursus impetu, quo  
ex majori loco pellebatur, in pristinum locum redire  
conabitur: corpore autem solido id impediante, anni-  
tetur

tetur vel fissuras ejus cum sibilo pro viribus penetrare, vel eò magnâ vi, ubi subito aperitur, ruet, vel, si hoc solidum minus durum fuerit, illud etiam diffringet. Hinc, me judice, videtur, facile posse explicari, quâ ratione fermentatio fiat, & quæ omnium ejus effectuum causa sit, prout in cerevisiâ recenti, musto, flagrantibus admodum floribus contusis & aquâ conspersis, similibusque observare licet. Datur cerevisiâ in Bataviâ species, dicta *Bottelbier* / quæ unâ cum vasculi operculo, si hoc paululum removeas, magno impetu in sublime fertur; nec difficulter colligitur, aërem esse, qui eò tantâ violentia ruit: hic enim se intinè cerevisiâ miscet, quemadmodum ex bullis ad oculum patet, & hinc cerevisiâ quantitas adeò augetur, ut multò majus, ac antè, occupet spatium, & tunc ob majorem cerevisiâ gravitatem aër denuo expellitur, reditque cerevisia ad priorem statum. Adfui aliquando, cùm vas vitreum medicamento chymico repletum in conclavi summo cum fragore rumperetur, & in quamplurima comminueretur *stustula*, maximâ cum præsentium consternatione ac admiratione. Quidam id ægri mortem portendere existimabant; & fortè si hoc æger rescisset, etiamsi non mortis, singularis tamen alterationis causa ipsi potuisset esse. Hujus ruptionis rationem me non latere credebam. Colligebam enim tam ex fragranti odore, spirituumque abeundi conatu, qui singularem in colligato orificii regumento intumescentiæ causam præbebat, quàm ex vasis debilitate, frustisque certâ ratione dissilientibus, hæc juxta modò dicta perfacilè potuisse contingere.

Haud aliter, paucis tantùm mutatis, explicari posset, quare omnes liquores, si saltem non nimis graves sint, ubi ad certum caloris gradum fuerit perventum, sub formâ bullarum vasa egrediantur; ut & alia plurima phænomena, quæ multis mira apparent, cur ex. gr. pleraque calcinata, aëri rursus exposita, solvantur; & quædam chymica exposita aëri reddantur graviora, curque succinum, vitrum, & alia

polita, si aliquantum perfricentur, papyrum attrahant &c. At verò hic probe notandum venit, quòd, si generales saltem naturas, quæ plurimis rebus communes sunt, cognitās habeamus, cautè admodum procedendum nobis sit, ne fortè universaliiores, ac quidem præmissæ permittunt, generentur conclusiones. Quà ratione autem idipsum præcaveri possit, exemplo jam speciali, siquidem magni momenti res est, declarabo. Quicumque hæc, quæ de genuinâ fermentationis naturâ impræsentiarum dicta sunt, bene secum perpendit, non negabit fortè, ea magnam veritatis speciem præ se ferre. Sed quia tamen res hæc ex ejusmodi naturis, quæ rebus aliis compluribus communes sunt, deducta est, singulares sanè, ne quis error admittatur, instituendæ sunt experientiæ, atque attendendum, num etiam omnia & singula in particularibus hisce experiētiis occurrentia effecta è prius datâ hypothesi accuratè pleneque explicari possint. Accipiamus, exempli gratiâ, vegetabile quoddam, quodcunque velimus, ex eodem ritè exprimamus succum, huncque vitro cuidam immittamus. Vitrum hoc deinde vesicâ quâdam, quæ tam diu aquæ subiecta fuit, usque dum crassitiem quandam probè consistentem contraxerit, tegamus atque obfirmemus. His ita peractis brevi pòst concavitate quandam sensibilem in eâdem vesicâ formatam observabimus; è quo phænomeno singulari facilè quis iterum conjiceret, genuinam fermentationis naturam eâ ratione, quàm suprâ dedimus, omnino esse detectam. Putaret enim quis procul dubio, se ita oculis suis quàm optimè observare posse, quòd externa vis aëris, postquam illa effluviis vis excundi per obfirmationem vitri impedita fuisset, in vitrum agere incipiat, atque vesicam, eò quòd hæc cedere violentiæ soleat, intra ire cogat, concavamque reddat. Sed licet tandem adhuc notandum est, si nec in hisce ad veram effectus alicujus causam indagandam decipi nolimus, distinctionem aliquam inter experientias faciendam esse, easque in-

primis,



primis, quæ generationem totam, & modum procedendi includunt, præ cæteris eligendas, sicque postea observandum esse, an hypothesis formata omnia hîc obvenientia phænomena explicare possit. Si res ita se habeat, tunc pluribus aliis experienciis nobis haut opus est, (nisi fortè ad alios, qui nonnisi experientiarum multitudine convinci se patiuntur, eò magis confirmandos adhibeamus plures,) satisque hac in parte certi sumus, nos rei naturam reverà invenisse. Sic e. gr. in naturâ fermentationis indagandâ varios ex vegetabilibus succos expressi, eorumque causâ insignis crassitudinis vitra, quæ tam firma, ut nullâ fermentatione rumpentur, tamque perfectè clausa seu obfirmata erant, ut evaporare nihil quicquam posset, præparari mihi curavi, posteaque phænomenis omnibus bene observatis, cognovi, hypothesis fermentationis suprâ recensitam, utut ea magnam certitudinis speciem præ se ferat, haut genuinam esse. Etenim hic phænomena se exhibent sequentia: 1. quidem vesicæ, quâ vitrum adopertum fuit, concavitas quædam, uti jam ante dictum est, contingit; quo ipso etiam introitus aëris externi manifestè admodum probatur. Deinde 2. varia sedimenta sensim atque sensim fundum vitri occupant, quod liquorum alteri citiùs, alteri seriùs accidit. Et hæc quidem sedimenta partim per diversam partium gravitatem, partim per aliam quandam causam, de quâ mox sum dicturus, ita efficiuntur. Tandem 3. omnibus, ut ab extrâ videtur, in diversa sedimenta separatis, ex ultimo sedimento pauculæ primùm, deinde plures multæque admodum prodeunt bullæ, quæ ascendendo liquorem transgrediuntur, & vesicam hætenus depressam seu concavam successu temporis elevant, adeo ut in concavitate locum convexitas quædam valde sensibilis succedat. Atque hoc tum demùm semper accidit, quando, juxta modò recensita, omnia jam sedimenta formata sunt, ac adeò nonnunquam post aliquot tandem dies præterlapsos; ubi tum sæpe etiam non exiguæ

crassitudinis vitra magno cum fragore diffringuntur. Ex his omnibus genuina fermentationis natura me iudice haut difficulter addisci potest, quòd videlicet illa materia, (vide *principia Philosophiæ Part. IV, Artic. 18, Cartesii*) quæ in liquidis turbidis, in quibus varii generis particulae junctæ invicem sunt, alias ab aliis successivè separat, ita ut hæ postmodum pellucidæ admodum reddantur, ultimò denique etiam subtilissimas omnium separet particulas; & quia hæ subtiliores levioresve illis fluidi particulis, hinc quoque sub formâ bullarum alta petunt: Cùmque hæ ipsæ nihil aliud fortè sint, nisi aut aër, qui in generatione vegetabilium iisdem, dum creverunt, immistus fuit, aut certè ejusmodi subtilis materia, quæ vim quandam elasticam habet; hinc etiam, quam primum aërem supra liquorem existentem saltem attigerint, vim istam iterum recipiunt, atque se ita expandunt, ut initio quidem vesica, quæ remittere solet, sursum versus prematur; postea verò, cùm copia bullarum successivè ascendentium nimium excreverit, vel ipsum vitrum rumpi iisdem possit. Sed de his suo loco plura. Hic in tantum saltem ejus rei mentionem feci, in quantum ea ad genuinam fermentationis naturam indagandam, atque ad præcepta nostra illustranda facere quid videbatur. Ubi tamen adhuc notari velim, me de fermentatione tantum hic locutum esse, non autem de effervescentiâ, quæ, quamvis cum istâ à non paucis confundatur, meo tamen judicio è causis longè aliis ortum habet.

## XII.

Admiranda plurimis videntur, quæ multi de montibus ardentibus referunt. Oblata mihi fuit occasio, eos penè omnes, qui in Europâ sunt, lustrandi, non quantum satis erat, sed quantum à peregrinante fieri potuit. Videbar autem mihi, eorum omnium, quæ partim ipse tunc observare potui, partim ex aliorum sermone hausi, rationem commodissimè me posse reddere: Accuratè enim notando, quoad  
tunc

tunc facere licuit, quæ ad ejusmodi effecta producenda hîc concurrunt, quatuor sequentia observavi, 1. materiam inflammatu facilem, nempe sulphur. Nam illis locis ubique venæ, in quibus nascitur, conspiciuntur, & sulphura effossa præparantur. Licet autem alia quoque materia, & in exiguâ quidem copiâ, ibidem inveniatur, nulla tamen igni concipiendo alendove idonea visa est. 2. observavi terram valde porosam, 3. aërem, 4. aquam seu mare. Cum itaque horum naturas experientiâ notas prius separatim, postea etiam conjunctim perpenderem, nihil occurrebat, cujus, ut & aliorum similium effectuum, probabilis sive satis intelligibilis causa ex iisdem naturis dari non posse videretur. Quia enim aqua in continuo quasi motu, & mare inprimis raro tranquillum est, hujus concitati fluctus aërem semper, quantum pote, ei contiguum quaquaversum, maximè verò subterraneum, concitato admodum motu ob terræ porositatem propellunt. Si ergo terræ pori materiâ inflammabili careant, haud adeo intensum edunt calorem; sed talem saltem, qualem in subterraneis ferè ubique locis observare licet, & qui, meâ sententiâ, ab hac potius causâ quàm ab igne quodam centrali, nimis ad hoc præstandum remoto, aut à sole, qui ad tam profunda non penetrat loca, videtur derivandus. Hinc etiam clarè intelligitur, quare in locis subterraneis mari vicinis calida valde exhalatio, eaque paulisper cessante, denuo alia atque alia per vices terræ specus intrantes hospites excipiat. Simile quid contingit in subterraneis, paululum à Puteolis (urbs est Italiæ) distantibus. Si verò præsto est materia inflammabilis, aër propter angustias terræ porosæ celerimè, pariterque ob marinorum fluctuum accessus recessusque admodum inæqualiter motus, tales etiam hujus materiæ venas pervadens fumum movet, qui levium more sursum tendit & quidem motu inæquali, atque per vices, seu undulatum, hoc est, modò parum fumi ascendit, modò ferè nihil, prout primus undarum motus contentum in poris

terræ

terræ aërem & inflammabiles hujus materiæ venas undulatum percutit. Quia autem plurima ejusmodi loca in interioribus montium cavernis observantur, quibus crateris nomen dedere, unde fumus continuò adscendit, fit, ut nunquam non ingens funi copia sursum feratur, eâque paululum cessante, nova denuò prodeat &c. prout observavi in Vesuvio, Ætnâ, Strongylo, inprimis autem in Vulcano, qui in Æoliis seu Liparæis insulis reperitur, quia ibidem ad ipsum craterem patebat accessus: quem profundè satis intravi, usque dum pervenirem ad ingens quoddam foramen in medio situm, verum minùs profundum, quemadmodum ex sono eò projectorum lapidum constabat. Hic ipsa loca, ex quibus circa venas sulphureas fumus undulatum adscendebat, quique admotà ad tempus manu calidus sentiebatur, ac materiam floribus sulphuris haud absimilem formabat, spectavi, & puros sulphuris flores ex fumo tali concretos ab ipsis lapidibus, quibus adhærebant, abradi. Atque ita fit, ut illi montes continuos quasi fumos edant. Porro, si aqua in istis crateribus esset, fumus procul dubio instar bullularum adscenderet; atque hæc thermarum mihi videtur origo: nam in illis omnibus adscendentes ejusmodi bullæ conspiciuntur, sulphurisque exhalationes forti odore nares occupant. Unde hujusmodi plerumque aquæ calent, & interdum ita fervent, ut coquendis ovis sufficiant. Imò quia intra terram dantur res variè inflammabiles, non est mirandum, si aliquando videamus, uti observatum legimus in *Ephemeridibus Gallicis (Journal de Scavans)* aquæ, ut ut frigida, superficiem totam concipere flammam admotà facere. Sed quando denique mare tempestate vehementiori agitur, ingensque inflammatu facilis materiæ, diutino illo tempore concretæ, copia adest, facilè tunc fieri potest, aëra inter varias pororum angustias tam impetuosè tantæque celeritate moveri, ut sui motûs vehementi percussione inflammabilia corpora in ignem vertat. Quia autem tales ferè tempe-



tempestates per aliquot tempus durare solent, ingens nonnunquam ejus materiæ vis vertitur in flammias; & hinc tanta fortium exhalationum, cujusmodi sunt sulphureæ, copia, quaquaversum exitum quarit, & eo ipso terræ motus, horrenda flammarum fulgura, ingentes terræ saxorumque obviatorum moles in altum projicientia, inimanes tonitruum, subterraneorum mugitus, & his similia phænomena necessario excitat, usque dum in exteriori aliquâ parte, quâ liberiores exitum terræ strata relinquunt, alicubi plenum nanciscatur exitum. Hinc etiam terra, igne absumptis venis sulphureis, magis fit cavernosa, & ob id ab exhalationibus exitum quærentibus facile dirumpitur, ita ut lapsu inferiora versus ruat, & hac ex ruinâ magnæ formentur cavernæ, seu, ut alii dicunt, crateres, in quibus ingens deinceps materiæ ab igne liquefactæ copia congregatur, ubi vel ex ejus copiâ nimis auctâ, vel ex naturâ, quam omnia liquida æstuantia non adeo ponderosa, habere solent, bulliendo assurgunt, per hæc foramina se effundunt, & inde per declivia, fluidorum more, defluunt; atque ita illa hujus materiæ fluidæ strata fiunt, quæ undiquaque in his montibus conspiciuntur. Memorabile imprimis est, quod circa montem Ætnam, cum anno 1669. ardendo maximè sæviret, observatum: fluidam nempe talem materiam usque ad urbem Cataneam per aliquot milliaria Italica defluxisse; ubi, quia cursu obliquo mania petiit, & ea satis alta ac firma fuerunt ad fluminis impetum aggeris instar arcendum, proprio pondere coacta fuit, succedente aliâ aliâque materiâ, cursum deflectere, & mare versus dirigere. Hæc verò stratorum materia non nisi terra vitrificata est, ubi consumpto sulphure reliqua materia, quæ igne non potuit consumi, ob exceedentem ignis calorem in vitrum, non tamen pellucidum fuit transmutata. Ex his jam permulta patent: nimirum, quare ejusmodi incendia in thermis non observentur. Est enim ibi non tam vehemens motor, mare scilicet; sed sal-

tem per declivia liberè decurrens aqua. Patescit etiam exinde, quare sævissimæ plerumque procellæ eo tempore, quo istorum montium incendia maximè tumultuantur, mare inquietent; Et quare etiam econtrà talia quandoque exoriantur incendia mari satis tranquillo. Magna quippe inflammabilis illius materiæ vis ita abundare, item mare rarò quietum vel mediocri motu aërem per terræ meatūs, qui propter materiæ inflammabilis accretionem successu temporis angustiores redditī sunt, majori vi cogere, & ob id, attritu aucto, calor adeò intendi poterit, ut tandem flamma excitetur, quā vehementer accensā, cūm satis materiæ ad eam & concipiendam & alendam suppetat, licet mare non adeò fuerit inquietum, similia tamen hac ratione possunt provenire phænomena; quod aliàs, nisi mari, ut dictum, summo opere sæviente, non contingit. Patet ulteriùs, quare istiusmodi montes non semper ardeant: multū enim temporis requiritur, quo absumptā ex tali aliquo incendio materiā inflammabili, nova iterum accrescat. Nec mirabar quoque, Strongylum montem, qui ab omni parte mari circumdatus est, & ita quidem, ut ejus vertex tantūm conspiciatur, nocturno tamen tempore continuò quasi flammæ undulatim eructare: item, loca à mari remotiora non tantopere incendiis ejusmodi esse obnoxia; & in littoribus maris, ubi ea montes habent vicinos, terræ motūs observari frequentiores: item in iis locis, qui terræ motu eversi fuere, lacus seu aquas stagnantes plerumque existere, ubi è contrariò priùs omnia sicca, & vel oppida, vel montes, vel similia erant, & ejus generis alia plura. Quin mihi firmiter persuadebam, non videri improbabile, aliquo modo posse effici, ut imposterum tales montes tantam non sint edituri stragem, nec proinde ampliùs adeò metuendi, si modò nempe magna hominum multitudo in sulphureis venis destruendis effodiendisque multū occupata foret. Multò plura his addere possem in dictorum confirmationem;

nem; sed talia hic accuratè pertractandi mea, ut dixi, impræsentiarum non est intentio: sufficiat aliquot hætenus speciminibus ostendisse, quantâ facilitate hujus methodi adminiculo aditus patefiat ad solvendum problemata, quæ aliàs tam difficilia tanique mira primo intuitu nobis apparent.

Jam hîc non foret abs re, ulteriùs progrediendo ostendere, hanc methodum omnino esse universalem, atque ad quævis alia solvenda se etiam extendere. Ita si cuiquam, ex. gr. circa rem quandam procurandam, negotium quoddam suscipiendum incumbat, is hoc sibi ante omnia ducat præcipuum, ut probè perpendat singula, quæ ad hunc producendum effectum conjungi debent; veluti sunt, ut propriam quis naturam ac dexteritatem, num ea rebus gerendis sufficiat, absque ullo affectu propriæ personæ blandimento candidè exploret: tum ipsius negotii suscipiendi, seu potius objecti, circa quod negotium illud versatur, naturam, num sibi hæc satis sit perspecta aut ejus notitia brevi acquiri possit &c. postea illorum, quibuscum tractandum est, naturam, quæ ex frequenti cum iis conversatione, vel ex aliorum, qui eis familiariter usi fuerunt, narratione sibi potest innotescere: illius denique loci, regionis, Aulæ &c. ubi res gerenda, naturam & id genus alia sedulò expendat. Et quia anarum status continuæ mutationi est obnoxius, idcirco extranei principes suos plerumque ministros, quos vulgò Residentes vocant, in quavis Aulâ, quò ejus status semper sibi exploratus sit, continuò morari jubent, à quibus satis superque, re exigente, edoceri possunt. Talia, & quæ hujusmodi sunt alia, si ante bene noscantur, quid eorum unumquodque singulatim postulet, expendatur, haud difficulter poterit colligi, qualis inde, si isthæc deinceps debito modo conjungantur, sperandus sit effectus. Hæc, inquam, & plura his similia hoc loco declarare non foret abs re, quò hac ratione evidentissimum evaderet, quòd communiter omnes, licèt rogati, fateantur, se genuinam igno-

rare methodum quævis ignota solvendi, eâ tamen in operibus assuetis, si quidem ad intentum obtinendum ritè processerint, sæpissimè utantur. Verùm nihilominus tamen existimarem, methodi hujus universalitatem absque prolixiori talium commemoratione satis jam innotuisse, partim ex variis modò solutis problematibus, ubi perquam diversa unâ eâdemque tractavi methodo, partim ex ipsâ hujus methodi naturâ probè consideratâ. Quicquid enim de aliquâ re nosse datum est, id ex solâ ejus naturâ, sive genuinâ definitione, tantùm seu unicè poterit derivari, nec est, ut credamus, aliunde quippiam posse colligi. Eam ob causam, concurrentibus pluribus diversis ad effectum quendam producendum naturis, si, quid à quopiam his in rebus sciri præstarive unquam possit, scire desideraverimus, omnium sanè, quæ sic junguntur, naturæ seu definitiones erunt præcognoscendæ: deinde quævis earum separatim bene veniet consideranda, ut notari queat, quid speciatim ex istarum definitionum vi sequatur; ac si tandem hæc omnia, quæ ante ut separata vidimus, nunc ut conjuncta spectentur; necessariò sic cognoscetur, quicquid hic sciri poterit, hoc est, desideratus explicabitur effectus. Et hæc ipsa (nulla certè alia existit) est methodus, quâ omnes, qui Algebræ student, utuntur, & cujus ope talia solvuntur problemata, quæ cuivis humano ingenio indissolubilia primo intuitu videntur. Proposito enim problemate, res integra quasi jam inventa ob oculos ponitur, ut ita clarè appareat, quanam res hic inter se invicem conjungantur: harum naturæ seu definitiones vel jam notæ sunt, vel reipsâ exhibentur: deinde unaquæque diversarum naturarum seorsim expenditur, & per diversam æquationem simplicissimam, quantum fieri potest, characteribus exprimitur: tandem singulæ harum æquationum variè inter se tam diu comparantur seu junguntur, donec unica inde oriatur æquatio, cui hæ naturæ, quæ antè diversis æquationibus exprimebantur, inclusæ, hoc est, omnes simul



mul junctæ sunt, & quæ proinde clarè ostendit, quo pacto proposita quæstio sit solvenda.

Jam igitur satis superque explicatum est non tantum, <sup>3. quid ex hisce, quæ de problematibus tradidi, sequatur.</sup> quo pacto omnis generis problemata Physica, Mathematica, ex hisce mixta &c. unâ eâdemque constanti methodo semper sint solvenda, secus ac plerique existimant, qui diversâ potius methodo, quàm eâdem, in quâvis scientiâ opus esse judicant; sed etiam, quomodo illa quasi pro normâ quâdam inservire possint, secundum quam levi negotio poterimus examinare, quâ ratione aliorum inventa à priori detecta fuerint, imò, quod potius est, anne problemata ab aliis rectè sint soluta nec ne: summa enim utilitatis est ea considerare; possemque hac in parte singulares Autorum etiam ingeniosorum errores indicare, sed hac vice sequens saltem sufficiat. Plurimi affirmant, ideo quædam corpora coherere, quòd superficies perfectè politas habeant; nec parum in hac opinione confirmantur, ubi reipsâ observant, politas ita coherere superficies, ut corpora, quorum planities haud adeò magnæ sunt, opinione majora levent pondera, antequam à se invicem divellantur. Sed statim liquet ex hac nostrâ methodo, hujus rei causam, quam hi perhibent, nullatenus genuinam esse. Nam perfectæ polituræ natura in eo sita est, ut partes omnes æquam ubique superficiem habeant, hoc est, ne una pars præ alterâ emineat. Si igitur duæ ejusmodi planæ superficies uniantur, id utique saltem ex earum naturâ concluditur, quod ex eâ sequitur: at ex earum naturâ nihil aliud potest concludi, quàm quòd partes propter talem polituram partibus sese perfectissimè sint applicaturæ nullo, ne minimo etiam, si ita placet, relicto interstitio; neutiquam verò, ut isti quidem volunt, ideo etiam cohærebunt, & nullâ ad eas divellendas vi opus erit. Datur igitur alia hujus cohæisionis ratio, & per consequens aliquid, quod recenseri debebat, omissum erat, quod aliis junctum hunc produxit effectum, cujus proinde natura non fuit considerata.

Porro quoties aliqua difficultas enodanda proponitur, omnes ferè incerti in limine hærent, quibus potissimum cogitationibus mentem suam præbeant: plerique in rebus, quas arduas & difficiles credunt, statim ab omnibus, quæ evidentia sunt, cogitationes avocant, & potius ad difficillima quæque se convertunt, dubii huc illuc vagantes, utrum hac vel aliâ viâ negotium sit aggrediendum. At verò huic, qui hanc, quam modò declaravi, methodum probè noverit, id ipsum laud continget, nec incertus hic, quid sibi agendum sit, ambiget; mentem potius ad ea tantum, quæ evidenter novit, converteret, nihil magis declinans, quam solutionem problematum absque certâ methodo moliri. Certum enim est, ingenia per ejusmodi inordinata studia & confusas meditationes nullatenus excoli & erudiri, verum obcæcari, ac ad quævis negotia, ut decet, pertractanda inoptiora reddi.

Ex hac modò explicatâ omnia problemata solvendi methodo non difficulter quoque capi potest, quâ ratione intelligendæ sint regulæ quatuor, quas *Dominus des Cartes* ad omnes difficultates in scientiis superandas nobis exposuit. Conqueruntur enim multi, illas quidem valde bonas videri, sed difficile tamen esse, eas in praxi accuratè observare. Cujus rei hæc præcipua causa est, quòd in illis optimè quidem docuerit, *quid* à nobis in detegendâ incognitarum rerum veritate sit observandum; sed, quia in his regulis non declaratur, *quomodo* hoc, quod observandum esse docet, obtinendum sit, hinc maxima difficultas iis, qui nullo modo in talibus exercitati sunt, relinquitur. Quod ipsum quia ad utilitatem eorum, quæ modò docui, apprimè perspiciendam non parum conducit, specialiùs paulùm id hic prosequar. Est autem harum regularum, quæ nobis in dissertatione de methodo rectè utendi ratione & veritatem in scientiis investigandi exhibuit

Prima:

Prima: *Primum erat, inquit, ut nihil unquam veluti verum admitterem, nisi quod certò & evidenter verum esse cognoscerem;*

Id autem assequi dabitur, si omnia, quæ assumis, perfectè concipiantur, juxta ea, quæ prolixè explicavi in secundæ partis primâ sectione, imprimis pag. 58. & sequentibus.

*hoc est, ut omnem præcipitantiam atque anticipationem in judicando diligentissimè vitarem,*

Hoc meo judicio non melius assequemur, quàm si omnium rerum, quæ in quæstionem veniunt, accuratas exhibeamus definitiones, & hinc inde axiomata genuina deducamus, secundum illa, quæ modò in secundâ hâc sectione exposui. Etenim quia 1. raro tales definitiones, quales hîc desiderantur, taliaque axiomata apud Autores inveniuntur, optimè sic præcaveatur anticipatio, sive, quæ per eam intelligitur, assumptio alicujus fortè fundamenti ex alio quodam Autore, quod ipsum bene examinâsse credimus, cum res reverà se aliter habeat, hoc est, præjudicium omne alienæ autoritatis tollitur. Et quia 2. non possumus in detegendâ incognitæ rei veritate progredi, priusquam accuratas definitiones & inde deducta axiomata obtinuerimus, sciverimusque, num definitiones nostræ genuinæ, numque axiomata legitima sint; & verò semper ego circa superiùs dicta normam, secundum quam infallibiliter cuivis concludere licet, an definitionum & axiomatum vices certò subire possint, exhibui; utique hinc optimè omnis præcipitantia, præcaveatur, hoc est, præjudicium omne autoritatis propriæ tollitur,

*nihilque amplius conclusionem amplecterer, quàm quod tam clarè & distinctè rationi meæ pateret, ut nullo modo in dubium possem revocare.*

si de omnibus rebus particularibus tales definitiones, quæ generationem ejusdem rei includunt, formaveris, hoc certè, quod de illis concludes, tam clarè & distinctè tuæ rationi patebit, ut nullo modo in dubium possit revocari, juxta ea, quæ passim, inprimis autem pag. 67. 68. &c. exhibui.

Secunda: *Alterum, ut difficultates, quas essem examinaturus, in tot partes dividerem, quot expediret ad illas commodius resolvendas.*

Si ad diversas omnium rerum naturas, quæ in enodando problemate conjunguntur, attenderis, & quibus ex partibus omnium harum definitiones constent, observaveris, non difficulter scies non solum, quot hic difficultates sint examinandæ, sed etiam, in quot partes quælibet difficultas resolvenda, sicuti materiam de problematibus solvendis à pag. 129. usque ad pag. 155. tam per præcepta quàm varia exempla fusiùs hoc explicui.

Tertia: *Tertium, ut cogitationes omnes, quas veritati quaerendæ impenderem, certo semper ordine promoverem: incipiendo scilicet à rebus simplicissimis & cognitu facillimis, ut paulatim & quasi per gradus ad difficiliorum & magis compositarum cognitionem ascenderem; in aliquem etiam ordinem illas mente disponendo, quas se mutuo ex natura sua non præcedunt.*

Si omnium, quas examinas, rerum (1) accuratas definitiones exhibere scias, easque (2) recto ordine, nimirum quæ simpliciore generationem habent, priori, & quæ magis compositam generationem habent, posteriori loco (h. e. quæ paucioribus elementis constant, omnium primò, & postmodum, quæ pluribus,) perpendas, ad omnia hinc derivanda axiomata; hisque tandem peractis (3) res, quæ definitiones simpliciores habent, cum iis, quæ magis habent compositas, eo ordine, prout compositio major atque major est,



est, ad derivanda varia theorematum combines; certè id, quod hic desideratur, reipsa sic explebis, ut nihil magis à te vel per rigorosissimum possit desiderari: quâ in re per omnia antecedentia tam continuis præceptis quàm exemplis prævi.

*Quarta: Ac postremum, ut tum in quærendis mediis, tum in difficultatibus partibus percurrentis, tam perfecte singula enumerarem, & ad omnia circumspicerem, ut nihil à me omitti essem certus.*

Si disquisitioni tuæ circa definitiones finem haut citius imponas, priusquam demonstrationem, plures definitiones non posse circa subjectam materiam formari, obtinueris, & deinde circa axiomata & theorematum reipsa, à te nihil ulterius posse concipi, in te ipso percipias; certus omni ex parte eris, nihil à te hic omissum, sed tam in quærendis mediis, quàm difficultatibus partibus percurrentis singula enumerata, adeoque ad omnia circumspectum satis esse.

Ex quibus paucis (nolo enim ob rationes unâ plures prolixior esse) facile conjicies, quàm parùm inexercitato in resolutione problematum particularium præcepta ista possint inservire, licet in se spectata optima sint; hoc est, quamvis præcipua earum rerum capita, quæ circa omnes difficultates in scientiis superandas observare debemus, complectantur; cum non simul apertè doceatur, quibus mediis ea, quæ in his desiderantur, acquiri queant. Econtra quoque colliges, quanti momenti hæc sint, quæ jam exposui, licet à principio fortè tibi tanti non visa fuerint, cum ita omnibus difficultatibus ex magni nominis Viro, qui in praxi talia reverà, qualia vix ullus ante eum, præstiterat, hac in parte desideratis tam perspicuè satisfiat, ut meo quidem iudicio non videam, quid ab eo, qui generalia saltem artis inveniendi præcepta tractare sibi proposuit (quemadmodum in præsentis libro ad hæc solum respicio) exhiberi possit melius. Id

quod tamen magis adhuc perspicuum evadet, si cum his, quæ jam indicavi, sequentia quoque, quæ mox in sectione tertiâ aperturus sum, jungas.

Tandem patet ex hac eadem quævis problemata solvendi methodo, quid efficiendum sit, ut semper his solvendis aptiores fiamus.

Primò namque necesse erit, ut potissimum exerceamus nos in solvendis iis, in quibus omnium ingredientium natura, ad aliquem producendum effectum, rationi perfectè cognita est: cujus generis sunt omnia problemata Mathematica. Acquisito ergo habitu quodam detegendi in similibus quæstionibus veritatem,

Secundò adeunda sunt ea problemata, in quibus eorum, quæ sic junguntur, natura per experientias evidentes est cognita, sicuti ejusmodi plura suprà adduxi. Ubi iterum habitum aliquem hæc solvendi deprehendimus,

Tertiò progrediendum erit ad ea problemata, in quibus causarum natura nec ratione, nec experientiis notæ, sed adhuc cognoscenda est. Si autem observamus, & hoc nobis haud difficulter succedere,

Ultimò opus non erit, ut solvendis particularibus problematibus, quod plurimi faciunt, multum temporis perdamus; quia, quò specialiora ea sunt, eò minorem plerumque habent utilitatem, ac ad solvendum difficiliora sunt: sed necessum est, ut ad perquam generalia nos accingamus problemata, quia, quò universaliora eadem, eò & utiliora & faciliora erunt. Nihil tamen, meo judicio, ad se ipsum hoc in negotio erudiendum compendiosius fieri potest, quàm si tunc problema omnium universalissimum aggrediamur, hoc est, quomodo omnes definitiones, seu primi conceptus sint inveniendi, & omne studium adhibeamus, quomodo talium primarum causarum ope omnia deinceps à priori sint investiganda, uti in eo ipso præsens hujus tractatus exercitatio jam potissimum occupatur, in quo eò usque perve-

pervenimus, ut sperem, attento Lectori non amplius ita fore ignotum, *quâ ratione per nosmet ipsos novas semper novasque veritates addiscere liceat.*

Verum enimverò, quia non unicè refert, an quis veritatem sibi acquirat, sed etiam, an id fiat facili & expeditâ methodo; interdum enim diutino tempore & magno labore vix absolvitur, quod brevibus fieri posset: ideoque me ad tertiam accingo sectionem tradendam, ubi ostendam, quo pacto ejus generis omnia exiguo admodum labore, respectu nimirum illius, qui alioquin esset faciendus, queant perfici; quod exercitatus magni esse momenti videbitur, ut ut alii, qui talia haud adeò profundè scrutati sunt, contenti tantum marginalibus eorum, quæ ibi tractabo, percurrendis hæc fortè non adeò magni fecerint. Verum, meâ quidem sententiâ, censeo hæc tanti esse faciendâ, ut mihi persvadeam, neminem insignem progressum in veritate detegendâ facturum, licet priora præcepta habuerit cognita, nisi & in sequentibus probè & multum ipsâ experientiâ fuerit edoctus, ac superare difficultates noverit. Imò, sum planè in eâ opinione, hanc genuinam fuisse causam, quòd, licet quidam optima circa hæc aliis exhibuerint præcepta, ea tamen aliis parum profuerint proptereâ, quia ista, quæ jam dicturus sum, vel nullo modo, vel perfunctoriè & leviter saltem attigere.

*Transitus ad  
tertiam sectionem.*

### SECTIO TERTIA.

*Quâ ratione veritatis acquisitio exiguo labore perficiatur.*

**S**I quis hanc, quam aperui, methodum veritatem indagandi fuerit secutus, eâque adjutus progredi inceperit, quò ejus operâ occulta omnia detegat, per magna impedimenta absque dubio reipsâ experietur hic oritura, quæ ipsum quam maximè in progressu retardabunt. Ut

*ut hoc fiat,  
conor omnia  
impedimen-  
ta removere.*

itaque in veritatis inquisitione omnia labore peragantur exiguo, hoc est, omnium, qui hic ex rei naturâ dari potest, minimo; non aliâ id obtinebimus viâ, quàm omnia hic occurrentia impedimenta removendo. Verùm quâ id ipsum ratione sit efficiendum, haud dabitur scire, nisi vera istorum impedimentorum origo nobis fuerit perspecta: hac enim detectâ, & cum eo, quod præstare possumus, collatâ, hinc solum colligere poterimus, an in nostrâ sint potestate impedimenta illa, aut si non sint, in quantum ea possint removeri. Quapropter, ut etiam huic rei pro viribus meis faciam satis, secundum ordinem hic primò recensebo omnia impedimenta, quatenus ipsâ experienciâ à nobis observantur, dum in veritatis inquisitione, ut decet, juxta hanc methodum sumus occupati. Tum secundò genuinam eorum investigare originem allaborabo, ubi videbimus, quantopere nobis noceat imaginatio: siquidem clarè monstrabo, cuncta hæc impedimenta unicè ex illâ ortum habere. Remedium denique communicabo, & ostendam, quæ consilia, quò ejusmodi tollantur impedimenta, ab ipso intellectu sint exspectanda. Quæ omnia, si à me accuratè, ut spero, fuerint pertractata, dubito an meritò ullus præter id, quod sum dicturus de hac materiâ, quid amplius possit desiderare.

*Primum impedimentum erroris, seu, quòd falsa admittimus, hic*

Quisquis itaque attentè ad impedimenta, quæ sibi in veritatis inquisitione hætenus oblata fuerunt, circumspexerit, non potuit non observare primum eorum ac præcipuum absque dubio fuisse errores. Hi enim nobis adeò familiares, ut eos quandoque viri, etiam ingeniosissimi, nullo modo potuerint subterfugere, sed potius falsa pro veris, quantumvis contrarium omni possibili conatu molirentur, nobis obtruserint. Quicumque autem in tales prolabitur, utique ultra modum in veritatis progressionem impeditur: dum enim falsa admittit, istud omne, quicquid ubique agit, est frustraneum, atque ita ne unum quidem passum in viâ veritatis promovet. Ut ergò tantum impedimentum,

*Primò Veritas hujus rei per ipsam experientiam ostenditur.*



tum, quo omnis nobis labor, tempusque omne nefariè surripitur, tanquam summum nostræ felicitatis hostem, tollamus è medio, necessum erit genuinam ejus scrutari originem.

Hoc ut fiat, notandum id, quod suprà ostendí, omnem *Secundò origo errorum* nimirum cognitionem nostram tantum ab his duabus facultatibus, intellectu scilicet & imaginatione, ortum ducere; adeoque errores, utpote falsam involventes cognitionem, necessariò oriri vel ab intellectu, vel ab imaginatione. At verò ab intellectu originem habere nulli possunt: nam *à priori.* quicquid potest concipi, verum est, adeoque ita acquirimus veritatem; quicquid autem concipi nequit, est falsum, atque sic falsitatem detegimus. Cum verò præter has duas intellectus operationes nullæ aliæ dentur, prout in 1. Sectione abundè ostensum, & per omnia sequentia evidenter fuit confirmatum, tertia quædam intellectus operatio, hoc est, quæ falsa admittat, concipi non poterit, & per consequens, nulli à solo intellectu errores proveniunt; adeoque clarum, si hac solâ præditi essemus facultate, aut eâ solâ uteremur, nullos nos unquam commissuros esse errores. Si ergo nulli ab intellectu oriantur errores, & non nisi duæ, concipiendi scilicet, quæ dicitur intellectus, & percipiendi, quæ imaginatio vocatur, dentur facultates, ut modò indicatum; necessum est, errores ortum ducere ab imaginatione. Atque ita verum omnium malorum & errorum, qui hic committuntur, aperuimus fontem. Detectâ igitur errorum origine, videamus nunc ipsorum generationem, seu, quâ ratione oriantur. Jam verò omnes impressiones, quæ nobis adveniunt ope imaginationis, efficere possunt, ut res à nobis considerentur vel ut diversæ, & sint quoque reverà diversæ, vel ut diversæ, cum tamen non sint diversæ; sed eadem, vel tandem ut eadem, cum tamen sint diversæ; adeoque quoniam quartum concipi nequit, siquidem errores contingunt, prout eos contingere est notissimum, ne-

cessum est, circa hæc tria eos accidere. Si igitur res considerentur ut diversæ, & etiam sint diversæ, vel ut eadem, & quoque sint eadem, hinc nihil falsi poterit concludi, sed potius verum; adeoque nullus hic error committitur, quâ de re mox plura. Si autem considerentur res, quasi diversæ forent, cum tamen sint eadem, nullus quoque error hic poterit contingere, sed tantum entia absque necessitate ultra modum multiplicantur, quâ de re circa quantum impedimentum plura. Verum si considerentur istæ ut ejusdem naturæ, cum tamen sint diversæ, tunc demum error hinc utique necessario oritur. Ponantur enim talia, quæ licet reverà diversâ sint, nostræ tamen imaginationi interim eâ se offerant ratione, ut nullâ prorsus in re differre videantur, aut haud ita faciliè distinguantur, certè id, quod affirmavimus aut negavimus aliàs de uno, prorsus quoque idem de altero concludemus: nullum enim, ex hypothese, adest signum, quo unum discernatur ab altero. Cum ergo ita diversas inter se confundamus naturas, errorem necessario committimus. Quia igitur præter hos, res quascunque considerandi, modos (quos omnes hic evidenter enumeravi, adeò ut nihil ulterius queat concipi, veluti quivis attentus in se ipso poterit experiri,) plures alii non dantur, clarum est, omnes errores, qui committi possunt, hisce comprehendendi, ac proinde aliam omnium errorum originem non esse, seu concipi posse.

*Id est experi-  
entiam, ubi  
proferuntur  
exempla  
circa entia*

Verum enimvero, cum solæ intellectûs rationes, quantumvis validæ sint, parum apud permultos valeant, hoc idem etiam ipsâ experientiâ confirmabo. Quosdam vidi, qui, dum intrarent quoddam conclave, cujus parietes meris contiguis speculis erant obducti, proprias in speculo reflexas species pro veris personis sibi obviam euntibus habuerunt, ac nudato capite eas festivè salutârunt. Certè non est alia hujus erroris causa, quàm quia his nullum aderat indicium, quo suas imagines, in speculo sibi opposito  
visas,

visas, distinguerent à veris personis, primo scilicet instanti:  
 sed ubi alias res, quæ veris hominibus non poterant attri-  
 bui, in hac repræsentatione animadvertissent, & faciliè &  
 subito ab errore liberabantur. Si verò supponamus, ea se *Imaginabi-*  
 tunc non potuisse offerre, quæ speciem repræsentatam à ve-  
 rà personâ distinguebant, profectò in hoc errore perman-  
 sissent, quia, ex hypothefi, nullum hæc objecta distinguen-  
 di à veris personis adest remedium. Id quod cum nobis  
 quotidie in somniis accidat, non est mirum, nos in tali er-  
 rore perseverare: nec quoque mirum, delirantes credere,  
 se etiam interdiu certa, quæ aliis tamen non apparent, vi-  
 dere, si eorum imaginatio internè eadem prorsus ratione,  
 afficiatur, quâ solent alii externè ab objectis etiam externis  
 affici, idque tam forti impressione seu motu, ut externa ob-  
 jecta hos motus internos non valeant suppressere. Et hinc  
 fortè remedium quoddam iis salubriter succurrendi posset  
 adinveniri, efficiendo nimirum, ut iisdem possint objecta,  
 ipsa objici externa, tali videlicet ratione, quâ indicium ali-  
 quod manifestum ipsi delirantes habeant, unde clarè cognos-  
 cant, externas ab internis repræsentationibus reverà differ-  
 re, atque sic certò appareat, eas esse diversas. Probabile,  
 videtur, eventum successu non cariturum, si statim ab ini-  
 tio iis subveniatur, idque eo tempore, quo vis, quæ objecta  
 illa interna æquè vividè repræsentat ac externa, minus est  
 valida; si porro in loco undique bene illustrato semper a-  
 gant, nec tandem soli & absque consortio relinquantur:  
 hæc inquam quatuor, si ritè, ut decet, usurpentur, aliquam  
 nobis de optato eventu spem præbere possunt. Verùm,  
 meum hîc non est intentum, delirantium aut somniantium  
 errores corrigere, sed vigilantium & rationis usu prædito-  
 rum; quinimo nec hoc quidem hîc loci mihi incumbit, sed  
 potius errorum origo à priori jam demonstrata per experi-  
 entiam pluribus firmanda est, in quibus nunc pergere libet.  
 Præstantes præstantium\* pictorum picturas depictas licèt in  
 planâ


planâ superficie, judicabimus tamen eminere, seu corporeas esse, imò eas ut ipsas res, quas tantummodo repræsentant, considerabimus, si modò exactè archetypa, eâdemque, quâ hæc alioquin nobis solent objici, ratione referant; quò autem magis ejusmodi picturas intuebimur, eo similiores hisce esse credemus, quia quò attentius obtutum in iis figimus, hòc minùs ad alia objecta advertimus & per consequens signum discriminis nobis minùs fit conspicuum, hoc est, similiores archetypis apparent. Quòd imagines plerorumque hominum suos spectatores, quocunque constiterint loco, videantur intueri, non alia est causa, quàm quia ii, qui pingebantur, eo ipso tempore oculos & faciem continuò in ipsum direxere pictorem; quod clarum erit, si supposuerimus, aliquem sic esse picturâ exprimendum, ac si bombardâ aut intendo arcu ad explodendum instructus rectâ collimet ad cujusdam spectatoris pectus, & simul velle ferire videatur, hic sanè non in alio situ, quàm quo ejusmodi machinam rectâ in pictorem iatendit, depingitur. Eâdem ratione omnes optici errores, omnesque alii, qui per sensus externos contrahuntur, juxta ea, quæ suprâ sunt demonstrata, facillimè explicantur, quia nimirum in his omnibus res diversæ ita sunt dispositæ, ut easdem in nobis sensationes excitent, & propterea pro iisdem reputentur. Nec porrò mirum est, infinita inter homines ob tantam vocabulorum æquivocationem oriri litigia. Cum enim eadem vocabula diversis conceptibus possint applicari, hinc de illis, qui iisdem, quibus alii, utuntur vocabulis, plerumque creditur, quòd iis ipsis eosdem etiam; quos alii hujusmodi vocibus designare soliti sunt, conceptus expresserint; atque sic absurda iis sæpissimè falsò assignantur. Quapropter si quis novas opiniones, quæ vulgò receptis quodammodo videntur adversari, cum aliis communicare voluerit, auctor ipsi sum, ut aut benè se explicet, aut planè taceat, nì voluerit brevi audire opiniones sibi tribui, de quibus ne unquam  
quidem



quidem cogitavit. Accidit etiam, magnam probabilitatem sæpissimè cum certitudine confundi, cum tamen magna veri probabilitas aliquid falsitatis non rarò includat. Quia autem quamplurima & infinita ab imaginatione nostrà, quasi eadem essent, nobis sistuntur, nò satis circumspèctè agamus, dum generales admodum propositiones, quæ se ad multa extendunt, formamus, plura sæpissimè in conclusione complectimur, quàm in præmissis continentur. Quin ipsi scholastici, (ne credant, me eos penitus oblivioni dedisse,) multa licèt alia circa errorum & sophismatum originem nobis explicant, longo tamen usu didicèrè, errores inde tantùm oriri, aliud alibi quamvis statuerint, quòd patiti bene distinguant; unde illud: qui bene distinguit, bene docet, quod utique cum traditis liscè absolutè consentit. Qui enim bene distinguit, hoc est, ea, quæ suà naturà diversà sunt, bene à se invicem discernere novit, & proinde inter se non confundit, ille & proprios & aliorum errores facilè detegit, atque ita alios meliora haud difficulter, hoc est, bene docebit.


Verùm ne quis arbitretur, similia Mathematicis non contingere, adeoque hanc universalem errorum non esse originem, itidem hæc exemplis confirmabo. *Cavallerius* in suà *indivisibilium Geometrià* sic ratiocinatur: Sint duæ parallelæ AF & DG, & parallelogramma ABCD, EFGH, basin habeant æqualem: ductà lineà IM parallelà ipsi AF, facilè

*Rationalia.*



tunc ostenditur IK æquari LM, & quia punctum I ad libitum est sumptum, idem erit verum de omnibus, quæ sic possunt concipi; adeoque omnes IK, hoc est, parallelogrammum ABCD, æquale


quale erit omnibus LM, hoc est, parallelogrammo EFGH. Id quod jam ex *Euclide* erat notum, sed non æquè facilè demonstratum. Itaque cùm observaret *Cavallerius*, hoc & alia pleraque tam quoad superficies planas, quàm quoad ipsa solida, in quibus alii admodum fuère prolixi, hac facilè methodo posse demonstrari, eam valde excoluit, aliique post ipsum. Interim tamen istam sequendo methodum permagna absurda hinc sequi observabantur in superficiebus curvis corporum, aut etiam lineis rectis vel curvis. Si enim de superioribus in *figurâ 50.* dicas, punctum I æquatur puncto L, & ita ubique, ergo omnia puncta I, hoc est, recta AD æqualis erit omnibus punctis L, hoc est, rectæ EH; erit hæc conclusio manifestè falsa. Ita quoque exinde poterit concludi, superficies parallelepipedorum A BCD & EFGH esse inter se æquales; quod tamen minimè verum. Hæc cùm prædictus *au-*



*thor* observaret, genuina verò ipsum horum errorum origo lateret, nullos potuit hac eadem methodo circa solidorum superficies, neque etiam circa curvas, progressus facere: fatetur enim in suis contra *Guldinum* exercitationibus Geometricis, methodum suam ad similia se non extendere. Videmus itaque vel ex hoc unico exemplo, quantopere talia in veritatis progressu nos queant retardare. Error autem juxta superius data hinc oritur: Omnes lineæ IK collectivè sumptæ cum rectangulo ABCD nobis per imaginationem quasi eadem representantur; ideoque si hæc ita forent, certè etiam, quod de uno affirmavimus, de altero non minùs concludendum esset. At hæc nullo modo eadem sunt. Lineas enim mente quidem in alias lineas continuò dividimus, super-

superficies in superficies, solida in solida, & sic hæc methodus legitime procedit, semperque vera concludit; sed nunquam concipimus punctum, tanquam partem ejusdem lineæ, aut lineam tanquam ejusdem superficiei, aut superficiem tanquam ejusdem solidi. Hoc si cum *Cavallerio* supponamus, hæc methodus non nisi per accidens vera concludet: id quod exemplo declarabo. Sint in *fig. 50*, parallelogramma ABCD & EFGH, eaque non in lineas, sed in superficies dividantur, nempe in rectangula abcd & eghf, quorum altitudo ac sit indefinitè exigua. Quia igitur rectangulum abcd sit indefinitè exigua. Quia igitur rectangulum abcd æquatur rectangulo eghf, idem de infinitis rectangulis verum erit, quæ sic concipiuntur in hisce duobus parallelogrammis contineri: hæc verò infinita rectangula cum parallelogrammis ABCD, EFGH eadem sunt, quia ob indefinitè parvam altitudinem *ac* differentia erit inassignabilis, adeoque, ratione æqualitatis, poterunt pro unâ ac eâdem re sumi, & per consequens, hæc etiam parallelogramma erunt æqualia. Hoc pacto legitime proceditur, nec ullus unquam potest suboriri error. Eâdem facilitate omnia veterum possunt demonstrari: imò hac methodo Mathematici curvas etiam in rectas illis æquales transmutârunt, quod à pluribus, etiam subtilis ingenii, viris creditum fuit factu esse impossibile. Ex hoc ipso clarum est, *Cavallerii* methodum hujus methodi specialem esse casum, ac proinde certo respectu veram esse. Cum enim rectangula abcd & eghf eandem habeant rationem ac bases, quia ejusdem altitudinis sunt, sequitur idem, quod de rectangulis dicitur, etiam de basibus cd, fh verum fore, adeoque solas adhibendo bases seu lineas cd, fh idem obtinetur. Atque hinc patet, quare *Cavallerius* supponat, sua indivisibilia, ut loquitur, debere æqualiter distare; id quod experientiâ solùm observaverat: aliâ si genuina illius rei causâ ipsi cognita fuisset, longè ulterius


terius processisset, quod ex hujus cognitionis defectu non poterat. Transeamus jam ad alia.



Sit in *fig. 51*, spiralis *Archimeda* ABCDEFGHI: demonstrarunt quidam, continuo biseccando & inscribendo arcus circulares, uti in KB, LC, MD, NE &c. videre est, hos arcus simul sumptos semper majores fieri, usque dum in infinitum eundo æquales evadant semiperipheriæ: id quod, cum arcus hi progressionem servant arithmeticam, æquè faciliè demonstratur, ac triangulum circumscripti rectanguli esse dimidium. Porro, cum hi arcus circulares simul sumpti continuatâ semper bisectione majores evadant, uti levi negotio ostenditur, ac proinde magis magisque in infinitum ad spiralem appropinquent, concluderunt, tali bisectione in infinitum continuatâ, omnes hos arcus nullâ ratione differre à spirali, & per consequentiam, spiralem




lem semiperipheriæ æquari; sed hoc, ut mox ostendam, admodum falsò. Circumscribantur enim (vid. *fig. 51.*) e. gr. spirali & semiperipheriæ tangentes. Si tunc posset ostendi, spiralis tangentes aB, bC, cD, dE &c. æquari tangentibus semiperipheriæ, i o, kg, lq, mi &c. & hoc semper fieri continuatâ bisectione tali, quousque velis, rectè hinc concludes, spiralem semiperipheriæ æquari. Hoc autem (nolo enim hic nimîâ prolixitate tædiosior fieri) si quis bene inspicere dignabitur, videbit, hinc esse concludendum, spiralem multo majorem esse semiperipheriâ, non æqualem, uti illi volebant. Quanquam verò talis demonstratio quidem ostendit, quòd conclusio hæc ideo falsa sit, nondum tamen menti nostræ satisfacit, quia non simul demonstrat, quare sit falsa, seu in quo præcipuè error sit positus. Eam ob rem hoc perspicuè hîc declarabo, ubi simul manifestum fiet, hunc errorem unice inde esse ortum, quòd, ut aliquoties dixi, imaginatio nobis sæpissimè perquam diversa tanquam eadem sistat. Id autem, ut effectum dem, nihil aliud opus erit, quàm omnes positiones, quibus hæc innititur demonstratio, enumerare, & unamquamque juxta omnis humanæ certitudinis principium examinare, num hæc verè queant concipi. nec ne. Hoc faciendo patebit, primam positionem, quòd nempe arcûs circulares inscripti continuâ ejusmodi bisectione semper majores evadant, & ideo ad spiralem magis appropinquent, omnino perfectè concipi; secundam quoque positionem, quòd scilicet omnes tales arcûs circulares simul sumpti continuatâ in infinitum bisectione æquales fiant semiperipheriæ: verum tertiam quod attinet, in quâ dicitur, hos arcûs spirali ideo æquales fore, quia eidem in infinitum appropinquant, hîc utique latet error, quique inde est ortus, quòd indefinita quantitatibus alicujus ad aliam appropinquatio, & ipsa æqualitas, imaginationi tanquam idem quid representantur, imaginationi videlicet, non intellectui.




Sit ex. gr. in *fig. 52.* linea AB divisa utcumque in C. Dividatur jam linea AC bifariam in D; porro linea DC bifariam in E, rursus linea EC bifariam in F, & hæc absque fine sic continuata concipiantur. Certum hic est, lineas AD, AE, AF &c. semper magis magisque in infinitum appropinquare lineæ AB; Verum enimverò clarum tamen quoque erit, omnes AD, DE, EF &c. simul sumptas non ideò fore æquales lineæ AB: æquantur siquidem lineæ AC; adeoque infinita cujusdam quantitatis appropinquatio & æqualitas nullo modo unum & idem sunt, sicuti hic in tertiâ positione statuitur, & propterea, valde diversa confundendo, error committitur. Quod ipsum specialius factâ applicatione ad præsens exemplum possem extendere, ni nimîa prolixitate tædium crearem. Possem hic quoque faciliè *D. Hobbesii* errores circa quadraturam circuli, & similia alia ex eodem omnium errorum fundamento ostendere; verum si animus esset errores recensere, quos vir ille non solum in his, sed & in pluribus aliis commisit, nimis prolixus forem: nam ferè neminem legi, qui adeò imaginationem cum operationibus intellectus confuderit; quod etiam à *D. des Cartes* in *responsione ad quartas Objectiones in meditationes* de primâ Philosophiâ, ut & ab aliis abundè est animadvertum.

Cùm *Galilaus*, qui egregiè detexerat, spatia, quæ gravia descendendo absolvunt, esse inter se ut temporum quadrata, uti supra ostendi, inquireret, qualem curvam projecta seu impulsa horizontaliter describerent, (abstrahendo scilicet ab omnibus impedimentis) ostendit, lineam illam esse parabolicam AFGHI. (vide *fig. 53*) Si enim concipiatur, mobile duobus motibus ferri, altero æquabili, orto ab impulsu horizontali, ex A versus B, C, D, E, altero verò  
per




ctis, ostendendo, hæc omnia suo motu designare curvas parabolicas. Verùm quia omnia, quæ cadunt, versus terræ centrum pergunt, certè lineæ BF, CG, DH &c. non sunt parallelæ, sed tales saltem apparent, ob tantam à terræ superficie ad ejus centrum usque distantiam. Quamvis ergò




per AK, orto à gravitate; sique sint AB, BC, CD &c. æquales, & perpendicularis BF sit unitas, erit CG quatuor, DH novem, EI sedecim partium &c. hoc est, servabunt rationem motus naturaliter cadentium, secundum superius dicta. Constat inde facile, curvam AFGHI hinc ortam esse parabolam. Quam doctrinam deinceps ampliavit *Torricellius*, de quibuslibet etiam non horizontaliter proje-

*Galileo* liberum fuerit hoc supponere, non tamen hanc curvam poterat comparare cum genuinâ projectorum curvâ, in quâ scilicet (vid. *fig. 54.*) lineæ BF, CG, DH &c. non sunt parallelæ, sed in puncto K, quod terræ centrum repræsentat, concurrunt: hæc siquidem curva non est parabola, sed quadam superioris gradûs, uti facile ostenditur. Hæ itaque curvæ, cum æquè diversam obtineant

neant naturam, ac quadratum & circulus, nullo modo inter se erant conferendæ atque confundendæ, hoc est, non erat affirmandum de unâ, quod affirmamus de alterâ. Ac proinde haud mirum est, eum, hisce ita sese habentibus, admodum implicitum hæsisse, quâ ratione explicandum & excusandum sit, quòd, cum genuina projectorum curva necessariò lineam AK, utpote quæ per terræ centrum transit, tandem attingere deberet, interim tamen parabola AFGHI semper plus ex naturâ suâ ab illâ recedat.



Idem *Galileus* alio in loco miratur consequentiam, quâ videtur debere concludi, circulum æqualem esse puncto. Qui locum istum inspexerit in *Dialogis ejus*, observabit, hoc in ratiocinio illum prorsus cum eo congruere, qui hoc modo ratiocinaretur: In parabola AED *fig. 55*, notum spatium BEDC duplum est spatii FEDG, & hoc semper verum est, licet BC valde ponatur exigua. Statuatur jam BC indefinitè parva. Quia ergo indefinitè parva imaginationi offertur quasi nulla esset, concludendum videretur, lineam CD semper duplam fore lineæ DG; Id quod apertè falsum est. Et sic quamplurima idem *author* circa infinita habet, quæ bene intellecta nihil mirandi includunt, modo infinita, quæ prorsus diversæ naturæ sunt, inter se non confundantur.



Arbi-



Arbitror igitur jam planè clarum esse, cum sapissimè res diversæ tanquam eadem nobis repræsententur, perfacile fieri, ut, non obstante, quod nemo studio errare velit, subtiles nihilominus errores etiam à magni ingenii viris committantur. Licet autem fortè hic videar plus justo prolixus, tanti tamen momenti res hoc certè meretur, nec existimo, mihi vitio datum iri, si ulterius progrediar. Restant enim omnium profectò subtilissimi errores explicandi, à quibus se paucissimi potuerunt liberare, circa physica nimirum objecta, seu veram ipsorum naturam. Hi errores ex eo ortum ducunt, quòd, uti suprà dixi, de quâlibet tali re tres diversos formare solemus conceptus. Hinc imaginatio, dum hac tria diversa, quæ difficulter, nisi probè simus attenti, distinguuntur, quasi eadem nobis repræsentat, efficere potest, ut facillimè confundantur. Sic vulgus, quia & vulgares Philosophi multò magis, quàm credi potest, entia imaginabilia cum realibus, hoc est, impressiones in nobis ab iis excitatas cum ipsis rebus confundunt; dum res externas, prout nobis repræsentantur, extra nos verè suis existere repræsentationibus similes firmiter credunt; cujus opinionis contrarium à *D. Robault in Physicis* clarissimis egregiè ostensum est exemplis, quod ipsum & ego suprà, ni fallor, & quidem à priori clarè & prolixè explicui. Nam quæcunque se nobis offerunt, non quemadmodum ea concipimus, aut concipere possumus, ea sanè non nisi confusæ impressiones sunt, quæ proinde in nobis solum, neutiquam, verò extra nos in suâ naturâ spectatæ, tales existunt: nulla siquidem confusio in ipsis rebus datur.

Porro etiam ens reale cum ente rationali plurimi mirum quantum confundunt. Cum enim pleraque corpora variis modis in admodum exigua, omnem sensum fugientia, minima resolvi, reipsâ observassent, illicò omnia in naturâ ex atomis conflata esse concluderunt. Ita *Baro de Nieuland in libello contra D. des Cartes* edito hinc deducit,

quâ ratione omnia ex nihilo sint creata. Nam omnia juxta ipsum ex punctis mathematicis conflata, hoc est, ex nihilo creata sunt. Quia autem in rebus minutis figurarum irregularitas non adeò conspicua fieri potest, (ita videmus ob eandem causam, literas malè exaratas per vitrum, quod objecta ut minora repræsentat, conspectas ut pulchras & bene formatas apparere) ideo plurimi opinantur, ejusmodi atomos referre figuras mathematicas, cubos, cylindros, conos, globos &c. Sed certè tantum differunt hæ figuræ à modò recensitis, quantum superficies perfectè sphærica à superficie nostræ terræ, quæ tot altissimis cingitur montibus. Quia etiam interdum observârunt, quòd, quamvis res adeò mutantur, ut videantur diversam prorsus induisse naturam, nihilominus in primum statum reduci possint, ideo arbitrati sunt, ejusmodi atomos indivisibiles esse, suasque figuras constanter & exactè retinere. Ut autem multa paucis complectar, ex hoc uno, quòd nempe de quolibet ente physico tres diversos formare solemus conceptus, omnes Philosophorum Sectæ, quoad Physicam, in tres præcipuè partes scissæ, ideoque in tres classes mihi redigi posse videntur; quod unico exemplo declarabo. *Robertus de Fluctibus* in operibus suis spatium magnum & nigrum pingi curavit, in cujus quatuor lateribus, si rectè memini, scriptum est: *Et sic in infinitum.* In alio schemate idem pingi curavit, sed jam ex parte nigrum, ex parte à radiis lucis undiquaque ingruentibus illustratum. Exhibet porro idem author alia quoque schemata, quibus credidit se optimè explicuisse statum, in quo omnia ante hujus mundi formationem fuerint, & quomodo postea omnia successivè particularia formam suam acceperint. Sed, meo judicio, nihil aliud, quàm imaginationis humanæ constitutionem exhibuit, qualis est, cum nocturno tempore expèrgiscimur, ubi omnia tenebris involuta latent; postquam verò emergente crepusculo paulatim diefcit, tunc primum quædam, sed obscure cernere incipimus,

mus, pòst paululum accrescente luce gradatim distinctiùs, usque dum, pleno tandem die ingruente, omnia distinctissimè patent. Sed quia, ut suprà ostendi, initio philosophandi, quid tenebræ sint, quid lux, & ejusmodi plura nullatenus intelligimus, nobis erit æquè ignota talis mundi formatio, ac antea fuerat, hoc est, merè tantum erit imaginaria. Deinde *Democritus*, *Lucretius*, *Gassendus*, alique, spatium indefinitè extensum concipiunt veluti magnum quoddam inane, immobile, indivisibile, ubivis à corporibus penetrabile. Et hæc quidem primò inde solum hausta esse videntur, quia imaginatio nobis hic circa terram spatium undiquaque extensum exhibet, quod plurimi sibi imaginantur, quasi merum nihil sit, vel quasi nulla ibi materia, quamdiu quidem à nullà afficiuntur, existat, & in quo spatio liberè omnia corpora moveantur, illudque horum respectu quasi immobile, ubivis penetrabile &c. esse videatur. Ubi deinde ad solum intellectum respexerunt, & animadverterunt, talia etiam in abstracto perfectè concipi, in hac opinione penitus acquievère. Nec proinde mirum est, quòd Mathematicorum plerique ad Physicam sese applicantes, talia statuentibus potissimum se adjunxerint. Quantumvis verò talia verè concipiantur, constat tamen, illos *Autores* non attendisse, nudum saltem fuisse conceptum, quo materiam, non ut realiter existit, sed tantum abstractè, quemadmodum omnia ejusmodi concipere solemus, conceperint. Adeoque licèt hi multò propiùs ad rem, quàm illi, qui assumpsère talia, de quibus nullum planè habent conceptum, accedant, eam tamen neutiquam attingunt. Quodsi enim quis existimaret, extensum absque materiâ, seu vacuum, in rerum naturâ dari, hic idem prorsus statueret, ac ille, qui crederet, dari superficies absque ullâ profunditate in rerum naturâ existentes: hoc enim planè idem esse, facillimè, si locus hic ea fusiùs prosequendi genuinus foret, ostendere possem. Denique *D. des Cartes* omnium optimè explicavit

materiam universi per impenetrabilem extensionem: hinc multa alia præclara deduxit, ac circa similia à vulgaribus præjudiciis se liberavit magis, quàm ante ipsum quisquam eorum, quorum scripta habemus. Sed aut valdè erro, aut ipsum non capio, aut rectè assero, eum suam inprimis ab imaginatione hausisse sententiam, dum observavit, omnia corpora reipsà esse extensa, hæc illa suis ex locis pellere, nec penetrari posse; cujus etiam plurima perquam curiosa dantur exempla, quæ alii ob metum vacui fieri credunt. Et hujus quidem effati mei hæc est ratio, quòd aliàs, si materiam seu extensionem, prout est in puro intellectu, impenetrabilem concepisset, non habuisset opus recurrere ad indifferentiam materiæ, ad motum & quietem. Extensionem enim absque motu concipere, juxta me repugnat. Verùm hæc pertinent ad principiorum Physices explicationem, ubi clarissimè demonstrabo, quietem ejusmodi, qualem vulgus putat, in naturà absolutè non dari, sed hanc ipsam vel imaginationis figmentum, vel ens rationale seu abstractum Mathematicorum esse, nequaquam verò aliquid in rerum naturà existens. Credo, me hisce aliquo modo reapse ostendisse, quà ratione extensio ab aliis repræsentetur, vel ut spatium permagnum nigrum, aut si mavis lucidum, vel ut abstractum quid, seu tanquam spatium ubivis à materià penetrabile, vel tandem ut impenetrabile seu reale quid. Si jam eadem ratione naturam motûs & quietis tractare, ac innumeros illos errores, qui orti sunt ex tribus hisce diversis rem aliquam physicam concipiendi modis, monstrare pergerem, nimius hic essem. Occasio verò isthæc accuratius tractandi dabitur eo loco, in quo sum ostensurus, per hæc tria tantum accuratè expressa, prout sunt in puro intellectu, quatenus hic nimirum omnia tanquam realia concipit, minimè verò, quatenus ea imaginatione percipiuntur, aut etiam abstractè à nobis concipiuntur, per hæc, inquam, tria quævis in physicis ardua haud adeò difficulter



culter posse explicari. Jam mihi interim videor satis expeditisse, quòd in re ob tot diversitates, quæ hic confunduntur, difficillimam viam monstraverim, quæ sola sit calcanda. Nec hoc exiguum debet censeri, cum videamus tam magnos viros lapsos, aut saltem lapsui proximos fuisse, quorum nominum hic & alibi mentionem feci, non eo fine, ut ullo modo eorum fama minueretur, plerosque enim praeceptorum loco veneror; sed ut fieret manifestum, quàm proclives simus ad errores, & quòd hæc sola, quam suprà aperui, eorum sit origo.

Ex his omnibus ritè perpensis possumus judicare, quot *Quæ hinc consequentia formanda.* & quantis ideò mens nostra fuerit involuta præjudiciis, quòd ab ineunte ætate ea, quæ nos bene afficiunt, secuti sumus, hoc est, facilioribus magis quàm difficilioribus, ac proinde imaginationis impressionibus, quæ absque ullo labore nostro nobis se offerunt, nos unice regendos potius commiserimus, quàm intellectus operationibus, quæ non nisi peculiari actione à nobis excitantur. Hæc qui bene perpexerit, ac quanto temporis spatio in tot confirmati fuerimus præjudiciis, consideraverit, non mirabitur, quòd in iis, quorum contraria diu credidimus, attentio tam difficulter figatur, quodque proinde se talibus applicare intellectui sit difficile, cum imaginatio continuò in contrarias quasi partes vergat. Nec ideo quoque mirabimur, ingenia humana iis obfessa esse adeò firmiter, ut plurimorum ab iis liberatio ferè impossibilis esse videatur, quanvis evidentissimis, prævalidis, & planè ad assensum cogentibus utamur argumentis, nisi ipsorum imaginatio ipsis experientiis contrarium clarissimè exhibentibus in alium denuo statum redigatur: perinde ut olim accidit, cum novus detegeretur orbis, quod negotium plerisque antehac, nequicquam persuadentibus rationibus utut firmissimis, incredibile visum; posse videlicet alicubi homines existere, qui tali situ supra terram incedant, ut pedes suos nostris semper adversos habeant.

beant. Non videtur operæ pretium, hæc præjudicia magis particulatim recensere, eisque diutius immorari, modò opportunum remedium, quod omnibus sic haustis erroribus certò tollendis sufficiat, producat.

*Tertio re.  
medium.*

Si itaque ad genuinam eorum originem animum ritè applicemus, observabimus *primò*, remedium hic situm esse in solo intellectu; adeò ut, hunc unicè sequendo cùm nullos, juxta superius dicta, nos errores committere possè jam certò sciamus, rem denuo ab ovo, omnibus posthabitis aliis impressionibus, semel in vità ordiri seriò statuamus. Hinc *primò* in id unicè incumbendum est, ut bene cognoscamus, in quo omnis nostræ certitudinis fundamentum consistat, quod aliud non est, quàm hoc, nos quædam posse concipere, quædam non. Cognitis ergò solis intellectus operationibus, necessum deinceps erit, ut assuescamus, ejus operationes benè ab imaginationis operationibus distinguere. Ut denique veram addiscamus viam eadem semper certitudine in veritate progrediendi, quousque placuerit, prout per ea, quæ suprà sunt dicta, hæc tria, quantum in me fuit, omni conatu studii docere. Quia verò intellectus nostri potentia admodum limitata, rerum autem multitudo ferè infinita, & imaginatio in errores proclivis est,

Opus erit *secundò*, ut intellectus in veritate investigandà ab imaginatione, directà à bonâ indagandæ veritatis methodo, juvetur. Multis hîc fortè erit inexpectatum, me illud, quod tantas nobis ad nos decipiendos struit insidias, in auxilium advocare; sed advertant illi quæso ad sequentia. Vidimus suprà in errorum origine, ex tribus illis modis, quibus externa in nos fiunt impressiones, unum esse, per quem res, quæ sunt diversæ, etiam ut diversæ nobis exhibentur, atque adeò hinc quoque imaginationis ope veritatem oriri. Si itaque id semper egerimus, ut, quæ tanquam diversà à nobis concipiuntur, etiam ut diversà semper nobis repræsententur, hoc ipso imaginationem ad leges intel.

intellectus ita reducemus, ut eâ deinde utendo nulli errores sint timendi, haud secus, ac si solum sequamur intellectum. Quantâ ista fiant cum utilitate, videbit iste haut difficulter, qui sequentia attentè lustraverit, præsertim si horum quædam ipsâ experientiâ cognoverit. Ut autem imaginatio benè directâ intellectui sit adjumento, idipsum diversis modis effici poterit.

I. Per *voces*, quando diversis conceptibus diversa etiam jungimus vocabula. Ut itaque hinc imaginationis operationes eodem, quo veritatis investigandæ via juxta intellectum instituitur, ordine procedant, diversæ definitiones diversis vocabulis sunt exprimendæ, ac primo collocandæ loco; tum eodem habenda sunt modo axiomata, theoremata, corollaria, scholia, problemata, omnia nimirum per voces exprimendo, distincteque, prout se invicem in intellectu sequuntur, ordinando. Si verò plura ejusdem generis theoremata, problemata &c. extiterint, non solum ordo numeris distinguendus est, sed etiam circa demonstrationes singulæ novæ positiones enumerandæ, & sub se invicem perpendiculariter collocandæ sunt. Quod ultimum si à Mathematicis in *Euclide* observatum fuisset, Autor hic incipientibus captu multò facilior esset. Etenim hoc modo, cum ea, quæ intellectui sunt diversa, etiam imaginationi ut diversa repræsentantur, omnia, sive ab intellectu, sive ab imaginatione, facillimè poterunt perlustrari, nec ullus error uspiam timendus, aut certè, si quidem aliquis fuerit commissus, non adeò difficulter detegendus erit. Sunt enim demonstrationes finitæ, adeoque omnia hic constant ex finitis positionibus, quæ si fuerint separatim & ordine examinatæ juxta omnis humanæ certitudinis principium, non poterit non fieri manifestum, ubi lateat error, si aliquis adfuerit. Hunc soli ferè Mathematici ordinem hætenus sunt secuti: unde haud mirum, istos inprimis ab erroribus sibi cavisse. Deinde *D. des Cartes* quædam sic ordinata circa secundas  
Objec-

Objectiones in suas Meditationes exhibuit. Quidam item primam ac secundam partem Principiorum ejus Philosophiæ reduxit ad ejusmodi methodum. Eâdem ferè ratione pleraque tractat omnigenæ eruditionis vir *Alph. Borellus* in libro *de motibus animalium*. Nec defuere, qui omnia sua cogitata Ethica in talem redigere ordinem sunt conati. Id tantum hâc in re notandum est, ut maximè caveamus, ne novis utamur vocabulis, sed quantum in nobis est, usitatas aliorum expressiones retineamus. Si enim nova, & suæ imaginationi respondentia vocabula sibi quisque pro arbitrio formaverit, eveniet, ut alii aut non bene, aut magno cum tædio, utpote aliis assueti expressionibus, ipsum capiant. Tanta etiam hinc vocabulorum oriretur facilè copia, ut tandem Lexicis opus foret, ad eorum significationes retinendas. Quinimò, tamen si quis cautissimè à talibus abstinuerit, eâque, quam rei natura permittere videtur, brevitate cuncta disposuerit; nimiam tamen quandoque in hac methodo observabit prolixitatem, præsertim in longis demonstrationibus; uti quilibet animadvertere poterit, si in prolixo aliquo vulgaris divisionis exemplo præsumpserit operationem integram solis verbis explicare.

Adeoque hic *secundus erit modus per Characteres*, ut nimirum ea, quæ diversa sunt in intellectu, per diversos quoque Characteres, literas ex gr. alphabeti, vel quocunque libuerit modo, exprimamus, iisque operationes intellectus eodem ordine instituantur. Sic Analytici hujus artificii auxilio paucis complectuntur foliis, quæ magno volumine Mathematici vulgares non comprehenderent. Nonne verò egregium est, hisce solis, sed juxta intellectus vias directis, imaginationis operationibus, hoc est, calculo algebræ, posse incognitas figurarum proprietates quasi ludendo elici, licet quandoque adeò sint remotæ, ut iis eruendis nullum humanum sufficere videatur ingenium? Si autem obijciatur, hæc effici quidem posse, sed quasi cæco, & eorum,



rum, quæ fiunt, in scio intellectu: respondeo, posse dehinc etiam intellectui, si ad omnia minutissima, quæ peraguntur, attentè respiciat, hic facillimè & plenè satisfieri. Imò tanta hic possent patrari, ut inde vel simplex rusticus magno aliquo Mathematico jam eruditior evaderet. Hujus rei alibi specimen quoddam dedi publicum in methodo tangentium, ubi unicâ & eâdem semper operâ, infinitarum curvarum tangentes semper determinantur, cujus operationes tam faciles sunt, ut à quovis literas edocto possint exerceri. *Vid. Acta Erudit. Ann. 1682. pag. 391.* Verùm alia hic dantur compendia, quæ fortè paucis erunt nota, & quibus paucis horis, modoque à quovis facilè perficiendo, talia possumus præstare, quæ ab aliis ad praxin nullo modo possent reduci, nequicquam hic adjuvante communi algebrâ: id quod suo loco evidentissimis probabo exemplis. Ex his colligitur, quàm insigne, & plus quàm credi potest utile, imaginatio bene gubernata intellectui in indagandâ veritate adferat adjumentum; sed hic quoque optandum foret, ut singuli iisdem, & ab alio quocunque receptis uterentur characteribus, non verò novos semper novosque cuderent, utpote qui admodum inaccepti sunt, nisi ad inventionem veritatis singularem præstiterint commoditatem: Quicquid enim eò conducit, licitum omninò & hac in parte est. Verùm, si quis hac ratione progrediatur, videbit, necdum eosdem quoad omnia penitus sufficere, aut certè, si suffecerint, laborem, tamen quandoque subeundum esse valde molestum. Quamvis enim ziphrarum characteribus omnia multò expeditius exequi liceat, quàm solis eundem calculum verbis explicando; interim tamen ejusmodi etiam calculi possint exhiberi exempla, quæ solis absolvere ziphris perquam tædiosum esset. Adeoque ultimum, quod hic efficere possumus, peragitur

3. Per *Motum*. Hic itaque omnes intellectûs operationes per motûs, qui machinulæ ope juxta easdem diriguntur

inter atque imaginationem impoſterum, quantum quidem per ejus naturam fieri poteſt, nexus ſit, talia nunc poterit invenire & ſeligere experimenta, quæ, ſi creberrimè imaginationi offerantur, ab omnibus hauſtis præjudiciis tam facile nos liberabunt, ut hac viâ quemlibet, quantumvis pertinacem, optimè corrigere queamus. Sic, ſi perſuadendum alicui fuerit, aërem eſſe corpus grave, & ad inſtar muri reſiſtens, adeò ut ab aliis corporibus penetrari nequeat, quinimò, ſi nimis urgeatur, ad dura admodum corpora confringenda ſufficere, & ſimilia, difficulter utique hæc alii parum in his conſiderationibus verſato demonſtrarem, nec quicquam inculcatis rationibus quibuſcunque, etiam validiſſimis, efficerem, quod tamen per experientiam faciliſſimè præſtarem, ipſi ex.gr. oſtendendo, veſicam aliquam capacem infarto aëre tumefcentem, quo ipſo omnia, quæ modò de aëre dixi, ipſi imaginationi extemplò patebunt. Quod ſi quis hoc experimentum ſapè fuerit contemplatus, & plura ſimilia (cujus generis de aëre docentia experimenta ſunt tubi *Torricelliani*, machinæ *Guerickiana*, *Boylia* &c. quibus aër extrahitur, quorum ſimilia multa exhibentur in libro Italico: *Saggi delle naturali esperienze*, qualiaque hujus ſeculi inventa à *Clariffimo Sturmio parte 1. & 2. Coll. gii experimentalis* curioſi perſpicuè admodum exponuntur) brevi imaginatio circa talia, quæ junioribus annis de aëre hauſit, præjudicia perfectè corrigetur. Eàdem ratione ad alicui oſtendendum ſtupendam quorundam corpusculorum exiguitatem, quòd ſcilicet, licèt talia ſint, quæ omnem effugiant ſenſum, ſemper tamen certo adhuc gradu his minora iterumque minora reverà dentur, nihil ſanè aut parum efficerem, demonſtrando, materiam ſemper diviſibilem abſque ſine concipi. Ut primum verò commonſtravero, Sòlem in cœlo conſtitutum per fenestram oculos in conclavi exiſtentes tam vehementer commovere, ut eò intuitum dirigere vix ſuſtineant; atque hoc ipſum ſibi quis bene & ſæ-

pius imaginatus fuerit; jam certè non difficulter admittet, vitrum poros habere. Quà alià enim quæsdò vià talis actio posset ad oculos absque miraculo transire, eosque tanto motu fatigare, quem visus sufferre nequeat? Deinde necessariò concludet, materiam, quæ hos sic transit poros, admodum subtilem esse, cum poros istos ne vitris quidem dioptricis, quæ tamen incredibili ratione omnia objecta exhibent majora adhibitis, ob eorum parvitatem, observeamus. Tandem quoque clarum erit, materiam hanc partes habere necessariò subtiliores aëre, utpote qui nullo modo vitrum transit, quâcunque licèt ad id vi coactus. Porro hisce frequenti contemplatione bene impressis, si quis postmodum sæpe imaginetur mirabiles illos magnetis effectus, quòd nimirum acus post tabulam ligneam positas in instanti variè commoveat; itidem haut difficulter concedet, corpora quædam subtilia, quæ hic etiam per tabulæ poros transeant, dari. Et quia materia hæc eodem instanti non solum vitrum, sed etiam tabulam ligneam & solidissima quævis metalla, qualia tamen corpora subtilis illa materia Solaris, quæ vitrum antea transibat, transire nequit, alioquin enim pellucida futura essent, permeat; non minus etiam admittet, materiæ hujus partes necessariò adhuc subtiliores esse. Adeoque sic per experientiam imaginatio corrigetur, ita ut non adeò difficulter quis conclusurus sit, tres reverà dari materias, aërem, materiam vitri poros transeuntem, & magnetis effluvia, quæ licèt tam subtilia sint, ut omnium oculis effugiant, hoc tamen non obstante, necessariò eorum partes gradatim adhuc subtiliores sint concipiendæ. Si porro plura ejusdem generis imaginemur experimenta, animalcula ex. gr. admodum minuta dari, quæ organis suis sint instructa, & in his organis fluida, quæ organa movent: imò quod potius est, hæc ipsa tam exigua animalcula adhuc alia sui generis generare, quæ suis parentibus adhuc minora sint necesse est, juxta differentiam, quam experientia inter majorum

jorum animalium corpora, & eorum embryones commonstrat: Hisce & similibus tam naturalibus, quàm artificialibus exemplis (è quorum numero est incredibilis illa auri in folia extensio &c.) diu consideratis, priores falsæ impressiones, quas ab incunte atate hausimus, per posteriores, quæ in nostrâ fiunt naturâ, intellectui conformes, si hunc in modum sæpe repetantur, non difficulter ope imaginationis perfectè corrigentur. Unicum adhuc adjiciam. Quia terra, nos afficit alio modo, eoque admodum diverso ab eo, quo nos corpora cœlestia afficiunt, à primis annis credidimus, ea quoque esse diversissima à terrâ nostrâ; nec mihi persuadeo, imaginationem hic facilè solis rationibus posse corrigi. Veruntamen, si quis alicui causas, quare Luna crescat & decrescat, clarè ostendat, eumque id reipsâ per aliquot tempus jubeat observare, ita ut ope imaginationis clarè evincatur, Lunam per se luminosam non esse, sed potius eam, quam videmus, lucem non nisi à Solis illuminatione oriri, adeoque eandem cum terrâ opacitatem habere; sique postmodum, hoc stabilito, non difficulter per tubum opticum demonstret, dari reverà montes in Lunâ: observamus enim in obscuro ejusdem loco lucida puncta, quæ absque dubio montium vertices omnium primò illuminari incipientes referunt, & quæ brevi tempore successivè, non secus ac in terræ montibus Sole oriente accidit, lucidiora & majora fiunt, usque dum parti illuminatæ, nullo interstitio obscuro relicto, penitus sese junxerint; si porro bene observet, quòd multas, modò à sinistra, modò à dextrâ parte, nigras cernamus maculas, umbras illorum montium referentes, prout, Lunâ crescente aut decrescente, illuminatio in diversas fit partes; & si tandem ipsi monstret, quanta sit ibi inæqualitas seu scabrities, ubi illuminatio Lunæ terminatur, tempore inprimis novilunio propinquo & similium, phasium, hocque nullo posse fieri modo, si Luna exactè esset rotunda, nec magnis inæqualitatibus, hoc est, montibus



esset circumdata; hæc, inquam, & id genus alia, si quis alicui dilucidè commonstret, faciliùs tunc fortè efficiet, ut admittat saltem non tantam, quantam hætenus ille certò sibi persuasit, inter Lunam & Tellurem intercedere differentiam, cum clarè pateat, eam esse opacam, & montibus quamplurimis circumdatam. Tandem, si hinc porro deduxerit, supponendo, nos in Lunâ versari, tetram, utpote quæ, non minùs ac Luna, à Sole illuminatur, non ut opacum aliquod corpus, prout illam nunc videmus, sed absque controversiâ ipsâ Lunâ luminosius tunc nobis apparituram, cum constet, eam multò esse majorem; sique ulterius concluderit, quòd, quemadmodum Luna pro vario recessu & accessu suo ad Solem diversas phases ostendit, ita etiam terra, æquè ac Luna, jam plenam, jam falcata, & iisdem phasibus se exhibitura sit eminè spectanti; Et si denique hinc derivaverit, quòd terra tunc Lunam necessariò de nocte magis sit illuminatura, quàm ipsa jam deprehenditur à Lunâ illuminari: cui asserto tanto magis fidem ille habebit, si ipsi tubo optico ostenderis, hoc lumen, quo terra Lunam illuminat, in obscurâ ejus parte reipsâ clarè videri, & similia; hæc, inquam, omnia si ordine fecerimus, hoc est, si ad alia non accesserimus, nisi prioribus bene per imaginaticnem impressis, non difficulter eo ipso efficiemus, ut tantam reverà non amplius ille credat inter terram & alios planetas (de quibus optima telescopia non absimilia monstrant) dari differentiam, quantam à primis annis firmo semper assensu sibi hætenus fuerat imaginatus: siquidem hac ratione pro certo & explorato habebit, terram sibi, si in cœlis consistere daretur, eâ, quâ nunc sidera nobis noctu apparent, luciditate visum iri, nec dubium est, quin ipsam pro stellâ quâdam cœli, veluti cætera sidera, tunc habiturus sit. Atque hoc modo cognoscet, desiderio istorum, qui admodum exoptant, ut in aliquam stellarum pervenire possint, quòd, quid rerum ibidem existat, queant observare, aliquâ ex parte

te dudum satisfactum esse, dum eo ipso, quod terram inhabitent, in quâdam cœli stellâ reverà existunt. Quod si quis hâc in re adhuc magis confirmare se voluerit, præter jam dicta etiam *Galilai de vero mundi systemaie dialogos* consulere, aut, si hi nimium prolixi appareant, licet utilissima scitu complectantur, celeberrimi *Megerlini argumentis invictis demonstratum mundi systema* evolvere poterit, aut, si tandem hi libri seria nimis continere videantur, lectio jucunda exigui cujusdam ingeniosissimi Autoris libelli, qui inscribitur, *les entretiens de la pluralité des mondes*, non minùs hac in parte animo satisfaciet. Hac quidem methodo, si rectè proceditur, ab erroneis impressionibus imaginatio adeò perfectè liberatur, ut viderim, qui, quæ antea pro absurdissimis habebant, non ita multò post firmissimè crediderunt; ad quod ipsi tamen solis rationibus, iisque vel maximè convincentibus, frustra adducendi fuissent. Ex quibus perspicuum fit, quantum nobis ad benè philosophandum conducant experientiæ, si intellectu dirigantur, ac quanti sit æstimanda conversatio cum eis, qui mentem à mille falsis, quas ab ineunte ætate, animo nequicquam renitente, liberrimè admiserant, impressionibus bene purificârunt: inprimis, quia nulla res est, quæ æquè imaginationem nostram ultra omnes terminos veteribus olim notos, & ratione quidem intellectui perquam conformi, extendit, ac vitra Dioptrica faciunt; quemadmodum celeberrimi viri *D. Hook* in suâ *Micrographiâ*, *Malpighius* in variis eruditissimis operibus, *Leewenboeck*, aliique perquam curiosa hac de re publicarunt. Optandum sanè esset, ut tam utilis ars, quoad ejus fieri posset, perficeretur: nec enim credendum, hic jam tum omnia, quæ dari saltem queunt, in praxin esse deducta, cum alia & alia indies etiamnum incrementa singularia producantur, non solum circa ipsam vitrorum perfectionem, sed etiam circa ea, quæ illorum ope reverà præstari possunt; qua in re specimina nonnulla exhibui in *Actis Eruditorum* & suo tempore plura proferam.

Post-

*Impedimen-  
tum secundum, quod  
ea, quæ cog-  
nita jam  
sunt, non  
magis faci-  
amus, ac  
proinde sit  
difficile, diu  
hac arte  
meditari.*

Postquam igitur rem eò deduximus, ut nullus nobis sit error timendus, hoc est, postquam artis inveniendi præcepta omnia sic jam ordinata sunt, ut, siue intellectum, siue imaginationem sequamur, nullæ res, quæ diversæ fuerint, inter se possint confundi, atque sic in ipsâ luce sumus constituti, ubi à lapsu sibi cavere non adeò difficile satis attempto erit; idem interim plerumque hic nobis evenit, quod iis, qui usu oculorum sufficienti & perfecto fruuntur, quem tamen non magni æstimant: sit enim, ut eò mentem ob rei simplicitatem convertere dedignemur, impossibile esse rati, nos per tam levia ad rerum difficillimarum & admirandarum notitiâ posse pervenire. Quemadmodum quis falsâ hac persuasionem seipsum decipit: ita certè in talibus, quibus minus assuetus est, attentionem diu continuare admodum difficile poterit: quâ in re is facile est assensurus, qui saltem expertus, quantâ difficultate alii facilia quædam, quæ in mathematicis occurrunt, doceantur; adeò ut *Euclidis* axiomata vix diu meditari, & aurem facillima & auditu notissima narranti præbere vix per horam queant. Fia periculum. Propositum sit alicui, talia in publico auditorio in medium proferre, quæ, licet unica rerum præstantissimarum fundamenta sint, vulgaria tamen, & omnibus sint notissima; eventus docebit, num omnes auditores per integrum horæ spatium attentioni sint vacaturi, & tantâ frequentia redituri, ut deinde quoque percipiant, quomodo illa, quorum spem fecerat, hinc deriventur. Optimè hoc norunt, qui in quibusdam artificiosis, quæ aliquid, quod incredibile, præstare videntur, spectantium visui obijciendis occupantur, ideoque eorum causas spectatores celare, quantum possunt, annuntiant, certò persuasi, artificio detecto omnem spectantium admirationem, ac simul & ipsius artificii, & per consequens, authoris, qui talia producit, existimationem esse cessaturam. Evidens etiam hujus rei argumentum in eo habemus, quod ingeniosissimi viri quandoque admodum difficilia

*Primo hujus  
veritas ipsâ  
experientia  
ostenditur.*

facilia optimè explicârint, cùm tamen econtrariò genuinas valde faciliùm rationes nobis nullas exhibuerint, eò quod non tam diu ad ita facilia, quàm ad rectam omnis indagandæ veritatis methodum necessariò requiritur, attendere potuerint. Quantum hîc quoque cum maximo damno suo plures aberrent, eò quòd simplicia medicamenta parvi faciant, indicabo infrà, ubi de curâ corporis sermo erit: jam enim solùm ad ea, quæ mentis curam spectant, attendo. Ut itaque ab hoc quoque impedimento liberemur, genuina ejus origo est detegenda.

Quia nimirum ab incunabulis, uti in primo impedimento dixi, nos imaginationi potiùs, quàm intellectui regendos commisimus, hinc eo ipso de iis, quæ fieri possunt vel non, plurima hausimus præjudicia, quæ, multis quasi experièntiis persuasi, tanquam certissima firmiter supposuimus. Si jam attendamus, quâ ratione id nobis evenire potuerit, observabimus:

1. Quædam à nobis cognosci ut talia, quæ possunt fieri, & quæ etiam reipsâ ita fieri experimur. Quæ autem sic cognovimus, ea ut talia vel intelleximus, vel imaginati fuimus. Si intelleximus, seu verè concepimus ea, necessum est, ut in naturâ perpauca ejusmodi extiterint: veluti in *parte primâ* abundè ostensum est, nos admodum paucorum naturæ effectorum initio philosophandi habere notitiam. Si verò ea fuimus imaginati, necesse est, nos ejusmodi multa hîc non observasse, sed tantùm pauca quædam, quæ in vitâ ad ordinariâ quævis peragenda occurrunt. Quia igitur in nobis experimur, talium cognitionem per admodum ordinariam cunctisque communem hominibus fieri potentiam, nec ulla per illam alia, præterquam vel valde pauca, vel perquam communia percipimus; hinc tacitè conclusimus, ordinariam notitiam seu potentiam non sufficere, nisi ad pervulgaria intelligenda aut præstanda. Hinc ratio in promptu est, quare omnia, quæ perfectè intelligimus,



mus, tam parvi æstimemus, quia nimirum ad nil aliud nobis inservire videntur, nisi ad perquam communia intelligenda aut præstanda, quæ jam tum scimus; imò quò aliqua præ cæteris intellectu facilia sunt, eò viliora magisque obvia esse putamus ista, ad quæ intelligenda inserviunt, ac proinde tantò minus æstimanda esse. Observamus porro, nos quædam cognoscere ut talia, quæ possint fieri, cum tamen contrarium potius evenire experiamur. Quia verò omnia, quæ intelligimus, seu verè concipimus ut possibilia, etiam talia necessariò sunt manentque; aliàs enim sequeretur, id, quod verum est, fieri falsum: necessariò quoque evincitur, nos talia, quæ pro possibilibus habuimus, & contrarium tamen de iis postmodum experti sumus, reverà non concepisse, sed tantùm imaginatos fuisse. Nec mirum, cum omnium rerum ignari nascamur, (unde permultæ, ut supra vidimus, erroneæ ortæ sunt impressiones) nos deinde in rerum naturà non pauca illis ipsis, quæ sic imaginamur, offendere contraria, quæ vel ideo à nobis veluti extraordinaria spectantur. Quia igitur potentia, quâ illa sic imaginamur, est ordinaria, nec sufficit ad ea, quæ extraordinaria nobis videntur, explicanda; inde collegimus, ordinariam notitiam, seu potentiam, ad ea, quæ nobis extraordinaria seu miranda videntur, explicanda aut præstanda nullatenus sufficere. Hinc in promptu est ratio, quâ de causâ vulgò omnes notitiam, quam intellectus operâ obtinemus, non tantùm parvi faciant, sed etiam omni modo spernant, omnesque, qui huic vacant studio, inde, tanquam à re haud magni momenti, quantum in ipsis est, avertere conentur: quia scilicet extraordinariis, seu mirandis, intelligendis ac patrandis eandem haud sufficere existimant, imaginationem cum intellectu nimio opere confundentes. Hinc porro mentem ad ea, quæ omnium facillimè intelliguntur, convertere superfederunt, nec ullam tam vilipendendis, ut putant, rebus attentionem, ne minimam quidem, tribuere dignati sunt,


sunt, quin potius tanquam condigna contemplationibus suis objecta sibi tractanda susceperunt ea tantum, quæ miranda, seu, quæ extraordinariam potentiam requirere atque exhibere visa sunt, hæcque fuerunt, quæ unice æstimarunt. Tandem observavimus, à nobis quoque quædam cognosci ut talia, quæ non possunt fieri, & impossibilia dicuntur: atamen, eo non obstante, experientiâ didicimus, isthæc reverà esse possibilia. Quia verò omnia, quæ intelligimus ut verè impossibilia, seu ut talia, quæ non possunt concipi, necessariò ita comparata sunt, ut eorum etiam contraria, nequeant accidere, nisi dixeris, id, quod absolutè falsum est, verum fieri; hinc sequitur, nos ea ut falsa tantum imaginos esse, non verò concepisse. Nec quoque mirum est, cum tot ab externis hauserimus errores, hisce nostris sæpissimè cogitatis contraria, seu extraordinaria ostendi. Quia igitur illa potentia, quæ sic quædam ut falsa imaginamur, ad ea nobis representanda, quicquid tandem conemur, haud sufficit, nisi sit extraordinaria; interim autem se his contraria, & quæ proinde ejusmodi tam extraordinaria reverà præstandi potentiâ pollent, se offerunt; inde conclusimus, solam extraordinariam notitiam, seu potentiam, ad extraordinaria explicanda & præstanda sufficere. Hinc facilè causa redditur, quare nemo præ discendi & quid miri præstandi cupiditate unquam intellectum consuluerit, sed unusquisque ad experientias potiùs confugerit. Etenim hic talia offenderunt, de quibus arbitrati sunt, ea extraordinariam planè habere potentiam, adeoque his similia fieri per experientias singulares tantum posse crediderunt: hinc præjudicio hoc occupati nunquam ad ulla naturæ effecta, quæ valdè communia, ac rationi convenientia sunt, verum potiùs ad illa, quæ quàm maximè rationi videntur adversari, mentem unice suam applicuerunt. Et quia talia quæcunque, quò magis rationi dissentanea, eò nobis admirabiliora videntur, (nam nil magis admirabile foret, quàm si,

ex vero fieri falsum vel contrà, posset fingi) hinc tales tantò magis quæsiuerunt & dilexerunt experientias, quantò cæteris admirabiliores visæ sunt. Aurea scilicet! axiomata, & digna, quæ ab insigni adeò doctore, imaginatione puta, humanæ dictata naturæ, eidemque ad perpetuam rei memoriam tam firmiter impressa fuerint. Adeoque magna hic talia corrigendi dexteritate ac studio nobis opus est. Sed priusquam hoc suscipiamus, præcipua eorum, quæ dixi, quibusdam firmabo exemplis.

2. per experientiam.

Quia, ubi rerum possibilitatem aut impossibilitatem observamus, eas ut talia, quæ ordinariam saltem potentiam ostendunt, nullo modo æstimamus, sed ea potius magnificimus, quæ credimus possibilia, & impossibilia tamen experimur, vel, quæ impossibilia credimus, & possibilia experimur, hoc est, uno verbo, æstimamus & admiramur quæ falsa sunt: hinc fit, ut ea hominum artificia potissimum magni faciamus & admiremur, quibus aliquid, quod credimus impossibile esse, fieri posse videmus. Sed simul ac animadvertimus, in quo artificium consistat, cum hac ratione contrà quàm judicaveramus, non nisi possibilia quædam observemus, omnis confestim tum cessat æstimatio. Præstigiatorum artificia, quibus in publico simplices in sui admirationem rapiunt, non certè sunt, veluti spectatores solent supponere, sed tantum sic videntur fieri. Memini me aliquando vidisse non injucundum experimentum, in quo globus gravis L videbatur suâ sponte ascendere ex F in E, ex E in D, ex D in B, atque ita porro: id quod primo intuitu valde admiratus sum,

Fig. 56.



sum, & magni feci. Licet autem scirem, non absolutè verum esse, omne grave deorsum tendere, (nam certè in aquà res non semper ita se habet,) minimè tamen hoc de ponderoso globo in aëre poterat negari. Ubi autem rem attentè considerabam, ac jam in eo eram, ut digitum rimæ, per quam hoc artificium arcæ inclusum conspiciebam, immitterem, animadverti durum quoddam corpus manibus resistens: quod ipsum erat vitrum aliquod, in loco illo subobscurò ita applicatum, ut visu ab introsipientibus nequiret facile percipi. Cùm itaque arcam inspicienti foramen illud, per quod lux ingrediebatur, superiori parte appareret, extrinsecus autem inferiori in parte arcæ reipsa esse observarem, facile opticum hîc latere artificium perspexi. Examinando ergo vitrum, quo rima ad introspiciendum relicta tegebatur, ex transversali lineâ non æquè pellucidâ, triangulare hoc esse prisina facile patuit, quod omnia in hoc artificio mihi sisteret inversa. Hæc igitur nec amplius admirabar, nec tanti ulterius æstimabam, perinde ac quis neque miraretur neque æstimaret, cui tanquam singulare quid ac rarum proponerem, globum plumbeum in plano inclinato descendere. Adeoque concludebam, hoc me antea non, aliam ob causam fuisse admiratum, quàm quia aliquid falsi supposueram tanquam verum. Eadem ratione, si experiëntiâ alicui probavero, me aliquid speculo ex glacie confecto posse comburere, næ id & admiratione & æstimatione dignum omninò censebit. Supponit enim, rem ultra modum frigidam non posse calorem excitare: cujus interim, hoc modo contrarium, id est, rem impossibilem se videre credit. Verùm si ipsi effectûs istius hanc esse causam ostendero, quòd nimirum ob glaciei figuram radii Solares sic refringantur, ut plures in magnâ copiâ in eodem loco congregati calorem quam maximè intendunt, ac proinde non referat, an talis figuræ corpus calidum sit, an frigidum, modò fuerit pellucidum, radiosque Solis dirigens ita, ut in



eundem cogantur locum, quo vis caloris unita fortior evadat, & ad eum usque gradum, qui ad combustibilia in flammam vertenda sufficit, augeatur: quia hac ratione non alia hic observabit, quàm quæ faciliè cogitantur, quòdque etiam illud, quod primum credidit, experimento scilicet monstratum fuisse, rem frigidam calefacere, non verum fuerit; tunc admiratio pariterque æstimatio de iis antea concepta cessabit. Ex quibus omnibus per experientiam clarè patet, omnia, quæ æstimamus, aut admiramur, aliquid semper falsi includere. Nec alia est causa, quare homines specula tantopere admirentur: videntur enim oculos ipsos convincere, quòd in iisdem quandoque veræ personæ aliavæ corpora satis longè distantia existant, id quod tamen falsum esse scimus. Huc etiam pertinet illud, quod tam intellectu, quàm experienciâ nobis constat, ad durum quoddam corpus transpiciendum aliqua necessariò requiri foramina: at observamus interim in vitro, corpore duro, nos illud visu penetrare, & omnia post id latentia detegere corpora posse, nullis licèt hic (scilicet per imaginationem) observatis foraminibus. Cum itaque credimus sic aliquid fieri, quod est impossibile, hinc idipsum miramur & æstimamus, quod est rem falsam, quasi veram credere atque admirari, quemadmodum hoc supra circa primi impedimenti finem latius declaravi. Ita ostendere possem, quòd vulgarium ingeniorum homines, hoc est, quales naturâ sumus omnes, cum de rebus naturalibus, quarum organa plerumque nimis sunt subtilia, & ideo operationes per imaginationem haud ita observabiles, nullum prorsus sanum habeant conceptum, si curiositate allecti multàm defudent in operibus naturæ scrutandis, non nisi admiranda, & quæ ipsos ad ea satis attentos (quia pleraque juxta leges imaginationi perquam contrarias hic sunt) in stuporem quasi redigere possunt, notare soleant, cum tamen simpliciores, ac proinde intellectu faciliores, dari nequeant leges, quàm illæ, juxta quas  
omnia

omnia in universo contingunt. Ut adeoque artificialibus hominum inventis naturalia longè sint simpliciora, illaque hæc artificio, quoad inveniendi ambages, multùm superent, nec proinde, nisi saltem tot præjudiciis essemus præoccupati, tanto ad naturalia, quanto ad artificialia cognoscenda opus sit ingenio; sicuti ex omnibus naturæ operationibus, in quibus organa non adeò sunt subtilia, ut omnem effugiant sensum, aut quorum genuina jam nobis detecta est natura, liquidò patet, & vel ex hoc evidentissimum est. Si machinæ quædam artificiosæ à duobus compositæ sint artificibus, eundem effectum exhibentes, hic sanè sapientior multò est dicendus artifex, qui eundem prorsus effectum simpliciori constructione producit, præ altero, qui per vias magis compositas in eundem scopum collineat. Adeoque haud dubitandum, sapientissimum omnium rerum effectorem tam simplicia ad cuncta producenda adhibuisse principia, quibus simpliciora excogitare absolute repugnet: etenim si simpliciora excogitari possent, non esset sapientissimus, eaque proinde multò simpliciora erunt illis, quæ quivis artificiosus mechanicus adhibet. Quia verò ex principiis simplicissimis à sapientissimo artifice etiam omnium artificiosissima composita fieri debent, exinde res evidens est, quare, qui ad sola composita seu naturæ opera animum advertunt, sibi contra persvadeant, hæc explicatu esse difficillima: quia nimirum in rebus humanis ut plurimum, quò plus est artificii in quâdam machinâ, eò plus ingenii ad eam capiendam requiritur: adeoque etiam naturalia, quia hic artificiosissima dantur, difficillimè omnium explicari posse credunt. Verum enimvero hic prorsum contrarium accidit, siquidem, ut dixi, sapientissimo artifice convenit ex simplicissimis, intellectuque facillimis principiis artificiosissima producere: aliter planè, ac quidam ex crassâ ignorantia opinantur, statuentes scilicet, per quò difficiliore hypothesis res omnes explicarentur, eò magis Dei sapientiam elucescere;

cescere; quam ob causam opera quoque ejus perquam admiranda seu inexplicabilia esse fingere, quantum possunt, student. Interim summa naturæ artificia viâ simplici absolvuntur; quâ in re obiter notamus, posse meo judicio, si ullâ ex re, certè ex hac à posteriori clarissimè cognosci, DEUM existere. Quia enim reverà observamus, omnes naturæ operationes per leges tam simplices, ut absolutè simpliciores concipere repugnet, peragi, quid inde quæso aliud colligendum, quàm has perfectas esse, imo continuò proficisci ab ente sapientissimo, adeoque, quod necessariò sequitur, DEUM reverà existere. Sed ne nimium hîc digrediamur, mittere hæc (quia ad subsequens remedium potius pertinent) & adhuc alia circa entia rationalia exempla ejusdem rei proferre placet. Sic equidem circa ipsam Mathematicæ Theoremata pleraque admiranda videntur, ob similes causas; quia præcipuè in continuâ inæqualitate semper observatur æqualitas. Exemplo sit *Archimedeum* de Cylindro & Sphærâ, ubi quævis inæqualia superficiiei Sphæræ segmenta semper æqualibus segmentis superficiiei cylindricæ æquantur: quia verò imaginatio semper nobis dictavit, in continuâ inæqualitate continuam quoque inæqualitatem reperiri debere, ejus dictati contrarium hîc animadvertimus. Hinc itaque talia miramur; sed quæ tamen vilescunt, simul ac, ea nil nisi intellectui valde consonum habere, demonstratum intellectumque fuerit, vel ad minimum non sunt tanti, quanti fiebant, cum nobis demonstratio incognita adhuc esset. Optimè id norunt, qui rebus suis æstimationem apud alios ambiunt: hi enim, utut theorematum, quæ æstimantur, satis faciles habeant demonstrationes, alias tamen de industriâ easque difficiles admodum fingunt, quò homines in suis detineantur præjudiciis, credantque, veritates ab ordinariis nostris meditationibus remotas non nisi extraordinariâ etiam & mirâ circuitione posse demonstrari.

Ex his jam patet, quantum damni hic imaginatio illis præcipuè, qui veritati eruendæ dant operam, per tantum temporis spatium dederit, talia nimirum edocendo, eaque quò magis veritatem absque methodo quærimus, eò fortius imprimendo, quibus ferè nil sanæ magis contrarium rationi ullo modo hoc in negotio potest fingi. Non ergo mirabimur, cur tam pauci magno quovis labore, verà destituti methodo, hic aliquid insigne præstiterint; nec mirum quoque erit, nos tantam in nobis experiri difficultatem ad facilia quæque nos convertendi, diuque ea attentè considerandi, ita ut natura nostra multo exercitio quasi pentius hic invertenda esse videatur; nec denique mirabimur, eos etiam, qui genuinam veritatis methodum callent, parum promoveri, nisi multum in eà se exercuerint, cum tantum hoc loco impedimentum se denuo offerat. Sed videamus, quænam hic nobis, in tot ac tantis imaginationis illusionibus constitutis, remedia ad tam noxias impressiones, post detectam earum originem, corrigendas intellectus, vera lux mentium, suppeditet.

*Primò* hic sæpe considerandum, illa nullo modo esse attendenda, quæ, cum nobis possibilia videantur, impossibilia tamen esse experimur; & ea, quæ contrà sub impossibilium specie se nobis sistunt, cum tamen possibilia sint: siquidem in his certè aliquid falsi à nobis esse admissum clarum est. Est enim veritas non nisi unica, nec una veritas alteri unquam potest esse contraria. Et quia, quodcunque ut tale nobis apparet, solemus ut plurimum admirari, ideo semper intellectui id valde debet esse suspectum, imò falsi quicquam hic latere certum est. Quod imprimis notandum circa illa problemata, quæ in physicis nobis admodum admiranda, adeoque soluta ardua, aut planè impossibilia videntur. Etenim naturæ leges simplicissimæ, & proinde intellectu facillimæ sunt, nec ulla hic, nisi à parte nostræ imaginationis, difficultas in rebus ipsis oritur. Deinde circa

3. quæ hinc  
consequen-  
tia forman-  
da.

*Tertiò re-  
medium.*



similia semper admiratio, dum saltem res intelligitur, cessat; id quod certum est indicium, nos antea aliquid supposuisse, quod nunc experimur, se reverà non ita habere, licet id, quidnam sit, non semper detegamus; adeoque his & similibus ad difficultum & admirandarum rerum cognitionem perveniri nullo modo posse: sed ea demum præclaro hoc fungi munere, quæ verè intelliguntur, hoc est, quæ possibilia sunt conceptu, seu, quæ generationem alicujus rei includunt; hæcque proinde sola esse, quæ ad talia impetranda viam sternunt regiam, & ideo quoque hæc tanquam omnium præstantissima, longè posthabitis omnibus ejusmodi imaginationum deliriis, æstimanda, ac propterea præ cæteris excolenda & promovenda esse. Quà autem id fieri possit ratione, suprà Sectione 1 & 2 docui, & veritatem ejusdem rei circa modo recensita exempla passim interjectis rationibus stabilivi. Notandum insuper de his, quæ verè æstimanda sunt, venit, inter illa, quæ verè concipiuntur, notabilem esse differentiam, & alia multò magis præ aliis esse æstimanda: nempe præ cæteris omnia maximè sunt æstimanda, & idcirco ante omnia quærenda, quæ se ad quam plurima extendunt, hoc est, quæ valde generalia sunt. Et licet circa superiora mera talia tradiderim, eaque acquirendi viam ostenderim, hic tamen inprimis declarabo, quanti hæc cognitio præ omnibus aliis reipsà sit momenti. Notandum itaque cognitionem generalem quavis speciali multò esse præstantiorem, quia

1. Nostram notitiam multum auget, cum omnis veritas, quæ cognoscitur cognitione generali, etiam debeat cognosci in omnibus specialibus subjectis, adeoque qui generalem habet cognitionem, eam etiam ad omnia specialia extendere potest; cum contrà specialis notitia non nisi certo & unico conveniat subjecto. Imò eadem hac cognitione, permulta de rebus infinitis, mente licet finitâ, certò possunt intelligi. Si enim infinitus individuorum in naturâ numerus,

rus, & in iis omnibus aliquid commune est, istud commune æquè de infinitis ac finitis intelligitur. Hinc patet, quòd, licèt ad omnes stellas, siquidem earum fuerint infinitæ, adæquatè concipiendas (hoc est cognitione speciali) mens requiratur actu infinita, interim tamen, si omnes aliquid commune habuerint, in suâ ex. gr. genesi, figurâ, motu, seu materiâ æqualiter affectâ &c. id utique à finita quoque mente percipietur, & sic in aliis; atque per consequens permulta de omnibus universi corporibus scire possumus. Adeoque licèt ea actu infinita esse, nullamque hinc nos aliam nisi generalem obtinere cognitionem, demonstrari posset, speciali cognitione menti actu infinitæ tantùm reservatâ; interim tamen non minùs clarè quamcunque rem poterimus intelligere, ac quidem nobis constat omnium in niuro aut pavimento quodam laterum, (sive finiti illi sive infiniti sint) dispositio, postquam ea nobis saltem in decem aut duodecim constiterit. Deinde eâdem etiam hac generali cognitione illa cognoscemus, quæ, quamvis infinita sint, naturam tamen talem habent, quæ communis est individuis numero infinitis, prout ejusmodi habet naturam indefinita omnium rerum in se considerata extensio. Nam quod omnibus est commune, illud æquè clarè in uno individuo, ac in omnibus, intelligitur. Si igitur id ipsum est infinitum, hoc etiam infinitum clarè intelligitur. Patet tandem, eâdem quoque cognitione illa infinita, quæ eandem in parte, quam in toto, naturam habent, à mente etiam finitâ concipi: quæ enim è naturâ partis veritas concluditur, ea ex naturâ quoque totius infiniti (supponitur enim, ejusdem esse naturæ,) sequitur. Talia sunt omnia Mathematicorum infinita, quæ quandoque finitis quantitibus demonstrantur esse æqualia, ac proinde ad harum finitarum exemplum alterum infinitorum alteri necessariò majus minusve erit absque ullâ contradictione; hinc infinita, quæ hic de infinitis inter eruditos habentur, litigia facili deciduntur negotio.

Sed nimis longum, & insuper tædiosum foret, res ejusmodi hoc loco specialius prosequi; sufficiat hîc generalis scientiæ præstantiam scire, ex eo, quòd se tam latè extendat. Loquor autem de generali, non abstractâ illâ, quam docent Metaphysicorum scholæ, scientiâ; id quod expressè moneo, ne hanc cum illâ quisquam confundat, cùm admodum differant istæ, & una tantum sit utilis, quantum altera instructuosa.

2. Talis deinde notitia generalis speciali est præstantior, eò quòd communes ejusmodi veritates multò faciliùs detegantur, nempe quia concluduntur ex aliquo, quod aut omnibus, aut quamplurimis subjectis specialibus est commune, adeoque hoc faciliùs observatur illò, quod certæ cuidam tantum rei, aut individuo, aut paucis quibusdam est commune. Ex quo concludere possumus, quàm egregiè nobis nostræque utilitati sit prospectum, quandoquidem, quò hîc magis salutaria occurrunt, eò etiam intellectu faciliora sunt, nî modò fidem magis habeamus imaginationis, planè semper contrarium hac in re svadentis, seductionibus. Sic nil aliud supponendo, quàm naturam omnibus curvis communem, ad deducenda theoremata omnibus communia, hoc est, curvas esse polygona, constantia ex lateribus indefinitæ parvitatæ, & triangula similia esse proportionalia; ex his paucis & intellectu facillimis adeò generalia possunt condi theoremata, ut ad minimum plura ex unico eorum saltem queant concludi, quàm omnia illa unquam complectuntur, quæ nobis à veteribus sunt relicta; quin multò illis præstantiora, prout clarum est ex *Hecuratio Theoremate*, quo curvas in rectas mutare docuit, aliisque similibus, quæ deinceps *Jac. Gregorius*, Scotus in suâ *Geometriâ univârsali*, & *Jf. Barrow* in *Lectiõibus suis geometricis* eâdem exhibuerunt methodo, adeò ut pluribus prolixiùs recensendis tædium alicui creare nolim.

3. Hæc etiam notitia vel ideo aliis est præferenda, quia efficit, ut (quod imprimis in physicis maximè usu venit) etiam aliæ speciales naturæ, licèt nobis incognitæ, eò faciliùs exinde detegantur, quo plures nobis eà de re, quas cum aliis habent communes, veritates innotuere. Unde patet, quantopere hîc alii aberrant, qui statim in physicis ad specialissimâ quæque se convertunt, atque ita iis involvuntur difficultatibus, ex quibus, ut unquam se extricare possint, impossibile videtur: cùm econtrariò, si maximè generalia hîc sectarentur, omniaque, quæ ita scire datum est, priùs determinarent, ardua quævis deinceps in valde specialibus magnâ facilitateolvere possent.

Ex his omnibus patet, quodnam genuinum sit artificium statim à principio cognoscendi, quæ cognitio alteri sit præferenda, h. e. quæ cognitio sit fertilior ad multas hinc derivandas veritates. Hoc qui ignorat, multum sæpè frustra laborabit, ac licèt meliora sciat, ea tamen, ex quibus res haud magni momenti deducere licet, sectabitur. Si qui ergò dicant, se alterius cogitationes longè prius novissè, quàm ille alter eas pro suis publicavit, nihil hoc refert, nisi tunc ipsis simul fuerit perspectum, quàm bonæ illæ sint cogitationes, & quantum idcirco aliis præferendæ: id enim si ipsos latuerit, non raro meliores postponent meditationes, easque potiùs sequentur, ex quibus haud magna speranda est utilitas. Hoc verò est præcipuum, quod ex tali auctore addiscunt: quem ideo injustè cavillantur, quod ea, quæ ipsis jam pridem cognita, tradiderit, cùm tamen tanta ejus rei utilitas ipsis fuerit ignota, quia alioquin diversis aliis viis circa similia ipsi non institissent. Quod verò alii dixerunt, cognitionem specialem, quâ veritas ex adæquatâ cujusque rei naturâ concluditur, & quam intuitivam vocarunt, generali, quâ eadem veritas ex naturâ pluribus communi eruitur, præstantiorem esse, id eò fecerunt respectu, quòd nos intrinsecus magis afficiat: id quod circa omnia.



superiora quis facillè potuit colligere, ubi sola præcepta, licèt eandem, quam exempla firmare solent, confirment veritatem, nos certè tantopere non afficiunt, ac exempla. Idem aliquando, si quidem permittet occasio, ut specialiora artis inveniendi præcepta tradam, se magis iisdem affici experietur lector: dum enim hîc tantùm generalia artis huius præcepta propono, eâ nobis tantùm delectationis adferre nequeunt. Maximè igitur hîc cavendum est, ne decipiamur, præsertim cùm videamus, nos facillè decipi posse, eò quòd pro more specialia, utpote circa quæ imaginatio potissimum antè fuit occupata, & quæ proinde nos magis afficiunt, ideo præstantiorâ censeamus, ac huic tam noxio insidiatori plus fidèi quàm intellectui, qui nobis nonnisi bona & præstantissimâ largitur, habeamus. Hæc igitur hisque similia, quæ hoc loco docui, assiduâ & frequenti meditatione nobis erunt consideranda, si nobis quidem cordi fuerit, imaginationem rectè dirigere, quamvis dubitem, num ea sola sufficiant. Erit ergo

*Secundò* ope genuinæ detegendæ veritatis methodi efficiendum, ut reipsâ videamus, quâ ratione ex cognitu facillimis, & vulgatissimis experiètiis, ac iis rebus, quas nullo modo æstimavimus, nec ullâ consideratione dignas iudicavimus, continuâ serie talia deriventur, quæ antequam detecta fuissent, nescio quibus mirabilibus phantasiis in lucem deducenda esse credideramus, uti his similia quædam suprà exhibui; atque ita tum cognoscemus, quàm infinita hinc sequantur nova, (nam ex aliâ ac aliâ infinitarum definitionum novâ conjunctione infinita resultant nova, aut novæ ad minimum demonstrationes) & quàm difficilia hîc facili negotio explicentur, (ex simplici enim naturarum compositione talia exsurgunt, quæ per genuinam veritatis methodum nobis acquirere licet, quibus notis etiam totius ex iis compositi natura indagabitur) quamve admiranda sic theoremata formentur: non enim dubitandum, quin pleraque  
corum,

corum, quæ sic deteguntur, talia ferè sint futura, quæ erroris nostris impressionibus, si non omnimodè, magnâ tamen ex parte quasi semper adversabuntur. Imò quàm pulchra etiam sint, quæ sic inveniuntur, fiet manifestum. Nam si pulchra nobis videntur, in quibus ordo partium observatur aliorum respectu facilè imaginabilis, cùm mediante hac methodo omnes disquisitiones certò & constanti, hoc est, facilè imaginabili ordine instituuntur, omnia necessariò quoque inventa constantem servabunt ordinem, ex quo progressio ut plurimum haud difficulter colligetur. Hæc, inquam, & similia cùm per nosmet ipsos inveniri posse ipsa nos experientia convincat, dubitandum non est, quin sic imaginatio sensim contrariis ejusmodi impressionibus multò magis quàm antea corrigatur. Sed

*Tertiò* omnium maximè imaginatio, meo judicio, corrigetur, si eorum, quæ præ omnibus summè fuimus admirati, cognitio nobis exhibeatur, confirmata tam ratiociniis clarissimis, quàm experientiis evidentissimis. Et quia talia plurima ab aliis egregiè sunt explicata, eandem nobis cognitionem comparare utilissimum erit: quâ, verbi causâ, miræ magnetis proprietates à Neotericis explicentur, aut quomodo Astronomi permulta circa corporum cœlestium motum, distantiam, magnitudinem &c. certissima ab experientiis perquam obviis deducant, ubi cognitionem nostram & tantâ quidem certitudine eò pertingere posse, ignorantibus ferè incredibile videtur, quod inprimis eclipsium Solis ac Lunæ &c. prædictio quotannis apertè demonstrat; præsertim si consideres, eò usque Astronomos jam progressos fuisse hoc seculo, ut talium etiam corporum motus & eclipses determinent ad minuta, quæ nullo modo sub visum cadunt, nisi tubis opticis juvemur, prout circa Jovis & Saturni satellites contingit. Videatur *Recueil d' observations faites en plusieurs Voyages par ordre de Sa Majesté pour perfectionner l' Astronomie & la Geographie.* Etenim imaginatio ita

ita perfectè convicta animadvertet, quàm paucis cognoscendis, & quàm vulgaribus sæpe experientiis ad demirandas proprietates explicandas, aut ad exploranda talia, quæ remotissima esse à nostrâ cognitione videntur, nobis opus sit. Quis enim e. gr. unquam existimaret, globum è fune suspensum & hinc & inde oscillantem ullâ consideratione dignum esse, atque exinde magni momenti veritates, & quæ à cognitione nostrâ remotæ admodum sint, concludi posse? Interim facillima hæcce experientia, quæ ne minimâ fortè attentione tibi digna videbitur, præcipuum fundamentum est, cui superstructa fuere talia, quæ maximè Astronomiæ & Geographiæ inserviunt. Hinc enim perpetua & omnibus seculis constans mensura derivata est; hinc inventio deducta longitudinis tantopere ab aliis desideratæ; hinc longitudo determinata spatii, quod corpora gravia dato tempore absolvunt. Hinc quoque certò scimus, omnia corpora circa æquatore leviora, sed versus polum graviora esse; item perpendiculara suspensâ non semper versus centrum tendere; terram rotundam non esse, eandemque circa axem in gyrum volvi. Quæ omnia pluraque alia ingeniosè deducta invenies in *Domini Hugenii horologio oscillatorio & Traité de la lumiere avec un discours de la cause de la Pesanteur*. Sed ut ad præsentia revertamur, inprimis etiam hic necessarium est, non tantum ut impressionibus valde contrariis ita, uti dictum, imbuatur imaginatio, verum etiam ut, cum jam sciamus, in omnibus, quæ nos in admirationem abripiunt, aliquid falsi supponi, falsum illud, quod latet, semper perfectè detegatur, prout suprà circa originem hujus impedimenti hunc in finem ejusmodi quamplurima protuli exempla: quibus bene peractis admiranda absque dubio, aut quæ talia videntur, imaginatio haud adeò magni, ac antè, amplius faciet, adeoque intellectui talia solum, quæ nullam in se admirationem habent, & quæ omnibus potius sunt nota, sectanti falsis suis illusionibus, quæ jam omnimodè, aut

magnâ

magnâ saltem ex parte hoc modo erunt correctæ, non adeò inposterum adversa erit.

Impedimento illo penitus sublato, &, nihil præstan-  
 tius iis solis, quæ Intellectui facilia ac valde generalia sunt, Tertium, impedimen-  
 tum, quòd  
 semper in-  
 quiramus,  
 num aliqua  
 notitia si-  
 utilis, & n-  
 talis statim  
 appareat, e-  
 andem pa-  
 ram æsti-  
 memus.  
 hic posse dari, ipsâ experientiâ cognito, ostensoque quoad  
 experimenta, ea præcipuè magni esse æstimanda, quæ quàm  
 vulgarissima & simplicissima sunt, quibus puta ceu solis alis  
 non solum in cælum seu astra versus, sed etiam quasi ad u-  
 niversi extrema evehimur, & sic in eo sumus, ut nos accin-  
 gamus ad profundissimas veritates detegendas, adeoque re-  
 ipsâ non parum progrediamur; his, inquam, se ita habentibus,  
 contingit, eas veritates nobis non statim, postquam  
 inventæ sunt, utilitatem quandam adferre, vel ad mini-  
 mum, eas non videri alicujus usûs esse: unde easdem tan-  
 quam inutiles speculationes negligimus, desinimusque no-  
 vas deinceps inde deducere veritates. Sic aliquis egregium  
 fortè aliquod Theorema sibi propositum magni æstimabit  
 non aliam ob rationem, quàm quia, juxta superiora, aliquid  
 miri in eo reperire sibi videbitur: ut primum verò ejus de-  
 monstrationem ipsi aperuero, quia nihil mirandi in eâ re-  
 peritur, sed omnia faciliè intelliguntur, extemplo omni ad-  
 miratione valere jussâ id ipsum, ac si inutilis esset specula-  
 tio, amplius non æstimabit, nisi denuo insignem aliquam,  
 ex illo theoremate mox oriundam, reipsâ exhibuero utili-  
 tatem. Optimè hoc norunt, qui alios Mathesin docent: Primo hujus  
 rei scribitur  
 exemplis de-  
 claratur.  
 hi enim, quò multos discipulos nanciscantur, statim ad i-  
 psam praxin, non verò ad *Euclidis Elementa*, aut magis ad  
 Theoriam spectantia, pergunt. Si enim à talibus ordiren-  
 tur, discipuli arbitrarentur, nihil aliud ipsis esse propositum,  
 quàm quo in inutilibus solum speculationibus & quæ nullius  
 sint usûs, diu multumque detineantur auditores; coguntur  
 idcirco docentes, propter perversa aliorum judicia, proli-  
 xam praxeos potiùs inire viam (in quâ tot ferè nova præce-  
 pta, quot exempla sunt,) quàm viam admodum compen-  
 diosam,



diosam, quâ infinitas praxes seu exempla unico theoremate seu præcepto addiscimus. Ut itaque à talibus impressionibus liberemur, earum origo est notanda.

*Secundò origo ostenditur,*

*1. à priori.*

Videtur autem hæc res, si ad primam attendamus ætatem, & quâ ratione impressiones aliæ aliis circa hæc successerint, ita evenisse. Quia natura nostra indiget continuâ quasi conservatione, haud dubium est, quin primæ nostræ cogitationes iis potissimum in rebus, quæ natura ut necessariae seu utiles appetebat, fuerint occupatæ; adeoque sic incepimus à primo quasi vitæ termino ea solum, quæ utilia sunt, magni æstimare. Ubi deinceps externa sensibus nostris se obtulere, magisque nos in ea obtutum, ac in alia, direximus, tunc quidem ob plurima nova eò cogitationes aliquantulum convertimus, quin & plurima etiam æstimare, ut nobis grata, incepimus: at verò quia his cogitationibus diu vacare non potuimus, eò quod necessariae nostræ conservationis à naturâ commonefacti fuerimus, omnes ejusmodi speculationes cito satis reliquimus, & nos ad ea, quæ magis necessaria, hoc est, quæ utiliora fuere, iterum convertimus; atque hoc ipso assuevimus ab illis, quæ non apparebant utilia, sæpe nos avertere. Quia verò eorum, quæ in speculationem veniebant, quædam quandoque observavimus nostræ naturæ utilia, plus quidem præ reliquis externa tunc cordi fuerunt, non tamen aliam ob causam, quàm ob solam plura nobis fortè inservientia detegendi spem. Atque ita tandem eò prolapsi sumus, ut nullam deinceps scientiam, nisi ejus utilitas aliqua statim apparuerit, æstimaverimus. Et hinc omnes veritates, quarum utilitas non illico se nostro sistebat conspectui, tanquam inutiles speculationes rejecimus. Quum verò in his omnibus solam consuluerimus imaginationem (unicè siquidem à primâ ætate de solâ corporis nostri utilitate cogitavimus) vix fieri potuit, ut ulla magni fecerimus veritates, præter illas, quæ aliquam conservationi corporis inservientem utilitatem nobis reapse patefaciunt.

Hæc

Hæc omnia tam clara sunt, ut haud opus videatur ul-<sup>2. à posteri-</sup>  
lis ad ea firmanda exemplis, cum tota vita nostra hujus rei<sup>ori.</sup>  
non nisi clarum sit exemplum; adeò ut nemo non, cui de  
scientiarum nudam tantum veritatem explicantium digni-  
tate facta fuerit mentio, brutum illud ogganniat: *Non est  
de pane lucrando.*

Non itaque jam mirabimur, cum scientiam veritatis<sup>3. que con-</sup>  
longissimè post se relinquat utilitatis notitia, & multò for-<sup>sequentia</sup>  
tius, quàm dici potest, nostras occupaverit cogitationes,<sup>hinc for-</sup>  
plerosque omnia sua etiamnum eò dirigere, ut satis clarè  
possit colligi, eosdem solius corporis, minimè verò men-  
tis, curâ tangi, quicquid sæpissimè contrario ore negent.  
Quà quidem in re condignas pessimorum suorum ratioci-  
niorum luunt pœnas, adeò ut, licet ad corporis utilitatem,  
ex suo quidem judicio maximè conducentia sibi acquisivisse  
videantur, illa tamen omnia, quia mentis curam insuper  
habuerunt, intellectumque, (qui legitimum omnium bono-  
rum usum solus edocet, quò nobis in solidam delectatio-  
nem omnia cedant,) ut par erat, excolere neglexerunt, il-  
la, inquam, omnia ad mentem non tranquillandam, sed  
quam maximè potius perturbandam inserviant, atque ita  
in magnâ bonorum abundantia miserrimè crucientur, stul-  
titiâ absolutum in eorum corpora exercente imperium.

Porro non mirabimur, illos etiam, qui summo studio  
veritatem quarunt, potissimum respicere ad aliquam uti-  
litatem, &, nisi ea statim apparuerit, (quanquam scientia  
reverà in se est utilissima) hanc ideo veritatem, ad alias ve-  
ritates inde deducendas diu considerare non posse, quia hæ  
cogitationes, veritatis nimirum atque utilitatis, hæcenus  
quasi semper conjunctæ, aut parum separatae fuerunt, ut  
jam exercitio ad eas sejungendas sit opus. Quò itaque à  
tam noxiâ imaginationis nostræ constitutione, quæ nos à  
verè utilium, quæ intellectus docet, prosecutione abstrahit,

liberemur, audiamus quæso, quid hic nobis consilii optima nostri pars, sana ratio, suggerat. Notandum igitur

*Tertiò re-  
medium.*

*Primò*, intellectum econtrariò nobis svadere, ut nunquam utilitatem in veritatis inquisitione respiciamus, sed puram tantùm veritatem, quæ, et si nobis nullatenus videatur utilis, nos tamen hoc solo, quòd novam quandam veritatem detexerimus, contentos reddere debet; cujus rei ratio est, quia aliter faciendo nobis ipsis viam ad utilissima quæque perveniendi occludimus. Nam quàm maximè notandum est, omnem, quæ à nobis acquiri potest, utilitatem à solâ naturæ potentiâ esse expectandam. Ita ope acûs magneti- cæ novus detectus orbis, eique acceptum ferendum est, tot jam mari commercia tantâ hominum commoditate fieri posse, quem usum non metalla, non mineralia, non vegetabilia, non animalia, non machinæ variæ &c. usquam nobis præstare poterunt. Atque idcirco, quòd nobis ejusdem naturæ potentia magis obvia est, eò plus utilitatis consequimur. Ut autem hæc nobis magis magisque aperiatur, nihil hic nobis magis prodesse poterit, quàm genuinam habere methodum absque errore, & constanti quidem ratione, quicquid est ignotum detegendi. Nil ergo melius fieri potest, quàm si talem excolendo methodum omnes, quas mens humana scire poterit, conemur hinc derivare veritates; in novâ autem detectâ veritate nulla, si in se consideretur, primùm apparet utilitas: nihil enim aliud sequitur, quàm aliquid posse concipi, hoc est, tantùm possibile quid, seu nova naturæ potentia, detegitur. Et ideo, cum hinc omnem nostram utilitatem provenire sciamus, adeò ut, si omnis nobis cognita foret naturæ potentia, hinc sanè omnium temporalium maximam, quæ exoptari posset, utilitatem consecuturi essemus; meritò nos solâ detectâ veritate contentos esse decet, & quò longiùs inoffenso pede in veritate detegendâ progredi licet, eò magis nobis de felicitate nostrâ poterimus gratulari, nullo licèt usu talium ve-  
rita-

ritatum interim perspecto. Est enim hic apprimè notandum, quòd detectà quâdam utut perutili veritate, quatenus in se consideratur illa utilitas, non tantùm nulla observetur, quemadmodum modò declaravi, sed ne tunc quidem queat ulla observari, quia utilitas tum demùm innotescit, cum inventa veritas ad quosvis usûs humanos applicatur. Ita inventa acus magnetica gubernandis navibus, vitra pellucidis fenestris, vasculis, speculis, telescopiis &c. metallâ, infinitis usibus applicata demum inserviunt. Quum verò infinitis rebus homines occupentur, non statim harum omnium applicationem scire poterimus, quantopere scilicet, & ubi, & quâ ratione usui fortè futura sint, & vel in subsequentibus, si plura dentur, sæculis quâdam utilissima poterunt esse, quæ jam apud nos nullius habentur usûs. Non ita diu est, quòd telescopiorum usus fuerit detectus, licet vitrum jam ante multa sæcula fuerit notum. Nota quoque jam dudum fuere sulphur, nitrum, carbones, sed pulveris tamen pyrii notitia, ejusque ad bombardas exonerandas usus multò est recentior. Magnes antiquis notus fuit, sed non æquè acus magnetica, & usus illius. Adeoque profectò, qui imaginatione suadente ideo quandam rejicit veritatem, quia ejus utilitatem non statim cognoscit, sibi eo ipso viam ad subtilissimâ juxta ac ad omnium utilissimâ perveniendi præcludit; quam notitiam antea habere nequit, adeoque nec quidem de utilitate ejus judicare potest, priusquam veritatem illam applicuerit ad omnes omnino usûs humanos, qui omnes nobis quoque nondum sunt perspecti. Hæc hisque similia diu mente volutata ad erroneas imaginationis impressiones corrigendas haud parum facient. Cui rei multùm insuper inserviet, si

*Secundò* reipsâ videamus, quâ ratione in nostrâ sit potestate, per inveniendi artem certò semper tales indagare veritates, quæ perquam utiles sunt. Nam ex eâ constat, quomodo omnia possint explicari definitionibus generationem inclu-



dentibus. Quam incredibilem autem ejusmodi definitiones præ omnibus aliis adferant utilitatem, reverà experietur ille, qui periculum in his ipsis fecerit, uti talia quædam supra aperui. Porro hic omnia ex valde generalibus derivantur: nihil autem hac notitiâ potest esse utilius, quâ unius theorematismis ope sic infinita simul explicantur, quemadmodum latius in secundo impedimento hæc indicavi. Tandem omnia per istam methodum eò dirigo, ut omnis demum cognitio ad genuinam Physicæ scientiam eruendam, id quod attendenti clarè constabit, inserviat. Quum autem hac cognitione nihil nobis queat esse utilius, (omnis enim, quam jam possidemus, aut sperare possumus, utilitas præcipuè à naturæ potentiâ, prout in se consideratur, derivatur) utique hanc methodum, ut decet, bene excolendo non possumus non hinc utilissima deducere. Verùm quia tempus & commoditas singularis ad hæc omnia, uti par est, præstanda requiritur, impossibile ferè est, ut erroneas imaginationis impressiones tam citò & ad arbitrium corrigere adhuc liceat, quin continuò recurrant & contrarium suadeant. Optimum ergò videbitur hic remedium, si intellectus per sensibiles experientias in hunc finem præ cæteris electas imaginationem eum in statum, quo sibi eam obsequentiorem reddere ad nutum queat, tandem reducere studuerit. Hoc autem fiet

*Tertiò*, sæpe considerando, quàm valde omnes homines, qui imaginationi auscultant, in modò dictis fallantur. Si enim quis alicui ostenderit, acum magneticam impulsu motam atque tunc liberè sibi relictam ad certæ lineæ in tabulâ quâdam ductæ normam semper quiescere, hoc quidem curiosum esse asseret, sed tamen, quam habeat utilitatem, se non videre dicet: quasi id ex ipsâ statim veritatis notitiâ, & non potiùs ex applicatione ad omnes humanas actiones, notas pariter ac ignotas, seu adhuc infectas, dignosci simul possit ac debeat. Ast ille contrà, qui rationem ducem sequitur,

quitur, nullam licet observet utilitatem, in eo tamen maxime, se novam quandam hoc modo detexisse naturæ potentiam, acquiescit, & certò interim scit, hoc posse esse utile, si non nostro seculo, certè sequenti, si tam diu quidem terra duraverit, uti reverà in jam dicto acûs magneticæ experimento successit. Quis enim, obsecro, simul ac ista detegebatur proprietas, potuisset credere, fore, ut eâ ipsâ homines aliquando vel aureorum milliones lucraturi sint, uti Rex Hispaniarum in Americâ ejus operâ detectâ, & aliæ post ipsum Nationes summo suo cum commodo reverà sunt expertæ? Quis arbitratus fuisset, multos hominum, si hoc ignoreretur inventum, notabile vitæ discrimen subire posse: id quod verò omnino fieret, si navigantes longè in altum proVecti pyxidem nauticam casu amitterent. Ita quoque eandem ob rationem homo Philosophus naturæ potentiam tam singularem, & quæ fortè pro incredibili antiquitus habitâ fuisset, nimirum globum tot librarum ope pulveris pyrii tantâ celeritate, tantumque per spatium explodi, dignè æstimat, licet nullus hujus rei ipsi perspectus fuerit usus, ipsique necdum innotuerit, uti postea deprehensum est, ejus adminiculo bestias, etiam ferocissimas, facillimè vinci, petras durissimas diffringi, latentia in iis metalla facilius erui, ponderosissima quæque faciliè elevari aut destrui, & alia plurima præstari posse. Multò autem magis vulgus despectui haberet hominem Philosophum, aliquantum æstimantem, seu multum considerantem, ut omnia naturæ possibilia, sic etiam hoc, quòd videat, nihil aquæ intrare in concavum, vasis vitrei aquæ inverso situ immergi, præcipuè si hoc ipso multa florenorum millia se posse lucrari assereret. At enim ab hoc unico dependet, quòd quidam sub lignèâ magnâ campanâ fundum maris petere ausi fuerint, quò tormenta bellica naufragio demersâ recuperarent, nec irritò conatu: qualia plura, si ritè procedatur, magno cum emolumento possent institui. Ejusmodi exempla diu multumque sunt  
consi-

consideranda, quò isthæc tandem præjudicia radicatus ex animo tollantur; quod imprimis fiet, si usque seriò nobiscum repetierimus, res etiam vilissimas, seu veritates, quia admodum familiares sunt, haudquaquam æstimatas, perutiles interim esse. Concusso lapide prosilit ignis, aqua & ignem extinguit, & suo cursu alia secum corpora vehit. Quis nescit, talia nobis incredibiles in variis vitæ occasionibus adferre usus? Nec ideo dubitandum est, adhuc alia plurima, etiam utilia posse adinveniri, cum ex levissimis quandoque observationibus perquam utilia profluxerint, quæ tamen non continuò & eodem simul tempore detecta fuere. Hoc faciliè credet, qui probè perpendit, quàm levibus opus fuerit observationibus ad Typographiæ, papyri conficiendi, filorum tam sericorum quàm lineorum tendendorum, texendorumque &c. artes primò inveniendas. Quod si jam similia magno satis numero nobis quotidie obvia bene pensitemus, quòdque nec in ullo adhuc humanorum operum (quæ aliàs satis utilia esse faciliè concesserim) genere demonstratum sit, omnium optimum utilissimumque esse modum illum, quo jam quisque utitur, ne quidem circa agriculturam: & si insuper in memoriam revocemus, quàm præclara hoc seculo saltem detecta fuerint, ex hoc uno, quòd jam huic præjudicio non tantopere ab hominibus, ac præteritis temporibus, indultum amplius fuerit; adeò ut etiam in ipsâ Mathesi, quæ plurimis videbatur ad majorem eveli non posse perfectionem, hoc nostro seculo ea, quæ omnia omnium antecessorum inventa infinito superant intervallo, in lucem fuerint producta; hæc, inquam, omnia, si bene introspicere dignemur, haud ambigendum est, fore, ut adepturi simus habitum multa adhuc utilia, & valde singularia efficiendi, modò solam considerare veritatem, eamque, quantum humanitus fieri potest, excolere seu augere studuerimus, neutiquam verò tam falsis imaginationis nostræ persuasionebus fidem ulterius habuerimus.

Post-

Postquam itaque hoc etiam impedimentum planè su-  
peravimus, atque in eo jam sumus, ut in eruendâ veritate  
ad ullam utilitatem nuspiam respiciamus, ac licèt nulla pla-  
nè animadversa fuerit, non ideo minus progrediamur, no-  
vas novasque subinde veritates juxta genuinæ methodi præ-  
cepta continuò eliciendo; accidit denuo, ut reipsâ singu-  
larem, ut ita dicam, indispositionem ad hoc negotium in-  
nobis non rarò observemus. Non loquor hic de malâ di-  
spostione, quæ ex morbis oritur; hac enim de re, quia  
hoc nimis hic foret prolixum, cogitationes meas peculiari  
tractatu proferam: nec quoque de illâ, quæ ex malâ educa-  
tione originem trahit; nam eâ de re differendi occasio se  
in sequenti impedimento offeret: sed solum de eâ, quæ ef-  
ficat, quò minus quovis tempore æquè simus apti in verita-  
tis inquisitione.

Omnes fatentur, se experiri, horas quasdam aliis longè  
esse feliciores, & auroram Musis esse amicam. Quàm no-  
tabilis autem sit differentia talium in nobis dispositionum,  
is experientiâ addiscet, qui statim post cibum copiosè sum-  
ptum percipiendis mathematicis demonstrationibus se ap-  
plicuerit, resumptâ post somnum horis matutinis eâdem  
operâ. Imo sunt, qui, licèt multùm in genuinâ indagan-  
darum veritatum methodo fuerint exercitati, hoc tamen  
non obstante de magnâ quandoque difficultate, quæ ad præ-  
cepta ejus accuratè, ut decet, adimplenda occurrit, con-  
queruntur. Opportunum igitur huic rei remedium ut in-  
veniatur, istius indispositionis præprimis origo erit dispici-  
enda. Notandum itaque est,

Si effectus quidam producit, omnia ea, quæ ad ip-  
sum producendum requiruntur, necessariò debere esse  
præsentia: & si jam omnia ejusmodi requisita adiant, talem  
etiam ex iisdem effectum necessariò secuturum esse; si ve-  
rò tandem effectus hic non producat, necessum est, im-  
pedimenta quædam externa, seu quæ ad hunc effectum pro-  
ducen-

*Quartum  
impedimen-  
tum indispo-  
sicio, quæ  
in nobis in-  
terdum ex-  
perimur,  
dum non  
semper æquè  
apti sumus  
ad verita-  
tem inquisi-  
rendam.*

*Primò con-  
firmatio hu-  
jus rei per  
experienti-  
am.*

*Secundò ori-  
go ejus o-  
stenditur,*

*1. à priori.*



ducendum nullo modo requiruntur, necessariò id efficere. Omnia hæc lumine naturali nota sunt. Hisce itaque sic positis, si quis magnâ facilitate sibi novit acquirere veritatem, necesse est, eum singularia hujus methodi præcepta scire; si verò insuper demonstratione evinci potest, nihil in eâ methodo desiderari, eâdem semper facilitate in veritate acquirendâ perget. Quia autem nihilominus experimur contrarium, & idipsum etiam illi, qui genuinam sequitur methodum, nonnunquam evenit, colligendum sanè est, externa hîc aliqua impedimenta huic negotio contraria accedere, hoc est, nos impediri quibusdam impressionibus, quæ vel sensuum, vel phantasæ, vel passionum ope excitantur in nobis. Insignivi autem suprâ omnes hæc impressiones ab externis nobis ita advenientes nomine imaginationis; adeoque clarum est, solam imaginationem hujus impediementi causam esse. Hæc omnia jam multis confirmare exemplis non est opus, cum nulla dies transeat, quin unusquisque experiatur, hæc satis superque jam confirmata esse, qui ad se ipsum saltem attenderit.

2. à posteri-  
ori.

Ponamus quendam in se deprehendere aptitudinem, quam felicem nonnulli dicunt venam, aliquid expeditè conscribendi, superveniant autem negotia externa ipsum à conceptu rei conscribendæ avocantia, sumatque ille deinde ex. gr. prandium, quo sumpto redeat ad prosequendam suam scriptionem; nã ille observabit se jam vix, nec sine tædio, tres quidem expediturum esse lineas tanto tempore, quanto antea multò plures, multoque majori facilitate exaraverat.

3. Quid in-  
de concludendum sit.

Non itaque mirabimur, si etiam ii, qui optimâ circa hæc methodo instructi sunt, in veritatis juxta eam ipsam methodum eruendâ progressu difficultatem quandam experiuntur. Si quis enim optima hic sciat, tempore autem non convenienti (quo nimirum multa in ipsum externa agunt) se ad veritatis inquisitionem applicet, progressus quidem

dem ille aliquos facturum est, sed tamen non sine satis magno labore, nec sine singulari operâ atque potentiâ adhibita id peragât: & hinc potest fieri, ut idem studia bona prorsus relinquat. Nec mirabimur quoque, quòd, qui veritatis acquirendæ præcepta optimè norunt, aliquot mensium spatio majores, quàm alii per multos annos, eandem licèt methodum secuti, faciant progressus, quia nimirum se convenienti tempore ad ejusdem exercitium applicant, ad quod alii parum attendunt. Nec magis etiam mirabimur, quòd ii, qui omni planè methodo destituti, multum tamen meditari sunt, idque non nisi tum temporis, cum se optimè ad id dispositos persensere, nobis quidem, tam circa physica quàm circa alia objecta, permulta & lectu quandoque curiosa aperiant, sed quæ non nisi meræ analogiæ, seu vividæ admodum imaginationis humanæ perceptiones, sive fictiones sunt, ipsam interim rei, prout in se est, veritatem nullo modo explicantes. Videamus jam, quid consilii nobis circa hæc suppeditet intellectus.

Primò notandum est, talem statum, quo quasi æqualiter apti sumus ad omnia, & in quo, per consequens, veritas magnâ facilitate acquiritur, reverà, non obstantibus tot impressionibus externis, dari, nosque in talem quandoque statum nosmet ipsos posse redigere. Nam externa illa, quæ hic possunt adesse, potentiam nostram circa præsentia externa vel planè destruunt, ut mors, de quibus externis jam non loquimur; vel eam tantum diminuunt, ita ut ad actiones humanas simus inepti, veluti si somno, morbo, ebrietate, passione aliquâ vehementi &c. capiamur, quæ ipsa tamen quandoque non adsunt; vel tandem potentiam diminuunt hac solum ratione, ut ad actiones humanas apti quidem simus, sed non æquè facilè. Hoc ultimum autem provenit vel ab externis talibus, quæ in nostro corpore sunt, sed tamen abesse possent, totâ nostrâ naturâ salvâ & eadem permanente; vel à talibus, quæ in corpus nostrum

*Tertiò  
remedium.*

recipiuntur, & etiam ad ejus conservationem necessaria sunt, ut cibus & potus, sed à quibus tamen per multas horas, imò totos dies abstinere, aut, si nimium fuerit assumptum, jejunio mederi possumus; vel provenit ab externis, quatenus ea externè corpus nostrum circumstant, ut aër insalubris, frigidus, nimis calidus, aliis corporibus nimis repletus, aut agitatus &c. Sed isthæc nos non semper impediunt, aut etiam possunt corrigi. Cum itaque hæc omnium præcipua, quæ possunt concipi, externa sint, omnia autem illa impedimenta vel non semper adsint, vel si adsint, remedia tamen contra ea habeamus; patet aliquem statum, in quo quasi æquè apti ad omnia sumus, certè dari & in nostrâ quoque potestate esse nos eò quandoque redigere. Si itaque alicujus rei cognitionem ad eam executioni optimè dandam habuerimus, non poterit nobis deesse libertas illa omnia ad arbitrium faciliè exequendi. Suppono autem nos præcepta veritatis acquirendæ jam didicisse. Cum ergo eo in statu, quo æque apti ad omnia sumus, constituti simus, aut saltem potestatem quandoque habeamus, in eundem nos redigendi, ut modò ostendi, nihil sic impediet, quin tunc possimus magnà facilitate veritatem certò acquirere.

Secundò videamus, bona methodus quid valeat. Vix autem credi potest, quantum hîc ejusdem ope, licet indagandæ veritati sumus minùs idonei, possit effici. Dum enim hæc quasi norma est, secundùm quam progredimur, non inconstanter hinc inde vagando, sed certò, quid faciendum, quidve omittendum sit, addiscendo, hanc exactè, quantum possibile est, sequentes, si non statim, breviori tamen, quàm multi sibi persuaserint, tempore potentiam nobis acquiremus externa, quæ nobis adversantur, ad eò coercendi, ut magnà postmodum facilitate pergere possimus. Quod facilius adhuc exequemur, præcipue si semper orsi fuerimus ab iis, in quibus imaginatio, sed juxta intellectus operationes ad regulam ordinata, sola sufficit: quo in negotio, si ali-

aliquantulum pergamus, videbimus omnes alias externas impressiones ita pedetentim superari, ut brevi sensuri simus, nos eo in statu esse positos, quo liceat magnâ facilitate progredi. Sic, si quis ex. gr. in problemate quodam mathematico solvendo per solum intellectum difficulter possit procedere, brevi, modò Analyseos adhibeat calculum, hac ratione efficiet, ut in seipso facilem sentiat progressum. Sic quoque, si quis in meditando parum successus experitur, ut primum suas cogitationes occeperit in chartâ consignare, illico in statum veritatis cum facilitate acquirendæ magis idoneum sese rediget. Adde, bonam methodum reipsâ quoque ostendere normam omnia, quæ nobis in arte invenienda sunt contraria, impedimenta corrigendi, prout id ipsum in hac tertiâ sectione haud obscurè effectum do. Omnia igitur, quæ in quolibet tali impedimento recensentur, remedia ad hoc idem, id est, ad hoc quartum impedimentum tollendum potissimum faciunt, ut adeò majori facilitate veritatis indagandæ methodum in praxin deducere liceat.

Tertiò, si ipsam etiam hac in re experientiam, dirigente intellectu, consulamus, haud sanè peccaverimus. Hic

i. pauci, quia id nondum experti, credent, tantam diversitatem, quanta reverà hic est, observari: auctor ergo fuerim, ut aliquis in utroque statu, hoc est, tam præsentibus, quæ modò recensui, impedimentis, quàm absentibus, veritatis investigandæ methodo sese applicet. Suâ sponte hinc non solum, quàm incredibilis hic detur differentia, addiscet, sed etiam certam quandam, si hoc sæpe reiteret, in se animadvertet perceptionem, quam quoties impofterum iterum apud se observabit, toties internè admonebitur, se jam absque dubio eo in statu versari, in quo ad veritatem inquirendam perquam aptus est. Non est autem res parvi momenti, hoc sibi ita per experientiam acquisivisse. At memorare subit hic ea, quæ me ipsum praxis hac de re docuit. Expertus itaque sum felicem in studiis progressum,



1. Quoties modico pastus eram. 2. Quoties satis temporis à cibo sumpto effluxerat. 3. Horis nocturnis, quia tunc omnia ferè externa in silentio & quiete sunt. 4. Quoties horis matutinis ante solis ortum, ubi aër nondum calore adeò agitur, studiis incubui. 5. Hyemali tempore, quod ideo destinavi ratiociniis meis in ordinem redigendis, æstivum verò tempus faciendis præcipuè experientiis. 6. Quoties Scriptores, qui suas cogitationes bene concatenabant, ita, ut aliud ex alio facillè videretur fluere, legeram; quo ipso multas mihi jam videbar addiscere veritates, similemque simul in me ad varia inveniendi dispositionem experiebar. 7. Quoties mihi fuit occasio conversandi cum viris, qui similia sectabantur studia, cogitationesque meas, simul atque illis explicata erant, literis consignandi. 8. Quoties sentiebam me ad studia ineptum, ab iis etiam abstinui, quærens interim cum aliis conversandi occasionem: ubi verò sic per aliquantum temporis indulseram innoxiiis potius sensuum oblectamentis, quàm meditationibus, revertendo ad studia primo equidem die, quia permultæ adhuc rerum præteritarum imagines, haut omnimode ad eadem aptus fui, proptereaque tunc seriis studiis non incubui, nisi quod reviderem, quæ de similibus antehac annotaveram, atque hac ratione scientiæ acquirendæ ardore tum denuo quasi in me resuscitato, postero sic demum die & sequentibus optimos feci progressus. 9. Quoties matutinis horis eum in modum, qui hic sequitur, fui usus. E somno nempe per alios manè excitatus in eadem corporis positurà, in quâ, cum expergiscerer, situs eram, aliquantisper quietus permansi; quo ipso facillè multorum somniorum, quæ dormiens antea habueram, recordabar; cumque inter alia continuo cursu in illis præcipuè cogitationibus, quas memineram me habuisse, antequam expergiscerer, perseverarem, summa facilitate in iisdem progrediebar. 10. Simul ac persenti, solitam in corpore meo membrorum agilitatem aliquan-

quantum deficere, certamque eis ponderositatem inesse, quia id ex majori, quàm requirebatur ad corporis conservationem, materiæ copîa fieri suspicabar, superfluitates hæc, licèt alias satis valerem, sudore mox excernendas statui: quò ritè peracto, haud obscurè animadverti, me non solùm plus virium acquisivisse, sed etiam intereà cogitando multò majores in veritatis acquisitione progressus fecisse.

II. Quoties arrepto calamo meditationem scribendo juvarem, maximum studiorum successum fui expertus. 12. Sed omnium maximè mihi profuit, quòd ob multa, quæ hæcenus habebam, impedimenta non semper ex voto (id quod in eorum solatium, quibus accidit, simile adjicio) progredi potuerim. Cum enim hæc, ut à studiis abstinere, haudquaquam valuissent efficere, quò insigni illà delectatione, quam ex iis tractandis hauriebam, sæpius afficerer, cogebar iis necessario inter medios quandoque multorum tumultuantium strepitûs vacare, quo exercitio frequenter iterato non solùm habitum interdum admodum curiosa, non obstantibus externis impedimentis, inveniendi mihi comparavi; sed etiam postea, ubi quietior mihi concedebatur status, eò facilius citiusve ab omnibus externis & impertinentibus cogitationibus me liberare, (siquidem huic rei vel inrer strepitum jam assvetus eram) brevique magnos hac ratione facere progressus potui, non secus ac ii, qui historias ejusmodi, quæ post singulares, quos continent, casus latum & felicem fortiuntur exitum, legendi cupiditate magnâ feruntur, si in multorum præsentia consueverint ejusmodi historias legere, hoc sibi brevi acquirerent, ut adstantium strepitûs, quamlibet valde effusi sint, ipsorum cogitationes non magis, ac si soli essent, aut horum nihil fieret, possint turbare.

2. Postquam igitur quis internâ quâdam, quam sentit, dispositione certior fuit factus, se jam in eo esse statu, in quo sibi liceat studia magnâ facilitate tractare, tunc præcipuè

puè erit attendendum ad hanc dispositionem, quando vel major vel minor sit, aut quâ ratione ea circa superius dicta varietur, ut adeò ex iis optimam seligere queat. Equidem, quia omnia modò recensita in nostrâ plerumque sunt potestate, imò pleraque quotidie ferè possunt exerceri, observari, quò plura talia sic conjunguntur, eò majorem nobis meditandi facilitatem acquiri. Sic ex. gr. post multam cum aliis conversationem habui circa finem autumnî primùm valetudinis rationem, tunc revidi ea, quæ circa hyemale pensum aliàs eram meditatus, & dum singularem talia continuandi in me excitatam animadverti propensionem, singulis diebus pariori prandio usus à cœnâ planè abstinebam, & ejus loco aut cum amico similium studiorum perito confabulabar, aut libros talia continentes legebam. Deinde, multo mane, cum adhuc omnia essent quietâ, experrectus, ea, in quibus sentiebam imaginationem jam esse occupatam, meditando primùm persequer; sed ea tamen, si fortè ab his, quorum tum temporis tractationem susceperam, diversa erant, sensim reducebam ad præsentis meas lucubrationes, dumque in his magnam experiebar progrediendi facilitatem, seu multas novas advertebam cogitationes, id statim interea agebam, ut scribendo juxta genuinam acquirendæ omnis veritatis methodum meditationes continuarem: atque ita totâ hyeme perrexi. Quempiam hic miraturum esse, etiamsi dixerò, me tunc singularem deprehendisse facilitatem, vix mihi persuaserim, quia, quæ antea particulatim recensui, & quorum unumquodque seorsim meditationi promovendæ conducit, omnia ferè hac ratione conjunguntur. Nec magis quis mirabitur, si dicam, quòd hoc pacto per aliquot tempora continuando omnia mihi multò expeditius licuerit exequi; adeò ut mihi tantâ sæpe facilitate, tantâque copiâ optimæ fuerint suggestæ cogitationes, ut calamus ad omnia tam subito consignanda sufficienti celeritate destitueretur. Nec facilem saltem atque aptum ad verita-

rita-

ritatem indagandam me videbam, sed in eò quoque statu positum, quo tantà voluptate, quantam in vitâ unquam fuerim expertus, fruebatur animus, ita ut, qui oblectationem ejusmodi gustaverit, hanc procul dubio omnium naturalium dulcissimam ac suavissimam, quâ homo in hac vitâ viâ rationali frui possit, esse occupationem fateri cogatur. Juvat hac occasione curiosam hic proferre experientiam, quam crebrò tali in statu observavi: videbar nimirum mihi tunc nocturno tempore magnam scintillarum lucidissimarum perquam variè ubique se agitantium congeriem ternere, ad quas ut obtutum defixi, quo earum motum observarem, ultrò disparuerunt illæ; inter meditandum verò quasi neglectæ non tantum tam diu ferme, quam diu ipse meditandi labor, durarunt, sed insuper intensiorem quoque lucem ediderunt. Postmodum, cùm hæc aliquoties sic noctu expertus essem, etiam mihi interdum, postquam ad certum facilitatis in meditando gradum pervenissem, contigit, ut in albo pariete, aut albâ chartâ à latere positâ ejusmodi scintillas mirè inter se volitantes magnâ copiâ observarem. Unde, me quidem judice, apparet, quàm concitatus tunc sit spirituum animalium motus. Verum ut præsentī proposito faciam satis, notandum venit

3. Si jam internam illam ad studia feliciter tractanda dispositionem ab aliis nostris internis perceptionibus bene distinguere sciverimus, quod erat primum, atque deinde, juxta secundum, nos eò usque, ut eam reverâ in nobis dispositionem exoriri persentiscamus, actu præparaverimus, tum demum tempus tam pretiosum non nugis terendum, nec, ut frustra præterlabatur, permittendum, sed, quantum fieri potest, opera danda est, ut inprimis veritati juxta genuinam methodum acquirendæ torum consecratur. Non enim adeò diu illæ dispositiones durant. Tu ergo, si sapiis, iisdem, dum habes, utere, quantum vales, non certè te pœnitebit. Qui hæc non attendunt, sed multum studiis ob



magnam, quam in iis experiuntur, delectationem quovis indifferenter tempore se applicant, & ideo aliorum conversatione parum fruuntur, hi ad omnes alias actiones humanas stupidi quasi, vel saltem minus ad illas apti, quam qui planè studiis non incubuerunt, evadunt. Unde eruditi tales politioribus aliis hominibus, & inprimis Aulicis, utpote qui morum elegantia præ cæteris abundant, ac ideo secundum externas inprimis apparentias alios omnes judicare consueverunt, sæpe risui esse solent, quinimo hanc genuinam non injuria dixeris causam, quòd passim studia tam male audiant. His verò, qui studiis convenienti tempore, constantique semper & bonâ methodo vacant, contrarium prorsus hic accidit. Quo enim tempore certam in se non invenerint dispositionem, tunc nil ferè minus, quam studia, cogitant. Sed aptæ id potius impendunt conversationi, quo ipso se perquam idoneos reddunt ad quasvis actiones humanas; adeò ut viderim, eos aliis sæpe fuisse admirationi, propterea, quia videbantur suas actiones tantâ dirigere dexteritate, quas tamen aliàs parum exercuerant; & hi potius hic monendi sunt, quia experienciâ addicere, quam notabilis in utrovis statu detur differentia, quantoque cum tædio, si certa interna absit dispositio, omnia peragantur, ne ideo tunc penitus intermittant studia, neve expectent, donec talis dispositio ultrò oriatur; sed, siquidem hæc defuerit, arte, quam docui, ipsi efficiant, ut semper, & certò apud se excitetur.


*Quintum impedimentum: difficile est mentem, quantum requiritur, habere attentam, si cruentarum veritatum nimis fuerit longæ series.*

Cùm igitur jam nunc à nobis quasi dependeat, quævis ita ordinare, ut optimâ fruamur dispositione ad studia bona facile continuanda, & in iis felices progressus faciamus; aliud denuo exsurgit impedimentum: nimis nimirum esse operosum, mentem ad tam longas, quales interdum occurrunt, veritatum catenas absolvendas, attentam retinere. Rerum enim diversitas infinita, & sæpe valde est composita, unde veritatum quandoque via adeò longa est, ut perlongum

gum sæpe iter sit emetiendum, antequam ad ultimum, quod *Primò, res*  
 desideratur, pervenimus: hinc fit, licèt certò sciamus nos *hac experi-*  
 præstantissima detecturos esse, ut ninià tamen rei difficul- *entià con-*  
 tate deterriti sæpe prorsus ab incepto opere desistamus. *firmatur.*  
 Quò itaque impedimentum tam noxium, quantum fieri  
 potest, tollatur, operæ pretium est, ut genuinam ejus ori-  
 ginem investigemus.

Circa prioris impedimenti originem clarè fuit osten- *Secundò on-*  
 sum, intellectum aequali facilitate semper pergere, nisi sal- *rigo aperi-*  
 tem res externæ impedirent eum, operationes suas exerce- *tur.*  
 re, utut longum iter ita emetiendum venerit; quia tota  
 difficultas est à rebus externis; quibus remotis effecta è suis *i. à priori.*  
 causis æquali necessitate ac facilitate sequuntur: adeoque  
 quòd quædam nobis sint difficilia, id totum ab imaginatione  
 provenit. Difficultas verò, quæ hic occurrit, vel reve-  
 ra talis est, ubi veritatis iter admodum longum est, vel se-  
 cundum apparentiam saltem; quod posterius è sequenti  
 causâ originem traxisse videtur. Quia nempe ab ineunte  
 ætate ad nulla alia, quàm quæ fuerunt facilè imaginabilia,  
 nos convertimus; quæ verò non sunt talia, aut saltem ta-  
 lia non esse primo intuitu apparent, statim averfati sumus;  
 hinc tanta in nobis adhuc dum est averfatio ab omnibus,  
 quæ talia videntur. Sic permulta dantur, quorum notitia  
 perfacilè acquiri posset, prout sunt quævis opera mechanica;  
 quia verò horum quædam ob multarum partium composi-  
 tionem primo adspectu difficilia imaginatu videntur, ideo  
 ad illa parum respicimus. Unde multi horologia in mar-  
 supio multos per annos circumferunt, qui tamen ignorant,  
 quâ ratione moveantur. Factum porro est propter tantam  
 rerum varietatem & delectationem, quam haurimus ex ea-  
 rum cognitione, ut etiam plurima, quæ apparebant diffici-  
 lia, fuerimus imaginati; sed quia ea sæpe imaginando ma-  
 gis nobis familiaria reddidimus, ideo hoc ipso imaginatio-  
 nem nostram quadantenus magis extendimus, ut, ubi talia  
 Ff 2 occur-

occurrunt, hæc exercitatis facilia videantur, quæ aliis difficilia: sed quando talia imposterum occurrunt, quæ illam extensionem superare videntur, quandam denuo aversionem in nobis excitent. Sic videmus illos, qui prolixas calculationes sæpe exercuerunt, tam in computo communi, quàm analyfi, minores non multum timere, quas tamen antehac difficillimas judicassent, nec facile tentare sustinuisſent. Si quid verò eos jufferis ad calculum revocare, quod multò majorem imaginationis extensionem requirit, quàm ea omnia, quæ antè imaginari assueverant, deponunt hic statim animum, & è contrario, alios talia tam expeditè posse exequi, mirantur, eò quod autumant, hos extraordinarià aliquà vià imaginationem suam posse extendere. Tandem, licèt inprimis curiosi naturæ scrutatores imaginationem sic longè extenderint, pro majori suà externorum ob delectationem, quam adferunt, speculatione: quia tamen eo ipso etiam entia ab imaginatione mirum in modum multiplicantur, dum hæc nimirum multa, quæ ejusdem prorsus naturæ sunt, veluti diversa nobis repræsentat; (prout circa originem primi impedimenti aperui) ideo qui ad hæc multum respiciunt, à similium speculatione planè abſtinent, utpote qui cognitionem tantâ rerum varietate, quæ vires nostras viderur longè excedere, refertamputant. Id quod itidem exemplis illustrabo. Sit in *fig. 57* KGE Hyperbola, cujus axis AF & asymptoti AH, AI, angulo recto ad A conjuncti. Si igitur cuiquam in mathematicis haud multum versato



dicerem,

2. à posteri-  
ori.

dicerem, dari curvam, cujus hæc natura sit, ut rectangulum quodcunque ADCB semper æquetur quadrato AMGL; & rursus dari curvam, cujus natura talis, ut rectangulum, quod ex duplâ AG unâ cum GF in GF sit semper æquale quadrato perpendicularis FE; hic certè, cum hæc naturæ inter se videantur esse admodum diversæ, crederet dictas curvas etiam diversas esse, cum tamen eadem hyperbola K&E hanc utramque habeat proprietatem. Quod autem sic ab aliquo rerum mathematicarum non valde perito committitur, id in hac scientiâ peritissimis quotidie accidit, ut scilicet easdem prorsus superiorum generum curvas pro diver-

Fig 58.




Fig 59.





Fig 60.



sissimis habeant. Ita dantur curvæ ABC & DEF in *fig. 58 & 59*, quarum una ad B formam quasi cordis representat, altera verò ad E quasi acuminata existit, quæ ideo naturâ admodum diversæ videntur, cum tamen unam eandemque constituent curvam *figura 60* per literas AC EDCB representatam. Hæc & similia non mirabitur, cui aliquo modo perspectum, ductum regularem perquam variè inflexum & reflexum in se redeuntem, in chartâ aliquâ ferè non posse exprimi, cui non respondeat curva aliqua geometrica. Accidit autem ob tot diversissimas in curvâ proprietates, ut magna hic curvarum diversitas fingatur, ubi tamen non nisi unica existit, è cujus unicæ proinde definitione infinita talia diversa facillè sic concluduntur, prout ea nempe ad alias ac alias rectas semper refertur.



Circa entia quoque physica ope Chymix producta ejusmodi occurrunt exempla quàm plurima, cum hic ex quolibet metallo, minerali &c. varia talia præparentur, quæ diversissima videntur esse, & quæ nihilominus non tantum differunt, quantum apparet, cum sæpe ad prima sua corpora reduci faciliè possint. Verùm circa ipsa naturalia, prout ea præter hominis directionem natura producit, talia infinita se offerunt. Ita eadem animalia non solum ut homines diversæ nationis, sed multò etiam magis inter se differunt, prout vel in sylvis, vel penes homines, vel in diversis terris, aquis &c. vel intra vel extra aquam enutrita sunt. Sic dantur in nostris aquis ejusdem naturæ pisces cum marinis, nisi quòd magnitudine differant. Hinc est, quòd multa vulgò animalia diversissima esse credantur, quæ tamen ejusdem naturæ sunt, seu quæ eandem prorsus initio generationem habuere. Nec aliter quoque circa vegetabilia, mineralia &c. hujus rei plurima eaque singularia exempla possem recensere, ubi communiter magnam comminiscuntur diversitatem, quia nos certo quodam respectu diversimodè afficiunt. Sed hæc omnia aptiori loco reservantur.

3. quæ consequentia  
hinc formanda.

Qui verò hæc & similia non probè perspexerit, nã ille immentias sibi fingeret difficultates. Ex quibus omnibus patet infinita dari, quæ difficillima judicamus, & quæ talia tamen nullo modo sunt. Nec mirum proinde, si egregia etiam ingenia, satisque valida ad incredibilia in veritatis detectione præstanda ad talia se nullo modo accingunt; nesciunt enim, quantum hic suæ vires reverà valeant, quinimò infatigabilis imaginationis suæ persuasionem acquiescunt, cum tamen certum sit, quòd etiam omnes illi, qui egregium quid publico exhibuerunt, si eo tempore, quo ne quidem de hisce adhuc cogitabant, ipsis fuisset prædictum, se aliquando talia tradituros esse, id pro impossibili absque dubio duxissent. Ut ergò tam noxiam, quàm omnes videntur esse obcecari, persuasionem ad pauca tentanda è medio, quantum fieri

fieri poterit, tollamus, audiendum est, quid sana ratio hic nobis dictare videatur. Petemus autem pro more nostro hucusque solito vel à solo inprimis intellectu; vel à bonà methodo, quæ intellectus & imaginationis vires conjungit; vel tandem à rebus purè externis, quæ solam imaginationem pro origine agnoscunt. Notandum itaque

*Primò*, si quidem difficultas reverà sit realis, nihil nobis melius erit, quàm disquisitionem, quæ præ manibus est, in partes certas dividere, certumque cuique parti tempus destinare, atque tum huic rei destinato tempore unicè incumbere. Sic enim æquali facilitate & semper pergemus, utut iter veritatis fuerit longum. Si verò difficultas ab imaginatione tantum ut talis fingatur, notandum est, deceptionis nostræ causam esse, ut modo indicavi,

*Tertiò  
remedium.*

1. Quòd omnia, quæ imaginamur, ut composita seu conjuncta spectemus, ideoque eorum tunc difficulter imaginari liceat causas: si verò omnia (ex. gr. in machinà artificiosà) in partes resolverentur, partiumque istarum sigillatim natura examinaretur, machinæ hujus, licet valde compositæ, motum, qui ex ejus dispositione sequitur, intelligere non adeò foret difficile. Et quia omnia, quæ intelligere avemus, sic resolvi & debent & possunt, ideo ea, quæ nobis adeò difficilia videntur, non sunt nisi imaginationis fragmenta, eaque si juxta intellectus præcepta dirigantur, sunt in se ut plurimum faciliora, quàm unquam ab aliis possit credi. Ita si cuipiam veniret in mentem characteres determinare, qui complectendis omnium hominum cogitationibus, quæ sunt, fuerunt, aut futuræ sunt, inservirent, nemo non judicaret rem fore difficillimam, cum tamen id quatuor & viginti aut paucioribus notis fiat. Eàdem ratione, septem notulis omnium hominum cantilenæ comprehenduntur. Nec alià prorsus ratione omnium rerum principia perpauca sunt, imò tam simplicia intellectu, ut absolute repugnet simpliciora dari, veluti in secundo impedimento  
clare

clare ostendi; ut proinde nihil magis sit necessarium, quàm omnia, imprimis in physicis, à priori deducere. Etenim si hinc ordiamur, ea, quæ imaginationi difficillima sunt, & valde admiranda, intellectui perquam facilia evadent. Et hic genuina apparet ratio, cur problematum resolutio in-exercitatis adeò difficilis esse videatur, licèt optima, quæ hic reverà dari possit, methodus ipsis fuerit exhibita: quia nimirum, ut suprà explicui, primùm desideratur, ut omnia, quæ sic in quâlibet conjunctione occurrunt, ad numerum revocemus. Hoc autem non est leve postulatum, partim quia imaginatio econtrario sibi ea semper ut conjuncta repræsentavit, partim quia non omnia, quæ sic conjunguntur, sese imaginationi sistunt. Sed hoc nondum est præcipuum. Secundò enim desideratur, ut harum rerum, quæ ita inter se conjunguntur, unaquæque seorsim & diu expendatur, quasi nullo modo juncta reliquis esset, ut appareat, quis hic seorsim effectus sequatur; hoc verò multò adhuc difficilior est postulatum, quod difficillimum esse inexercitatus saepe reipsâ comperiet, quia contraria imaginationis constitutio nimium quantum hic prævalet: omnia liquidem, quæ hic seorsim spectari debent, ab infantiâ usque semper ut conjuncta aspeximus, quia hunc illumve effectum producere non nisi juncta possunt. Quà de causâ suprà varia hujus rei in problematum resolutione dedi exempla, quæ ideo non leviter transcurrenda, sed seriò & diu meditanda sunt: non enim solis præceptis, sed multo potissimum exercitio, ista imaginationis constitutio corrigitur. Nam hoc mihi firmiter quisque credat velim, quòd si quis in problematibus resolvendis quaslibet res, seu causas in similibus conjunctionibus occurrentes, & separatim diversa effecta producentes, bene, diu, multumque, imò plus quàm necessarium esse videtur, seorsim perpendere non fuerit gravatus, ausim promittere, eum hoc exercitio contrariam imaginationis constitutionem, quæ non nisi conjuncta omnia spe-

ctari

ctari vult, brevi adedò correcturum, ut hæc deinceps facillima (quia eadem ubique methodus, & proinde eadem sapissimè actio repetitur) evadant, & hanc clavem esse ad quævis mysteria seu incognita recludenda omnium præcipuam. Quæ omnia ideo bene hîc erunt notanda: pauci quippe sciunt, quæ in quâvis re sint præcipua, ad quæ ante omnia attendere debemus, siquidem nostri perfectionem optimè stabilire velimus; qui verò id sciunt, non æquè apertè & candidè cuilibet hoc insinuant.

2. Imaginatio unicâ, ut sic dicam, imagine, eodemque tempore res omnes vult complecti; id quod impossibile est, unde nova difficultas oritur, quæ, si intellectus sequamur præcepta, cessat. Etenim si cuncta in certas diviserimus partes, nec citiùs ultra progressi fuerimus, nisi postquam acquisitam nobis notitiam bene familiarem reddiderimus; imaginationis comprehensionem adedò extendemus ut, quod nobis difficillimum videbatur, facilè hac ratione assequamur.

3. Tandem quoque imaginatio entia nimium quantum multiplicando difficultates admodum auget; ast ubi rerum externarum naturas ope Anatomix aliussve methodi omnia in suas resolvendo partes circa entia imaginabilia, scrutati fuerimus; aut genuinas rerum origines juxta veræ Physices leges inquisiverimus; aut etiam circa entia mathematica, quàm facilè permulta ad pauca possint reduci, consideraverimus, prout horum quædam suprà aperui, reipsâ tunc objecta multò, quàm unquam credidimus, pauciora esse experiemur. Quæ omnia multùm perpenſa contrarias illas imaginationis persuasiones nostris è mentibus sensim atque sensim delebunt.

*Secundò* genuina methodus hîc nobis egregiam præstat operam. Hæc enim omnia in sua primâ principia resolvere docet; adedò ut reipsa, quàm pauca sint omnis humanæ scientiæ fundamenta, convincamur: Omnia porro ejusdem ope per diversas generationes ita à se invicem di-



stingvuntur, ut nullatenus pro diversis sumamus, quæ ejusdem naturæ dentur. Et licet in mathematicis quædam ejusdem naturæ dentur, quæ tamen diversas habent generationes, hæc etiam sua habent remedia; prout singulare suo loco indicabo remedium, ubi genuinam locorum doctrinam, à nemine adhuc, ut decet, explicatam, declarabo. Denique ordine à simplicioribus ad magis composita, à generalioribus ad specialiora progrediendo obtinetur, ut incredibiles, quas comminiscimur, difficultates, ita magna facilitate liceat solvere. Ut taceam, hanc methodum, omnia auferendo impedimenta (id quod fieri posse tertia hæc Sectio luculenter ostendit) efficere, ut quæ aliàs difficilia videntur, nobis contrà non possint non facillima evadere. Ea ipsa enim est genuina memoriæ ars: quandoquidem id præstat, ut unicâ definitione, unove theoremate alia, quæ hinc sequuntur, infinita simul retinere queamus: atque sic omnia, quæ in detegendâ incognitarum rerum veritate utilia sunt, nobis faciliè suggerit, si accuratè ejus præcepta sequamur. Unde haud mirum, si ab uno sæpe viro talia ejus opè edantur specimina, qualia à multis retro seculis huc usque præstantissima ingenia producere non valuerunt.

*Tertiò*, nihil hic, meo judicio, præstantius est, quàm imaginationem per externa, juxta genuinæ methodi normam tam latè, quàm humanitus fieri potest, extendere, adeò ut haud faciliè aliquid occurrere possit, quod nobis difficile videatur, seu, quod persuasionem excitet, nos debitâ operâ adhibitâ certò id non posse attingere. Quod autem alii aliis multò extensiozem habeant imaginationem, is cognoscet, qui multùm cum aliis fuerit versatus, multas viderit nationes, varias didicerit linguas, plurima legerit, & similia. Hic enim int aliis, quibus talia nondum sunt perspecta, observabit, quàm arcto circulo eorum imaginatio, si cum suâ fuerit collata, terminetur. Quia autem cum infinitis impressionibus erroneis ejusmodi extensio, uti com-  
muni-

munitur accidit, conjuncta est, nec alia quædam, quibus hæc emendari suo tempore queant, simul imprimuntur, hæcque ideo tam altas agere radices possunt, ut non nisi magnâ difficultate extirpentur; per externa, intellectu extensionem talem dirigente, res optimè in sequentem modum institui poterit. Et quidem

1. Nihil ad hoc præstantius est excogitatum, quàm scriptura, quâ omnes nostræ cogitationes perfacilè in chartâ consignantur, ut illarum obliti relegendo facili negotio eas in memoriam revocare possimus; cujus quantus sit usus, præsertim in re præsentî, facilius observatur, quàm dicitur. Hoc reipsâ experiemur, si hunc, aut similem in modum, processerimus. Quia rarò ob tot hujus vitæ impedimenta est possibile, ut semper sat temporis habeamus rem quandam accuratâ, ut decet, methodo tractandi; utilissimum, quod hic facere possumus, est, ut, si bonæ nobis cogitationes suggerantur, (id quod non rarò præter spem in mediâ cum aliis conversatione, dum ne quidem de veritatîs acquisitione cogitamus, accidit) singulis eas diebus, eoque, quo in eas incidimus, ordine conscribamus. Hoc ego dum feci, observavi, me sic brevi tempore sat multas observationes, quæ mihi fundamento fuerunt ad multa ex iis utilia derivanda, sic congestisse, quæ aliàs memoriâ dubio procul excidissent; quin non potui postea relegendo recordari, me quorundam, quæ consignaveram, cogitationes unquam habuisse. Porro, si jam commoditas studia, prosequendi aliquo modo faverit, tum ea, quæ sic in scriptis, eò quòd nobis placuerint, consignavimus, revisa tempore opportuno haud difficulter ad quædam eorum continuanda quandam in nobis excitabunt dispositionem. Quamprimum itaque sentire occæperimus, nos posse faciliè meditando progredi, statim nos accingamus ad omnia conscribenda, quæ sic juxta genuinæ methodi leges, quantum à nobis tum fieri potest, meditamur: atque tunc quidem per-

multum materiæ scribendi nobis suppeditabitur. Absoluto autem penso isto, totâque hac meditatione nitidè conscripta, insequenti die, continuando in eâdem materiâ, de-nuo incipiamus: sic sensim in illâ progrediemur, magnâque facilitate se nobis quamplurima offerent; id quod aliàs solâ meditatione non fieret, quia sic eadem sæpe repetita, imaginationi fructuosè objiciuntur. Et hæc eodem tenore rantisper continuanda sunt, donec integram disquisitionem ad finem perduxerimus. Tandem, si alio atque alio tempore eandem meditationem mente volvamus, & verò uno tempore semper alia ac diversa circa eandem sese offerant, quàm alio; optimum certè erit, tales jam tum antea bene tractatas disquisitiones convenienti quodam tempore (juxta dicta in remedio quarti impedimenti) resumere, & quasi de novo per partes eâdem, quâ dixi, ratione retractare: tunc enim id, quod aliàs nimis foret difficile, ut scilicet ad cuncta, quæ in re quâdam consideranda veniunt, & quando ea omnia requiruntur, simul attendamus, hoc ipso remedio hîc expedire faciliè licebit; atque ita paulatim & semper, ac maximo successû promovebimur. Nec mirum: facillimè enim datur vel altissimam conscendere turrim, si gradatim procedamus, ac vires ex continuo ascensu deperditas aliquantulum quiescendo recuperemus. Quantopere hac ratione procedendo imaginatio extendatur, vix est credibile; adeò ut viderim, quorum prima meditata vice primâ conscripta vix folium replebant, tamque pauca erant, ut ad alicujus tractatûs præfationem formandam nondum suffecissent: quibus tamen, cum plus vice simplici scribendo illa tractassent ac retractassent, materia adeò sub manibus crevit, ut satis superque ad formandos integros tractatûs utilissimis meditationibus refertos esset. Præstabit autem hæc & similia multò facilius ii, qui nôrint, quæ dicenda sunt in sequenti secundâ annotatione; omnium verò optimè, qui quæ in tertiâ insuper addenda veniunt, ipsâ praxi fuerint adepti.

2. Id quoque plurimum prodest, si quis studeat suam imaginatōnem per aliorum cognitionem, quantum possibile est, extendere: egregia enim cognitio ab antecessoribus jam acquisita est. Hic itaque ea omnia, quæ intellectus suadet, primum acquirenda sunt. Dum enim præstantissima antecessorum inventa habemus, difficillima quæque multò facilius possumus superare, quàm veteres, qui similia præstare non sine magno & labore & tempore potuissent, destituti eorum, quæ nostri callent, scientiâ: uti sunt tot utilissimorum librorum impressio; notitia tam telluris, quàm universi particularior; Anatomia jam illustrissimis inventis aucta; Chymia à multâ obscuritate liberata; Astronomia ad magnam facilitatem redacta, non solum quoad Theoriam, sed etiam quoad praxin, in quâ observationes paucis fiunt instrumentis tam accuratæ, ut veterum observationes, etiam in iis, in quibus vel accuratissimæ videbantur, ad modernas comparatæ, satis rudes sint habendæ. Idem de singulis ferè scientiis narrare possem. Nec adeò multa hic erunt addiscenda, quàm forsitan videbitur, si ubique ea demas, quæ ad meram ostentationem inserviunt, quæ aliorum, non nostri, causâ discere cogimur. Porro tot quoque præsentī hoc nostro seculo bonorum studiorum cultores existunt, quot ullo antecedentium: annus vix elabitur, quin videas variis in locis singularia publicè exhiberi, quæ nostris iterum studiis apprimè inservire possint. Tandem etiam coadjutores pecuniâ acquirere haud difficile est, qui nobis pro arbitrio nostro auxilio esse queunt ad varia mechanica perficienda, ad nos in calculis analyseos nimis prolixis sublevandos, ad difficiles experientias instituendas &c. ut adeò, quæ exequi nobis solis impossibile esset, assequi auxiliis hisce facillimè detur.

Denique 3. imaginatio per externa omnium maximè juxta intellectus operationes extendetur, si integra nostra educatio, eo prælucente, formetur. Ut itaque ipsâ educatio-



ne imaginatio quàm latissimè extendatur, eò omnia sunt dirigenda, ut homines ad quævis humana negotia æquè evadant idonei, hoc est, ut nihil ipsis videatur difficile. Hoc ut assequamur, notandum est, præcipuas hominibus occurrentes difficultates ad tria reduci genera: quorum primum est, quòd animadvertant difficultatem cum aliis convenienter conversandi, & ea, quæ inconvenientia sunt, declinandi: tum, quæ vera aut falsa sint, bene dignoscendi, unumque ab altero secernendi: denique ea, quæ bona malave apparent, ab iis, quæ reverà talia fuerint, ita distingvendi, ut bona, quicquid passiones svadeant in contrarium, sectari, mala verò evitare sciant. Si igitur constitutum fuerit, eos, quos educare animus est, ad eum habilitatis seu dexteritatis gradum evehere, ut nihil sit, quod ipsis difficile videatur, hæ tres sequentes præcipuè notiones eorum imaginationi à primis statim annis, quoad ejus fieri potest, familiares reddendæ erunt; nimirum notiones decori & indecori, quid scilicet in humanà cum aliis conversatione conveniat, quidve disconveniat, deinde veri & falsi notiones, & demum notiones boni & mali.

Primum autem addiscitur per solam inprimis imaginationem, dum nullam patimur elabi occasionem crebrò cum variis hominibus conversandi, cum constitutis in vario dignitatis gradu consuetudinem habendi, ac varias denique nationes frequentandi. Horum omnium ratio est in confesso. Licèt enim quis optimo præditus fuerit intellectu, quo verum à falso, bonum à malo exactè dignoscat, non poterit tamen, quin se risui sæpè exponat, (id quod eruditis sæpè viris accidit, qui plurimum temporis studiis impendunt, interim verò parum conversationi tribuunt) nisi regionis, in quâ sibi est vivendum, mores bene fuerint perspecti, qui quidem non tam præceptis, quàm solo potiùs addiscuntur usu: quia pervaria hîc occurrunt, quæ, dum certis ea definire legibus foret prolixum, solo interea usu propter

pter continuam eorundem repetitionem adeò evadunt facilia, ut, postquam satis diu nobis cum aliis fuerit consuetudo, perfectè ea sæpe etiam præter attentionem exequamur. Hoc itidem iis non est ignotum, qui politis aulicorum moribus studuerunt; hi siquidem post diuturnam ab aulâ absentiam eò reverfi satis animadvertunt, quàm inconsuetâ ipsis plurima, priusquam iis denuo assuescant, videantur. Inò videmus quoque, eos, quibus ob negotia, aliasve causas aliquamdiu à multâ conversatione separatim vivere contigit, si ipsis postea res in magnâ politorum virorum frequentiâ extemplo fuerit gerenda, aliquam initio difficultatem sentire. Hinc patet, quantum ii errent, qui credunt, se hæc ex solis libris posse haurire; patet quoque, quàm malè agant, qui, dum intersunt celebritati virorum politoribus excultorum moribus, & deprehendunt, se ab aliis hæc in re multum discrepare, si statim imitari eos conentur; non considerantes, omnes actiones nobis saltem placere, quæ quàm maximè naturales esse videntur, cum scilicet omnia liberè agimus, non aliter ac si in loco quodam ab omni hominum commercio remoto versaremur, non attendentes, an alii nostras actiones observent nec ne; e contra verò nihil magis displicere, quàm actiones affectatas, quales sunt, si jam dictis contraria peragimus, ac multa ad imitandos alios ab aliis mutuamur. At regerent alii: quâ ergo ratione similia nobis acquiremus, si politoribus ornatos moribus imitari non liceat? His autem denuo inculco, eos nullo modo esse imitandos; quinimo, si cum iis fuerit occasio conversandi, omnia potius naturaliter, seu modo sibi ipsis ingenito, esse peragenda. Sed quærenda tamen est (in eo enim solo consistit totum artificium) cum elegantia morum politis continua quasi conversatio, quâ fiet, ut elapso quodam temporis spatio, eorum mores nobis etiam haud advertentibus ac ne cogitantibus quidem absolutè acquisitos esse simus experturi. Vulgò enim & optimè dicitur: mores

res sumuntur à conversantibus. Quod autem suprâ addidi, ad notiones convenientiæ aut disconvenientiæ sibi bene imprimendas magnopere quoque necessarium esse, ut quis consuetudinem habeat cum hominibus in vario dignitatis gradu constitutis; id haud abs re adjunxi. Videmus enim aulicos, omnesque morum civitate insignes cum rudioribus non nisi cum difficultate versari, & hos vicissim multò ægrius cum illis; cum tamen frequenter & pacis & belli tempore utilissimum pariter ac necessarium inter eos intercedat commercium. Quisquis itaque ad quævis negotia, dextrè suscipienda se æquè aptum reddere voluerit, id facillimè effectum dabit, si multam cum variis summæ, imæ, & mediæ dignitatis hominibus confabulandi seu conversandi occasionem habuerit. Quod insuper dixi, has quoque notiones frequenti cum variis nationibus familiaritatis usu posse acquiri, id adeò per experientiam clarum est, ut notabile admodum inter hunc, qui multarum mores regionum, vidit & urbes, & inter illum, qui vix sustinuit patriæ limites transgredi, sit discrimen. Imò etiam, si tibi aliquid negotii fuerit cum quodam externis quidem moribus ab ineunte ætate admodum exculto, nuspian tamen patriam egresso; miraberis, quàm ridicula ejus sæpe sint de externis nationibus judicia, & quàm multa in oblati certis congressibus eidem desint, quamvis in certis aliis negotiis se perquam convenienter gerere sciverit: cujus rei causa etiam clara est. Nam cogimur inter peregrinandum omnia hæc tria suprâ recensita ad has notiones bene imprimendas requisita conjungere, dum nempe quasi in continuâ versamur occasione variæ conversationi litandi, cum iis, qui sunt in diverso dignitatis gradu, negotium habendi, atque ita varios populos lustrandi: non itaque mirum est, si effectus, qui inde resultat, præ illo sit multò visibilior; adeò ut viderim, qui, licèt alia omnia, quæ in peregrinatione præcipuè sunt discenda, penitus neglexerint, magnopere tamen mutati redierint ab eo

eo qualitatum statu, in quo erant, quando è patriâ discederent. Ne quis autem inutile putet, hæc omnia, de quibus modò fui locutus, sibi comparasse: observet velim, me equidem concedere, internas qualitates externis semper esse præferendas, & ideo illa potiùs sectanda, quæ has formant, sed eò tamen meliùs utique esse, si utræque adfuerint. Adde, cum penè omnes, & præsertim politioribus exculti moribus, alios ex externâ tantùm apparentiâ judicent, me sæpe experienciâ vidisse, id ipsum aliis, qui externis ejusmodi qualitibus non erant dotati, impedimento fuisse, quin admitterentur ad negotia, in quibus tamen ob interna, quæ possidebant, tam præclara bona & sibi & aliis valde prodesse potuissent. E contrario alios, quibus nihil, quod extrinsecus desiderare possis, deerat, quique interim internis ad singulares humano generi usûs præstandos necessariis qualitibus planè carebant, admissos vidi. Cum igitur talem, ut dixi, mundo in eligendis ad res gerendas subjectis habilibus animum esse sciamus, necesse erit homini ad perfectionem omnimodam (hoc est, ad id, ut æquali animi libertate seu facilitate quævis peragere possit) anhelanti ea non omittere, quæ si non præcipua, summæ tamen eo ipso sunt utilitatis, eò quòd efficiant, ut ab aliis, qui potestatem habent quamplurima efficiendi, libenter recipiatur, atque ita his quasi literis commendatitiis bonæ ejus qualitates, quæ magis reales sunt, multorum sæpe cum utilitate aliis innotescere possint.

Secundò, quod ad veri & falsi notiones attinet, hæc imprimis per solum intellectum addiscuntur, & autor aliis fuerim, ut aliquem habeant, qui sibi bene acquisivit genuinam methodum indagandi quicquid est occulti, quique ipsis hic subveniat, imprimendo imaginationi à teneris, quod dicunt, unguiculis, quæ inservire possint ad hanc methodum suo tempore faciliùs capiendam, & semper, quæ noxia hic esse queunt, quandocunque occasio fert, vel corri-



gendo, vel removendo, (prout his similia in hac tertiâ Sectione exhibeo) usque quò imaginatio sic sensim ad leges intellectûs, quantum fuerit possibile, reducatur. Hic enim ultimus & maximus est perfectionis gradus, ad quem pertingere datum; adeò ut, licet vixeris in statu non tam quieto, nihilominus tamen in veritate per te ipsum acquirendâ insignes semper progressus facere facilè valeas.

Quia verò de his per totum hunc tractatum multa exposui, supervacaneum esse existimò plura hoc loco de re eâdem repetere: interim referam hic ea tantum, de quibus alibi tacui, & quæ huic inprimis loco destinavi explicanda, ut adeò, quæ modò nimis generaliter fuere insinuada, quodammodo evadant specialiora. Ut itaque quispiam brevi magnos circa has notiones faciat progressus, planè persuasus sum & ratione & experientiâ, id in his paucis consistere.

Primò, si quis fuerit docendus ea, quæ non nisi crebro disci exercitio possunt, erit quidem operæ pretium, ut ea à discente sæpius repetantur: sed id inprimis hoc in negotio est palmarium, ut dispiciatur etiam, non quàm sæpe, sed quàm bene repetat. Quod ut fiat, necessarium erit, ut repetitio illa non instituatur à discente, nisi præsentem & observantem magistro, qui circa hanc id maximè curet, quò discipulus exercitium peragat summâ, quâ potest, accuratione & diligentia: simul ac verò senserit, discitem à debitâ illâ accuratione aliquantulum remittere, satius erit omnino ab opere cessare, & ad alia se conferre, quàm inutili, imò nocituro labore tam docentem, quàm discitem fatigare.

Patet hujus regulæ veritas. Nam si quis ex. gr. ornatos & artificiosos literarum ductûs necdum edoctus, arrepto calamo non nisi inertem & indecoram exaret scripturam, se frustra multum scribendo fatigabit, nec ideo concinnior formabit scripturam, quin imò poterit fieri, veluti sæpe vidi, ut deteriore scribere incipiat scripturam: est ergo

go in propatulo, frequentem repetitionem, nisi simul cum alacritate & secundum præscriptum hæc fiat, non sufficere. Ubi verò quis, quandocunque aliquid scribit, id, quantum potest fieri, dexterrimè efficere, hoc est, literas secundum receptas peritorum scribarum regulas modo, quo potest, exactissimo formare alacriter studuerit, dubio procul magis magisque in scribendi ratione proficiet. Pariter, qui se multum saltando exercet, non propterea saltandi artem perfectius discet, quin potius, absente magistro exercitatione perperam institutâ, ineptos sibi contrahet habitus, qui postea difficulter corriguntur. Quântæ autem utilitatis sit hæc regula, quantoque & temporis & laboris compendio, moderante docto magistro, sic perficiamur, nullus credet, nisi qui differentiam hac in re satis visibilem ipsâ praxi perceperit. Vidi equidem, qui scribendi artem dexterrimè callens alium quempiam, qui minus pulchro utebatur characterè, hac ratione informabat, ut, præsentè se, literas juxta præscriptum suum juberet formare; simulac verò videbat, discentem non amplius tantâ, ac initio, alacritate scribere, absque morâ præcipiebat, ut calamum deponeret, quem duabus aut tribus horis elapsis (quas ad alia interea tractanda destinabat) resumere scribendique exercitium iisdem legibus continuare, se præcipuè præsentè, monente, scripturamque sedulò observante, &c. mandabat; & hoc singulis diebus quater repetebat, quo factum est, ut breviori, quàm credi unquam possit, temporis spatio discipulus tam nitidè scribendi habitum sibi acquisiverit, ut, qui paulò ante ejus scripturam viderant, hoc ignorantes artificium, rei admirabilitate commoti, propriis oculis, discipulo coram scribente, fidem habere vix sustinerent.

Secundò necessè erit, ut discenti non quidem nisi utilia, interim tamen non statim à principio optima illorum, quæ detecta fuère circa scientias, tradamus, quanquam interim, illa optima non esse omnium, quæ habentur, studio

distinuemus. Primum autem simplicissima docenda sunt, & his impressis, meliora, atque ita gradatim eo ordine, quo semper singularia in scientiis augmenta de novo fuere inventa.

Manifestabo rationem ac utilitatem hujus regulæ exemplis. Consultissimum certè erit, si animus est aliquem docere Mathesin, primò ei praxes ordinarias ostendere, quas judicaverimus reliquis utiliores, circa omnes Mathematicas disciplinas, quævis bene per solam experientiam confirmando, nec ullas adhibendo demonstrationes, non aliter ac si demonstrationes meliores illis, quæ dicuntur à posteriori, haberi non possent. Postquam similia multum ipsum delectârunt, ejusque memoriæ bene sunt impressa, tunc ipsi *Euclides* poterit exponi, quò præcipuorum omnium, quæ ipsi ostensa fuerunt, demonstrationes à priori addiscat; pòst *Archimedes*: ut sic gradatim reipsa percipiat, hæc esse meliora; quod sanè scire non potuisset, si hæc ultima ipsi mox à principio fuissent ostensa, ipseque tibi ea pro melioribus obtrudenti non nisi cæca, quod dicitur, fide credidisset, nec proinde ea tanti, quanti jam, æstimasset, cùm jam non opus habeat credere, ea meliora esse, quæ reverà talia esse actu jam percipit. Tandem si ex facto feliciter progressu in iis, ad quæ unquam humano intellectu posse perveniri antea non credidisset ille, desiderium in eo fuerit excitatum ad similia proprio Marte inveniendâ, poterit tunc ipsi Algebra, seu recentiorum ars analytica, ostendi, quod est ingeniosissimum & optimum hac in scientiâ inventum, cujus ope per seipsum facillimè poterit invenire non solum omnia, quæ in veteribus Mathematicis maximopere admiratus est, sed etiam ea, quæ multò longiori, quàm dici potest, intervallo omnia antiquorum inventa post se relinquunt. Hac ratione progrediendo optinè perficietur discipulus. Quisquis verò contrario processerit ordine, & statim quæ optima sunt, hoc est, ipsam Analysin primum alicui

alicui insinuaverit, nã ille reipsã observabit, eam artem non tanti ab eo æstimatum iri, ac reverà meretur: cujus ratio clara est, quia, quanti quãdam sint æstimanda, non cognoscimus, nisi ex comparatione cum aliis, quibus eadem non æque facilè obtinentur. Hanc autem comparationem discipulus nequit instituere, cui nec meliora nec pejora nota sunt. Si verò ista non æstimaverit, ea etiam multùm cogitatione ruminare absque dubio supersedebit, cùm id tantùm soleamus circa ea agere, quæ maximi facimus. Hinc porro fiet, ut ea non multùm sibi imprimat, & per consequens ad singularia suo tempore ex iis nova derivanda parùm perficiatur. Eãdem ratione alicui perperam mox à principio ostendero optimam demonstrandi viam; sed melius fuerit ab eã incipere, quã *Euclides*, *Archimedes* & reliqui veterum sunt usi; his bene impressis subnectere deinde methodum *Cavallerii*, aut aliorum, ope centri gravitatis demonstrantium; & si tunc adhuc discipulus meliorem reverà dari posse dubitaverit, aut planè negaverit, ultimò methodum universalem, quã *Heuratius*, *Barrow*, aliique sua explicarunt inventa. Pari modo non malè in physicis primò declarabuntur antiquorum, quæ etiamnum vigent, vulgares opiniones; tum *Democriti*, *Lucretii*, & similium, qui in quibusdam propiùs veritatem attigèrè; tandem Neotericorum, *Kircheri*, *Verulamii*, *Gassendi*, *Galilei*, *Cartesii*, aliorumque, quorum præclara ingenia nostro hoc seculo singularia inprimis augmenta huic scientiæ addidèrè: vel, si magis placet, primò Physicorum opiniones, qui principia magis imaginabilia; tum illorum, qui abstracta; ac tandem, qui sola realia ad sua explicanda adhibuerunt, prout suprà in primo impedimento eosdem ad tres classes redegei; verbo: gradatim eo, quo videbitur Physica crevisse, ordine. Quantà hæc cum delectatione simul & utilitate fiant, si discipulus omnibus priùs traditis, eò quod optima esse arbitrat, bene sibi impressis, deinde reipsã meliora gradatim



semper dari convincatur, experientia luculenter testabitur. Nam quæ minùs bona sunt, semper imaginationi magis placent, quia, quæ non tam simplicia sunt, & non tam obvia intellectui, magis admiranda habentur &c. Atque ita, his bene impressis, si doceantur meliora, licet ideo simpliciora, attamen cum delectatione addiscantur, partim quia reverà hæc meliora esse experimur, partim quia tam simplicia prioribus præstare miramur, cum tamen imaginatio semper contrarium suaserit; atque sic fiet, ut, si tandem optima addiscamus, licet ideo simplicissima, intellectui perquam obvia, nullamque prorsus admirationem excitantia, hoc est, breviter, talia, quæ nullo modo imaginationi placent, hæc nihilominus ac eo non obstante plurimi faciamus, quia ea reverà optima esse ipsâ conscientia convincimur, & propterea acquisitam excolere scientiam pro viribus studeamus. Unde clarum est, sæpe eos, qui optima primo loco declarando credunt se aliis quàm optimè prodesse, iis eo ipso maxime nocere. Est autem valde notandum,

Tertiò, non omnia discipulo per magistrum ostendenda esse, sed tantum in aliquâ scientiâ aliquo usque progrediendum, talia videlicet solum exhibendo, quibus cognitis reliqua discipulo, si bonos hac de re libros evolvendi laborem in se suscipere velit, statim patent. Hoc peracto optimi discipulo authores indicandi, & quo ordine legendi, quæve in iis lectu minùs necessaria, ac proinde in lectione prætereunda sint, ostendendum erit, definito semper penso ipsi destinato, quò cognitionem sibi exhibitam ex authore per se ipsum sibi acquirere studeat, & quid fuerit assecutus, magistro referat.

Si ex. gr. alicui *Euclides* sit explicandus, hic nonnisi definitiones, axiomata & postulata exponerem; tum sex aut octo propositiones, vel, si tardioris fuerit ingenii, aliquantò plures. Hic autem penitus subsisterem, (quia eadem ubique methodus est, & qui priora assequitur, modò ordinem,

nem, ut decet, servet, reliqua gradatim eadem sibi acquirere potest facilitate) ipsique injungerem, ut omnes sequentes propositiones earumque demonstrationes proprio Marte addiscere, & postea mihi eas, quò cognoscerem, an earum sibi notitiam certò acquisiverit, ipse demonstrare conaretur. Qui *Euclidem, Archimedem, Apollonium* de conicis Sectionibus à multis breviter & dilucidè explicatum hac ratione addiderit, is differentiam observabit inter suum, quem ex suà studendi ratione collegit, fructum, & inter alterius, cui hi libri toti usque ad finem fuerunt explicati: scilicet omnium, quæ in iis traduntur, præceptorum multò, quàm ille alter, facilius, siquidem necesse sit, recordabitur, ea constantius retinebit, & sentiet, se habitum sibi acquisivisse ejusmodi plurima, modò boni in promptu sint libri, per se ipsum multò minori, quàm alter ille adhibebit, labore addiscendi. Quæ tria hujus regulæ rationem & præstantiam, satis reddunt perspicuam; ut taceam, aliquem sic procedendo sibi paraturum esse habitum attentionis, quo ritè acquisito nihil est utilius ad indagandam proprià sponte veritatem. Hæc quibusdam communicata amicis non displicuerunt: quoniam non solum sic clarè ostenditur, quantopere ab aliis, etiam iis, qui autumant, se rem quàm optimè dirigere, in his peccetur; sed quia etiam hæc evitandi simul docetur modus: has, inquam, ob causas approbare, hæc ipsa amici non dubitârunt. At enimverò licèt hæc multò adhuc specialiora, quàm quæ ab initio exposui, ad discendas has notiones veri & falsi sint: sed quia tamen ipsis hæc adhuc nimis generalia visâ sunt, & ego etiam aliàs per multa in hoc tractatu passim exhibui, quæ sanè, si æstimationi meæ potiùs quàm lectorum utilitati studerem, dubio procul omisisssem; ipsis hic specialiora adhuc petentibus hac in re (licet sciam, id mihi existimationi haudquaquam esse cessurum) morem quoque geram, horum præcipua complectendo quatuor positionibus, quarum

*Prima:*

*Prima:* Oportet ut quædam à primis statim annis incipiantur, semperque continuentur, si velimus præcavere, ne pueri quamplurima sibi contrahant, quæ deinceps difficulter corriguntur. Est autem illorum

Primum, ut nunquam patiamur eos esse otiosos, sed ut illi statim ab incunabulis aliquid habeant, quod manibus tractent, quo delectentur, quo ludant: sic enim imaginatio assuescet semper in aliquibus occupari. Scio equidem, si bene hæc & semper, prout desidero, continentur, futurum esse, ut pueri hinc talis evasuri sint naturæ, ut semper aliquid agere cupiant, omnia attingant, omnibus se immisceant colloquiis, omnia intueantur &c. ac hac ratione damna plurima, non quidem ex ullâ intentione, sed quia debita prudentia nondum adest, afferant. Hæcque genuina est causa, quare istiusmodi liberi vulgò petulantes audiant, econtrariò autem alii, qui sedentarii ac otiosi sunt, & ideo nulla committunt damna, bene morigeri & probi dicantur, & hi potius hanc ob causam præ illis à parentibus amentur, studiisque ac aliis rebus præstantioribus discendis destinantur: id quod tamen pessimè factum puto; quandoquidem experientia postmodum contrarium reipsâ ostendit, dum videmus, quòd pueri, quos petulantes seu nequitia plenos appellant, si studiis prudenter, ut par est, applicentur, perquam egregia successu temporis evadant ingenia, & contrà, qui bene morati seu probi dicuntur, non adeò excellent. Hinc multos parentes admiratos fuisse vidi, quid culpæ sit, quòd liberi sui, qui, uti ipsis videbantur, se tam probè gere inceptant, postea tam parùm in studiis proficiant, urgentibus licèt rem nullo non labore præceptoribus. Sed non est, quod hic tantopere mirentur, si ad causam saltem respexerint. Hi enim pueri, qui nunquam diu in aliquo subsistunt loco, omnia suis contrectant manibus, curiosè omnia externa perlustrant &c. verbo, qui petulantes seu nequitia referti (nam necesse est, ut ideo etiam multa damna, licèt

licet innocentes, adferant) dicuntur, imaginatione utuntur multò quàm alii pueri, vividiorè, ac proinde ad studia multò sunt aptiores; contrà sedentarii, otiosi, immobiles, tacentes &c. nulla quidem, ut patet, damna committunt; sed sanè nec etiam ad bona ulla exequenda valde sunt idonei, nisi malis prohibitatem cum eorum parentibus appellare, multum in eodem commorari loco, in silentio, & absque motu sedere &c. adeoque hi toto etiam reliquo vitæ tempore nec in studiis, nec ullà alià in re, crede mihi, actiones, quæ multum profint, sunt edituri. Et hæc idcirco prolixius hoc loco insinuavi, quia ferè ubique hac in re maximopere aberratur, idque cum magno Reipublicæ literariæ damno; cum plus quàm semel viderim, petulantium, ut sic dicam, ingenia, quia parentibus hoc ipso multum negotii facessabant præ reliquis, qui nullum creabant tædium, abjectissimis rebus, ut ipsos coërcerent, destinata fuisse; quæ sanè, si ad studia ingenio suo convenientia accessissent sub quorundam directione, qui eorum excessus prudenti ratione corrigere scivissent, in præstantissimos atque ad quævis negotia maximè habiles viros absque dubio evasissent. Notandum itaque ad subito corrigendos istiusmodi excessus: statim à principio puerulis hisce partim sedulò & sæpe inculcandum esse, non, (veluti sæpe perperam fit) ut quieti, immobiles, muti &c. sint, id quod eorum naturæ adversaretur, eisque perquam noxium foret; sed licitum ipsis esse, quamlibet delectationem, omneque id, quod animo lubitum fuerit, peragere, verùm eà tamen lege, ut caveant, ne cuiquam noxii sint: partim efficiendum, ut statim quamplurima possint perficere, desiderio suo respondentia, & quæ, dum ipsos delectant, suo insuper tempore utilissima sint futura: perinde ut nec ego alia, quàm quæ fuerint ejusmodi, in sequentibus proferre constitui.

Secundum est, ut non multùm cum aliis puerulis conversentur, sed cum adultis, cum præditis judicio, cum iis,



qui externè politi, internè bonis dotati fuerint moribus, quibus multum cum ipsis fabulari tædio non sit, qui ipsos secum mensæ assidentes habeant, quique eos in multorum hominum civilium celebritates, sicubi occasio tulerit, sæpe introducant.

Hujus regulæ ratio clara est. Quicquid enim infantes vident, hoc imitari gestiunt: ita verò imaginatio statim à teneris bonis imbuatur impressionibus. Certè malæ illæ dispositiones, quas parentes in iis septimo aut octavo ætatis anno, & cum satis temporis adhuc superesse credunt ad bona ipsis imprimenda, observant, ab hoc unico proveniunt, quòd huic malo non statim à primis annis prospexerint, vel, si per aliquantum temporis in id debitam adhibuerunt curam, eam tamen non semper bene continuârunt. Hinc optimè faciunt parentes, quando cum liberis suis, simul ac fari incipiunt, ordinariè multa confabulantur & peragunt; pessimè autem, si successu temporis, ex quo paululum adoleverunt iis, hæc iterum intermittunt. Nam licèt ipsorum judicia ob ætatem non adeò firma & accurata esse possint, unde etiam sæpe ridicula proferunt; semper tamen loquendo se magis magisque exercent, aliosque secum prudenter colloquentes imitari discunt.

Tertium est, ut nulla iis passio tam citò imprimatur, quàm obsequium: quod faciliè fiet, si, quæ velimus ut illi faciant, nos ipsi illis sæpe cernentibus peragamus, ac ad idem etiam faciendum illos amicè exhortemur, sedulòque illis inculcemus magnam incivilitatis notam incurrere, qui detrectaverit parentibus obedientiam in iis, quæ suaserint. Primarium verò hac in parte est, ut nulla alia ipsis imprimamus, quàm quæ efficiunt, ut magnâ nos passione ament: tunc enim non faciliè inobsequentes nobis erunt. Quemadmodum autem utilissimæ hæc passionēs, obedientia & amor præ omnibus aliis maximè ipsis sunt imprimendæ: ita econtrariò nullæ adeò ipsis adimendæ, quàm tristitia (in quam si  
fortè

fortè inciderint, aliò eorum cogitationes avertendæ; quod in his facilius, si dextrè procedatur, quàm in adultis efficitur) & timor, per quem ad obedientiam præstandam nunquam, si potest fieri, cogendi liberi sunt. Quantæ idipsum sit utilitatis, ex eo est perspicuum, quòd multa, antequam provectiorem attingunt ætatem, adversa possint supervenire, quæ omnes ii, qui hisce passionibus non affliguntur, cæterum bene sunt educati, multò majori animi æquitate ferre, & imminetibus periculis fortiori, ac alii, animo resistere poterunt.

*Secunda positio:* Permittente igitur imaginatione, ut quicquam queant addiscere, post ordinaria, quæ pueri solent communiter doceri, (qualia sunt principia Christianæ fidei, item legendi & scribendi ars) ea sunt præcipua, quæ sensus admodum oblectant: veluti sunt, delineandi ars, faciles praxes geometricæ, ludicra optica, fortificationum delineationes, perspectivæ notitia, tabulæ geographicæ pulchris coloribus illuminatæ, mapparum talium conficiendarum ratio, delineationes horologiorum gnomonicæ, curiosæ experientiæ physica, quæ oblectant & admirationem pariunt, libri curiosis schematibus urbium, animalium, machinarum, &c. adornati, libri historici, inprimis nostri temporis historias describentes, narrationes jucundæ, & id genus alia. Talia sanè oblectare non solum animum, sed etiam liberis simul prodesse poterunt atque inservire ad studium Mathematicum, physicum, politicum &c. suo tempore expeditius absolvendum.

*Tertia positio:* Ubi corpus aliquanto agilius fuerit redditum, id mox bonis assuefaciendum est exercitationibus. Scimus enim experientiâ certò certius, eos, qui corpus habent ad plurimas actiones aptius, etiam possidere plerumque mentem ad plurima cogitanda aptiorem. Nescio autem, an ex omnibus exercitiis, tantulæ ætati convenientibus, utilius quid & jucundius sit arte saltandi & musicæ. Salta-

tio enim id corpori conciliat, ut omnes actiones majori cum venustate & libertate fiant; ac proinde, ut agiliores jam facti alia exercitia, vehementiorem exigentia motum, uti sunt athletica, equitandi ars &c. (teneræ huic ætati nimis violenta) suo tempore multò facilius & perfectius, quàm si hæc ars non antecessisset, sibi, siquidem placeant, acquirant; Ut taceam nihil esse conducibilius sanitati corporis motione tam convenienti, quæ totum corpus quasi æqualiter afficit. Est autem nihil verè aptius ad exhilarandam mentem musicâ: ea quippe nobis statum animi verè tranquillum, in quo nihil est, quod dissonum, sed omnia quâdam consentiunt harmoniâ, ad vivum repræsentat. Hæc & similia, quorum quædam protuli, si in tenerissimâ statim ætate infantibus adhuc proponerentur, ambigendum non est, quin se totos iis libentissimè traderent, adeo ut ipsis satis esset futurum, quod agant, nec tempus ullum sit superfuturum ad indulgendum nequitii; cùm contrà vulgò pueris tædio refertissima proponantur, quibus neque ulla inest delectatio, neque ulla, quæ quidem ab ipsis percipi possit, utilitas, veluti inter alia præcipuè est linguarum studium tædio plenissimum. Verùm cùm id ut malum ferè necessarium, in educatione puerorum vix possit omitti, siquidem nihil aptius est ad rerum præstantissimarum scientiam brevi acquirendam, quàm libros vario idiomate conscriptos æquali felicitate posse legere, necessum est, ut hac de re aliquid tradam: quæ methodus mea fortè faciliior & jucundior erit, quàm vulgò usitata. Est ergo

*Quarta positio*, quòd circa varias linguas addiscendi methodum notandum sit,

1. Id facilius fieri non posse, quàm si quis in ejusmodi versetur locis, ubi aliam non audit linguam, quàm illam, quæ addiscenda est. Et hac ratione variæ simul linguæ possunt apprehendi; prout in locis finitimis, ubi diversas loquuntur linguas, usu fit, ut rudiores etiam pueri variis assuescant

ſveſcant linguis ; adeò ut non ſit dubitandum, ſi bona accedat educatio, alia magis incredibilia poſſe præſtari. Quid, quod ipſe audivi, duodecim annorum puerum Hiſpanicè, Gallicè, Belgicè æquali facilitate verba facientem. Quia autem non cuivis occaſio & neceſſarii ad id ſumprùs ſuppent, notandum eſt

2. Pueros ad linguarum ſtudium non ante eſſe admit- tendòs, quàm magno deſiderio illis impreſſo earum rerum, quas non niſi ex libris haurire poſſunt, eà, quam ipſos docere animus tibi eſt, linguà conſcriptis. Hinc una ex præcipuis apparet cauſis, quare tantum temporis ſit abſumendum, tantumque tædii ferendum, antequam ab adoleſcentibus vel ſola lingua latina addiſcatur : quia nimirum ea præmittere neglexerunt præceptores, quæ magnam in ipſis potuerant excitare aviditatem legendi libros Latinè conſcriptos, quâ lectione ſibi facillimè hanc linguam acquiſiſſent ; & licèt deinde eò pervenerint diſcentes, ut aliquo modo libros ſcirent evolvere ; ipſis tamen exhibuerunt authores pro captu eorum nimis intellectu difficiles, quales ſunt Romani Oratores, Poëtæ aut Hiſtorici, in quibus nihil inveniunt, quod delectet, nec ullâ eos cupidine, niſi inſtigante magiſtro, evolvunt. Novi econtrà quendam, qui quidem eò uſque profecerat, ut aliquo modo intelligeret latinòs libros, rarò tamen, niſi à præceptoribus cogeretur, eos in manus ſumeret ; ubi verò in aliquem incidit, docentem ipſum fideliter vulgares & delectabiles quacunquæ, quæ in ſingulis Mathèſeos diſciplinis occurrunt, præxes, factum mox eſt, ut rerum amœnitate (qualem nullam in omnibus, quæ antehac audierat in ſcholis, potuerat reperire) allectus tantâ aſſiduitate Mathematicorum verſaret libros, ut omnia, quibus antea vacabat, ſtudia ad certum tempus, quantum per præceptores licitum fuit, ſeponeret. Felices autem fuerunt illæ induciæ. Hæ enim deinceps in cauſâ fuerunt, ut authores undiquaque conquireret Mathematicos, & quia hi



non adeò difficili utuntur stylo, & sæpenumero eadem repetunt, istos, demonstratis sibi primariis fundamentis non solum levissimo negotio didicit intelligere, sed & hoc ipso ardorem quosvis imposterum curiosos evolvendi authores non mediocrem addidit. Exinde igitur colligere est, quanto damno fiat, quòd communiter ad hæc modò dicta ne minimum quidem attendatur; cum tamen, si hac ratione per realia studia appetitus in pueris rectè excitetur, hi tantam ad studia sese applicandi assiduitatem ostendant, quantum certè non vidi ullà admonitione aut coactione consuetà procedendi methodo obtineri potuisse. Nec mirum: Si enim quis appetitum comedendi singularem sentiat, ei quæ cibi, qui apprimè gustui conveniunt, apponantur, tunc cum rem suam bene acturum esse nemo facilè dubitabit.

3. Atque his valde necessariis priùs peractis notandum deinde est, tres dari in quâlibet linguâ perfectionis gradus. Horum primus est, linguam tantum intelligere, non item eandem loqui posse; qui quidem gradus in quâvis linguâ omnium facillimè obtinetur. Etenim videmus, peregrinantes regionis ejus, quam adeunt, incolas multo citiùs posse intelligere, quàm eos alloqui. Secundus est, præter intelligentiam loquentium aut librorum omnia etiam ordinaria sine hæsitatione posse eloqui, & hic gradus priore est difficilior. Tertius est difficillimus, eadem linguâ de quâvis materiâ exactè, & quodcunque libuerit, disserere, scriptumque posse componere. Quum itaque semper à facillimis sit exordiendum, non satis quis poterit mirari, quare contra manifestam rationem vulgò à re hac in parte difficillimâ, hoc est, ab ultimo gradu in puerorum institutione, initium fiat. Est autem hujus rei ratio in promptu: quia omnes consuetudine ducimur, non sanà ratione, & commissos hac in re errores, utut quis palpârit, vix tamen emendârit. Præceptor quippe hac ratione supersedere multo labore potest, nec aliud facit, quàm ut exercitia latinè red-  
denda

denda discipulo proponat, & reliquum quod est temporis ipse in otio transigat, sudante interim discipulo sibi soli relicto, seseque in omnem miserè torquente formam. Ast econtrario secundum methodum à me hìc tradendam discipulo exiguus, præceptorì multus, imò omnis ferè incumbit labor: quà etiam methodo si vulgares uterentur pædagogi, non tam multos simul discipulos, ut jam sit, præ nimio labore possent informare. Verùm, quia in his ad puerorum utilitatem tantum est respiciendum; ultimi autem duo gradus seu utilitates in tradendà quavis linguà, videlicet ut sciamus aut ore aut scripto omnia animi sensa cum aliis communicare, multò difficilius acquiruntur; nec tantum semper, quantum primus gradus, usum habent, imò si vel maximè eos tibi reddideris familiares, temporis tamen tractu, ni exercitium quasi continuum adsit, abeunt in oblivionem; & verò multò facilius primus gradus, seu utilitas bonos intelligendi authores acquiritur, continuum quoque semper usum habet, nec adeò oblivioni obnoxius est; quin & hoc bene acquisito gradu, reliqui duo multò etiam faciliori negotio obtineri poterunt; neminem sanè credo existimare, me hìc sanæ rationi contrarium quid tradere, licèt id consuetudini quàm maximè adversetur, me primum solum hìc amplecti gradum. Si verò non alius tibi tum fuerit scopus, quàm ut puer authores ex. gr. latinos quosvis discat intelligere, eò eum licebit hâc, quam traditurus sum, methodo adeò facilè perducere, ac tam brevi, ut, licèt à decimo aut duodecimo ætatis anno demum fecerit discendi initium, id tamen non impediturum sit, quo minùs sat adhuc temporis supersit ad æquè magnos deinceps, ac cuivis alii, qui vulgari ducitur viâ, progressus, ne dicam majores, in studiis faciendos. Etenim hìc non erit necesse, ut puer multas Grammatices regulas magno labore ediscat, tædiosisimas plerumque & ne quidem bene intellectas, aut ullam syntaxin, quæ tam subito iterum oblivioni, quàm antea memo-

riæ,

riæ traditur; nec quoque, si ita placet, necesse erit, ut ulla vocabula technica, quæ monstra pueris videntur, in rationem veniant: sed sola hîc post necessariam lectionem requireretur declinatio & conjugatio cum verborum copiâ. Ne verò hîc denuo multas singas difficultates, hæ declinationes & conjugationes juxta ordinem tradi solitum à puero, ut vulgò sit, memoriæ non sunt mandandæ, sed primò tantum scripturâ consignandæ, tum plurima vocabula, ad eum in illâ scripturâ exercendum, sæpe secundum hunc ordinem, varianda erunt; si denique satis tibi in hisce exercitatus videbitur, extra ordinem variè interrogando discipulum, & quidem in vernaculâ, efficiendum est, ut tandem latinè absque ulla hæsitacione respondere sciat, aut vice versâ, si tu latinè quæsieris, ipse in vernaculâ respondeat: Id quod breviori, ac quis opinatus fuerit, tempore obtinebitur. Sono enim sæpe audito, quia sic per responsionem certi in nostrâ imaginatione motûs frequenter se invicem subsequuntur, puero adeò, continuatâ aliquantulum hac repetitione, facilia evadunt, ut in ipso etiam præter attentionem rogato isti ferè motûs tandem excitentur, atque ille ita levissimo negotio respondere sciat. Sed hoc ipsum, si magnâ ideò facilitate, majori certè, quàm vulgò, utilitate efficitur: quandoquidem vocabulorum variationes non occurrunt in libris secundum ordinem regularum Grammatices, unde fit, ut pueri grammatico ordini assveti soleant hîc hære; id quod in hac nostrâ methodo non accidit, quâ turbato quomodo libet ordine, æquè promptè respondere discunt. Verùm hæc levia sunt. Maxima tibi fortè videbitur difficultas, unde haurienda sit vocabulorum copiâ? Fortè è Lexico, Januâ quâdam linguarum, similibusque libris? Verùm, quia multa hîc sæpe addiscuntur vocabula, quæ tam parum ex usu sunt, ut, priusquam aliquando in auctorum lectione occurrunt, eorum aliquoties possimus oblivisci; colliges faciliè, hæc magno tædio, exiguoque è contrario fructu perdisci.

disci. Dices fortè, quia is, qui multæ fuerit lectionis, suspicari facile potest, an aliquid occurrens vocabulum multi fuerit usus, nec ne; indicem idcirco multorum vocabulorum ei fore tali percurrendum cautelâ, ut puero ediscenda feligat vocabula, quæ judicârit frequentioris esse usus, reliquis posthabitis. Consilium utique bonum, quod etiam, si sequentia addideris, suum poterit habere usum: quin imò ausim spondere, tam pauca numero tunc collectum iri vocabula ad multos scriptores intelligendos sufficientia, ut, si primum hæc alicui narraveris, vix tibi hac in re fidem sit adhibiturus. Verùm hîc communicabo unâ cum totâ procedendi methodo consilium, quod magis meo quidem iudicio prodesse eò poterit, ut puer quosvis authores latinos brevi intelligere discat. Sumatur liber, quem aut puer jam tum satis in vernaculâ linguâ cognoverit, aut qui talia continuerit, quibus eum quàm maximè delectari sciveris; in hujus libri quâlibet parte explicandâ operam dabis, ut omnia in eo occurrentia vocabula, te continuò rogante, ipso autem respondente, memoriæ mandet: secundò, jubeas eadem vocabula omnia ipsum declinare vel conjugare, extra ordinem, ut suprà docui, ipsum semper interrogando: tertio, his peractis eidem ipsum explices textum. Non video quid hîc obftet, quin, si vel stupidissimus fuerit, longè minori opus habeat labore ad interpretationem latinorum authorum addiscendam, quàm si aliquid ex vernaculo in latinum transferat sermonem, vel, ut fieri vulgò solet, componat. Quanto autem hæc omnia successu, si sæpe diuque continuentur, quantâque porro fiant utilitate, facile tibi apparebit; quia hæc ita continuando per totos authorum tractatus plurima vocabula quàm sæpissime repetuntur. Continuato aliquantisper hoc negotio, sensus etiam trium quatuorve vocabulorum detectus faciet, ut reliquorum quoque sensum facile conjiciat. Si tandem multùm hoc continueatur exercitium, quæ ratio loquendi apud Latinos sit consuetâ,



sueta, quæve inusitata; quid bonam sapiat latinitatem, & quid non, multaue ejusmodi alia; vel ex ipso phrasium audito sono levi negotio deinde res dijudicabitur. Memini equidem, me vidisse puerum annorum circiter decem, qui duorum annorum spatio omnes latinos authores vulgatos bene intelligere sibi habitum comparârat, tantum inde, quod varios authores interpretandi consuetudinem sibi habuit commendatam, quanquam, ut hoc efficeret, multa ipsi imprimerebantur haud quaquam necessaria. Quid itaque hinc sperandum sit, ipse judicaveris. Ubi autem eum eò perduxeris, ut libros vulgares latinos absque ullâ difficultate capiat, nec non secundum ea, quæ suprà dicta sunt, ardorem in ipso varios evolvendi libros, hos ipsi exhibendo excitaveris; ostendet tibi luculenter experientia, quàm incredibiles brevi in linguæ notitiâ progressus ille sit facturus; adeò ut, siquidem è re suâ fuerit, ac postulaverit necessitas, reliquos etiam duos gradus circa perfectionem in eâ linguâ sibi acquirendi, facili quoque conatu eò pertinere queat. Tum demum fuerit operæ pretium, bonam, si placuerit, Grammaticam, nec non aliquem in latinâ linguâ exercitissimum adhibere, quocum de rebus variis frequenter & doctè sermones habeat, arreptoque calamo de rebus diversis diversimodè se scribendo exerceat, aliaque complura subeat exercitia: quo ipso futurum est, ut hæc omnia ille sibi etiam acquirat longè minori difficultate, quàm alii in scholis, sed æquali omnino perfectione. Hæc ergo sufficiant ad bene intelligendum, quænam adminicula, ut imaginatio circa veri & falsi notiones quàm latissimè extendatur, & quò difficultatem hac in re habeat minorem, sint adhibenda.

Tertiò tandem, quod ad notiones boni & mali attinet, quamvis eæ multâ adhibitâ meditatione per intellectum acquirantur; multò tamen meliùs per intellectum adjutum imaginatione acquiri possunt. Sic licèt intellectus optimè distin-

distinguat inter bona apparentia & realia; difficulter tamen à prioribus abstinēbimus, nisi usu, quā ratione nos ea decipiant, reipsā confirmemur. Sunt autem meo iudicio bona realia, quæ propter se expetenda, nulla alia, quā sapientia, sive acquisitio veritatis per seipsum seu per proprias meditationes juxta genuinam methodum institutas; virtus, seu naturæ nostræ ad acquisitæ veritatis leges directæ perfectio realis seu melioratio; ac tandem mentis tranquillitas, seu ex hisce duabus, sapientiâ & virtute, exoriens in nobis status quietus. Unde simul haud difficulter conjicies, quid per mala realia intelligam: mala nimirum bonis hisce directè opposita, ignorantiam, vitium, & statum mentis inquietum. Bona verò apparentia sunt honor, divitiæ, & delectationes sensuales, quæ si acquisitioni bonorum realium adjumento sunt, ex apparentibus fiunt realia bona: si autem iisdem impedito, prout sapissimè accidit, hæc reverà non nisi realia mala sunt, licet alii secus judicent. Hinc quoque facile colligitur, quænam econtrà mala apparentia sint: status nempe obscurus seu non adeò illustis in mundo, paupertas, & absentia delectationum sensualium. Et hæc quidem si adjumento nobis sunt ad bona realia acquirenda, id quod etiam tantum non semper accidit, reverà bona realia existunt, quamlibet pauci hoc capiant: si autem impedito, ex apparentibus malis in realia mala degenerant. Jam verò quia pauci ad res, omnes morales eâ ratione respiciunt, ac plerique potiùs, apparentibus admodum illusionibus ab ineunte ætate persuasi, perquam contraria his firmiter statuunt ingenti licet damno suo; multum quidem utile est hæc bene nosse: sed quia præjudicia ejusmodi profundè admodum naturæ nostræ infixæ hærent, ac proinde, solâ ratione difficulter corriguntur, optimum ergo fuerit, ut aliquis, cui hæc bene sunt perspecta, alios, quamprimum è re fore judicaverit, tam realia, quā apparentia bona & mala dignoscere per ipsam experientiam doceat, & ubique

eorum statum vividè repræsentet; quid scilicet nobis promittant ante possessionem, & quàm parum stent promissis, imò quàm sæpe penitus contraria in ipsâ fruitione exhibeant; eosque ad similia in ipso rerum usu bene attendere, assuefaciat. Etenim ita deinceps ea, quicquid passiones in contrarium suaserint, non minùs facile evitabimus, ac pueri ignis contactum, quem quidem aliquando, splendore ejus antea delectati, manibus imprudenter, licèt præmoniti à te fuerint, tractârunt, ab eo tamen semel læsi multò suo malo prudentiores, ac mille præceptis hac de re ipsis præscriptis, evaserunt. Ita hi facilè flocci pendent, quæ vulgus summo studio sectatur, postquam reverà bona realia gustârunt, hoc est ea, quæ primo intuitu haud nobis videntur spondere delectationem, sed quò iis plus fruimur, eò majori delectatione mentem perfundunt; atque id tam constanti ratione, ut nunquam honesta hæc voluptas vertatur in tristitiam: cùm è contrario bona apparentia multò plus promittant, quàm reverà experimur; ad hæc nos nimis subitò delectatione in mediâ fruitione privent; imò haud rarò in magnam vertantur tristitiam.

Quia verò plura de his in parte primâ protuli, ac quoque quædam hisce in tertiâ parte subjuncturus sum, ideo circa hæc nolo prolixior esse; sed hoc tantùm hic porro addam, ad has notiones sibi bene formandas perutile esse, si quis genuinæ Politicæ studeat, quæ clarè aperit, quid sana ratio doceat apprimè utile esse ad societatis humanæ conservationem, quâ de re præclara passim extant meditata in scriptis celeberrimorum virorum, *Grotii*, *Hobbesii*, *Puffendorffii*, *de la Cour*, *Cumberland*, aliorumque. Tandem id quoque eidem scopo inserviet, si quis patriæ suæ leges & constitutiones de talibus sibi valde reddiderit familiares.

Ultimum, quòd hic de his monendum mihi venit, est, hunc ordinem in his omnibus, de quibus modò sum locutus, notionibus imprimendis esse observandum, ut inprimis  
eorum

eorum notiones, quæ convenient, quæve non, statim ab incunabulis vividè imprimantur: notiones verò veri & falsi tum demum, ubi paulò adultior ætas successerit, & omnia hic necessaria bene fuerint præmissa: sed ultimò notiones boni & mali, ubi mundi constitutio per experientiam exactiùs aliquantò fuerit explorata. Quàm latè autem ejus, qui talem nactus fuerit educationem, imaginatio extendatur; quàmque huic omnia, quæ præcipuè circa veritatis inquisitionem tentaverit, evadant facilia, ac aliis contrà bonà educatione destitutis admodum difficilia; nemo credet, nisi cui talia per ipsam prudentem praxin inspiciendi frequens fuerit occasio.

Quamvis autem jam omnia tandem eò reducta esse tibi videantur, ut nihil nobis circa incognitarum veritatum acquisitionem superatu difficile amplius appareat, ac proinde etiam nihil superfit, quàm ut nos ad ea omnia obtinenda accingamus; attamen, ecce, aliud denuo impedimentum nobis fit obviam, nimirum, nos tempore & commoditate ad ea facienda non rarò destitui. Ita enim in mundo se res habent, ut, quibus sat temporis & subsidiorum est ad experimenta aliaque ei negotio necessaria facienda, sæpissime ignorent, quâ ratione ea sint instituenda, aut suscepto licèt gnaviter opere, difficultates difficultatibus cumulando sese magis magisque intricent potius quàm extricent: cum è contrario hi, quos non later ratio omnia talia ita dirigendi, ut plurimæ magnique res momenti (quarum quædam se nunquam casu offerent) indagentur, tempore tamen, sumptibus ad id necessariis, imò coadjutorum necessariorum, opportunitate non rarò destituantur.

Horum omnium origo non difficulter detegitur: si quidem eorum ratio in oculos plus nimio incurrit, dum vel certo vitæ negotio adstricti cogitationes aliò convertere tenemur; vel, à publicis occupationibus soluti, cogimur de rei familiaris conservatione cogitare; vel, si satis bonorum

*Sextum impedimentum, quòd commoditate se sæpe destituamur, eâ, quæ ad executionem in veritatis acquisitione requiruntur, ad effectum deducendi.*  
1. Veritas hujus rei exponitur.



suppetat, ut rerum domesticarum curas aliis queamus demandare, fortè in eo vivimus statu, in quo multam cum aliis conversationem non semper licet honeste declinare, ubi ut plurimum cogimur cogitationibus à nostris valde diversis & percipiendis & referendis multùm esse occupati; vel denique, si quoque liberi à conversatione sat nobis fuerit temporis seriò studiis incumbendi, quamplurima tamen circa calculum analyticum absolvendum in mathematicis, circa experimenta facienda in physicis &c. (atque sic alia in aliis scientiis) occurrent, quibus præstandis soli non sufficimus. Et durum utique videtur rerum inventoribus, tantùm sibi temporis in ejusmodi laboribus, qui vel à rudioribus possent peragi, perdendum esse; cum satius sanè sit, cogitationes interim suas iis potius detegendis, quæ non ita à quovis in lucem erui queunt, destinare.

Existimo verò hæc omnia iis esse notissima, qui singulare quippiam, & quod publico apprimè fuerit utile, sibi firmiter proposuere in studiis exequi; adeoque credo, tædioissimorum exemplorum memoriam quibusdam, dum hæc legent, in mentem esse venturam. Quare hæc specialibus exemplis illustrare superfluum foret.

Nullo itaque modo mirabimur, multos, licèt qualitatibus quibuscunque, quæ ad magni momenti veritates in lucem protrahendas necessariò requiruntur, præditi essent, atque ita multùm valerent in singularibus hoc in negotio præstandis, hic tamen viribus deficere; adeò ut bonis studiis sæpe penitus cogantur valedicere, cum tot tantaque hic se offerant obstacula, quibus superandis pauci pares sunt. At verò hic & hujus & illius ratione specialia quoque dantur remedia, quæ unusquisque, si saltem serio consulat intellectum, levi negotio indagabit; & si iis, quæ hic svadet, reapse perficiendis non defuerit, ejusmodi superare impedimenta cum tempore poterit, quæ tamen primò intuitu videbantur insuperabilia. Ego verò constitui generalia  
tan-

tantum hujus rei remedia hoc in loco jam attingere, & quidem.

Primo, si consideraverimus, quænam à nobis ipsis auctore intellectu expectanda sint remedia, hic sciendum, nihil ad hoc superandum impedimentum fortius esse, quàm si semper propriam in studiis inclinationem sequamur. Qui enim contra hanc dirigunt studia, aliò cogitationes vertunt: nec itaque mirum, si non tantum, quantum alii, proficiant, nec singulare quid præstent. E contrario autem, quia unusquisque à naturâ formatur ad certa quædam peragenda, aptior, quàm ad alia, eaque interna & genuina cujusvis videtur esse vocatio; si quis inde hanc fuerit secutus, quicquid etiam ejus ductu aggrediatur, facillimum sibi evadere comperietur, ac ipse omnia ejusmodi jam recensita obstacula, continuo ipsius sufflantia progressum, propriâ naturâ remove, quantum in se erit, allaborabit. Et quamlibet nobis non omni, quo desideramus, modo id fuerit possibile, magnum tamen poterit habere usum. Quia enim tunc nos externa impediunt, inclinatio autem ad illa prosequenda semper addit stimulum, hinc fit, ut ea solum aggrediamur, quæ intellectu facilia, & quæ valde sunt generalia; atque ut sectemur potius experientias vulgares, quàm difficiles & abstrusas; id quod aliàs vix fieret. Si verò observaverimus, quædam esse in nostrâ potestate, perutilia quidem, difficilis tamen executionis; tum varia ad ea obtinenda annitumur excogitare compendia, quæ aliàs non quævissemus. Talia postea his omnibus fieri possunt, ut, quamvis magna adsint impedimenta, haud exiguum interim progressum in veritatis acquisitione nobis facere liceat. Si verò ea impedimenta nobis, quicquid tandem conemur, reverà evadant insuperabilia, sùadet intellectus, ut aliquid publicemus, quod speramus aliis placiturum, ne alios lateat, quid efficere, quidve non queamus, & num utilia publico reverà possimus præstare, si ab aliis, ut decet, juvemur.

Tertiò,  
remedium.

Nulla

Nulla siquidem res est, quæ errori tantopere exposita, quantopere isthæc; cum ad talia præstanda se ignarissimus quisque valde idoneum judicet: ideo hic apprime necessarium est, ut propriæ de potentiâ nostrâ persuasioni publicus eruditorum assensus suffragetur. Si hic generalis, ut requiritur, applausus obtineatur, spem nobis præbet, fore, ut tandem mundus sapientior sit evasurus. Tot enim egregios ille amisit viros, qui ipsi præclara magnâ facilitate poterant exhibere, quæ jam ne summo quidem labore posset consequi; adeo ut credam, ipsum similibus virorum tandem singularem habiturum esse rationem, & quidem in tempore, dum studiorum tractandorum vires per ætatem adhuc sufficiunt. Atque si hoc contigerit, tum fieri tandem adhuc poterit, ut non planè desiderato auxilio destituamur.

Secundò, videamus, quid adjumenti à bonâ veritatem indagandi methodo sit expectandum. Hæc autem, modò in eâ rectè procedamus, talia suggerit compendia, ut & paucis opus sit adjutoribus, & breve temporis spatium sufficiat ad singularem progressum faciendum. Porro, si quædam in lucem edere fuerimus coacti, quò nostri aliis innotescant profectus, hujus quoque methodi auxilio non difficulter ea sic disponere licebit, ut lectori placeant. Et licet scribendi materiam à nostris speculationibus quodammodo remotam eligere necesse fuerit; quia tamen ad expediendas res tales methodus hæc nos reddit æquè aptos, ideo nec ista quoque adeo magnam nobis pariet difficultatem. Demus tandem, nullum ab aliis auxilium, quemadmodum desideramus, sperandum esse: at si nihil hac in parte aliud, certè tamen id hæc methodus efficiet, ut, quanquam ejus ope non tantopere progredi, quantopere adjuti ab aliis, possumus, progrediamur tamen semper pedetentim: nam ubi ubi vel tantillum saltè temporis fuerit relictum, id unum ad multa exequenda opportunum erit iis, qui bonâ instructi methodo, multumque in eâ sunt exercitati.

Tertiò, fatendum, quædam inprimis hic insuperabilia nobis, quicquid conemur, fieri, nisi huic negotio unicè competentem rerum merè externarum subsidio adjuvemur. Nec etiam omni penitus spe decidimus, hoc præcipuè seculo, in quo studia literarum plus, quam ullo antecedentium, florent, & in quo non tantum integræ Academiæ huic rei incumbunt, verum etiam rarioris eruditionis viri singulares certatim prodeunt, singularia edentes inventa, quæ apprimè studiis nostris inservire possunt. Insuper, ne hic aliquid desit, permulti viri celebres variis in locis aliorum scripta, labores, inventa, observationes &c. in synopsi non sine magnâ eruditorum utilitate singulis mensibus exhibent. Hinc ortæ *Ephemerides eruditorum*, Gallicè *Journal de Savans* Parisiis; hinc *Philosophical Transactions* Londini; hinc *Giornale de' Letterati di Roma*. Verum, quia sic certæ tantum nationi ob peculiaria idiomata, quibus utuntur, fit adjuumentum; omnes eruditos sibi summopere devinxere Celeberrimi Lipsienses, qui in *Actis Eruditorum* applausu universali idem exequendi latino idiomate in se suscepere munus. Nec multum abiit temporis, ex quo hoc ipsum non minus haud quidem Latino, sed Gallico sermone, summâ verò cum approbatione inchoavit præstantissimi vir ingenii, Roterdami Philosophiæ & Historiarum Professor, in libro, cui titulus: *Nouvelles de la republiques de Lettres*. Hac ratione paucis sumptibus, paucoque labore nobis innotescit, quâ ratione alii sua dirigant studia, quæ ubique prodeant præclara inventa, & similia, quæ studiis nostris promovendis maximè sunt idonea. Non est autem hic negandum, quia unusquisque pro diverso, quem sibi præfixit, scopo, diversam ab aliis sectatur viam; alia nobis esse usui, alia in aliquâ re deficere, quam tamen, cum nostris ea unicè inservire possit disquisitionibus, inprimis desideramus. Deinde plurima, etiam restant eruenda, quæ nunquam casu se offerent. Et licèt eorum quis veritatem jam tum solis rationibus deter-



minasset; nemo tamen, qui bene judicio utitur, suas circa hæc meditationes cum publico faciliè communicabit; cum-  
eæ ad alios convincendos parum futuræ sint sufficientes, imò  
plerisque hæ nimis hyperbolicæ possint videri, nisi experi-  
entis quoque clarissimis eas comprobare liceat: quas verò  
experientias nemo feliciter inibit præter ipsum istarum me-  
ditationum scriptorem, utpote jam dudum de hujus rei ve-  
ritate persuasum; ad minimum necesse erit, ut illæ sub ejus  
directione, quin & præsentia quandoque instituantur. Sed  
& hic porro non dubitandum, etiamsi necessaria ad singula-  
ria publico communicanda defuerint subsidia (merito enim  
pecunia omnibus istis impedimentis præstantissimum habetur  
remedium) non tamen, inquam, dubitandum est, quin  
& hic se oblaturæ sint occasiones ad tantam subsidiorum co-  
piam, quanta ad hanc rem requiritur, impetrandam. Nam  
ipsi Magnates jam inprimis studiis delectari incipiunt, mul-  
tum in studiorum cultores impendunt, largosque totis Aca-  
demiis suppeditant sumptus. Et quia Principes viri ma-  
gnam pecuniæ copiam annuatim frustra consumunt, haud  
faciliè crediderim, eos, maximè ubi propensionem ad curio-  
sa studia in seipsis observaverint, certam harum profusio-  
num partem indefessis admirandorum naturæ scrutatoribus  
esse denegaturos. Illi enim inprimis sunt, si qui quam alii,  
qui avent mentem suam oblectari, & sanè nescio, quæ stu-  
dia eos, etiamsi Principes sint, magis delectare possint,  
quàm quæ hoc inprimis seculo excoluntur. Dolendum ve-  
rò est, quòd ejusmodi hominibus nummorum satis conce-  
datur, qui ad singulare quid hoc in negotio præstandum aut  
non, aut parum sunt apti, eò quòd nullà ad hoc bonà me-  
thodo instructi, nunquam, nisi ipsis esset Mæcenas, in arti-  
um inducerent suum bonà seriò tractandi studia: rarò au-  
tem iis subvenitur, quibus bene perspectum est, quid ulte-  
rius hic sit facto opus, ut posteris singularia detegantur, qui  
etiam summo istorum studiorum amore flagrantès à nullo  
faciliè

facile hujus generis labore se subducerent, modò iis progredi, ut summopere desiderant, liceret. Deinde nec ipsi Principes, nec ipsorum ministri, pecuniis istis erogandis præfecti, ob publica negotia tantum habent temporis ad aliorum meditationes examinandas, percipiendas, ac proinde æstimandas, an subsidio dignæ sint, nec ne: unde quandoque accidit, ut ingeniis bonis tractatio injungatur studiorum istiusmodi, in quorum labore præcipuè magis sensibilis & specialis quædam quàm ulla realis spectatur utilitas, quæ studia ideo maximè sunt extra illorum institutum: atque ita tempus pretiosum his solùm rebus malè collocare non rarò tenentur. Consultum itaque hîc foret, ut viri docti, qui & talia intelligunt, & proinde pro meritis æstimare norunt, quique eadem de causâ veritatis acquisitionem (& cum hac conjunctam virtuosam animi tranquillitatem) pro summo bono, quod in hac vitâ viâ naturali potest obtineri, judicare didicerunt, si fortè sibi non liceat per se ipsos (propter infinita, quæ in quovis vitæ genere occurrunt, impedimenta) progredi, & interim satis opum suppetat; consultum, inquam, foret, ut hî talibus veritatis indagatoribus tantum generosè largirentur, quantum ad facienda necessaria experimenta, honesteque vivendum, sufficerit. Nec ullus hîc deceptioni esset locus, modò erga alium non forent tam liberales, quàm erga illum, qui non tantùm genuinam sciverit methodum indagandæ veritatis, sed etiam passionem, ut ita dicam, dominantem in se habuerit eam, quæ in veritatis desiderio sita est, quæque omnes alias ejus superet passiones; adeò ut, licèt ipsi non subveniatur, nihilominus constanter & laboriosè in hoc progredi negotio non dubitet. Duo enim hinc dubio procul præ omnibus aliis hîc ipse efficiet: primum, ut, cùm antea absque alterius etiam subsidio, ac frustra obstantibus impedimentis, in cursu suo assiduè pergere fuerit conatus, se jam certius multò huic rei & magis seriò sit jam nunc appli-

caturus, ubi nulla amplius suæ inclinationi se obijciunt impedimenta: secundum, ut, quia bonâ insuper est instructus methodo, non sit frustrâ laboraturus, sed semper nova detecturus. Has quoque duas qualitates, num nimirum seriò quis amet veritatem, bonâque sit instructus methodo, in aliis agnoscere illi haud difficulter licebit, qui saltem voluerit ad eorum actiones bene attendere. Deinde quia hi, qui dulcedinem, quam veritatis acquisitio per nos ipsos affert, semel perfectè gustârunt, aliarum rerum curâ parum tanguntur, ac proinde paucis contenti vivere sciunt; ideo, si quinquaginta pluresve curiosorum veritatis amatorum initâ concordîâ contribuerent, haud certè magni singulis eorum annuatim constaret, ut tantum conferrent, quantum sufficeret, ut quis, qui habitum seu facilitatem acquirendi veritatem, & nova semper inveniendi sibi comparavit, vitam suam commodè iis sustentaret, intereaque brevi tempore plus præstaret, quàm multis seculis alii. Prostant quippe doctorum virorum exempla, qui à nemine adjuti tanta etiam proprio Marte ediderunt specimina, quanta de nostris antecessoribus frustra per multa retro secula hucusque fuerunt sperata. Atque ita alii vitæ suæ negotia possent persequi, & absque omni labore suo veritatem sibi acquirere, ac summâ illâ simul frui voluptate, quâ mens in ejus acquisitione afficitur. Quò verò hoc negotium facilius procederet, posset lege sancitâ in hoc collegio caveri, ut, si aliquod societatis istius membrum absque liberis & consanguineis ad studia aptis è vivis excesserit, definita hæreditatis portio cederet bonarum artium cultoribus, pro societatis arbitrio distribuenda. Hujusmodi plura possent constitui utilissima. Adde, quòd desiderium illud sciendi doctorum nostri temporis non mediocre ob tot singularia hoc ævo detecta in bonam eos suspensionem adducit, fore, ut horum plurimi, quia otio veritatem per se ipsos investigandi carent, id munus iis, quos scient aliquid hac in re posse præstare haud ita à quo-

à quovis alio præstandum, necessariò sint delaturi, tandemque ad hæc hisve similia salutaria consilia, acti sciendi ardore, confugere necesse habituri. Si autem hac quoque spe frustremur, non desunt sapienti, siquidem tale quid appeteret, tot aliæ viæ satis opum ad isthæc necessariarum colligendi etiam ab ignorantibus, si placet, & vulgi turbâ. Quale quid fuisset, si ille, qui primus telescopia invenit, operam dedisset, ut in celeberrimâ urbe, in quâ multi habitant novitatis avidi, cuivis volenti objecta è longinquo per telescopium conspecta, tam sensibili apparentia specie, celato artificio, ostendisset, idque vili accepto a singulis pretio; haud difficulter ingentes hoc invento pecuniæ summas potuisset lucrari. Sic haud difficile foret artis inveniendi peritio plurima comminisci, quæ, tecto artificio, magis admiranda apparerent, quàm omnia ea, quibus multa sæpe lucrari videmus. Ita variis insuper modis (quos de industriâ subiticeo, quum viro ingenioso, si ad ejusmodi acquirendi modos se saltem velit applicare, nequeant esse ignoti) majorem opum copiam per alios fortè possent colligere, quàm ad institutum suum requireretur. Si denique hæc remedia non arrideant, vel ea usurpandi nulla se offerat occasio, & idcirco studia publico utilia prosequi non liceat, nisi velimus ipsi rebus nostris obesse; nullum tamen sanè talem video statum, quo ad minimum nos ipsi non possimus sapientiæ operam dare; & cum aliis non, nisi damno nostro, possimus inservire, nobis solis pro viribus prodesse erit satius, hoc est, nobis solis tunc studendum erit; quod quidem traditâ hic methodo tam facile cuivis successurum spero, ut existimem, qui eam bene nôrit, se, & nullo quidem ferme negotio, tantisper à mundanis abstracturum negotiis, ut omnia, quæ ad mentis suæ beatitudinem conservandam necessaria sunt, sufficienter semper indagare queat: atque hæc tunc illi, qui nihil omnino nisi ex sanâ ratione appetit, abundè sufficere possunt.



*Conclusio  
tertia Secti-  
onis.*

Spero me hisce cum satisfactione etiam Lectoris tertiam Sectionem posse concludere, in quâ reor, me satis evidenter explicuisse: quid faciendum sit, *ut veritatis acquisitio exiguo labore perficiatur.* Unde Lector clarè potuit colligere causas, quare ipsâ attentione nihil absolūtè sit difficilior, hoc est, cur nihil difficilior sit, quàm uni & eidem rei diu inhærere: causas enim has eadem hac sectione speciatim enumeravi, quæ tam communes tamque frequenter obviæ sunt, ut sæpissimè in singulari saltè solutione alicujus problematis omnia hæc sex impedimenta simul concurrant. Quia verò attentione nihil hominì salutarius est, imaginationem, utpote quæ sola efficit, ut nequeamus esse attenti, ubique in quolibet impedimento adeò ad leges intellectus reducere conatus sum, ut impofterum circa veritatem acquirendam intellectus & imaginatio iisdem, quantum possibile, legibus in nobis regantur, ac proinde jam æquè facile sit, veritatem ope solius imaginationis cognoscere, ac antehac juxta superius datas sectiones solius intellectus adminiculo. Atque ita rem arduam expedivi, videlicet docendo, quâ ratione id, quod omnimodæ mutationi obnoxium, sicuti est imaginatio, in immutabile quid, seu intellectum, hoc est, humana natura in divinam quasi, ut sic loquar, quantum lumine naturali potest fieri, sit transmutanda. Et sic clarè constabit, quo pacto cum perniciosissimo nostro hoste (hinc enim unice derivavi, quodcunque nobis in veritatis acquisitione noxium fuerit) in gratiam sit redeundum, ut nobiscum reconciliatus maxima hic præbeat nobis bona; cum existimem, jam haud adeò difficile futurum, ut quisquam, in statu licèt vixerit minùs quieto, haud contemnendos faciat progressus, atque hac ratione se paulatim ad summum humanæ perfectionis gradum evehat.

*Conclusio  
partis sc.  
cunda.*

Denique confido, me generalia artis inveniendi (nam forsàn de specialibus aliàs agam) præcepta tradidisse, quo-

*rum ope, si saltem iis rectè semperque utimur, imposterum cuiuspiam impossibile fuerit in falsa incidere, aut veritatem non semper cognoscere, (veritatis enim & falsitatis clarissimam notionem, passim obviam, exhibui: nimirum id, quod potest concipi, esse verum, &, quod non potest concipi, esse falsum; eamque per totum hunc tractatum infinitis ferè exemplis illustratam confirmavi,) quà etiam ratione quis semper absque errore possit progredi, nova iterumque nova detegendo, modò ad id se velit applicare, (infinitas enim definitiones formare docui, quæ si variè junguntur, varia hinc & indefinita nova formantur) idque exiguo labore: quomodo enim præcipua, quæ hic occurrunt, impedimenta possint ut plurimum penitus tolli, satis prolixè declaravi.*

MEDI-

# MEDICINA M E N T I S,

Sive

TENTAMEN GENUINÆ LOGICÆ,

ubi differitur

De

METHODO DETEGENDI INCOGNITAS  
V E R I T A T E S.

## PARS TERTIA.

*In quo præcipuè objecto perscrutando vitam suaviter & cum  
maximo oblectamento consumere liceat.*

*Hic, quâ ra-  
tione id o-  
ptimè conse-  
quamur, o-  
stenditur.*



Utm verò tandem non sufficiat metho-  
dum sibi acquisivisse, veritatem, ubi-  
cunque latuerit, per se ipsum eruendi,  
nisi in eâ nos multum exerceamus;  
restat ad ultimum ejus complemen-  
tum, ut eam etiam statim ipsis rebus  
occultis detegendis applicemus, quò  
magis magisque in eâ, quantum fieri  
potest, confirmemur. Ut autem hæc quoque omnia cum  
maximâ nostri delectatione peragantur, quia nos illa, ad  
quæ nos ipsi propriâ sponte inclinamus, omnium maximè  
delectant, judicandum sanè est, nihil hic magis è re fore,  
quàm proprium hac de re consulere ingenium, & proprias  
potius animi inclinationes, quàm quicquid alii suaserint, ex-  
actè sequi. Sic enim non dubitandum, quin tunc, quia,  
quò

quò inclinatio fertur, eò etiam tota nostra natura tendit, multò majores in veritatis acquisitione facturi simus progressus, & majori cum delectatione, ac in ullà unquam re alià: quod idem experientia quoque omnimodè confirmat. Etenim illi, qui hoc naturæ suæ instinctu sive ex instituto *1. Respe-  
nostri.* singulari, sive fortunà sic disponente fecêre, magni certè viri sunt habiti, mundoque exhibuêre singularia. Hæc, qui magnorum virorum vitas perlegerit, optimè firmata inveniet: cùm contrà tot Academiae tot annorum absumpto tempore, & tot Collegia virorum studiis quàm enixissimè incumbentium, paucissima tantùm nobis sua, plerumque verò aliorum inventa, aut commentariis illustrata, aut alio ordine ad discipulorum usum disposita, tradiderint, nihil autem dignum, quod cum inventis illustratissimorum virorum (qui ad invidiam usque ita noti sunt, ut eos recensere sit supervacaneum) comparetur, ne dicam æquipolleat, multò minùs palmam iisdem præripiat. Certè hujus rei ratio non est alia, quàm, quòd plerique proprias inclinationes ob necessariam vitæ sustentationem vix potuerint sequi, utut optarent maximè, vel quòd unà cum studiis certo adstricti fuerint generi vivendi, ad quod unicè propter temporis penuriam attendere necesse habuerunt, aut, quòd ad studia attinet, ea tantùm tractare coacti sunt, quæ ipsorum genio directè adversabantur. Quod adeò verum est, ut ex alterà parte viderim, homines admodum rudes, qui semper propriam animi inclinationem ab ineunte ætate secuti sunt, eò perfectionis evasisse, ut, quòd oculis saltem inspiciebant, id manibus feliciter efficere, licèt fuerint destituti speciali magistri manu ductione, non sine omnium hæc non attendentium admiratione scirent. Ideoque non ambigendum est, quin, si quis bonà instructus methodo, propriis insuper desiderijs circa hæc haudquaquam sit contrarius, sed potius iisdem, quantum potest, indulgeat, sit exhibiturus non solum sui moliminis progressus singulares, sed etiam tantà cum sui



delectatione, ut suavius hoc ipso omnium bonarum actio-  
num nequeat excogitari præmium. Quin imò mihi præter  
ea certò persvadeo, si ii, qui literis dant operam, suo tan-  
tùm indulserint genio, fore, ut, licet plures personæ circa  
eadem prorsus objecta disquisitiones suas instituerent, nova  
semper post nova, & ita quidem, ut cujusque inventa di-  
versa ab alterius inventis deprehendantur, sint exhibituri;  
id quod quanto cum reipublicæ literariæ emolumento futu-  
rum esset, nemo non videt. Est autem hujus rei ratio cla-  
ra: quia unusquisque, qui propriæ animi inclinationi ob-  
temperat, diu, multumque unam eandemque rem propter  
delectationem, quam ex eâ percipit singularem, nocte die-  
que animo volvit, ac proinde circa id objectum progressus  
potest sperare multò majores, quàm ullus alius, qui, quam-  
vis bonâ methodo fuerit instructus, illo tamen studio planè  
non delectatur. Deinde inquirentium singuli in unoquo-  
que objecto, quod ipsis est delectationi, utut unum idem-  
que fuerit, attendunt ad alia & diversa, pro diverso cujus-  
que ingenio, proque variâ in iisdem rebus considerandis  
constitutione: unde necessario perquam differentia medita-  
tionum inventa nascuntur; id quod variis etiam experien-  
tiis possem elucidare, sed paucis absolvam. Quis crederet,  
in vilibus illis animalculis, qualia vulgò primo intuitu inse-  
cta plerisque videntur, aliquid singulare posse detegi? Imò  
multò minùs quis credidisset, plures eruditorum virorum  
propriâ adductos inclinatione satisfaciendæ curiositatis ergo  
circa ista medituros, & singulos eorum singularia à reli-  
quorum inventis valde discrepantia detecturos esse; quod  
tamen nostro avo factum vidimus. Celebris *Dominus Rbe-  
di* multa in *tractatu* suo de *insectis* profert egregia, ex quibus  
illud inprimis est singulare, quod ostendit, hæc insecta nul-  
lo modo ex putredine, uti quamplurimè, maximè apparen-  
tibus experienciis delusi, crediderunt, sed omnium ad in-  
star animalium perfectorum ex ovo ortum trahere. Curio-  
sissimus

sissimus *D. Gædartius* verò in suo tractatu de *Metamorphosi naturali* multa alia recenset, inter quæ hoc inprimis singulare, prout idem cum admiratione de bombyce notum est, naturam tres præ cæteris singulares transmutationes hic spectandas exhibere, sub formâ scilicet erucæ, chrysalidis & papilionis; quod idem ferè circa omnia reliqua insecta contingere edocet. Clarissimus autem *D. Swammerdam* præterea de hisce subjectis prorsus alias format meditationes, & inter alias hanc inprimis peculiarem, nullas hic fieri metamorphoses, ut alii putant, sed tales tantum transmutationes, quales videmus in omnibus plantis & quibusdam etiam animalibus, videlicet majorem atque majorem, quæ operationis sit, partium explicationem; adeò ut in erucâ jam tum omnia adsint, quæ ad papilionis formationem requiruntur. Nec dubito alios successuros, qui plurima adhuc alia & multò magis singularia circa eadem objecta nos docebunt. Naturæ enim thesauri sunt inexhausti, & DEI Majestas in parvis æquè ac magnis est conspicua. Ac ego ipse quoque, si DEUS vitam concesserit, singularia hic aperiam, & inter alia insectorum primam originem. Licet enim concedam, cum omnibus Neotericis, omnia animalia ex ovo esse; non tamen concedo, omnia ova ex animali ortum habuisse. Hac enim de re evidentissimæ mihi experientix per aliquot jam annos collectæ adsunt, clarè ostendentes, quâ ratione insecta à principio absque aliorum insectorum coitu possint generari seu produci. Ut verò ad exempla accedam propinquiora, habes hic quoque unum & singulare, ne longius digrediamur, in hoc ipso tractatu circa evolutionem curvarum. Erenim quòd hinc multa alia eduxerim, quàm illustrissimus *D. Hugenius*, primus harum rerum speculator, causâ sanè non est alia, quàm quòd hic vir circa pendulorum motum ad utilissimam eorum ad horologia applicationem omnium primus meditatus sit; & cum facilè prævideret, eorum oscillationes haud isochronas

seu æquè diuturnas fore, ad curvas procul dubio se contulerit, & insigne illud, quòd pendulum circa Cycloidem motum æquali tempore oscillationes absolvar, (quam speculationem ingeniosus Anglus *D. Newton* in præclaro opere, quod *Philosophiæ principia mathematica* inscripsit, deinde ulterius promovit) hic observarit; hocque variis deinde curvis applicando in pulchram hanc, quam exhibuit, de curvarum evolutione incidere meditationem. Ego verò exploraturus, quâ ratione omnes conceptibiles curvæ geometricæ viâ simplicissimâ possint efformari, ubi multum hæc meditarer, observavi, simpliciores hic, quàm per focos, dari non posse; tentando deinde idem in curvis mechanicis, reipsâ compèri, hic necessariò focos non esse puncta, sed ipsas curvas; & cum ulterius perspicerem, quomodo omnia analogicè omnibus modis consentirent cum prioribus, incidi præter intencionem in eandem curvarum evolutionem. Inde verò eandem rem diversis modis applicando, diversa planè eduxi, quemadmodum horum quædam suprà explicui fusiùs. Unde clarum est, nullâ nos ratione debere detereri, quòd præclari viri eadem objecta, in quibus nos occupamur, jam tum ante nos magno cum applausu tractarint, modò nobis ad ea magna fuerit inclinatio: inprimis si talia fuerint, quæ singularem includant utilitatem. Quamobrem, ut spero, benevolus Lector mihi non vertet vitio, quòd post tot ingeniosissimorum virorum lucubrationes, aliaque præclara cogitata concernentia methodum detegendæ veritatis, (notiora, quàm ut ea hic prolixè recenseam) meas etiam cogitationes in publicum edere non dubitarim; cum videam, res inter humanas absolutè nihil esse arte inveniendi utiles, neque quod scire plus referat. Quinimo cum in votis habuerim, si ullam unquam rem, certè hanc ipsam inveniendi artem perfectè addiscendi; ideo nihil mihi hac in parte optabilius, & magis ex animi sententiâ cedit, quàm si æquè feliciter, ac quidem optaveram, id fuerim

rim executus; adeò ut hoc idem etiam inter exempla, de quibus jam sum locutus, haut falsò referre lectores, si velent, possint.

Verum enimvero, quamvis concesserim, optimum esse, ut quis, propriam secutus inclinationem, aut hæc aut illa, ad quæ inclinatur animus, sectetur studia; quædam tamen studia nullatenus videntur esse omittenda, ob rationes, me iudice, sat validas. Cum enim per genuinam omnis veritatis detegendæ methodum semper in studiis juxta propriam animi tui inclinationem progrediendum, veluti modo monstravi; primarium autem hujus methodi præceptum sit, ut semper à simplicissimis incipiamus, & gradatim ad magis composita pergamus, cui quidem præcepto inprimis satisfiat per exercitium; nec etiam ulla studia dentur, quæ, quâ ratione id optimè fieri possit, reipsâ tam evidentibus illustrent exemplis, quàm quidem studia mathematica: sequitur sanè, quod, etsi quis in eligendo studii genere ingenio suo, quantum voluerit, possit indulgere, studia tamen mathematica negligere nequeat. Ex illis enim perfectissimæ methodi idea perfectè elucet, ut vel ideo nobis quasi pro normâ possit inservire, ad quam respicientes, si imaginatio nobis insidias struxerit, satis maturè nos corrigamus. Videmus insuper, paucos extitisse Philosophos, qui aliquid laude dignum præstiterunt, nisi simul Matheseos fuerint gnari: impossibile quippe ferè videtur, aliquem nobis singularia in physicis absque hujus scientiæ cognitione exponere posse, quod adeò verum est, ut viri, licet aliàs modestissimi, se vix interim à risu temperent, ubi audiunt, homines Matheseos penitus ignaros in physicis philosophari, nisi id fortè in talibus fiat, quæ ipsis, ut dicitur, oculis parent. Est autem horum omnium ratio, quòd mens nostra tot ab ineunte ætate præjudiciis circa hæc fuerit præoccupata, quibus ea à veritatis indagine avertitur, ut fere impossibile videatur, quenquam singulare quid in ipsis posse pro-

*2. Respectu  
scientiarum,  
quæ nullo  
modo hîc  
possunt omitti,  
quibus se pri-  
mum appli-  
care magis  
refert, licet  
aliis magis  
delectemur.*



ducere, ni ab illis per evidentissimas experientias liberetur: præstant autem id præclarè scientiæ mathematicæ. Aufe-  
runt enim è vestigio tria primaria, de quibus modo in ter-  
tiâ sectione partis secundæ mentionem feci, impedimenta,  
quæ nos mirum quantum remorantur, ne progrediamur in  
veritatis inquisitione. Consistunt autem in eo, 1. quòd ho-  
mines principia assumunt incognita pro cognitis, 2. quòd,  
licèt principiorum loco mera supponant cognita, ea tamen,  
ut omnia alia facilia, non magni faciunt. 3. Quòd, licèt  
horum præstantiam sibi persuaferint, in eorum tamen uti-  
litatem semper, non solam veritatem, inquirunt. Hæc,  
inquam, præjudicia in Mathesi statim ab experienciâ refel-  
luntur. Nam in illâ merè talia traduntur, quæ perfectè  
possunt concipi; quod efficit, ut ab obscuris imaginationis  
perceptionibus sensim liberemur. Porro ex facillimis in-  
tellectu, & quæ vix ullâ attentione digna videbantur, præ-  
clara admodum deducuntur, & horum ope res tam diffici-  
lis solutionis explicantur, ut ante solutionem unusquisque  
absolutè pro impossibili habeat, tam levi cognitione eam  
posse præstari. Denique hic formantur theoremata, quæ  
in se spectata nullius usûs esse videntur, rebus verò diversis  
applicata, incredibilem in Astronomicis, Geographicis, Op-  
ticiis, Mechanicis, &c. afferunt utilitatem. Sublatis igitur  
his tribus per experientiam præjudiciis, in nobis oritur di-  
spositio, theoremata talia per nos ipsos inveniendi; atque  
sic ipsi discimus meditari. Etsi, dum in eo sumus, comper-  
tum nobis fuerit, talem dari artem, qualis à Mathematicis  
inprinis hoc demum seculo detecta fuit, quâ nimirum &  
facile & certò per nos ipsos liceat indagare ea, quæ antea  
mirabamur ab humano ingenio potuisse determinari; tunc  
accidit, ut magnâ artis analyticiæ discendæ feramur cupidi-  
tate. Hac autem rectè perceptâ, tria reliqua impedinen-  
ta, de quibus suprà dixi, levi negotio tolluntur: in hoc  
enim solo præcipuè consistunt, quòd homines, quicquid  
labo-

laboriosè inquisitores invenerunt, id declinare soleant. Ubi verò animadvertimus, ejusdem operà tum admiranda, tum pulchra, & maximè utilia, & nondum antea nota nos posse theoremata determinare, nulla hic ad ea acquirenda laboris habetur ratio; atque ita sensim in nobis qualitatem formamus perutilem, ut scilicet laboriosi seu infatigabiles evadamus, hoc est, nullum in indagandà veritate laborem subterfugiamus. Hisce autem mens ad magna præstanda gradatim, nobis quasi non advertentibus, disponitur atque optimè præparatur. Nec hæc omnia absque singulari delectatione nobis contingere, putandum est; siquidem huc usque neminem vidi, qui, si in ullis aliis, in his præcipuè studiis singularem inesse delectationem inficias iverit. Et nihil notius est, quàm communis illa & plerisque usitata querela: deditos multum hisce studiis sensuales etiam delectationes magnam partem negligere; ut adeoque non sit dubitandum, studia hæc, quæ majorum in nobis delectationum, quàm solent excitare in nobis delectationes, quas vocavi sensuales, causa sunt, absque controversiâ omnibus etiam aliis delectationi futura esse, modò ea cuncti actu, ut decet, tractarint, atque ita rem ipsi perceperint. Notandum autem maximè est, quòd ideo nolim credi, me in eà esse sententià, omnes mathematicas disciplinas cuivis esse discendas; sed id solum urgeo, ut quis tantum ex iis intelligat, quantum requiritur, nimirum, ut Mathematicorum methodus, quâ ad omnia sua inveniendâ & demonstrandâ uti solent, bene innotescat: quæ notitiâ certè, si mihi credis, comparari potest vel manuductione cujusdam, cui hæc methodus bene est perspecta, brevissimo tempore, exiguo labore, & magnâ dubio procul delectatione; vel etiam lectione exigui istius libelli, cui titulus: *Elementa Geometrie planæ & solidæ cum selectis ex Archimede, auctore Andréâ Tacquet*; in quo omnia tam perspicuè explicantur, ut multos noverim, qui hunc authorem aggressi, absque ullius magi-

magistri institutione, suâ sponte hanc sibi scientiam satis feliciter acquisiverunt. Cogor etiam necessariò fateri, me pauca illa, qualiaqualia sint, quæ mihi hætenus per tot impedimenta in quocunque scientiæ genere discere licuit, huic potissimum debere rei, quòd jam tum à teneris delectatus studiis mathematicis quædam, admodum licèt vulgaria, discendi nactus fuerim occasionem; sed inprimis singulari deputo fortunæ, quòd hætenus studiis incumbere licuerit, si non semper ex voto, attamen, quoties concessum id erat, nulla mihi necessitas fuerit imposita ad certa studia prosequenda, sed in iis potius, quibus maximè delectabar, eligendis studiis integra mihi semper fuerit libertas.

3. *Respectu  
scientiæ, quæ  
summam  
absolutè de-  
lectationem  
omnibus  
procuraret,  
modò ipsis  
esset nota.*

Hæc omnia quamvis ita se habeant, necessum tamen est fateri, me ad omnes scientias respiciendo, in quibus homines occupantur, tandem observasse, ratione delectationis magnam inter eas dari differentiam; imò inter omnes illas unam esse, quæ absolutè summam præ omnibus aliis scientiis philosophicis delectationem cunctis absque dubio exhiberet, modò ejus notitia omnibus, ut decet, esset perspecta: ideoque hanc ipsam omnium præcipuam esse, in qua, applicando methodum indagandæ omnis veritatis, modò perceptam operam nostram collocare optimè possumus. Mihi autem hæc videtur esse *scientia naturalis*. Scio equidem multos isthæc legentes à me esse dissensuros, cujus causâ me minimè latet: quia nimirum ejus, de quâ loquor, Physicæ ideam hætenus parum rectè mente formârunt, multò minus fructus ejus perspexerunt, omnium verò minimè reipsâ eos gustârunt. Quod enim ad me attinet, nihil aliud hic per Physicam intelligo, quàm scientiam universi accuratâ Mathematicorum methodo à priori demonstratam, & evidentissimis experienciis, ipsam imaginationem convincentibus, à posteriori roboratam. Videamus autem, num talis scientia sit possibilis, & num ulla detur delectabilior. Si intuemur omnem, quam de entibus ima-

imaginabilibus habemus, notitiam, eam ut plurimum errori valde esse expositam deprehendimus, adeo ut hic non tam universales liceat condere regulas, quin quandoque nos decipiant istæ, quamvis sæpe cum multi laboris & temporis dispendio in lucem protractæ fuerint. Quapropter Mathematici, ad hæc ac similia respicientes, mentem his potius scientiis applicuere, in quibus entia tantum rationalia considerantur, quia in his nullus unquam est timendus error, & quæ proinde propter majorem certitudinem animum eo majori delectatione perfundunt. Verum, quia ob varias ejusdem rei definitiones seu generationes, quæ hic concipi possunt, accidere solet, ut ejusdem rei quamplurimæ dentur demonstrationes, atque adeo nos non statim in omnium maxime genuinam & facillimam semper incidamus; deinde, quia, licet genuinam etiam noverimus viam, hic tamen res tam compositæ concipi possunt, ut ad earum veritatem detegendam multo sit opus labore, eoque nonnunquam tanto, ut, nisi calculum & sæpe iteratam figuræ inspectionem, h. e. imaginationis simul operationes adhiberemus, id, quod proponitur, solâ intellectûs ope planè nobis impossibile solutu esset; ideo crediderim, eum, qui hæc aliaque his similia bene perspexit, majorem procul dubio percepturum esse delectationem ex disquisitionibus, institutis de entibus realibus, seu physicis. Sunt enim hæc omnes priorum respectu multò faciliores. Quod autem plurimi secus judicent, id nullâ aliâ ex causâ oritur, quàm quod innumeris circa hæc sint præoccupati præjudiciis, aut, si fortè quidam à plerisque jam sint liberati, statim ab initio valde specialia, hoc est, prius difficilia, post facilia aggrediantur; id quod bonæ methodi præceptis omnino repugnat. Huc accedit, eos alia etiam specialia circa hæc non considerare, nisi quæ ipsis singularia & admiranda videntur. Hisce obstaculis, quæ oriuntur non à parte rei, sed à nobis ipsis,



sublatis, non ambigo, quin illi etiam mecum dicturi sint, Physicam omnium scientiarum esse facillimam. Nam supra in secundo impedimento satis clarè ostendi, omnia hic fieri juxta ejusmodi legum, quibus faciliores absolutè nequeunt concipi, rationem seu præscriptum. Id quod adhuc specialius cognoscas, si consideraveris, hic non opus esse ut determinetur, quâ celeritate aut tarditate res moveatur, (hoc enim Mathesi competit;) sed tantum, quòd celerius aut tardius res quædam moveatur, id quod multò facilius detegitur; nec quoque determinandum hic venit, in quantum altera quantitas major aut minor, sed solum, quòd quantitas quædam major aut minor sit; nec quoque tam exacta ratio figuræ cognoscendæ est habenda, modò præter propter sit talis, qualis describitur: illa autem omnia in Mathesi necessaria sunt, adeoque difficultatem valde augment. Porro hic necesse est, ut nonnisi unica semper ejusdem rei demonstratio concipiatur; nam hic unica tantum datur causa alicujus effectûs, secus ac in Mathesi, ubi infinitæ ejusdem rei dantur formationes: deinde plurima ejusdem rei dantur individua, ubi, si aliquid nos in uno latet, id in alio se conspiciendum exhibet; si quicquam in minoribus subjectis non ita patet, id in majoribus valde fit conspicuum, ac ubique quasi eadem semper leges continuò repetuntur: quæ omnia hanc scientiam præ aliis multò faciliorem reddunt. Denique non tam facilè hic, quemadmodum in entibus imaginabilibus, decipiemur; quia non solum nobis opem fert intellectus, exhibendo leges universi simplicissimas, secundum quas omnia, ubicunque fuerint ea, & quandocunque producta sint, necessariò determinantur; sed etiam experientias præ cæteris selectas, quæ nos distinctè de rei veritate certos reddant, aut, si alicubi aberratum, in rectam reducant viam, imaginationi facilè, idque innumeris modis, repræsentare potest. Quod si verò alicui eorum quædam,

dam, quæ protuli, quodammodo obscuriora adhuc fuerint visâ, eum oportet libros Neotericorum physicos adire, eorum imprimis, qui in Mathesi excelluerunt, ubi inveniet pleraque, quæ jam protuli, clarè confirmata, quin & multò faciliora & æquè certa, ac sunt, quæ in Mathesi demonstrantur, unde magni momenti res concluduntur. Porro si spectemus omnes alias scientias, in quibus literati occupantur, veluti sunt Medicina, Anatomia, Chymia, Astronomia, Optica, Oeconomica, Ethica &c. hæc singula certè subjecta, de quibus tam varia varii meditantur, diversa à physicis objectis non habent: attende quæso, an ulla alia scientia se tam latè extendat? Quantæ autem sit etiam utilitatis huius scientiæ extensio, tum experieris, cum omnia, quæ reliquæ scientiæ ex cognitione Physicæ hauriunt, ipsis subduxeris. Quid enim reliquum erit Medico, Anatomico, Chymico, Astronomo &c. speculandum? scio equidem, ingeniosum quendam *Gallum* in præclaro libello, *l' Education des dames* dicto, in eâ esse sententiâ, ut scientiam de cognitione sui ipsius omnium præcipuam iudicet: attamen, quàm sterilis hæc cognitio futura sit, si ea demas, quæ ex genuinâ Physicâ hîc præcognoscenda necessariò requiruntur, quilibet facilè colligere poterit. Adeoque certum est, nullam absque Physicâ posse concipi scientiam; ex hac autem ritè explicatâ omnes alias derivari: id quod suprà quoque ostendi, ubi ens Reale, Rationale & Imaginabile (ad hæc tria enim omnia scientiarum objecta tantùm reducuntur) dicebam non nisi unicum & idem ens physicum esse, prout nempe hoc diversâ ratione seu respectu à nobis consideratur; imò, si, quod res est, dicendum est, omnes aliæ scientiæ non sunt nisi scientiæ humanæ, utpote in quibus leges explicantur, quæ à solo nostro intellectu formantur, quatenus ab ipsarum rerum consideratione abstrahimus, & omnia ad nos solos referimus: hæc autem scientia sola inter eas

verè est divina. Etenim in hac explicantur leges, quæ à solo DEO suis inditæ sunt operibus, secundum quas omnia constanter operantur, & quæ nullo modo à nostro intellectu, sed à DEO realiter existente dependent: adeò ut opera Physices considerare nihil aliud sit, quàm ipsius DEI actiones considerare. Hujus quoque scientiæ cognitio nos à tam innumeris liberat præjudiciis, ut, si quis ad primas infantix suæ cogitationes respexerit, sit observaturus, vix unicam ex cogitationibus, quas tum temporis de rebus physicis habuit, fuisse veram; adeò ut aliquis mediante genuinâ Physicâ homo veluti merè novus evadat, & quasi philosophicè regeneretur; idque tantâ sui utilitate, ut jam nunc longè melius & felicius, quàm antea per quævis Ethicorum præcepta, se possit liberare à passionum impetu. Tunc enim clarè videt, ea, quæ oculos delectant, auribus suavia, carni deliciosa, quæ in hominibus superbiam excitant, aut alia quæcunque, quibus ipsorum mens agitur & turbatur, non nisi magna infantix nostræ esse præjudicia, quibus ab imaginatione vehementer decepti sumus, eò quòd hæc omnia tanquam bona realia consideraverimus, extra nos in ipsis rebus existentia: cum contrà per Physicam edoctus quis clarè sciat, idipsum quod jam nobis pulchrum, delectabile, magni faciendum &c. videtur, si nostrorum saltem sensuum alia esset constitutio, tunc visu horrendum, molestum, omnique ratione spernendum &c. visum iri. Quod si hic talia sæpe animo secum volvat, & per sensibiles experientias imaginationem contrariantem vincat & corrigat, facillimè à plerisque passionibus, aut potius ab illegitimo illarum usu liberatur; adeò ut intellectus bona verè realia is nunquam non præferat. Non verò mirandum est, alios, qui hac carent notitiâ, quicquid & quantumcunque eas ipsis dissvaseris, à vitiosis istiusmodi passionibus non abstinere: quum istius rei causa attendenti sit satis perspicua; quia

quia nempe genuina horum errorum causa pulchris Ethicorum sententiis non tollitur, verum sublatâ genuina horum origine. Ex Physices scientiâ perfacile quoque potest colligi, quàm inanis sit gloriæ cupido, quâ eruditi non rarò vexantur, multumque se cruciant. Hinc enim clarissimè cognoscitur, terram perituram esse, adeoque & cum eâ omnia horum ingeniosissima inventa, quæ mallent ut in æternum durarent. Si verò mente paulò altiùs elevatâ perpendere dignarentur, nil intellectui esse evidentius, quàm nos unicè quovis momento à DEO pendere, adeò ut ne quidem manum elevare, ullamve formare cogitationem, &, ut verbo dicam, nihil unquam absolutè sive mente sive corpore possimus præstare, ad quod actualis DEI concursus quovis momento non requiratur; Cui adeò etiam soli unicè, non nobis, debetur gloria: hæc, inquam, & similia si attentè & frequenter dignarentur considerare, mirarer, si adeò impensè gloriam quærerent, & hoc ipso aliis forent molesti. Nam certè voluntas fertur in id, quod ab intellectu ut verum evidentissimè cognoscitur. Et licèt vulgus non rarò quærat & conqueratur: quid juvat scientia absque praxi? attamen hoc solummodo de scientiâ historicâ, aut, si mavis, inimaginabili, non verò de intellectuali, quæ à praxi nullatenus potest sejungi, est verum. Sicubi verò etiam aliquis, qui cujusdam rei notitiam habet intellectualem, huic contraria vitæ suæ actionibus expresserit; certum est, eum ad hanc tum temporis non respicere, verum potiùs ad imaginationis saltem ductum. Si enim ad intellectum reverà attendetet, necessariò voluntas in id quoque tenderet, quod intellectus ut verum ipsi exhiberet, hoc est, idem suis actionibus necessariò exprimeret: ideoque reapse juvat multum talis scientia, cum hac ratione nullo modo à praxi sit separabilis. Hisce tamen non obstantibus condigna verè eruditus nunquam deerit æstimatio, licèt ad eam sibi parandam



dam ne quidem unquam cogitent; dummodo, quæ intellectus suaserit, constanter prosequantur; quinimo plus sibi tunc gloriosi nominis conciliabunt, quàm ipsi pro talium virorum consuetudine unquam sibi optaverint, cum id gratissimo illi otio, quod ad intellectus culturam necessariò requiritur, fermè semper sit contrarium; de quo in primâ parte plura. Physices quoque scientiæ ope clarè confirmamur (ut prænobilis Philosophus alicubi ait) *non nisi chimeram esse id, quod vulgò Fortuna vocari, hominumque mentes mirum in modum inquietare solet: contrà autem hic omnia à providentiâ dirigi, cujus decretum æternum adeò infallibile & immutabile est, ut exceptis iis, quæ idem decretum voluit pendere ex nostro arbitrio, cogitare oporteat, respectu nostri nihil evenire, quod necessarium non sit, & quadantenus fatale; adeò ut absque errore cupere non possimus, ut aliter eveniat.* Hoc, inquam, Physica certâ ratione clarissimè etiam confirmat, ubi innumeris imaginatio experientiis convincitur, quòd, quandocunque effectus producitur, necessariò omnia requisita ad hunc effectum producendum adesse debeant: si autem omnia adsint requisita, necessariò etiam effectus sequatur. Ei quoque, qui huic scientiæ incumbit, DEI magnalia ex ejusdem operibus incredibili ratione magis, quàm ulli ex vulgo, elucent, dum reipsâ clarâ demonstratione cognoscit, operum DEI, eorumque perfectionis non esse finem, sed absolutè tam magna & perfecta ea esse, ut nulla hominum cogitatio hic finem attingere queat. Hinc ipsi DEI sapientia, potentia, ac bonitas ad vivum conspicua erit: quâ de re illustrissimus D. Boyle præclaram dissertationem, quæ inscribitur: *Debita erga DEUM veneratio ob sapientiam & potentiam* &c. edidit. Verùm hic tandem ad multò majora adhuc noscenda Physices ope præparamur. Omnium enim hujus scientiæ generalium tractatione bene absolutâ, non solum mentis nostræ ejusque immortalitatis, sed & ipsius DEI,

DEI, ejus realis & necessariæ existentia, ac attributorum infinitè perfectorum notitia, quanta quidem per lumen naturale obtineri potest, multò nobis clarior & facilior evadit. Atque hæc genuina causa est, quare plurima eorum, quæ *D. des Cartes* in suis *meditationibus* nobis exhibuit, multis adeò obscura fuerint visa; quia nimirum tunc necesse habuit multa reticere, quæ non nisi post explicatam Physicam clarè patent, & quibus cognitis illa demum præjudicia, quæ claræ perceptioni ibi obstant, penitus tolluntur: quod ipse etiam variis in locis apertè dixit, v. gr. in *principio meditationis quinta*: *Multa mihi supersunt de DEI attributis, multa de mei ipsius, sive mentis naturâ investiganda, sed illa fortè aliàs resumam.* Quod absque dubio præstitisset post totam suam explicatam Physicam. In fine sextarum objectionum apertè fatetur, rerum physicarum cognitionem ad mentis notiones bene cognoscendas, atque ad se circa Metaphysicæ fundamenta confirmandum, inprimis sibi inserviisse. In *synopsi 2, meditationibus præfixâ*, hæc insuper expressa verba habet: *tum etiam, quia præmisit, ex quibus ipsa mentis immortalitas concludi potest, ex totius Physicæ explicatione dependent.* Hicque rogandus est Lector, ut notet, quæ mihi causa fuerit, cur supra de entibus realibus tractans eorum nulla alia quàm physica produxerim, deque nullis aliis usque huc disseruerim: quia nimirum in eâ sum sententiâ, hanc notitiam, ita ut ab omnibus rectè capiatur, non posse, nisi genuinâ Physicâ, prout decet, prius explicatâ, fructuosè tradi. Quis enim mortalium tanti momenti veritates claro mentis intuitu lustraverit, nisi ab innumeris & magnis præjudiciis, quæ hic obstant, & quæ sola Physices scientia plenè & planè auferre potest, perfectè purgatus & liberatus fuerit? Hoc autem ritè peracto, hæc quidem & similia adeò clara esse possunt, ut nusquam ullus de iis dubitandi locus supersit. Verùm si demonstrandum esset, quantum Physica omnes

omnes alias philosophicas superet scientias, quis id oneris in se suscipiens dicendi finem inveniret? Existimo interim, me jam satis, quantum ante Physices explicationem fieri potest, ostendisse, quòd, nisi præjudiciis nimium quantum occupati essemus, nulla scientiarum foret tam facilis quàm Physica; nulla tam latè extensa; nulla tam utilis; nulla, in quâ tanti momenti veritates ad conservandam mentis & corporis sanitatem, & utriusque potentiam mirum in modum augendam, cognoscantur; nulla denique (ut hoc superaddam) quæ nos adeò ad suorum objectorum speculationem continuò quali invitet, quàm Physica. Quicquid enim cogitemus (sive dormiendo, sive vigilando) quicquid videamus (sive cælum intueamur, sive terram) aut quicquid agamus, Physices objecta semper se ultro offerunt. Quodsi ergo has omnes, præ omnibus aliis scientiis, singulares prærogativas consideraverimus, nullus dubito, quin, si cognitio veritatis nos omnium maximè delectat, juxta primam hujus tractatus partem, omnes illæ veritates, quæ ope hujus scientiæ eruuntur, postquam multam earum cognitionem adepti fuerimus, omnium maximè absque ullâ controversiâ nos delectaturæ sint. Est enim insuper hæc scientia tam fertilis, ut, licèt terra per multa annorum millia adhuc duratura esset, non ideo tamen timendum sit, ne fortè posterius multas adhuc singulares, magnique momenti res non sint derivaturi, de quibus nullus antecessorum cogitasset. Nec solæ nobis rationes talia suadent. Quantâ enim dulcedine, seu internâ voluptate mentem, plus quàm quævis alia, reverà Physices afficiat cognitio, ipsa etiam experientia clarè demonstrat. Fuerunt enim, qui propter haud vulgarem Matheoseos cognitionem majores, ac alii, in hac scientiâ delectationes gustârunt, interim tamen Physices studia adeò Mathesi prætulerunt, ut propemodum huic valedixerint, quòd plus temporis mentem tam amœnis speculationibus

bus recreandi haberent: quod certissimum, meo judicio, argumentum est, hanc scientiam majores, quam Mathesin, delectationes menti exhibere degustandas. Idem vel ex eo clarè colligitur, quòd, postquam experienciâ hoc inprimis seculo eruditi didicere, quàm magnos hoc in studio, si nos ei ritè applicemus, progressus possimus facere, & quàm singulares nobis adferat delicias; tanto jam cum applausu id ipsum excoli cœperit, ut integræ illustres Academiae in Galliâ, Angliâ, Germaniâ &c. ejus causâ præcipuè fuerint formatae, quæ, licet alia quoque sectentur studia, omnia tamen sua eò præcipuè dirigunt, ut genuinam Physices scientiam, quâ nulla scientiarum antehac magis fuit incognita, in lucem protrahant.

Scio equidem, has rationes convenientiores olim fueras, cum posterius aurea illa, si dabuntur, secula, in quibus tam nobilem conatum felix hujus rei exitus est secuturus, aspicere poterunt: interim tamen tam præstantia & hoc seculo jam sunt inventa, ut, licet minima adhuc sint eorum, quæ detegi possunt, ea tamen omnia, quæ dixi, satis superque confirment; adeò ut eum, qui hæc attentè expenderit, facile concessurum esse credam, meritò me concludere posse, quod hisce satis evidentè ostensum sit, *in quo præcipuè subjecto perquirendo* (juxta inveniendi artem) *vitam suavitè* (quid enim suavius, quàm propriam semper animi inclinationem sequi?) *& cum maximo oblectamento* (in quâ enim scientiâ majori cum delectatione, quàm in Physicâ, entis nimirum perfectissimi actiones considerando occupabimur?) *consumere liceat.*

Hisce tandem ea omnia absolvi, quæ de methodo veritates incognitas detegendi me tractaturum hac vice mihi proposui: siquidem scopus mihi fuit, ut, quantum in me esset, aliis viam quandam tam facilem, quàm quidem natura ejus permittit, traderem, quâ quisque per seipsum summam

*Conclusio  
tertia par-  
tis.*

*Conclusio ge-  
neralis cum  
elucidatione  
eorum, quæ  
sunt præci-  
pua in hoc  
tractatu.*



nam perfectionem, cujus homines lumine naturali capaces esse videntur, assequi, hoc est, quâ ratione sibi habitum acquirere possit, veritatem in omnibus rebus proprio Marte detegendi, ac proinde, quid sibi utile, aut quid noxium sit, discernendi. Ubi inprimis in id incubui, ut clarè ostenderem, non solum, *Quid* hic sit faciendum, aut omittendum; sed etiam, *Quomodo* hoc sit faciendum aut evitandum, seu ut ipsam id obtinendi viam evidenter monstrarem. Hæc enim duo perquam diversa sunt; quorum posterius plerumque ab aliis omittitur, cum tamen sit omnium primum, quod ipsi lectores inprimis desiderant. Verum quisquis hæc attentè evolverit, non poterit non observare, me ad hoc obtinendum viâ usum quasi intermediâ inter omnium huc usque philosophantium vias, quorum quidam omnem cognitionem à priori per solas rationes, reliqui potiùs à posteriori per experientiam derivandam esse censuerunt. Est enim mea sententia, initio quidem à posteriori incipiendum, tum verò in progressu omnia tantum à priori derivanda, & ubique per evidentes experientias singula confirmanda esse; hocque eò usque continuandum, quo usque denuo ad primas experientias, quas à principio assumpseramus, ipso ordine ducti redeamus, & sic totus Philosophiæ circulus absque circulo (illum puta, quem improbant Logici) sit absolutus, id quod philosophantium nemini, credo, adversabitur, modò me bene affecutus fuerit. Etenim existimo, nullam esse præstantiorem viam investigandi in principio veritatem, quàm per experientias. Hoc interim sanæ rationi omnino consentaneum esse sentio, quòd (cum experientias faciendi non semper detur occasio, nec absque sumptibus eæ plerumque fiant, imò, nisi accuratissimi simus, eadem etiam non rarò perquam sint fallaces) ab iis potissimum experientiis sit inchoandum, quæ omni pene momento possunt institui, quæ nullas requirunt expensas, & quæ nulli

pror-

prorsus errori sunt obnoxia; hoc est, incipiendum esse putato ab experienciis, quæ in nobis ipsis fiunt, & præcipuè ab iis, quæ omnium primæ in nobis existunt. Quod autem supra strictè iis inhæserim, facile, si sequentia notaveris, colliges. Cum enim nullo modo possim negare, quod *sciam*, me hæc ipsa verba jam scripto consignare; adeoque eadem ratione *notum mihi sit*, quod hunc tractatum jam concludam, atque ita eodem modo variarum omnino rerum *consciis sim*; hoc meum scire, hoc notum mihi esse, hoc conscium, quod in me experior, quod etiam nullo modo negare possum (si enim negarem, scirem sanè, seu notum mihi esset, me negare) pro primo principio, vel pro primâ experienciâ, mihi notissimâ, assumo. Sed hic maximè notandum est, me interim neque affirmare neque negare, quod hoc meum scire, hoc notum, hoc conscium esse, seu, ut *D. des Cartes* vocat, hoc cogitare res notissima à priori sit; de his enim & similibus nihil jam determino: sed hoc tantum, ut dixi, pro certo statuo: *quod hoc meum scire, hoc notum, hoc conscium esse, vel, si mavis, hoc cogitare, primum sit in nobis, quod omnes nostras cognitiones præcedit, & cujus in nobis ipsis existentiam* (non dico naturam: hæc enim diversissima sunt) *experienciâ evidentissimâ cognoscimus*; adeo ut unusquisque, cum dicit: *ego* aliquid facio, nihil aliud per hoc *ego* significet, quàm id, cujus ope scit, vel notum sibi est, vel conscius in se ipso est, se aliquid facere, vel si ita placet, quod cogitet, se aliquid facere. Et cum talia, nulli attribuat corpori (quis enim scire, notitiam habere, conscium esse, cogitare ulli attribuit corpori?) certum est, illum mentem solam per hoc *ego* denotare, ore licet semper quasi contrarium statuat, & hoc *ego* soli corpori appropriet. Vides igitur, quid per *Mentem*, quidve per *Conscientiam* intelligi velim. Cum igitur mens conscia sit multarum rerum, hocque conscium esse neutiquam ab eadem

mente, seu à nobis ullà videatur ratione posse separari; hoc enim si possibile esset, illico hoc conscium sibi esse, à se ipsis tollerent ii, qui magnos patiuntur dolores, aut qui facti alicujus improbi recordatione in conscientia anguntur; idcirco nihil tam necessarium esse videtur, quàm felicitatem ejus, quod nobis semper intimè adest, procurare. Hoc autem dum agimus, se nobis offert experientia secunda, nobis notissima, quæ est fundamentum totius nostræ felicitatis: *nimirum quòd nos quadam bene, quadam verò malè afficiant.* Nec video, quà ratione hac de re possimus dubitare; nam ipsi Sceptici, qui tam rigorosè de omnibus dubitabant, nihil aliud suis dubitationibus quæsiwerunt, quàm quietum animum, ne, si aliquid statuerent, atque postmodum ejus falsitatem detegerent, hac de re turbarentur, (ut refert *Sextus Empiricus* de fine Scepseos) ideoque concedebant, se meliùs à quieto, quàm ab inquieto, animo affici. Sed interim, ut dixi, hoc principium non ut à priori, sed tanquam per experientiam saltem cognitum assumo; nec jam disputo, num id, quod me bene afficit aut malè, sit, absolutè loquendo, bonum aut malum; multò minùs determino, unde hoc in nobis oriatur, & similia alia. Hanc autem mentis operationem, quà ea, quæ ipsam bene afficiunt, appetit, & ista, quæ malè afficiunt eandem, averfatur, *voluntatem* voco. Dum autem juxta hanc experientiam progredior, & omnia, quæ me bene afficiunt, examino, ut inde colligam, quæ me omnium optimè afficiant, animadverto, nihil meliùs & constantiùs me afficere, quàm acquisitionem veritatis; ideoque de hac acquirendà meditando observo tertiam experientiam, quæ est totius humanæ certitudinis fundamentum, videlicet, *quòd quadam possimus concipere, quadam non.* Explicui autem suprà variis in locis, nullum hominem hanc rem in dubium posse vocare, ni modò propriæ velit conscientiæ contradicere; refutavi quoque ob-

jectio-

jectiones communiter hic produci solitas, idemque quamplurimis illustravi exemplis. Imò sapè miratus sum, cur recentiores quandoque tam prolixi sint in refutandis formis substantialibus, qualitatibus realibus, facultatibus attractricibus, retentricibus, &c. speciebus intentionalibus, similibusque innumeris Scholasticorum commentis, cùm tamen hæc omnia paucissimis possint destrui, quin imò tam validà ratione, ut nulla validior demonstrandi ratio dari absolute queat: nempe monendo, cuncta hæc talia esse, de quibus nullus hominum, quicquid conetur, ullum possit formare, conceptum, nec ullum quis impofterum sit formaturus. Eadem ratione non opus erit, ut longi simus in demonstrando, in rebus naturalibus explicandis admittendum esse partium motum, magnitudinem, figuram, situm, &c. cùm sufficiat dicere, hæc omnia ab unoquoque posse concipi. Hic autem itidem profiteor, mihi hoc tantùm experienciã innotuisse, quo ipso infinitas declinò disputationes, nimirum, in quo consistat natura conceptus, vel si mavis ideæ, quid sit vel non sit, & similia plura. Hanc autem mentis operationem, cujus ope quædam concipimus, quædam verò non possumus concipere, *intellectum* vocavi. Ulteriùs verò hujus experienciæ certitudinem examinans observo, quòd illud, me quædam posse concipere, me non tam fortiter ad assensum cogat, quàm hoc alterum, me quædam non posse concipere. Hic in hujus rei causam inquirendo reperio quartam experienciam, *permulta mihi tanquam ab externis advenire, nimirum per sensus, per internac imagines, & per passiones.* Hac quidem de re nemo unquam seriò dubitavit, ne ipsi quidem Sceptici. Non enim de apparentiùs poterant disputare, nisi apertè fatendo, se quasdam habere. Sed hic iterum non opus habeo determinare, quâ ratione hæc & similia, & id genus alia peragantur: nam hæc non nisi ut experienciam clarissimam admitto. Voco autem fa-



cultatem, quâ res tanquam externæ sic cognoscuntur, *imaginationem*, & per *Corpus nostrum* intelligo id, cujus ope talia animadverto. Habes hic omnes primas experientias, quibus solis utor; quæ omnes tales sunt, ut quovis ferè momento possint institui, nullas requirunt in executione expensas, & nulli planè errori obnoxia sunt, prout idem modò & per totum hunc tractatum evidentissimè manifestum feci: atque sic intelliges quomodo velim, ut à posteriori in initio Philosophiæ inchoetur; & quâ ratione infinitas declinem difficultates, ac aliis viam aperiâ eas declinandi, in quas se frustra magni certè viri conjecère, eò quòd non attenderint, hæc, hisque similia initio philosophandi nullo modo esse definienda, cum sanè nobis tunc possit satis esse, de similibus tantum scire, quantum requiritur, ut incognitas veritates possimus elicere; hoc verò abundè nobis ad id sufficiat, eâdem ratione, ac Mathematicus novit veritatem, certò detegere, indubitato demonstrare, erroresque optimè evitare, licèt ipsi non sit perspectum à priori, in quo natura mentis, intellectus & similium consistat. Velle autem negare, similia ad effectum non posse perducì, nì priùs priora determinentur, idem mihi videtur esse, ac si quis negaret, homines ulla prorsus artificia mechanica manibus posse perficere, nisi ipsis antea natura seu interna manuum structura, esset perfecta. Hisce itaque ritè determinatis, quantum, ut dixi, necesse est, deinceps omnia per totum hunc tractatum ex his solis derivavi, hoc est, semper à priori per intellectus operationes processu, & omnia, quantum potui, clarissimis firnavi experientiis, ut imaginatio ubique ab erroneis purgaretur impressionibus. Eodem modo progredior in sequenti tractatu, de quo mox dicendum erit. Quia verò circa hæc magna in philosophandi principio oritur difficultas, ea, quæ ibi concludo, inter probabilia tantum repono. Verùm si hîc deinde rogaveris, quid porro agendum

dum restat? responsum jam supra dedi, ita esse progredendum à priori, usque dum ad primas has quatuor experientias reversus fueris, hoc est, ut clariùs loquar, usque dum hominis natura tota fuerit explicata. Et ut paucis multa complectar: Philosophia, hoc est, ars inveniendi non incongruè mihi videtur posse assimulari arbori, quæ consistit ex tribus, nempe radicibus, trunco, & ramis cum fructibus. Radices mihi artis inveniendi generalia præcepta esse videntur; truncus artis ejusdem specialiora præcepta circa entia imaginabilia, mathematica & physica; rami cum fructibus artis inveniendi specialissima præcepta circa Ethicam, quæ mentis perfectam sanitatem, circa Medicinam, quæ, quantum possibile est, sanitatem corporis, & circa Mechanicam, quæ utriusque potentiam in rebus externis ad nostras utilitates applicandam docet. Unde patet, quòd, quemadmodum radices, truncus, & rami ex tribus constant, substantiâ scilicet medullari, per quam succus præcipuè fertur, durâ seu nucleo, & cortice; ita ubique in hac totâ Philosophiâ tractetur non nisi de entibus realibus, mathematicis & imaginabilibus; circa radices quidem imperfectè; in trunco perfectiùs; in ramis perfectissimè. Me quod attinet, optârim, ut, his jam cum publico communicatis, arboris hujus radices saltem quodammodo tibi, Lector benevole, exhibuerim, prout unicus meus hac vice fuit scopus. Quicquid verò sit; votorum meorum summa est, ut hæc in veram mentis tuæ medicinam vergant: quod dubio procul fiet, si hæc ipsa, quæ tibi offero, tam fuerint efficacia, ut per ea excitetur in te certa ejusmodi dispositio, quam præcipuum studiorum meorum fructum deprehendi, quâ etiam nulla earum, quæ lumine naturali acquiritur, utilior absolute concipi potest, & quâ tam omnibus bonis placere, quam ipsi etiam DEO non displicere, possis: talis nimirum, quæ te semper intrinsecus ad veritatem, quoad ejus fieri potest, ferat.

riò quærendam efficacissimè incitet, continuoque, ut nullam ejus acquirendæ occasionem prætermittas, te impellat, tandemque efficiat, ut veritatem, sicubi illius tecum fueris conscius, nullâ habitâ aliarum rerum atque considerationum ratione, num scilicet veritas illa te multorum errorum, quibus hætenus addictus fuisti, convincat; vel num tuæ æstimationi, quam huc usque alia profitendo tibi comparasti, aliquid ea detrahat; vel num eam ab adversario tuo discas; vel num ab eo, qui quoquo modo sit vel habeatur vilior atque simplicior teipso, tibi exhibeatur, &c. nullâ, inquam, tali, nisi solius veritatis habitâ ratione, liberrimè & pleno animo eandem amplectaris, & tanquam thesaurum, quovis alio pretiosiore, tuo digneris amore. Cæterum quia unanimi omnium consensu perhibetur:

*Transitio ad  
sequentem  
tractatum.*

*Orandum est, ut sit mens sana in corpore sano,*

& verò tu hic reipsâ quædam consilia sanitati mentis haud inutilia hætenus offendisti; laboris etiam, ut spero, te haur pœnitebit, qui in sequentem tractatum, eâdem attentione, evolvendum, impendetur: cùm, quæ in eo percipies consilia pro conservandâ corporis valetudine, non minùs fortè salutaria sint futura.

F I N I S.

# MEDICINA CORPORIS,

SEU

COGITATIONES ADMODUM  
PROBABILES

DE

CONSERVANDA SANITATE.



LIPSIÆ,

• Apud J. THOMAM FRITSCH.

---

M DC XCV.



*[The text on this page is extremely faint and illegible due to fading and bleed-through from the reverse side. It appears to be a continuous block of text, possibly a letter or a chapter section, written in a cursive script.]*

AMICUS AUTHORIS  
AD  
LECTOREM.



*Peritièrunt hic loci amici, ut Author hunc suum Tractatum quâdam muniret præfatione; id verò ab ipso impetrari non potuit, eò quod arbitraretur unicuique satis velex solo titulo manifestum futurum, bas suas Meditationes non nisi pro valdè probabilibus venditari, & proinde fortè refutari posse. Quod si ab aliis sincero animo, veritatis cognoscendæ ergò, præstetur, nullatenus ipsi displicere poterit; ideòque horum in gratiam nullo procæmio opus esse fatetur: si illis occurrendum, qui solis passionibus seducti, bellum ei indixerint, ut propriam auctoritatem, quam hoc in Tractatu periculum subire autumant, tueantur. Multa hic quidem præfationis loco in medium possent proferri, sibi solis duntaxat, minimè verò Lectoribus profutura; quorum tamen utilitati hoc suo scripto inprimis litaret: se igitur nolle eos hic frustra moram injicere. Existimat insuper nullas rationes, ut ut validissimæ fuerint, sufficere, ad illos, qui passionibus suis miserè inserviunt, atque eâ de causâ propria salutis, id est sibi ipsis contrarii sunt, cohibendos, quin aliis quoque adversentur: se hic utilissimam, multo labore, & multiplici experientiâ observata aliis candidè communicare; se porrò contra illos, qui ea in-*

*grato acceperint animo, nihil valere, & summopere optare, ut Lectorum utrique, antequam hunc evolvant Tractatum, vel de eo suum ferant judicium, præcedentem perlegere dignentur, cujus hac pars mera tantum est consequentia, (id quod in quarto impedimento baud obscure innuit) & Specimen quoddam, quo ostenderet, quàm ardua per hanc suam methodum, antecedenti Tractatu traditam, statim liceat aggredi; atque ideò Lectorum judicia æquiora sine dubio tunc fore. Nequivit autem à se ipso impetrare, ut propter eam præfationem conscriberet, in quâ alios rogaret, ut hunc laborem in illius gratiam susciperent. Hac sunt, Lector Benevole, quæ ex ipso audita, tibi impræsentiæ præfationis loco indicanda duximus.*

*Mirabitur quoque dubio procul Amicus Lector, qui fiat, ut stylus MEDICINÆ CORPORIS toto ferè cælo differat à stylo MEDICINÆ MENTIS, & diversum esse Authorem existimabit: verum qui mente volverit continuas, & graves Authoris occupationes, aliaque infinita impedimenta, quæ doctis baud raro remoram injiciunt, admirationem suam sistet, & credet hac non fuisse illius juris, faciliq; negotio hoc non nobilissimo Authori, sed aliis imputabit, qui id operam dedere, ut hic Tractatus, ab ipso suo idiomate conscriptus, in lucem prodierit publicam.*

*Hæc monere visum fuit. Vale.*

# MEDICINA CORPORIS,

SEU

COGITATIONES ADMODUM PROBABILES  
DE CONSERVANDA VALETUDINE.



Um juxtà sapientiorum sententiam, ejus, qui veritatibus incognitis detegendis operam dederit, prima & præcipua cura esse debeat, ut benè vivat, certasque sibi regulas, secundum quas vitæ suæ ratio disponenda sit, conveniente præviâ meditatione, comminiscatur; non ideò posthabenda ipsi esse videbitur cura, quâ maturè & à principio de certis sollicitus sit regulis obtinendis ad valetudinem conservandam facientibus, cum ea primum fuerit omnium nostrarum actionum basis. Ad priorem igitur quod attinet curam, quia in præcedenti Tractatu eam expeditam dare allaboravimus; crediderim hoc mihi jam negotii superesse, ut ratione posterioris curæ, ingenuo veritatum inquisitori Medicinâ aliquâ provisionali, ut sic dicam, id est quâ interim, donec melior suppetat, tantisper utatur, pro tempore subvenirem. Quâ quidem in Medicinâ propositurus sum, si non meras apodicticis demonstrationibus evictas certitudines, at tales saltem, quæ perquam probabiles mihi videntur, quasque experientiâ satis confirmatas huc usque notavi: paratus interim causâ cedere, opinionemque meam absque morâ mutare, quam primum, vel per me ipsum, vel per alios, major successu temporis lux in re tam obscurâ affusserit.

Primò autem id ostendam, quod experientia me hætenus didicisse existimo, conservationem valetudinis tam-



et si strictæ alicui diætæ non adeò scrupulosè & ad amussim adhæserimus, nihilominus non tantæ molis opus esse futurum.

Secundò; quænam sint signa præcipua de malo nobis sat vicino nos commonentia, quibusque mediis istud malum præcaveri possit?

Tertiò; amissa valetudo quomodo recuperanda, sive quænam, si morbo nos premi contigerit, securissima sint remedia, quorum ope experientia nos doceat commodissimè liberari posse?

### PRIMA PARS.

**P**rimùm quod concernit, fateor ad valetudinem conservandam bonâ & ritè ordinatâ Diætâ nihil inveniri præstantius, per quam à vario cibi potûsque genere abstinemus, aut si iis utimur, destinato hoc sit tempore, variisque præterea corpus exercitiis, dummodo ne nimis fuerint vehementia, sæpè movemus. Hâc unâ enim benè observatâ diætâ, multi communem humanæ vitæ terminum ab omni morborum molestiâ liberum longissimè transgressi sunt: cujus rei nobis speciale exemplum per notabilem experientiam in se ipso exhibuit Cornarus nobilis Venerus in tractatu suo de Sobrietate. Possent huic aliæ adhuc similes addi regulæ: nimirum valetudini non parum conducere, si, prius quam cibus utamur, calido quopiam jusculo stomachus fuerit præparatus: quippe comperimur eo ipso cibi appetentiam augeri, ex adverso eam, si vel optima fuerit, ubi cibum potus frigidi alicujus haustus præcesserit, ferè omninò extinguì. Præcipuè vero senio confectis haud modicum conferre victu nutriri ut plurimum satis calido. Porro animadvertimus, ad concoctionem facilius absolvendam prodesse, si cibus non diglutiat, nisi probè mansus dentibusque comminutus, aut, ubi ob senectutem defecerint, in minutissima discindatur frustula. Et sic multa alia ad eundem scopum ducent.

ducentia in medium afferri possent: ut omnia corporis membra à frigore externo arcere: locum in quo maximam juventutis partem confecimus, ob res, quibus natura nostra assuevit, innumerabiles, non multum mutare, &c. Verum enim verò fateri omninò cogor, ad isthæc omnia iisque consimilia ritè observanda neminem sufficere, præter solitariam vitam viventes, aut eos, qui, ut dicitur, sui juris sunt, seu nullius obedientiæ subjacent, quod utrumque, totoque vitæ tempore, obtinere posse difficultatis certè non mediocris res esse videtur. Nec multos proinde ejusmodi proficere, regulis posse in confesso est. Imò observavi contrà, iis, quibus nulla cibi potûsve seligendi potentia concessa est, nihil magis noxium esse, quam ordinatam ejusmodi victûs rationem. Si enim à consuetâ suâ vivendi normâ vel tantillum recedere cogantur, in gravissimos plerumque morbos incidunt, quin, quod multos qui diætæ cui assueverant limites nimium excesserunt, ipsam mortem subiisse sæpenumero compertum est. Et sic communiori exemplorum observatione notavi illos, qui quovis indiscriminatim cibo, prout buccæ obvenerit, uti dubitant, quemque capiunt pastum, nonnisi parcissimè capiunt, & insuper certo se in hoc alligant tempori, cum huic ordini tam strictè semper inhærere non possint, eos, inquam, deterioris ut plurimum conditionis esse, quam ii, quibus ista omnia neutiquam curæ sunt. Hinc est, quod multi, qui hæc non considerant, non rarò mirantur, eos, qui quàm possunt exactissimè in victu discernendo sibi cavent, inque omnibus suis actionibus accuratissimo procedunt ordine, morbis sæpè magis vexari, quam quos in his omnibus graviter excedere vident. Unde in hanc imprudentes delabuntur opinionem, ut satius esse credant, nullum in his certum sequi ordinem, nisi eum quem consuetudo introduxerit, in quo non minus falluntur, prout tot morbi, quibus sæpenumero affliguntur, contrarium ipsis faciliè persuadent. Inter utrumque igitur errorem, tam

exces-

excessum quam defectum (quorum alter bonæ diætæ observatio est, sed non continuata: alter mera consuetudinis sequela, id est, omnium penè regularum neglectio) mediocritatem proponere per sequentes Regulas arbitratus sum. Quarum

### PRIMA REGULA.

*Naturam nostram, quam diu in tali fuerimus statu, quo vires nostræ satis sunt valida, assuefaciendam esse, ut omnia, quæ in hac vitâ nobis communiter obtingere possunt, contraria perferre discat, eaque non tantum mediocria, sed etiam aliquantum, non tamen nimium, excessiva: Ut Sicim, à Cibus abstinentiam: contrà etiam aliqualem cibi potûsque, cum superfluitatem, cum varietatem, cum vilitatem: frigoris æstûsque injuriam: laboriosarum expeditionum molestiam, & id genus alia.*

### PROBATIO.

**M**Over me ad id sequens ratio: quia notavi ejusmodi exercitatione naturam nostram multò reddi validiorem, & ad omnia ferè toleranda aptiorem, adeo ut à levioribus incommodis non facilè vincatur. Sic videmus eos, qui castra sequuntur, quantumvis infinitas molestias, multaque valetudini quam maximè adversa frequenter experiri cogantur, nihilo secius validâ frui corporis sanitate, ac robustâ durabilique naturâ, ad morbos, si in aliquos inciderint, superandos. Sic plerumque etiam videmus eos, qui provectiores ætate sunt, ubi multa in juventute, quæ valetudini eorum adversa sufferre coacti fuerunt, non pauca præstare posse, quæ alii sine satis magno sanitatis detrimento non sustinerent. Multa etiam sunt, quorum expeditio à fœminis suscipi, non ex earum naturæ defectu, sed ob nimis mollem earum educationem, non potest, quin iisdem multum sibi contrahant mali, quæ tamen masculis & faciliora expeditu, & nulli prorsus damno futura sunt: eò quod ad talia eorum naturam, magis quam fœminæ, assuefacere non dubitant.

Nec

Nec minus etiam ii, qui corpus assiduo usu ad varia quæque adaptarunt, aut vehementi exercuerunt labore, ejus statu tam prospero fruuntur, ut omnibus communiter oboriri solitis ægrotationibus multò possint resistere facilius. Ceterum quanti detrimenti opus sit, naturam ad certas quasdam res, certumque vivendi modum contrà hujus regulæ praxin assuefacere, maximè in statu, quo alterius nutui subjecti absolutà vivendi libertate destituimur, non est, quod ulterius verba faciendo urgeam, cum id antè monuerim, cum mentio eorum fieret, qui definitam aliquam diætã, rigorosè quidem, non autem semper, observant; saltem addam, quanquam aliàs sufficienter notum, quod qui contrà frigora corpus nimium tueri solent, illico malè habere incipiant, quoties consuetudinem mutaverint: ubi contrà alii ingenti sæpè frigore saviente malè vestiti, & tantum non planè nudi incedunt, absque ullo sanitatis incommodo. Quid communius, quam capite tecto noctu dormire solitos extemplò affligi, si vel unicâ nocte id non continuaverint? Cum contrà, qui caput nullo unquam velamine, mediâ licet hyeme, nec frigus sentiant ullum, nec ullos capitis dolores aut catarrhos, &c. ut illi qui contra consuetudinem caput vel semel revelatum aëri exponunt. Quatenus autem hanc regulam sequi oporteat, ut ne excessus isti in nimium excrescant, quilibet proprio sensu in se ipso optimè scire poterit: videlicet, ut dixi, in quantum suarum quisque virium vel augmentum vel decrementum apud seipsum animadverterit; unde hoc magnopere, præcipuè juventutis annis attendendum, quâ utique ætate crescentibus viribus consultum maximè duxerim operam dare, ut natura citò variis rebus assuefiat; minimè verò, cum ob decrepitæ ætatis ingruentiam vires jam declinationem urgere occipiunt. Quanquam & senes in hoc non parum peccant, quod molliter plerumque vivendo propriam naturam minus, quam par est, exercent. Tam diuturnâ enim & multâ, quâ gaudere solent,



sessione pedes ad motum inepti redduntur, dorsum curvatur, cibi appetitus deficit, &c. Ex adverso memini me vidisse octoginta annorum senes, qui, cum assidue cursitando aut equitando in perpetuo essent motu, tam pedibus valuerunt, quam multi juvenum, quique & cibos appetenter, & somnum quietè ceperunt. Quod si verò præter intentionem hæc regula in largissimo accepta sensu aliquantum impingat, facili negotio per sequentem ipsi poterit subveniri regulam, quæ isthanc ad sensum paulò strictiorem reducit, in quam incidi, dum explorarem, quatenus huic regulæ obtemperandum sit, tam circà victum, quam circà alias res, quæ valetudini particulariter vel prodesse vel obesse videntur. Hinc enim profluxit

#### REGULA SECUNDA.

*Cibos, antequam assumantur, non esse prælibandos, ad rescindendum an nobis conducant nec ne: nec opus esse ut reminiscamur, an palato antehac fuerint grati, nec ne, quod plerique tum temporis facere solent; sed eorum saporem absque ullo, sive prægustu, sive respectu ad præterita habito, benè sibi imprimendum esse, non aliter ac si, ad eos jam jam comedendos, accingeremur. Tum enim si internum aliquem apud nos appetitum persenserimus, eos corpori maxime salutares: contrà si nauseam, maxime noxios futuros: imò quo major appetitus sive nausea fuerit, eò magis sive profuturos sive obfuturos.*

#### PROBATIO.

**Q**ui hanc regulam proprio usu nondum approbârunt, ejus veritatem citius absente cibo aut potu animadvertent, dum eos sibi quasi præsentēs & jam jam sumendos fingent. Reverà enim præsentēs nimis plerumque movent gustum, quò minus aversionem illam internam nocituramque ciborum qualitatem facilè percipere queant. Neque etiam negligendum puto, quod monui, nè imaginemur eorum gratum, quem antea nobis reddiderunt, saporem.

porem. Hoc ipso enim appetitio renovatur, & impedimento est, ne, si qua interior cibi detestatio in nobis sentiat. Hinc regulæ hujus veritatem paucissimi comprehendunt. Nihil tamen hic magis ob stare dixeris, quam ipsam ciborum delibationem, cum magna pars eorum amœnum nobis saporem excitet, nihilominus non sine subsecuturo nocumento: sic etiam in contrario sensu res sese habet. Ab his igitur omnibus si caveatur, & contrà observetur quod dictum est, non facillè crediderim à quopiam negatum iri, quod in hac regulâ continetur, præsertim si insuper attendatur ad sequentia cuivis obvia. Cum sufficienter cibus saturati, ab aliis instantius sollicitamur ad ulterius edendum & bibendum, nauseam statim capimus: quod si tunc eorum dictis morem geramus, non ita multò post experimur in nobis ipsis, quod satius utique fuisset, hisce supersedere potuisse. Neque aliâ ex causâ ubi à convivio malè habemus, si inter alios cibos, quos ibi sumpsisse imaginamur, is in memoriam redierit, qui hoc malum nobis contulit, singulare in nobis fastidium orietur. Hinc illi, qui bene compoti postero die crapulâ laborant, à potu, qui illos inebriaverat, adeò abhorrent, ut eum vix limis intueri oculis sustineant: unde qui subitaneo aliquo morbo corripuntur, causam ipsimet verissimam non rarò conjecturare sciunt, utut de industriâ reticeant, ne stultitia ab ipsis commissa erumpat. Porro & ii, qui nimis vel matutino, vel serotino cibo potuve contrà eorum consuetudinem & inviti utuntur, non solum insignem à pastu aversionem, sed etiam daninum, quod eo ipso sibi asciscunt, concipient, præsertim si senio cōfecti fuerint. Ulterius nonnullibi locorum mos est, in conviviis propinari tam cerevisiam quam vinum, quo casu non omnes indiscriminatim dapes eandem vini aut cerevisiæ appetentiam ciere observabimus, & prout interno nostro appetitui aut satisfacimus, aut aversamur, ita salutis propriæ aut consulimus aut nocemus. Tandem multos agrotantium, cum

primum melius habere incipiunt, acida appetere, eorumque moderatum usum ipsis conferre videmus. Possem jam pergere ad magis particularia: ex. gr. post lactis usum neque cerevisiam sapere neque vinum: vervecinas aliasque carnes pinguiore, præcipuè si faciliè coagulentur, cerevisiæ potum reddere ingratum, viniq; contrà gratum &c. Sed quia isthæc apud me solum aliosque saltem paucos locum forsitan habere possunt, tacendum potius existimo; non possum tamen, quin apertè fatear, me quoque, quoties ægrotaverim, in hujus regulæ certitudine propriâ experientiâ maximè confirmatum esse. Vidi etiam alios certa genera ciborum, quos natura eorum tantò avidius appetebat, quanto medici severius eos ut inevitabilem ægrotanti mortem allaturos prohibuerant assumpsisse, eoque ipso convaluisse. Ququam & dubitare subit, an ægrotis hæc regula semper salutaris esse possit; id tamen pro certo tibi assero, me, quando rectè valens hanc secutus sum regulam (si non semper ratione appetitûs; attamen ratione aversionis) non recordari unquam ab eâ fuisse falsum: saltem nulla singularia symptomata successerunt: quinimò, simul ac contrà ejusmodi nauseam internam aliquid comedere conatus sum (quod datâ operâ interdum experiundi gratiâ feci) illico dolores, pressiones stomachi, singultus aliæque incommoditates subsecutæ sunt, quæ indicio nobis semper esse judico, cibos nos cepisse concoctionem impediētes. Quia verò unusquisque dum valet, raro ad ea, quæ in se ipso intrinsecus accidunt eoque modo, quem ad hujus regulæ usum præcipuè requiro, attendit, ideò credo paucissimos, quantal ejus utilitas sit, experientiâ esse percepturos. Faciliorem ergò in medium asseram, per quam non opus erit, tam certis alligari rebus, & ea quæ in nobis sunt in consilium adsciscere; sed potius ad solum saporem animum reflectere: cujus regulæ utilitas valdè probabilis evadet, hæcque præsens per eam innumeris confirmabitur exemplis. Cum enim

enim isthanc regulam exactissimè observarem, examinaturus quinam ciborum palato appetitum quique nauseam excitarent, deinde si plures cibi adfuerint, quemnam appetitum ordinem in singulis servare soleat, obtulit se mihi

## TERTIA REGULA.

*In edendo & bibendo satis inordinatè nos procedere posse absque ullo repentini alicujus damni subsequenti indicio, dummodo ad ea, quæ gustui valdè inter se discrepantia videntur, (ut sunt humida & sicca, pingua & macra &c.) attendamus, ut ea inter edendum alternatim ita invicem commutemus, ut justa quasi ex iis temperatura exsurgat: si quæ verò ratione saporis sibi contraria esse aliquomodo videantur, (ut dulcia & acida, persalsa & insulsa, fervida & frigida) ut primum subsentimus, alterutrorum nimium nos comedisse, iis talia, quæ prioribus vel ex parte vel omnino contraria sint, superaddamus, ut excessus hæc ratione inter se aliquo modo corrigantur.*

## P R O B A T I O.

**H**Æc regula cum experienciâ adeò concordat, ut, si probè ad talia attentionem direximus, experturi simus, quod eam quivis velut ab ipsâ naturâ incitatus observet. Hoc nos ipsa docet natura in cibo & potu, quibus alternatim utimur. Hinc videmus, ipsas bestias, si nimis sicca comederint, solo naturæ instinctu ad aquas, licet interdum valdè diffitas, celerrimè festinare. Quantum naturæ nostræ prosint ea ciborum genera, quibus & mandicando & sorbendo frui possumus, attestabuntur ii, qui sæpe id experti sunt. Imò si esculentorum quædam, quæ nimis sunt humida primum, post denuo alia sicciora comederimus, multum nobis saluti esse animadvertimus. Ita quoties poma aliosque fructus valdè humidos in abundantia comedi, nullum ab iis incommodum passus sum, dummodò alius generis vel fructus cibos siccioris qualitatæ, aut si non aliud, saltem panis frustum simul comederim. Hoc autem quia plerumque non



observatur, sæpè alvi profluvium aliaque morborum genera sequuntur. Sic potus, quem nimium quandoque in epulis haurire coactus sum, dummodò simul edere parum panis licuit, non mihi unquam nocuit. Porro si rebus nimis dulcibus vescamur, acidis vel ad minimum minus dulcibus subveniendum. Sic cum aliquando largius vinum exhauriendum fuit, nihil obfuit, modò cibus acidioribus, citreorum succo aliisque, stomacho succurrerim. Nimis salsa magnam excitare sitim plus quam notum est; ubi verò hæc comesta, exceperint vel minus salsa, vel quod melius planè insulsa, subito excessum fuisse correctum persensit. Hæc autem neglectum, quantum detrimenti afferat, testabuntur maricini, qui pisces sale conditos, aliaque salsamenta ut plurimum edere coguntur: hinc faciliè crediderim ipsis provenire scorbutum, aliosque illis in locis frequentiores morbos. Nec desunt exempla eorum, qui frigidis nimium cibus, iisque copiosis & sæpè usi, cum tamen stomacho non satis calido, ut dicitur, præditi fuerint, multas sibi morborum incommoditates attraxerunt. Quin & cibos fervidiore, aliis refrigerantibus vel tepidis temperari proficuum nobis essentimus; præcipuè, cum à vino nimis largiter poto internum percipimus calorem, refrigeriis juvamus, quod ni fiat, insuperque calefacientia potius addamus, febres non rarò ardentes gravissimique exoriuntur morbi, quod maximè experiuntur æstuosis in regionibus peregrinantes, qui, nimio calefacientium vinorum usu, in cephalalgiam, febres ardentes aliasque infirmitates incidunt, quod aliis, qui usitatas ibidem aquas artificialiter congelatas usurpant, non evenit. Cæterum quam subitarius morbusque percipiendum ejusmodi excessibus talis correctio auxilium præbeat, vel ex hoc solo sæpius deprehendi, quod multi, qui à singultibus nullo modo potuerunt liberari, ne potu quidem, communi aliàs in hoc casu remedio, simul ac citreorum succum adhibuerint, momento liberati sint, quæ omnia usque modò commemorata

rata veritatem hujus regulæ sufficienter manifestare videntur. Quod autem hanc regulam reddit facillimam, est, quod in tantâ ciborum varietate multi ex utroque inter se pugnantium genere reperiantur ejusdem naturæ & effectûs, nec differt quibus utamur ad corrigendos excessûs à nobis commissos, dummodo id fiat per eos, ut dictum, qui prioribus sint contrarii; sic sæpè non sine aliorum admiratione mox carnes, mox fructus, mox pisces, mox alia, & varia ciborum genera, maximè extravaganti ordine, assumpsit: imò vel diversas carnes tantum, vel divertos alios fructus tantum, ordine inusitatissimo comedi absque ullius nocu-menti perceptione, ita tamen, ut regulæ hujus rationem haberem, atque ita satis quidem ordinatè secundum eam processu, licet aliis inordinatè factum potius videretur, eò quod ordini vulgariter consueto maximè contrarium esset. Quocirca hæc regula facili omninò negotio observari potest, ut ut victu interdum perquam inordinato frui cogamur, præsertim in conviviis, in quibus tam variæ totque modis diversis præparatæ dapès proponuntur; ideòque tum præcipuè, cum maximi contrà valetudinem excessûs perpetrantur, utilis nobis erit, ad omne quod inde nasci possit malum evitandum. Tametsi etiam aliquà in parte limites fortè egrederetur, non adeò difficile esset per regulam antecedentem, ex quâ tanquam generaliori præsens hæc sequitur, eam corrigere. Quin imò firmissimè mihi persuadeo eum, qui utramque regulam experienciâ didicerit, ex magnâ ciborum copiâ haud difficilè cogniturum, non tantum quid edendum sibi aut bibendum sit (id quod præcipuè antecedens docet regula) sed etiam quo successivè ordine id fieri debeat, (quod propriè ex præsentè apparet) ut ne valetudo, veluti communiter fit, periclitetur, idque ex seipso multò melius, quam ex alio quocunque, si vel peritissimus quisque medicus fuerit, percepturum esse. Hinc verò satius esse intelliget, naturam ad multifaria sufferenda, affve-

assuefacere; maximè ubi à nobis ipsis absolutè non dependemus, ut prima requirit regula, quam quatenus obsequendum ei sit in iis, quæ imaginationem & gustum diversimodè afficiunt, jam tum explicui. Ostendam nunc, quatenus ei obtemperandum sit, etiam in iis rebus, quæ universum corpus nostrum variis afficiunt modis. Notanda igitur

#### REGULA QUARTA.

*Quaquam ii, qui corpus ad contraria quævis sufferenda assuefecerunt, valetudinem multò conservant securius; summo perè interim cavendum, ne directò contraria immediatè se invicem subsequantur: quin imò, si vel maximè fuerimus ad ea coacti, eò tamen præcipuè, quoad ejus fieri potest, al- laborandum esse, ut gradatim quasi, & pedetentim iis assuescamus.*

#### PROBATIO.

**H**Inc cum fervefacti subitaneum frigus quærimus, grave valetudini damnum inferimus. Reipsà hoc experiuntur ii, qui vel è balneo, vel è lecto calente egressi, vel dum aliàs vehementi calore sudant, frigidò aëri derepente se committunt, aut potum frigidiorē avidè hauriunt: ubi non sine admiratione observaveris, quam subitanè vehementique alteratione vires debilitentur; adeò ut multi jam morti videantur proximi, qui ante aliquot tantum momenta perfectè valuerunt; ubi contrà, licet ob nimiam sudoris in lecto vehementiam omnia intestina admodum incaluerint, si tamen refrigerium pedetentim tantum quæratur, nullum timendum sit periculum. Inde error natus est, ut sudor communiter credatur vires labefacere, cum tamen id potius adscribendum sit nimis subitanæ refrigerationi, quæ ex intolerantiâ celerius quam par est præsumitur. Sæpius ausus sum à vario corporis exercitio adhuc æstuans aquis artificio congelatis, de quibus suprà, me reficere, absque ullo, quod ob id senserim, incommodo, eò quod ob nimiam, quâ palatum afficit, frigiditatem non nisi pauxillum

fin.

singulis vicibus assumi potest, fervorque interior tam exiguum liquoris gelati quantitatem illicò resolvit, ut quia hâc ratione guttatim tantum ad stomachum pervenit, non sit sufficiens ad tantas alterationes inferendas. Contrâ, alios vidi in eo statu cerevisiam avidius & copiosius inglutientes in gravissimos morbos collapsos esse, à quibus vix liberari potuerunt. Sic etiam validum frigus perpeffis malè conducit ad vehèmentem calorem festinatio, id quod aliqui magno suo damno comprobarunt, qui postquam manûs pedesve gelu rigentes absque morâ fervidæ immerferunt aquæ, ad id extremitatis redacti sunt, ut extremorum membrorum refectione opus fuerit, ne contigua membra malo, quo jam correpta erant, quoque inficerentur. Quod ii, qui ad certum se alligârunt vivendi modum, si consuetudinem mutaverint, maximas cogantur subire alterationes: & rursus qui quieti nimium indulserunt, ut primum vehementia corporis exercitia aggrediuntur, in gravissimos incidunt morbos, sufficienti nobis indicio est, quàm periculosum sit ab unâ extremitate subitò prolabi ad alteram. Ex his etiam addiscimus causam, cur, succedentibus subitaneis in aëre caloris aut frigoris mutationibus, sæpè varii & repentini se ostendant morborum casus, etiam in corporibus satis commodè valentibus, prout, exempli gratiâ, ex eadem ut plurimum causâ plus vernis & autumnalibus quàm ullis aliis temporibus corpora humana, nisi providè caveatur, ægrotare videmus. Per eandem hanc regulam monemur, ut probè caveamus, ne cibos, quos olim nobis gratissimos fuisse recordamur, ubi post diurnam eorum carentiam ad eos redire concessum fuerit, nimîâ appetentiâ & aviditate capiamus. Sic singularem semper in me certorum ciborum appetitum, ab exteris regionibus redux, persensî, à quibus nisi tantisper abstinuissèm, donec pedetentim iis reassuescerem, procul dubio morbo fuissèm correptus. Et isthanc genuinam arbitror esse causam, cur multi, à peregrinationibus in



patriam reversi, brevī vel graves morbos, vel planē mortem subierint; non verò, quod eorum causam semper in exteris partibus sibi asciverint. Tandem valetudo valdè alteratur, quoties ex aëre, cui diu assuevimus, migramus in aliū, fortī nobisque contrario odore repletum, velut evenire solet iis, qui ædificia renovata aut noviter trullifata justò maturius inhabitant. Hujus generis multifariæ subitarum mutationum operationes referri possent, sed hæc suffecerint, satiusque fuerit, ut propriæ quisque salutī invigilet, suoque sapere periculo discat.

Hæ igitur præcipuæ sunt regulæ, quas experiētiâ addidici ad valetudinis conservationem multū facere; at probè hīc notetur velim, siquidem vires nostræ valetudinis optimæ nos commonefaciant, non opus esse, ut ad eos nos adedò rigorosè alligemus, dummodò ne contrà eas nimium multumque peccetur. Id verò, quod secundâ parte jam significare constitui, multò observandum erit accuratius, si gravissimos præcavere morbos voluerimus.

# MEDICINA C O R P O R I S,

SEU

*COGITATIONES ADMODUM PROBABILES  
DE CONSERVANDA VALETUDINE*

SECUNDA PARS.

**D**um autem hoc effectum dare præsumo, lectorum aliquis fortè mirabitur, cur signa morborum proximè instantium diagnostica declarando hic sumperim, cum ea alioqui satis cuique nota esse videantur, quandoque aliud plerumque non habeatur signum, quam insignium dolorum sensus, aut debilitas virium tam  
magna,

magna, ut vel domi se continendum, vel planè decumbendum sit. Verumtamen istiusmodi sunt signa morborum non proximè futurorum, sed jam actu præsentium, indicantia tantam morbum vim acquisivisse, ut valetudo ipsi resistere nequeat, non verò esse eum adhuc in ortu seu origine, ubi multò facilius fuerit iis arcere juxtà commune proverbium *Principiis obsta*, &c. Et de his ultimis signis annotatones jam meas in medium proferam, quæ neque aliis quoque inutilia fore esse confido. Ut autem vera signa diagnostica, ut plurimum occurrentia, omniumque quasi prima, è quibus reliqua postmodum oriuntur, bene determinemus, notandum, tres præcipuè casus ordinariè cuivis homini indies evenire, quorum status ratione valetudinis nostræ bene ponderandus est. Ex quibus, an, & quomodo mutentur, siquidem de malo aliquo ingruente suspicio fuerit, faciliè conjicietur. Sunt autem hi tres casus, qui sequuntur.

1. Cum nullas ferè actiones exercemus.
2. Cum victum sumimus.
3. Cum ordinaria tractamus negotia.

Juxtà primum ubi valebimus, magnam omnium membrorum agilitatem & levitatem experimur: juxtà secundum, bonum ciborum appetitum, si tempus prandendi advenerit: juxtà tertium; absque ullâ difficultate aut molestiâ omnia consueta nos expedituròs. Ex quibus clarum fit communissima, certissima, omniumque prima signa incipientis morbi diagnostica esse, cum per sentimus inconsuetam aliquam omnium membrorum gravitatem, nullum adesse ciborum appetitum, aut tandem, in ordinariis negotiis peragendis virium defatigationem; præcipuè si hæc continuaverint. Quâ autem ratione in hiis nos gerere oporteat, tribus sequentibus regulis proponam.

## REGULA QUINTA.

*In nobis ipsis attendendum esse, an agilitas seu levitas omnium corporis membrorum diminuatur, id est, an membra nostra solitò minus levia sint, potiusque valdè ponderosa esse vide-*

*antur, non obstante quod vel jejuni, vel modico tantum pa-  
stu saturati simus. Quo observato, quia in corpore nostro  
tunc plus nutrimenti, quam opus fuerit, esse videtur, super-  
fluum illud sudore expellendum esse.*

PROBATIO.

**Q**uia tam sæpe multumque quotidie comedimus, ut ad  
omnem nutrimenti superfluitatem expellendam cal-  
lor externus vix sufficiat, facilè hæc superfluitas ad-  
eò potest augeri, ut internis corporis nostri operationibus  
impedimento potius quam adjumento sit, ac proinde omnia  
nostra membra admodum nobis ponderosa esse videantur;  
idcirco commodius excogitari medium, quod omnia simul  
membra tam naturaliter & homometricè afficiat, primo in-  
tuitu non posse dixeris, quàm ut calori interno succurra-  
mus, & sudore talia propellere tentemus. Haud equidem  
me latet, omnes hæc in re tergiversari; quâ de causâ infra  
ostendam modum, quo facillimè procedi, resque sine sin-  
gulari fastidio ad effectum perducì possit; attamen hoc ipso  
ad plurimos gravissimosque morbos præcavendos nihil utili-  
us esse existimo. Particulares hîc, quas in me ipso obser-  
vavi, experientias recensere possem, sed malim hoc pericu-  
lum ab aliis quoque fiat, ut eò facilius dictis meis fidem ha-  
beant, quod nescio an aliàs à lectoribus meis sperare liceat;  
tunc enim omnino reipsâ experirentur, quod, si aliquis le-  
cto benè rectus sit, tantisper immobilis ibi moretur, quoad  
undique sudorem profluere sentiat, idque eodem situ per  
horam continuat, tantam humorum copiam expulsurus sit,  
ut dicenti, quantum hujus humiditatis ex solâ interulâ, quâ  
indutus fuerit, exprimi possit, vix crederetur. Memini me  
aliquando istum procedendi modum, quantumvis integrâ  
fruerer valetudine, per universum octiduum continuantem  
animadvertisse, non, ut vulgò creditur, vires debilitatas fuis-  
se; sed potius contrarium, singularem videlicet omnium  
membrorum agilitatem, adeò ut mihi ipsi quasi regeneratus  
vide-

viderer, nec corpus totum credidissem præ levitate aliquot saltem librarum pondus habuisse. Ad hæc cibi appetitus mirum in modum auctus, totaque natura tantas vires videbatur adepta, ut non jam ullum, velut antehac adversæ valetudinis incommodum, quoscunque excessus commissem, experirer. Firmiterque mihi persuadeo, qui id semel saltem, vel bis anno quovis fecerit, melius se habiturum, quàm scarificationibus, venæsectionibus, purgationibus, laxationibus &c. aliisque ejusmodi evacuationibus, quæ minus naturalia videntur remedia, quam sudatio. Sed perfectam cuique relinquo cogitationum suarum libertatem, eique, quod optimum esse sana me ratio cum experientiâ docuerit, firmiter inhæreo; sicque institutum meum prosequor.

REGULA SEXTA.

*Si mense appariate accumbendo ciborum presentia ad manducandum nos licet in pastos aut planè non, aut tam parum invitaverit, ut omni planè cibo absque ullâ violentiâ carere possimus, cibos tunc solito minus copiose assumendos; inter ordinarios pastus à cibo planè abstinendum; de reliquo corpus externo motu frequentius, quam aliàs consuevimus, exercendum esse. Ubi verò non tantum appetitus carentiam, sed insuper etiam aversionem seu nauseam ciborum senserimus, à victu per unum diem planè cessandum, postmodum modico pastu incipiendum, pro ratione appetitus nos incitantis, sudore etiam interno calori aliquantisper subveniendum esse.*

PROBATIO.

**Q**uia rarissimè hoc observamus, potiusque eandem, quam aliàs solemus, ciborum copiam, sive edendi cupiditate feramur, sive non, assumimus, mirum non est, tot & tantos ideo morbos in corporibus etiam sanis repentè excitari. Lubens quidem concesserim febrium aliam quoque causam assignari posse, admodum tamen probabi-



babile mihi videtur, plurimas ex hac solâ potissimum causâ,  
 ut modò dixi, provenire, quod, nimirum humores, in cor-  
 pore nostro ad ejus nutrimentum promovendum, reperti,  
 adeò abundant, ut eos sufferre nostri corporis constitutio  
 non sufficiat. Optimæ enim valetudinis & ætatis personas  
 iis videmus corripî; adeò ut nulla ferè alia excogitari causa  
 posse videatur, quam nimia succi hujus nutritivi superflui-  
 tas. Sic aliquos vidi salvos & sospites, postquam certa ci-  
 borum genera, quibus aliquamdiu caruerant, ut ostreas,  
 pisces &c. nimis avidè & copiosè unico pastu ceperunt,  
 mox sequenti post die in febrim incidisse. Nec alius certè  
 tunc effectus in corpore sano eò sequi posse videtur, quàm  
 ut nimia ciborum copiâ assumptâ, nimia quoque humoris  
 nutritivi copia necessariò accrescat, ac proinde febris, secun-  
 dum meam quidem sententiam, generetur. Hinc f. cilè vi-  
 demus, cur jejuniis curari febres, ut plurimum, possint, &  
 cur febris laborantes sæpè diutius ferè, quam credi possit, ab  
 omni planè victu abstinere queant? quia nimirum nutri-  
 menti superfluitate scatent: quod autem febris aliqua pro-  
 ximè imminens, non subito præsentiri semper potest, et-  
 iam si nimium comedamus, fortè ex eo accidit, quod succum  
 nutritivum non omnes cibi augment. Multi jam anni sunt,  
 cum singularem in me ipso omnium ciborum nauseam  
 animadverti, postquam verò interim usitatæ edendi consue-  
 tudini mos erat gerendus, repentina me invasit febris, quæ  
 diu etiam institit. Postea, quantumvis satis quandoque in-  
 ordinatè vivendum mihi fuerit; quia tamen ea, quæ suprà  
 dixi, probè observavi, nihil tale mihi amplius contigit; aliis  
 verò simile quid in se ipsis se subscire narrantibus consu-  
 lui, à largiori pastu se temperarent, omneque superfluum  
 sudore excernerent. Hoc secuti consilium optimè habue-  
 runt, consueto comedendi appetitu brevi recuperato. Ali-  
 os verò, qui edacitate continuârunt, febris repentè corripu-  
 it. In quibus omnibus tot exemplis jam adeò confirmatus  
 fui.

fui, ut nulla ferè amplius dubitandi occasio sit. Neque enim, quod ciborum appetitum in bene constitutis diminueret aut nauseam eorum ciere magis possit, video, quam si succi, qui nutrimentum nobis præbet, major quam nostra requirit natura, quantitas in nobis fuerit. Plus vice simplici observavi, aliquos, in labore sibi incumbente indefessos, cum sedentariam ex abrupto vitam elegerint, febre repentinâ obrui, cujus causa ex antè dictis satis clara. Cum enim strenuè laborarent, succi nutritivi superfluitas, siquidem aliqua adfuerit, expellebatur: simul ac verò à labore cessatum, nec minus interim, quam durante adhuc labore commestum fuit, succus nutritivus facilè adeò crescere potuit, ut, quia non jam labore ut antè evaporabat, febrem generaret. Insuper observavi eos, quorum facies indies solito magis irrubuit, continuante coloris hujus augmentatione, ex improviso omnium cum admiratione (quia florida ejusmodi facies vulgò signum perfectæ valetudinis esse judicatur) in febrem illapsos: ubi postea multis, in quibus tale quid adverti, id malum, ni à consuetâ victûs ratione abstinerent, certò ipsis eventurum auguratus sum; qui experienciâ postmodum ejus, quod antea credere noluerant, convicti obstupuerunt, quod nullo modo comprehenderent, unde ejusmodi de ipsis satis & athleticè valentibus præfagire potuerim. Id quod omne meam de verâ febrium origine, earumque præcautione sententiam summo opere corroborat. Pergere hic quidem possem, clariorique, quam ab ullo unquam præstitum fuit, modo, commonstrare, quo pacto post Tertianæ aut Quartanæ earumque singularia symptomata ex eodem oriuntur fundamento. Dum enim genuina morbi alicujus causa modò detegatur, omnes alii, quos generat, effectûs, ab eâ deduci indubitato poterunt, quos tamen jam proferre supersedeo, quia, cum in similibus nimis ad specialia proceditur, ob tot internas naturæ nostræ operationes incognitas facilè & graviter errari potest, ut ut admodum verisimile nobis

nobis appareat. Et quia ejusmodi porrò scientia, si vel consummatissima foret, neque ad febres præveniendas, neque ad eas extirpandas ideò unquam serviret, quod tamen inter alia hîc ostendere præcipua intenti mei ratio est. Cum contrà id obtineri facîle possit, cognitâ nobis primâ ejusmodi morborum origine, quod etiam multò priore facilius detegi potest, prout clarissimis eam experientiis me insinuassee arbitror. Bene autem notandum, quod, etiam si nimia succi nutritivi quantitas febrim plerumque progignere, plurimum tamen aliorum morborum causa pro aliâ atque aliâ corporis constitutione esse possit. Sufficiat hîc ejus saltem, cujus experientiâ magnopere confirmatus sum, mentionem fieri. Sæpius miratus sum, quî fiat, ut apud infantes epilepsia sit tam frequens; id autem deprehendi, videlicet cum ex multis rationibus perfectè valeant, utpotè ex sanis parentibus prognati, ac proinde salubri nutrimento potiti, nullam hic aliam comminisci causam posse, nisi quod superfluo fruuntur nutrimento. Hinc vulgò perhibetur: infantes, qui sæpè vomuerint, plus aliis non vomentibus profici, quia eò ipso superfluum ejicitur nutrimentum, in aliis remanens, nec proinde hîc loci tam tristis effectus, quam apud alios, exoritur. Imò crescentibus annis hunc affectum rediisse, animadverti, quoties nimis immoderatè comederint, adeò ut, quod apud alios febrim, id apud hos epilepsiam excitârit, eò quod ab ineunte statim ætate eadem ex causâ sibi jam tum eam contraxerant. Quod autem ex eadem accrescentis superflui nutrimenti causâ gravior in infantibus affectus (veluti epilepsia) resultat, quam in provectioribus ætate (qui febre tantum affliguntur) ratio esse potest, quia sanguis in infantibus ordinariò activior est, ac proinde vehementiores edit operationes. Porrò etiam inveni homines senio confectos, valetudinarios, aut obesi corporis homines, postquam aliquandiu parcius comederunt, si unico solo pastu contra regulam quartam peccârint, ob hanc causam

apoplexiâ repentinâ fuisse sublato, quod ex eorum sectione postmodum luculenter apparuit, cum omnia membra in optimo fuerint statu, uno cerebro excepto, quod cruore scaruit seroso. Cujus rei venularum ex nimis succi celeri nutritivi accretione disruptio procul dubio causa fuit. Fuerunt etiam aliqui grandævioris ætatis homines, quos novi aliquamdiu parcius pastos, cum in epulo quodam & hilaritate elati & opiparo apparatu alleciti suo comedendi bibendique munere strenuè defungerentur, nocte proximè sequenti de insolitâ cephalalgia, mox & capitis ponderositate conquestos esse, adeò ut sublevari illud ab aliis peterent, quod amplius sustinere se propriis viribus non posse asserabant, eoque vix prolato, derepente immobiles expirasse: quod multi satis mirari non potuerunt, maximè cum tantæ eos valetudinis constitutione vegetos animoque festiviori lætitiâ prædito paulò ante viderint: cujus tamen causa ex eo, quod apoplexiæ malum inferre modo dixi, meo quidem iudicio, cognitu mihi facilis fuit. Nam temperatori usque modo victu usos, multos extemplo variosque simul superfedere cibos, subita nimis admodumque noxia contra quartam regulam mutatio erat. Porro si cuipiam optimè valenti inter dulces symposiastarum conversationes animo indulgendi occasio, dapiumque ad palatum compositarum copia apposita fuerit, urgente insuper, ut fit, instantius hospite, ulteriorem ciborum degustationem, facilè tunc accidet, ut aliquis modico aliàs victitare solitus inopinatò plus quam crediderit assumat, unde facili negotio nutrimentum adeò augeri potest, ut venulæ præ aliis subtiliores, & ob senium non tam solidè amplius firmatæ quam in junioribus, insolitam hanc à succo subinde affluente intensionem sustinere, non valentes disrumpantur, quod, antequam fiat, exquisitissimum utique dolorem, qualis in læsione quâvis observari solet, inferre nemo negaverit; post autem cerebro sanguine repleto caput pondus acquirere videtur, ac proinde si



sanguinis copia tantâ forte concurrat celeritate, ut nullum fortiatum exitum, præsentissima necessariò mors sequitur. Contrâ talium in juvenibus rectè valentibus exemplorum non recordor, nisi quod in tanto victus excessu magno capitis dolore, aut etiam hæmorrhagiâ laboraverint, quod robustiore scilicet naturâ præditi malo huic (quod decrepiti dubio procul incurrissent) resistere adhuc valuerunt. Quamquam in juvenibus, & ægrotis variorum subit exemplorum memoria, ubi præcipuè notabilem vidi casum, assertionem hanc meam magnopere corroborantem. Sedecim annorum adolescens gravem aliquandiu perpessus morbum, ad eum jam à duarum usque hebdomadarum tempore convalescentiæ gradum pervenerat, ut altero post die lectum relinquere constituerit, cum eodem adhuc sero decumbens hilarem amicis ostenderet frontem satisque prolixâ cœnâ pastus non parum exhilararet adstantes, qui quod tantum comedere posset, nondum viderant. Sed ecce! vix appropinquaverat diluculum, cum præcox apoplexia & capitis movendi, & loquendi facultatem dicto citius adimeret. Supervixit tamen adhuc, pro ejus naturâ, quam satis vigoroſam habuit, sedecim horas, imò servari eum forsitan potuisse crediderim in vitâ, si media, quorum in tertiâ Parte fiet mentio, fuissent adhibita: cum verò magna ipsi infunderetur medicamentorum copia, quæ nullo modo inservire poterant ad coacervatum istum, de quo aliquoties dixi, cruorem dissipandum seu expellendum; nulla utique restitutionis spes integra esse potuit. Non prolixus ero in causâ tam inopinatâ & repentinâ mutationis explicandâ, ne, quod aliquoties jam prolatum est, ad nauseam repetatur. Tandem apoplexiâ ictos novi naturæ eorum vigore sensim quidem se recollegisse, gravi tamen ex intervallo temporis affectu febrili infestatos fuisse: cujus causa est, quod etsi succi nutritivi abundantia venulas aliquantulum dilacerare inceperit; quia verò fortiores fuerunt, quam ut plane dissilire possent, altera-

alterationem illam in febrim degenerasse oportuit. Ex quibus omnibus jam dictis vera & prima tum februm, tum apoplexiæ, tum & epilepsiæ origo luculenter apparet. Non equidem sat temporis habui isthæc omnia examinandi tantâ industriâ, experimentorum reiteratione, quantum quidem ad aliquid certi in materiâ tanti momenti concludendum requiri scio; speraverim tamen, tantæ jam prolata probabilitatis esse, tantique ponderis, ut si vel maxime ita se non omnino haberent, nihilominus ob speciem veritatis, quam præ se ferunt, exactiorem apud eos, quibus plus occasionis suppetierit, disquisitionem mereatur. Quanquam quid opus est omnes determinare morbos è victûs excessu provenientes? sufficit ostendisse præcipuos, & ut plurimum evenientes casûs, unâ cum indicio perfacili, quo observato omnia inde emergentia præcaveri possint, ut insimul insignis hujus regulæ utilitas appareat, quæ à tam gravibus nos morbis, per remotionem originis eorum, modoque tam facili liberare potest. Denique per totum diurnum tempus jejunandum esse suprà dixi, quia notavi, cum in eodem aliquando statu versatus in tertium usque diem perrexissem, tantam mihi salivæ copiam succrevisse, ut dentes solito minus stabiles mihi viderentur, ejusque acrimonia palato non parum doloris inferret: postquam igitur hac ratione edendi appetitus redierat, tantam in mandendo difficultatem & dolorem experiebar, ut cibos in minutissima frustula dissectare cogerer. Quocirca porrò sic eveniente casu non multum ultrâ diem jejunandum arbitratus sum; observatâ postea majori salivæ copiâ, paululum edere incepti, sæpius interim lymphâ palatum, quò salivæ acritudo leniretur, diluendo, sicque pristinum edendi appetitum recuperavi.

REGULA SEPTIMA.

*Cum iis, quibus maxime assueti sumus, utimur, & quidem absque ullâ festinatione: interim tamen inconsuetam inde nobis fatigationem provenire experimur; rationem tunc in-*

*eundam esse, an ea indies, aut etiam celerius augeatur: quod si fiat, moras tunc non esse neccendas, quousque malum adeò crescat, ut decumbere cogamur; sed illico minus cibi assumendum: præcipuè verò illos, qui nauseam nobis cient, juxta secundam regulam, esse vitandos, illosque contrà usurpandos, ad quos appetitus nos maximè invitaverit: noctu verò oblecto corpore, solitoque coöpertius cubandum, quò melius omnia membra refoveantur: illud autem tantisper continuandum, quoad restaurari vires occeperint.*

## P R O B A T I O.

**Q**uamvis hæc omnia vix ullâ indigeant probatione; at tamen, quid hac in parte & quanto cum effectu observaverim, aperiam. Quotiescunque mihi novas adire provincias contigit post bimestrem, aut trimestrem, alicubi commorationem, singularem in communibus & alioquin assuetis actionibus (ut in graduum ascensione, in exspatiatione saltem horariâ) defatigationem memini me perpeßum, nullo licet aliquâ in re excessu, quod sciam, commisso. Quanquam si, quod res est, dicendum foret, non erat quod mirarer: cum natura tunc nostra tot novis rebus (ut aëre; cibo, potu, &c. diversis, alioque insuper modo preparatis) assuefacienda sit, quæ tamen non in quovis homine semper æquè valida ad istiusmodi sufferendum invenitur; adeò ut memorati casus faciliè evenire potuerint. Simul ac verò supradicta adhibui remedia, non solum brevi vires amissas recuperavi; sed etiam, cum postmodum illis in locis non parum excedere in victu oportuit, nullum inde damnum persensi: cum alii contrà ad hæc non attendentes, & indies more solito quasi viventes, in maximos incurserint morbos. Imò ætatis robustioris juvenes, qui tantæ valetudinis mihi videbantur, ut necessariò ad summum senectutis gradum perventuros esse judicassem, intra paucorum dierum spatium conspexi & salvos & mortuos. Quanta verò peregrinantium non obiit pars ex hoc solo, quod id unum  
non

non observat? Cæterum quid inconſuetæ ejusmodi mutationes efficere poſſint, id vel ex hoc unico colligere in me ipſo mihi licuit, quod, cum aliàs à teneris uſque pani ſiligineo aſſuetus eſſem, poſtmodum verò perveniſſem in aliquam regionem, quâ farreum ob ejus vilitatem aſpernatus triticio tantum veſcebar, vix octo aut decem ſeptimanæ præterierunt, cum ſingularem omnium membrorum laſſitudinem expertus ſum: ut primum verò ad hujus regulæ praxin me applicarem, utendo jam nunc triticeo (quem adeò tunc abhorruì, ut intueri vix ſuſtinerem) ſed quaſi ſemper ſiligineo pane (cujus appetitu tum temporis ferebar ſingulari) brevi redierunt vires, ſuperatoque hoc discrimine, quocunque poſtmodum panis genere paſcerer, extra omne noxium fui. Cujusmodi præcipuè laſſitudinem in me aliquando percepì, ab extraneis regionibus per aliquot annos peragratis in patriam redux. Quippe omnibus in patriam reverſis id ſolet accidere, ut eo temporis varii iſſis proponantur cibi, quibus à primis olim annis aſſuefacti ſunt, quibus extra patriam verſati diu vel planè caruerunt, vel non eodem modo præparatos habuerunt; hinc aliquam ſentiunt difficultatem in appetitu inconſueto tum temporis exiſtente cohibendo, quo minus ſibi iſſis plus, quam opus fuerit, ſatiſfiant. Sic tali in caſu brevi notabilem omnium virium imbecillitatem in me ipſo obſervavi, cui per id, quod ſuprà hæc in parte attendendum præcepi, ſubito remedium inveni, neque ulli poſtea in cibo aut potu exceſſus inter familiares amicos commiſſi impedire valuerunt, quin optimâ interim fruerer valetudine.

Hæc ergò præcipua ſunt indicia, certiffimè imminentiſ morbi nuncia; non deſunt quidem alia, quorum alii mentionem faciunt, quam plurima, eorum tamen quædam nulli planè ſequuntur morbi, (quo ipſo multis vanum incutiunt metum) quædam rariffimè occurrunt, ac proinde non facilè in memoriam revocantur ad morbos cognoscendos,



iisque remedium quærendum: quædam nimis repentini nimisque periculosi sequuntur morbi (ut cum tertiam, præsertim autem quartam contra regulam peccatur) propterea parum expedit ea scivisse, cum non satis temporis nobis sufficiat ad morbis instantibus præveniendum: satius fuerit nosse remedia contra ea ipsa indicia, ne in nobis exoriantur, id quod in primâ parte, ut modo dixi, sufficienter expositum est: tandem quædam ab aliis indicia notata fuere, quæ ex jam dictis, nisi maturè præcaveatur, proveniunt; magis ergo necessarium fuit priorum tantum mentionem facere, ut quam fieri possit citissime consilium inveniatur. Quâ autem ratione morbi ea sequentes evitandi sint, in his regulis sufficienter etiam arbitror esse explicatum, eaque proposuisse remedia, quæ cum naturâ valde conveniunt. Quia omnia in hoc tantum sita sunt, ne victus tantâ, quantâ aliàs solemus, abundantia capiatur, & ut noxiæ superfluitates, sive aliquo corporis exercitio, sive sudore expellantur. Hæc autem remedia, ut maximè parvi momenti esse videantur, quantæ interim utilitatis sint, alii reipsâ satis percipient. Hoc pro certo asseverare possum, me, licet multis retrò annis ob perpetuam quasi peregrinationem, nullam unquam valetudinis curam habere licuerit, quin potius sæpius enormiter contra eam deliquerim, nunquam tamen ab ullo morbo adeò fuisse oppressum, ut triduum me domi continere fuerim coactus, ex hoc solo, quod has tam viles res observavi, præcipuè cum non tam robustæ sim complexionis, quam aliorum multorum esse ex indiciis haud fallacibus judico. Neque etiam, quâ ratione regularum circa valetudinem conservandam utilitas perfectius cognosci possit, video, quam in personâ complexionis non adeò validæ, cujus tamen ope in prosperâ sese valetudine diu conservare (non tantum cum juxta diætam præscriptam vivere ipsi licet, quia talis conservatio non tantæ molis esset; sed etiam præcipuè cum maximè inordinatè & præposterè visitare tenetur)

netur) potest. Demus autem non eâ, quâ par est, accuratiorne has observari posse regulas, tam ob varia in negotiis hominum occurrentia impedimenta, quam multis aliis ex causis, ac proinde nos aliquem in morbum, qui planè nos prosternat, prolabi; idcirco in tertiâ Parte ostendam, quomodo tunc procedendum sit, ubi talia me prolaturum spero, quæ lectori, veritatem amanti, non displicitura esse confido. Ast fideliter in antecessum præmoneo, exactius his, quam quæ in secundâ Parte dicta sunt, obtemperandum esse. Et sanè, quid, quæso, post intellectus culturam laudabilius, & quod majori cum utilitate conjunctum sit, præstari à nobis potest, quam valetudo amissa ut corpori restituatur, ut aliquamdiu otiosi id obtineamus, quò postcâ expeditius diuturnaque corporis salute nostras exequi occupationes queamus? Contrà verò, quod majus damnum ultro nobis accersere possumus, quam si nostras continuando occupationes non fuerimus unicè occupati in morbis propellendis, nihilque aliud reportamus, quam ut tanrò post diutius iis excruciemur, ne dicam, planè pro symptomatum frequentia extinguamur?

---

# MEDICINA CORPORIS,

SEU

*COGITATIONES ADMODUM PROBABLES  
DE CONSERVANDA VALETUDINE.*

## TERTIA PARS.



Am instituti mei ratio requirit, ut aperiâ, quomodo morbus, ubijam in tantum excrevit gradum, ut ejus infirmitates & dolores corpus à consuetis suis functionibus arceant, per remedia,

dia, quæ experientia nos docet, omnium securissima è medio tollendus sit. Siquè ullâ in re, certè in hac ipsâ contingit, ut quot capita, tot sententiæ sint, inter ipsos etiam Medicinæ Doctores. Ea enim omnium hominum natura est, ut nullum hac in re consilium, dum valent, expetant, imò quæ optima circa hæc ipsis proponuntur alto supercilio despiciant, aliis contrà ægrotis sat remediorum suppeditent. Simulac verò ipsi eandem subire vicem cogantur, nec consilii tunc locum habent, nec remedii copiam, cujusvis implorant auxilium, nullumque ipsis communicari potest remedium tam superstitiosum tamque vanum, ad quod arripiendum non propendeant. Imò si unquam quod optimum est, & facilè obtineri potest, maxima pars hominum insuper habet; tum maximè id contingit, cum ad valde inconfueta, quæque vel è longissimè distitis regionibus apportantur, vel ex intimis terræ penetralibus excavantur, confugiunt, facilèque crediderim, si quicquam posset è distantissimis cœli partibus accersiri, citius id approbaturos quam aliquid cogniti, cuique maximè fuerint assueti. Hinc tam ridicula nonnunquam prodeunt remedia, quorum authores fatuitatem humanam risui exponere velle videntur potius, quàm sana iis suppeditare consilia, quæ nihilominus tantà veneratione acceptantur, non secus ac si divinæ inspirationes essent. Cui saltem cognita fuerint remedia, contra febres & spasmodum proposita, reipsâ sufficienter, quod jam dictum est, experiretur, cum tamen præter omnia isthæc remedia, febres communes vel facilè præveniri, ne iis infestemur, ut in regulâ quintâ probatum; vel si jam tum nos invaserint, facili negotio profligari possint, ut in sequentibus ostendam: nec minus spasmus (qui multos multum affligit) momento ferè tolli potest, dummodò cum primum persentire inceperimus, pedes benè extendamus (id quod multi quidem faciunt cum aliquo mitigationis sensu, nondum tamen sufficit) extremumque pedis versus nos magnâ cum vehementia attrahamus:

mus: sic enim nervi fortiter intenduntur, spasmusque dicto citius cessat, cujusmodi momentariam curam multi, qui tentarunt, non sine admiratione experti sunt. Verum non immorabor diutius in suprà dictorum per exempla confirmatione, quod ea candidioribus & veritatis avidioribus ingeniis satis superque nota esse scio. Quamquam admodum difficile mihi videtur à tam inveteratis & damnosis præjudiciis genus humanum liberari posse: attamen cum optima ingenia primam hâc in re glaciem quasi fregerint hisque se abusibus masculè opposuerint, non dubitavero meas circa hanc rem cogitationes liberrimè exponere. Ast rogatos velim lectores, ut ne judicium contrà me præcipitent, nisi omnibus ad finem usque bene ponderatis. Esto igitur juxta ordinem, hætenus observatum

REGULA OCTAVA.

*Cum in eo jam sumus statu, ut continuos quasi debilitates aut dolores sentiamus, omnia negotia planè intermittenda, eaque remedia, quæ jam proponuntur, absque morâ adhibenda esse.*

PROBATIO.

**H**ic plurimi maximos committunt errores. Permultos enim novi, qui multò antè, quam in graves inciderent morbos, de variis conquererentur doloribus, nec tamen de ullà præcautione solliciti essent, sed consuetis suis occupationibus more solito fungerentur, at maximo eorum cum damno. Quippe quod rationi omnino congruum videbatur, se omnibus negotiis per aliquot saltem dierum spatium exutos, iisque usos remediis, quæ jam proponenda sunt, faciliè ab omnibus hisce malis liberatum iri: cum contrà adaucto nimis eorum malo aliquot postea menses ab omnibus negotiis abstinere coacti, in pristinam restitui salutem vix potuerint. Inter alia hoc quoque circa secundæ Partis finem fideliter monui, notumque est insuper tritum illud: *Principiis obsta, &c.* sed ô quotâ vice repetendum foret, ad sufficienter persuadendum hominibus condignam moniti hujus



observantiam? Imò ipsos quandoque vidi medicos ad ægri curam requisitos liberè profiteri, nondum contra morbum quicquam ordinari posse, sed tantisper expectandum esse, quoad cognoscatur, in quod morbi genus hoc malum degeneraturum sit, nec ullum ægroto præscripsissent medicamentum, nisi exultimationis conservandæ gratiâ moti. Quæ tanta tamque solennis stultitia est, ut nullâ opus habeat refutatione. Quasi verò tantum temporis morbo sit indulgendum, ut magis magisque crescendo tantò majores acquirat vires ad valetudinem nostram eò facilius extinguendam? Non autem dubium est, quin cuivis malo libenter multi citò resisterent, si certi essent, quodnam inter tot medicamenta, quæ singuli diversa præcipiunt, præ aliis præcipuum, morboque magis appropriatum, seligendum sit, ne malum malo augeatur. His ergò ut subveniatur notandum, ut remedia securissima & naturæ nostræ convenientissima certò inveniamus, maximè attendendum esse, per quas præcipuè res vita nostra, dum valemus, conservetur, ut, cum ejus discrimen incurrimus, judicare queamus, quibus rebus naturæ inprimis succurrendum sit, si rebus sibi contrariis adeò impediatur, ut sibi ipsi sufficere hac in parte nequeat. Sique experientiam consuluerimus, primum aërem, ut respiremus, requiri notabimus: deinde alimenta, quæ capimus: & denique calorem naturalem, omnia nostra membra vivificantem. Uno enim horum trium continuè absente, mors necessariò sequitur. Hinc facilè concludendum, quibus auxiliis, cum ægotamus, naturæ succurrendum sit. Videndum scilicet est, aëris constitutio qualis tunc requiratur; quæ præsertim alimenta assumenda sint; quoque modo calor internus ita adjuvari possit, ut omnia sibi contraria vincere valeat. Hæc autem docebunt tres, quæ sequuntur, regulæ.

#### REGULA NONA.

*Procurandum, ut ægotus sstatur in aëre tranquillo, subcalido, nullo fortî odore, qui ipsi fuerit molestus, repleto, sique aliquam-*

*quamdiu morbus duraverit, expulso veteri aëre, novum in locum, in quo egrotus decubuerit, intromittendum, & totum conclave repurgandum esse.*

## PROBATIO.

**H**Æc omnia satis sunt clara. Qui verò ad ea attenderit, graviter contra ea committi animadvertet. Quot eorum, qui satis infirmi sunt, in plateis non deambulant, aut sua sectantur negotia? Alii in conclavibus dormiunt, vento undique perviis: imò non rarò vidi infirmos lecto relicto leviter vestitos per fenestram apertam prospexisse ad observandum quid rerum geratur in plateis. Quam necessaria autem, si diutius institerit morbus, aëris sit mutatio, de quâ modò dictum, incolumes experiuntur, dum ægros invisunt, in quorum camerâ fenestrâ aliquamdiu fuerunt clausæ, quam fortis nimirum & ingratus tunc sentiatur odor. Contrâ si per apertas tantisper fenestras liber aëri transitus fuerit concessus, ac conclave fuerit bene prout decet repurgatum, frigidâque conspersum aquâ, non parum refici ægrotus deprehendetur.

## REGULA DECIMA.

*Ab omni cibo potuque quantum possibile abstinendum, horis verò pastui destinatis, si ciborum non appetitum, sed aversionem, potius habuerimus, nihil quidem eorum assumendum esse. Juvat tamen eos coram præparatos aliquantisper intueri, aliosve eos comedentes aliquamdiu spectare: quod si verò appetitus oriatur, edere quidem licebit, at modicè & non nisi quæ bene calida, facilis digestionis, nobisque ordinaria, seu ut plurimum usitata fuerint. Ubi verò singularis & extraordinarius certi alicujus cibi, licet aliàs inconsueti, appetitus in nobis fuerit excitatus, satisfaciendum ei quidem esse, sed non nisi horis ad pastum ordinarium destinatis, nec magnâ nimis copiâ assumptâ.*

## PROBATIO.

**H**ujus rationes sunt istæ: quod cum valetudinis ratio in eo sit sita, ut corporis nostri vires sint fortiores rerum

externarum continuè in illud operantium viribus; ideoque morbus nihil aliud sit quam ejusmodi status, quo vires rerum externarum fortiores nostris evadunt, easque jam tum sensim destruere incipiunt: non consultum certè videtur, magnam rerum externarum copiam corpori nostro ingerere, præcipuè quando naturam nostram maximè ab iis abhorrereprehendimus. Huc accedit, quod omnium nostrarum operationum debilitas in nostro tunc corpore nimis sit evidens, nec proinde sufficiant ad ejusmodi partim concoquenda, & in chylum convertenda, partim per omnes corporis partes posttransmittenda, & ut opus fuerit distribuenda: nam & nimis debiles sanguinis motus, cujus ope distributio ejusmodi procedit, ex tardiori arteriarum pulsû sufficienter colligitur. Hinc in sextæ regulæ probatione ostendi, toties observatos esse ægros ex nimis avidâ ciborum assumptione in apoplexiam incidisse. Attamen cum juxta octavam regulam nihil utilius fuerit, quam ut, pristinum corpori vigorem restituere quam potest fieri citissimè, studeamus: sapius quippe usu venit, ut diversam planè naturam brevi adeptum corpus haud faciliè ad priorem reducatursatum; optimum ergò fuerit, ut, hõris ad pastum constitutis, aut cibos nobis præfentes mensæ appositos coram intueamur, aut aliorum alacriter & appetenter comedentium spectatores simus, quo ipso amissus ciborum appetitus facilius recuperabitur: quandoquidem in multis vidi ægrè passis mentionem tantum fieri ciborum, cum primum alios conspexerint comedentes, appetitum rediisse: appetitui verò jam præsentî utique, propriâ naturâ nos ad eum sollicitante, obsequendum esse; at ex rationibus allegatis, moderatius, idque in cibis bene adhuc calentibus, sic enim interno ad concoquendum requisito calori succurritur. Porro cum omnes corporis nostri operationes magnâ cum debilitate procedant, eorum maximè ratio habenda est, quæ facilioris sint concoctionis, ut sunt carni-um gallinarum, aliarumve rerum juscûla, aliaque ciborum humo-

humoris potius quam solidi speciem referentium genera, quorum quidem nullum observavi meliorem, quam qui sequitur. Variæ carniū facilis concoctionis succosarumque species conjungantur, discindantur in minutissima frustula, earum ossa, quæ non nimis dura fuerint, sed medullæ plena in mortario benè contundantur; hæc omnia inter se commixta quoad satis est coquantur, & ut notum est præparentur. Multa hîc addi possent, ut: alvum, si obstricta fuerit, cibi moventes, soporiferique, si magni dolores sævierint, & sic alia adhuc alterius generis, &c. prout appetitus ægroti vel acidum vel dulce, vel salsum, vel insulsum desiderat, ejusque constitutio requirere videtur, dummodò, ne multum aromatum aliarumque ejusmodi rerum, quæ parum succi præbent, adjiciatur. Hisce omnibus ita præparatis, corpus succo tantum indè factò, (quicquid autem in succum non evadit removendum,) dum morbus durat, continuè nutriatur, nullo alio cibo aut potu (nisi fortè appetitus aliud quid desideraverit, ut jam mox dicetur) adhibito, tandemque succus iste vel spissior vel tenuior reddi ad ægri placitum potest. Quæ omnia rationi maximè consentanea videntur. Iste enim succus ciborum essentia quasi aut virtus est, qui solus ut plurimum nutrimentum nobis, dum edimus, præbet, ubi omne residuum, quod in succum verti non potest, à naturâ ut superfluum rejicitur. In regulâ hæc suprà quoque volui, ut ab extraordinariis cibis abstinenceatur, nisi nimis magnus eorum fuerit appetitus. Quantum hoc experienciâ confirmetur, in regulâ secundâ ostendi, quæ ipsa hujusce maximè in prægnantibus evidentissimè nos convincit, non semper denegandum esse infirmis id, quod tanto desiderio appetunt. Quod si verò iste appetitus non fuerit valdè insolitus, aut vehemens, (id quod in se ipso quisque facilè sentiet) ab hisce omnibus abstinendum est, quæ raro seu non semper comedere solemus, ut sunt pomæ, olivæ, haleces, musta, mella, &c. cum enim, ut suprà dictum (Reg 7.) peregrinas regiones visitando, multi tantam in se omnium



virium debilitatem ex eo derivent, quod tam in consuetis rebus, vel iis saltem, quæ non eo, quo assueti sunt, modo præparatæ sint, uti cogantur; quid demum alterationis procreaturum creditis in statu, quo omnes vires debilitatæ sunt, assumptionem variorum ciborum, quibus ordinariè non assueti sumus? Quocirca quivis, qui sanam secutus fuerit rationem, tantò magis pro certo mecum colliget, quam periculosum esse videatur, non tantum inconsueta tunc edere, sed & talia, quæ nunquam comedimus, vel quæ nullus hominum, dum valet, edere solet. Hic aliquos fortè dicturos esse suspicor: neminem fore tam omnis rationis expertem, ut ægrotus ea assumat, quibus neque ipse, neque ullus alius, dum valeret, fuerit usus. Verùm meritò quis mecum miretur extravagantias, quas consuetudo introducere valeat. Quid enim quæso aliud sunt omnia chymica præparata ex metallis, mineralibus, &c. (medicamenta, ex. gr. è ferro, plumbo, antimonio, corallis, &c.) imò omnia propemodum medicamenta, quæ passim omnes ferè tunc assument, quam talia? Hujus conclusionem mihi fortè lectores hic negaturi sunt, licet omnibus antecedentibus, ex quibus ea formata est, planè assenserint; idque ex hac tantum ratione, quia quædam admodum speciosa sunt, quibus plebejorum hactenus oculi in modum excæcati fuere. Veræ enim procul dubio rationes, cur ad tam monstrosa remedia prolapsum, hinc ortæ sunt, quia in principio morbi plerumque nullum ægroti cibum desiderant, creditum fuit aliud quid esse adhibendum, quod nullam cum cibis convenientiam haberet. Quæ ratio mihi haud minus absurda videtur, quam si ad vividius inflammendam candelam semiextinctam, quia alioqui sebo, cerâ, &c. abundat, nec ejusmodi opus habet, ideo quis aliud quid, & quod cum hisce pabulis non congruat, usurpandum esse arbitretur. Porro opinio fuit, non frustra Deum isthæc per naturam produxisse, sed potius ad nostram utilitatem: sed hoc ipso profectò obtendere velum huic rei voluerunt. Omnia enim

enim hujusmodi præparata chymica ex metallis, mineralibus, & vegetabilibus natura neutiquam produxit, sed ea per prodigiosas demum præparationes (quas cur alius hoc, alius alio instituat modo, causam vix quispiam, ut credo, assignaturus est) in medicamenta evadunt. Præcipuum tandem quod dicitur est: licet ejusmodi res nullam primò intuitu cum naturâ convenientiam habere videantur, magnam tamen earum utilitatem experienciâ satis superque confirmari. Ast si in rebus dubiis & obscuris potius id, quod maximè experientia utile esse confirmaverit, sequendum est, de quibusnam rebus, cedò sodes, plus experientiæ habemus, & quænam tantâ nos perspicuitate, quod corpori nostro maximopere prosint, certiores reddunt, quam ordinarii cibi. Hos enim, ubi bonâ fruimur valetudine, tantâ in copiâ, torque vicibus indies assumere licet, utilitatemque ex viribus, quas corpori nostro communicant, adeò manifestè offendimus, ut nihil horum à quopiam in dubium vocari possit. Quisquis vel de unico aliquo medicamento mihi demonstraverit, me illud saluum & incolumem, eâ, quâ cibos consuetos, ratione & copiâ impunè assumere posse, causam nullam dixerim, quin me victum asserat. Communiter hic respondetur: Quod si medicamenta eâ ratione & quantitate, quâ ordinarii cibi, usurpari possent, non essent medicamenta. Quæ instantia quam nullius sit probationis, non est quod prolixius commemorem. Omnia enim eò recidunt, aliis, cum decumbimus, utendum esse, quam cum valemus, & medicamenta diversas à cibis proprietates requirere, quod nondum probatum; sed potius tam absurdum videtur, quam candelam ad extinctionem vergentem aquâ refocillare velle. Quanquam non negaverim, aliter cum ægroto quam cum sano esse procedendum, quod ipsum maximè hoc in tractatu ostendere institui. Indè autem non sequitur, aliis tunc rebus, & quæ cum iis, quibus rectè valentes utimur, nullam habent congruentiam, utendum esse; quin potius sanam rationem mihi persuadere posse

non

non reperio, id magis sequendum est, quod experientia utilius esse docuerit, eaque in promptu sunt, quæ in magnâ copîâ accepta non illico nocent, sed potius vires corroborant, ut alimenta communia fuerint: sique contrà ad manus sunt, quæ quantitate non æquali accepta semper noxia sunt, viresque debilitant, ut omnia præparata chymica, simul ac injusta à medicis ordinata dosis excedatur: hoc, inquam, (posito utroque ut indubitato) rationem sanam mihi persuadere posse non reperio, ut aliquem in morbum prolapsum posteriora inconsueta remedia potius usurpemus, quam priora, quibus assueti sumus. Huc accedit probabilem suboriri suspensionem, omnia ejusmodi præparata chymica, quorum dosis in paucis consistit guttulis aut scrupulis, fortè pura puta venena esse. Quà verò fronte isti talium medicamentorum æstimatores id, quod jam propono, accepturi sint, equidem haud sciverim; attamen non facilè ausus fuero cuipiam, etiam sano ac sospiti aliquod, quicquid sit, sub quantitate cochlearis mensuræ propinare ita ut repentè moriatur, quin omnes beneficii me reum postulaturi sint. Qui ergò causari poterunt, hujusmodi medicamenta chymica, quæ licet non jam cochleari quantitate, sed minutissimâ portione propinentur, mortem tamen intulerint, jure non posse dici venena? Hinc luculentissimè, meo quidem judicio, colligitur, cur plurimi ea tantæ utilitatis esse arbitrentur, quia nimirum, cum ejusmodi medicamenta, injustè præscriptâ dosi assumpta, magnas quidem in corpore nostro alterationes creare, non verò id eo ejus functiones planè destruendi potentiam habere vident, ex eo conjiciunt, majoris ea virtutis esse, quam ulla alia medicamenta, quæ tam sensibilia operationum suarum specimina non tam celeriter ediderint, hasque tam visibiles in corpore excitationes mutationes fieri asserunt, è tam vehementi contra morbum dimicatione, non considerantes, quodvis venenum in parvâ dosi sumptum eundem editurum esse effectum, ut sunt: vomitus, sudores, magnæ intestinorum

com-

commotiones, &c. prout eorum, qui venena potârunt, exempla satis testantur. Quam strenuè verò hæc medicamenta morbos impugnent, tum demum crederent, si cognitum ipsi esset, quam multi mortem ex hoc solo obierint, quod præparator horum medicamentorum contra præscriptam à medico dosin imprudenter peccaverit. Et edoceri velim, unde medici resciverint, tam parvam ægroto dosin in ejusmodi medicamenti esse ordinandam? Nisi valde fallor, quam plurimos internecione abreptos fuisse oportet, priusquam hoc addiscerent. Quidam etiam medicorum mihi innotuere, qui, quando ægroti medicamenta eorum assumere ex eodem metu recusârunt, ad addendum ægroto animum, & ad probandam ipsi medicamentorum suorum innoxiam integritatem, plus quam ad dosin constitutam requiritur, se ipsos assumpturos esse asseruerunt, reipsâque præstiterunt, per hoc autem gravissimos sibi morbos accerserunt. Quin & aliquem novi medicum juniorem idem fuisse conatum, qui, licet optimâ frueretur valetudine, brevi tamen interiit. Interim, si præscripta dosis non exceditur, illudque proinde natura nostra superare valet, neque etiam tantâ medicamentorum copiâ, quanta apud Galenicos adhiberi solet, infirmus tunc aggravatur, sæpe accidit, ut ægroti brevi convalescant; idque (quia ad isthæc non bene attenditur) falsò adscribitur talibus medicamenti, quæ propterea etiam Galenicis, utpote quæ in magnis potionibus aliisque incommodis consistunt, præferuntur. Sic multa porrò referre possem, clarè indicantiâ, decumbentem non medicamentorum ope, sed sufficientibus propriæ naturæ, per ordinarium ciborum usum sustentatæ, viribus unicè pristinam recuperasse valetudinem. Novi virum magni nominis, quod ob ægrorum curationem in mundo obtinuit: novi itidem alios multos, eorumque aliquos exiguâ in arte medicâ experienciâ præditos, qui ejus methodum secuti felicissimas præstiterunt curas, quæ in his paucis consistit. Cum magni in ægroto oriuntur dolores, opiatis



utuntur, cum calor excedit, alcalibus: ubi contrà frigus, depresso calore, regnat, acida usurpant. Quia igitur in ægrotantibus ex his tribus unum semper, vel plura etiam certò inveniuntur, facili negotio, quid ægroto præscribendum sit, sciunt, cum aliud non opus sit, nisi memoriâ retinere quædam alcalia, acida, &c. eorumque doses, tametsi nullam quis artis medicæ cognitionem habuerit. Hinc recorder, novellum medicum magnam sibi apud alios medicos præsentem, quibus methodus ista nondum erat cognita, admirationem & æstimum conciliasse, quod tantum in variis processuum, quos vocant, modis ægroto præscribendis habitum possideret. Sex enim ex. gr. alcalium, totidemque acidorum species sæpe inter se commutari possunt, adeò ut si conjungantur, justam dosin non superent, facilique negotio cum aliis ista misceri & præparari, ut sub formâ vel pilularum, vel pulveris, vel massulæ, vel potionis, vel succi ad ægroti palatum accommodari tradique possint. Sed vehementius adhuc mirabantur, cum ejus processus, quos sibi notaverant, in iisdem postea casibus adhibiti, diversum planè sortirentur eventum. Non enim adverterant, quod iste bonus vir sub unguibus opiata celaret, medicamentisque clam ingereret, quæ cum ægroto somnum inducerent, id reconvalescentiæ speciem apud illos, quos artificium hoc latebat, præbuit. Non tamen ideo prolixius ero in demonstrando, istam curandi methodum nullo modo securiorem esse eâ, quam impræsentiarum proponendam suscepi, cum hujus rei cognitio non tantæ difficultatis sit: quia insuper manifestissimum est, per eam tolli tantum symptomata morbi (& adhuc sub judice lis est, an verè tollantur) non etiam veram ejus causam, ideoque hanc morbi curam, non ejusmodi methodo utenti, sed potius robustæ ægroti naturæ adscribendam esse. Facilius tamen per sequentem refutabitur regulam, in quâ modum ostensurus sum causam morbificam tollendi; tum demum palam fiet, per modum jam descriptum minimè id posse expediri. Quanquam nimis mi-

hi prolixitate opus foret ad artificia quævis narranda, quibus famam sibi idiotæ majorem, quam in arte medicâ experientissimi conciliare sciunt. Nec adeò incognita cuique talia sunt, ut ea sibi fortè imaginantur. Ex his verò omnibus satis perspicuum esse credo, admodum eos falli, qui recuperatam valetudinem medicamentis semper attribuendam, ac proinde magis tutum esse existimaverint, ingruente morbo, ad similia confugere, quam ad ea, quæ in hac regula unice observanda suprâ insinuavi. Ex his quidem omnibus sequi fateor, medicamenta ex vegetabilibus præparata minus noxia, ideoque tutiora prioribus videri; attamen non video, cur horum potius, quibus planè non assueti sumus, quam ciborum essentiis utendum sit, id est, succo ex iis, ut suprâ dictum, præparato, cui natura se nostra omnino assuevit, & præter quem naturæ nostræ nihil nobis magis conducere tot experientiis convincimur. Quanquam tantumquid refert? statuerit quilibet hæc de re quicquid libuerit, per me licet, dummodo remedia, quæ jam propono, omnium quæ scimus tutissima esse concedat. Cum igitur si ullâ in re, certè in hac, hominis aut vitam aut mortem concernente, cautè procedendum sit, ea meritò ante omnia arripienda sunt. Probè autem notandum est, me non ideo ullo modo improbare chymiam, sed ejus scientiam cuius naturæ scrutatori maximè potius necessariam judicare, tanquam præstantem admodum scientiam, ex qua incredibilem haurimus utilitatem; de qua nullus dubitabit, qui consideraverit omnia metalla, varias mineralium species, vitrum, calcem, lateres, saccharum, sal, pulverem pyrium, aliaque ejusmodi non nisi chymicis parari posse operationibus. Porro bene notandum, me hic de generalibus loqui remediis, quæ, quomodo in omnibus morbis procedendum sit, indicant, non in morbis ex causis extraordinariis provenientius, id est, à rebus inconsuetis ex imprudentiâ assumptis, aut quæ ab accidentibus, quæ corpori nostro extrinsecus adveniunt, ortæ fuerint. Facile enim me tunc specifica quædam haud rejectu-

rum judicabunt, ut ut maximè inconfueta fuerint, eò quod in rebus dubiis & obscuris ei utique adhærendum, (ut modò dictum) quod utile futurum experientia probaverit. Quod autem in reliquis symptomatibus, quæ à rebus non tam extraordinariis procedunt, ejusmodi specifica, quicquid alii frustra gloriantur, admodum rara sint, vel ex hoc manifestissimum est, quod, qui se talibus uti jactant esse instructos, in morbis id ipsis probandum esset maximè notis, veluti febribus, aut levioribus etiam symptomatibus, ut odontalgia, tussi, raucedine, &c. cum enim similibus incommodis tam crebrò & ubique homines infestentur, eorum majorem sibi per tot secula cognitionem comparare debuerunt. Atqui non rarò mihi obvenèrunt impudentiaudacià promittentes (si expeterem) certissima & infallibilia in hisce remedia, quæ postmodum applicata, in quibusdam quidem subjectis aliquam opem, at valde obscuram, nec æquè ac ipsi antè jactitaverant, sensibilem tulerunt; in plurimis autem subjectis planè promissis fefellerunt. Id quod nullo modo mihi admirationi fuit, consideranti, optimos quosque cibos, nobis etiam valentibus, non omni prodesse tempore, neque si post alios atque alios assumpti fuerint: quid quæso demum sperare licebit nobis ægrotantibus, ubi effectus in corpore nostro se exserere possunt tam singulares, ut remedia, quæ heri profuissent, hodie ob sint, & quæ aliis proficua, aliis contrà noxia esse possint. Optimè enim notari velim (siquidem omnes ferè in hoc quam enormissimè errant) effecta aut operationes, quæ à medicamentis sperantur, dependere, non ab ipsis tantum, sed partim ab ipsis, partim etiam à corporis nostri constitutione. Et quis quæso in tantà rerum multitudine, tantàque ob id obscuritate, aut earum ignorantia asseverare ausus fuerit multa se possidere specifica indubitato certa, cuius indifferentes & quovis tempore usurpanda? Ex quibus omnibus quam evidentissimum fieri videtur, hisce in hâc regulà allatis remediis nihil excogitari posse generalius aut melius. Multi excellentium

tium medicorum ultrò mihi facti sunt, medicamentis febres communes potius fieri peiores, nihilque conducibilius esse, quam ab omnibus, tum præcipuè, medicamentis abstinere; præterea illos, qui hoc fecerint bonæque diætæ rationem habuerint, multò citius ab ipsis, quin & à multis aliis morborum generibus liberatos fuisse. Progredior jam ad propositionem remediorum multò excellentiorum, veram morbi causam tollentium, & ferè universaliter omnibus morbis curandis inservientium, postquam hoc ultimum monuero, cur suprà in hac regula dixerim, omnibus cibis justò utendum ordine, horisque ad pastum definitis. Videmus enim, dum prosperà fruimur valetudine, escam nos paulò tunc sumere appetentius, magisque nobis conducere, quam cum intempestivè & inordinatè pascimur. Nec satis mirari potui visitando ægrotos, maximè honoratoris conditionis, inordinatum & præposterum eorum vivendi modum. Simul ac infirmus tantillum queri inceperit, aliquod ipsi pharmacum ingeritur, mox hoc, mox aliud, & intra duarum horolarum spatium, quandoque tot vicibus & de rebus tam variis, ut, si sani corporis homo huic se applicaret vivendi rationi, brevi ægotaturum existimaverim, tantum abest, ut tam intemperato victu ægrotus convalescere possit. Sed de his dixisse sufficiat.

## REGULA UNDECIMA.

*Omnia corporis membra in tranquillâ quiete conservanda, sufficienti calore fovenda, sudoribusque exercenda esse.*

## PROBATIO.

**Q**uod hic omnia membra in tranquillâ quiete conservanda esse dico, non accipi velim, uti in regulâ octavâ, ut omnibus negotiis se abdicent: nec tantum ut in lecto decumbendo bene quiescant; sed præcipuè ut à motu, quam potest fieri, maximè nobis temperemus. Hâc enim ratione magnis sævientibus doloribus, quoties uno in situ immobilem me tenui, toties dolores notabiliter remisisse, aut



saltem tolerabiliores factos reperi; contrà quò plus hinc illinc me verterem atque reverterem, hoc pejus me habui. Rationi quoque consentaneum videtur, per hoc naturæ operationes, quæ contra morbum omnibus sine dubio viribus pugnant, mirum quantum impediri, id quod sequenti experientiâ facillè colligitur: cum aliquid, quod stomacho contrarium est, comedimus, vomitum, ad quem tunc incitamus, facillè avertemus, si aliam corporis posituram, ac antea habuimus, formaverimus, id est, si, ubi antea stetimus erecti, subito confederimus: si verò in eâ sessione aliquantulum quieti commoraverimus, denuo vomitum invitabimus: si rursus erigamur, iterum impediemus, & ita porrò: aut si cubuerimus, itidem crebrâ volutatione impediri sentiemus; adeò ut per aliquot horas medicamenti purgantis operationes hâc ratione ipsæ sim remoratus. Ex quibus apparet, quam ægrotis nocumento sit ex impatientiâ nolle vel per quartam horæ sedatos in lecto se continere. Quia verò diuturnâ ejusmodi pausâ lectus nimium comprimitur, eoque magna decumbenti molestia dolorque, creatur, consultum tunc fuerit ægroto prospicere de lectis paulò mollioribus, aut si fortè in alterum latus devolvendus sit, ut lentè id fiat eodemque semper situ, id est, si pedibus extensis cubuerit, volvendo pedes extensos retineat, &c. maximè si certo situ corporis constitutus aliquam molestiarum laxationem, animadverterit, in eo potissimum permaneat. Hoc igitur primum esto quod observetur.

Porrò, quamvis Naturam (quæ omnes tunc vires suas ad morbum debellandum impendit) in operationibus suis nullo modo impedire non levis res momenti fuerit; attamen & insuper succurrendum ipsi est. Cumque in præcedentibus morbum ex eo provenire dixerimus, quòd externarum (ad naturam nostram non pertinentium) rerum vires corporis nostri viribus fortiores sint, easque suppressere conentur; magnum, tunc auxilium præstari videtur, si calori interno seu nativo, ubi per seipsum sit insufficiens rebusque externis succumbere teneatur,

atur, opem feramus, collocando decumbentem non solum in calefacto aliquo hypocausto; sed etiam omnia ejus membra molli & calido lecto bene contendo & focillando. Hic maximi iterum, ut plurimum, errores committuntur, ut, si decumbens calorem ægrius sufferre inceperit, levato protinus operimento totus detectus jaceat, melioraque monentibus plerumque regerat: in calefacto se hypocausto jam morari. At meminisse oportet non parum discriminis inter teporem hypocausti calefacti, & calorem lecti in eo positi, beneque cooperti consistere; & præsertim subitas tum temporis mutationes (juxta regulam quartam) sedulo esse vitandas, cum resultans inde damnum, quod per debilitates, tumores sive flatus, variam in corpore pressionem, aut, si exitum invenerint, eruptionem inducentes, oppidò se prodit, attendenti liquidò patefcat, prout præcocium mutationum effectus & damna citius tunc, quam cum valemus, in nobis experimur. Nec ulteriore hic explicatione opus esse video, & maximopere exoptandum foret, ut eadem facilitate id observetur, quâ intelligitur. Hactenus secundum.

Tandem hic hujusmodi præstitum naturæ auxilium, ut ut satis notabile, multum tamen abest, ut sufficiens sit: cum insuper internus calor adeò sit certis temporibus augendus, ut quæcunque suis in corpore nostro operationibus restiterint, easque impederint, à se repellere possit. Bene igitur notandum, quæcunque ad corporis conservationem assumimus, ejus nutritioni vel inservire, vel non: si inservit, id fieri quantitate aut insufficienti, quod plurimum nutrimentorum assumptione corrigi potest: aut justâ & sufficienti, quod nullum tunc inferre damnum corpori potest: aut denique majori quam corpus sufferre queat, quod magnum sane nocumentum adferre potest, pro eo, quod suprâ dictum est, plerumque generari indè in infantibus epilepsiam, in provectioribus febrem communem; in senibus verò apoplexiam. Si autem non inservit corporis nutritioni, à naturâ tunc vel expellitur,  
vel

vel non. Si prius, ut secessu, vel urinâ, exhalatione per poros, &c. nocere non posse clarum est: si posterius, seu si non expellitur, interim autem nutritioni nil confert, multorum causa morborum existere potest pro diversitate aut rerum, è quibus consistit, aut modorum, quibus diuturnitate temporis in diversis corporis partibus pedetentim coacervatur. Ex paucis hisce extrâ omne dubium positum videtur, generalem & primam omnium membrorum à nutrimento convenientium causam, ideoque genuinam eorum originem ex eo tantum scaturire, quod vel nutritioni inservientium major justò quantitas sit, vel nutritioni non inservientium nimia itidem coacervatio fiat; propterea non generalius nec proinde utilius omnibus ejusmodi morbis comminisci remedium posse, quam quod omnia corpori nostro superflua, & ob id ejus functiones impugnantia & impediencia propulsare doceat. Id verò neque purgationibus, neque venæsectionibus, neque aliis ejusmodi evacuationibus perfectè obtinetur. Omnes enim tales evacuationes non nisi particulares sunt, id est, certas tantum res expellunt, non omnes uniformi modo totius corporis superfluitates, prout multis postea exemplis ulterius expositurus sum. Quia ergo per validam caloris interni augmentationem omnes superfluitates sudore ita excernuntur, ut omnia totius corporis membra simul uniformique modo afficiantur, nec aliud nobis hætenus innotuerit remedium, quod talia præstare tantà perfectione valeat, concludendum est, nullum melius & universalius nobis esse contra omnes à rebus usitatis procedentes morbos remedium, ac propterea, quæ in hac regula proposuimus, media morbis adhibenda omnium esse maximè salutaria. Hæc itaque ad ea, quæ in medium allata sunt, defendenda sufficere quidem possent: attamen firmiter mihi persuadeo, quod, si vel maximè mathematicæ demonstrationes in ejusmodi rebus formatæ fuerint, multum tamen absit, ut ad præjudicia, quæ apud omnes ferme tam altas egerunt radices, extirpanda suffecturæ sint: quocirca isthæc omnia, quæ

quæ jam nudis probare rationibus allaboro, etiam per experientiam corroboranda duxi. Primò nihil notius est, quam innumeras naturam superfluitates per urinam, sedes &c. ut suprà dictum, à se propellere : ex quibus liquidò nobis patet, quam natura sit valida in iis, quæ sibi necessaria non fuerint, propulsandis : quin à primis quoque annis morbillis seu variolis, bois & pustulis, scabie, aliisque ejusmodi morbis ubique ferè locorum homines ferè corripuntur, quia videlicet natura, quo tempore ejus calor suo adhuc vigore præditus est, omnia, quæ ut superflua hoc pacto coagmentantur, ejicit, nec aliquid hisce morbis (si tamen morbi dicendi sunt, non autem naturæ potius emendationes) periculosi subest, dummodo sufficienti calore decumbens foveatur, aliàs velut in variolis usu venit, si refrigerium quærat, ut retrò cedendo interiora petant, de reconvascentiâ vix sperare licebit. Adeò ipsa nobis natura ad oculum quasi demonstrat, quid crescentibus annis, cum calor internus hisce per se ipsum præstandis non amplius sufficit, nobis faciendum sit ; quia autem nihil horum fit, adhæc superfluitatum copia magis indies augetur, omnes tunc corporis quoque operationes magis magisque impediuntur, adeò ut quantò plus senescimus, tantò res succedat segnius, sicque internus calor pedetentim debilior in iis, quæ sibi contraria fuerint, superandis evadit, quibus eventibus innumera postmodum morborum genera, ipsaque tandem mors succedit. Id ipsum multæ principum aulæ visibili probant experienciâ, in quibus tanta vini copia epotatur : ple-rosque enim Aulicorum arthritide laborare videmus, malè pedatos incedere, contractionibus affici digitorum, quos tuberculis confitos flectere ad libitum nequeant, de quibus vulgatum illud habetur : *tollere nodosam, &c.* nec mirum quidem : magnam enim vina tartari quantitatem alunt, qui multis eorum artubus sensim se insinuans coacervatur. Ubi contrà ruri colæ, iique, qui indefessis laboribus strenuè exercentur, quia crebris suis sudoribus omnes corporis inutiles abundantias



evacuandi occasionem habent, rarò podagrà, rariusque quam alii, qui laboribus parcent, victuque lautiore utuntur, ægrescunt. Vidi tabellarios, qui, ut ut octogenarii, satis tamen, facili membrorum agilitate cursu suo defungebantur, quod continuato motu calor internus omnia sibi contraria pedetentim à se arcet: sic proprii nos docent oculi, quanta tartari copia dentibus quorundam, qui eorum munditiem negligunt, adhæreat; adeò ut inde non magna tantum oris deformitas, sed odontalgia etiam aliique perniciosi resultent effectus, à quibus ii, qui dentium curam habent, immunes reperiuntur. Alii verò tripudio excandefacti, postquam potu frigido præproperum quæsisissent refrigerium, tantam sibi visi sunt attraxisse morbum, ut vix ullis potuissent medicamentis restitui. Contrà memet id ipsum aliquando commississe recordeor, ut primum verò virium debilitatem in me augeri persentiscerem, tripudium concitatori motu continuare perseveravi, quo ipso postea nihil ulterius mali sum expertus, aliosque novi eodem remedio non infeliciori successu usos. Hoc unum ferè satis est ad ostendendum, quatenus calor internus hac ratione adjutus omnia antecellat medicamenta. Aliquibus etiam in locis equos ex itinere sudantes aquari non dubitant, quos, si statim superquiescere permitterent, utique perituros esse deprehenderent, veluti exempla satis testantur: quia verò post aquationem itinere reassumpto ad vehementem motum incitantur, nullum ipsis malum subsequitur. Luculentissimum sanè exemplum adferam, admodum clarè ostendens, quid valeat internus calor, si contraria sibi superare conanti succurratur. Sæpius in compotationibus non parum excedere fui coactus, cum postea noctu lecto, quam potui, profundissimè immersus somnum immobilis caperem; postridie verò à sudore sensim remitterem, & quam lentissimè ad refrigerationem redirem, verè athleticè, & tanquam quasi nihil excessum esset, me valere sensi. Novi quempiam non minus ac alii Aulicorum in potu enormiter excedentem, qui nihilò secius non

tan-

tantum prosperâ fruebatur valetudine, sed etiam à podagrâ, paralyseos, aliorumque morborum, quibus multi alii aulicorum laborabant, afflictione planè liber erat: id quod mirum mihi haud visum est, ubi omnem corporis abundantiam forticum sudore quotannis elicere rescivissem, maximè cum observarem, in sudoribus (quos certo collectos modo reservare solebat) postquam recrementa subsederant, tertiam ferme eorum partem in duram, & subalbicantem concrevisse materiam, tartaro vini non absimilem: unde haud obscurè colligere potui, quàm præstans sit remedium omnes à se posse superfluitates sudoribus removere, nec usquam poteram imaginari ullo id effici posse alio medicamento, ullâve aliâ evacuatione, purgatione, venæsectione, scarificatione, &c. Cum insuper attendissem, quantum præ aliis hic Vir annorum cumulum attigisset, quantâ membrorum agilitate omnia expediret, quam nullâ incommoditate iter faceret, equo veleretur, aliisque actionibus cæteroqui senio satis molestis vacaret. Quò ipso talis materiæ, quæ post adedò induruit, exsudatæ exemplo apparet, sudationem singulare itidem remedium esse contra materias, quæ in nobis lapidescunt, ad instar calculi renum, &c. ejusmodi enim materiæ sensim & successivè in corpore nostro coacervantur, donec tantum acquirant molis & duritiæ, ut maximâ postmodum difficultate dissolvantur; ubi contrâ in principio, simul ac vel minimum ejus se exerit indicium, nondumque tanta ejus copia est, multò faciliori negotio calore extraordinario dissipari, strenuèque sudando expelli possit. Quandoquidem aliquos novi, è quibus arenosa aliqua materia, imò jam lapides per urinam secesserunt, qui tamen, postquam sudores aliquamdiu continuârunt instantius, ventre inferiore bene semper focillato, hoc mali per multos post annos non sunt experti. Per hoc sudoris remedium hydropicos melius & securius fuisse curatos, quam educatione aqueorum humorum, per foramina à chirurgis facta, id quod quibusdam acceleravit mortem, oppidò notum est. Quin & firmiter mihi persuasum habeo,

multos, quorum natura ad corporis obesitatem inclinât, ut primum animadvertunt, quod crassescere occipiant, maturè tunc hoc remedio, nec forsitan alio quocunque, præcavere, posse. Id quod haud inviti crediderint ii, quos experientia docuit, quam incredibilis humoris quantitas sudore per horæ spatium eliciatur, præsertim si accuratius observaverint, vitam sedentariam agentes, & de cætero benè victitantes, plerumque impinguescere, quod aliis, qui multis negotiis occupantur, non ita facilè accidit, cum natura, quæ superflua sunt, hac ratione à se remove se semper possit. Eoque non dubitandum, si naturæ per sudorem subveniretur, multò id fieri facilius posse. Fuerunt non pauci, qui flatibus seu tumoribus, quod, exitum ubique quærentes, meatus, per quos transeundum ipsis erat, admodum extenderent, miserandum in modum excruciatii sunt; à quâ quidem tortura facilè liberari potuissent, si flatibus istis per sudorem aperturam fecissent, aut lecto ad minimum bene cooperti calorem fovissent. Contrà alii hoc remedio usi, à colica aliisque ejusmodi repentinis, & ex hac causâ ut plurimum procedentibus, variis aliis morbis facillimo negotio liberi sunt redditi. Vidi, quos febres diuturnæ moratæ sunt detentos, magnusque medicamentorum numerus frustra habuit, cum primum bonæ diætæ sudoribusque se applicârunt, febris planè solutos fuisse. Nec sine delectatione singulari hic notavi, quam sensibilibiter continuatis gradatim sudoribus, victuque juxtâ superiorem regulam temperatè sumpto, paroxysmi vires remitterent; quid quod alii omnia aspernati medicamenta, quamvis aliquot jam paroxysmos febriles experti, cum me authore parcius victitarent, & quovis relaxationis die (non verò, quo paroxysmum rediturum sciebant, quia tunc nimium jam recruduerat malum) sudore per horam vacarent, citius, quam ipse speraveram, convaluerunt: nec postea ullos pedum ventrisve tumores, quod aliàs multis accidit, sunt perpeSSI; sed singularem ciborum appetitum, notabilesque corporis vires unâ cum consummatâ valetudine, isthac ex curâ reportârunt.

Imò

Imò tandem ii, quos semel tantum febrilis accessus habuit, ubi proximè sequenti die strenuè sudârunt, arbitrato citius evaserunt, nullis aliis subsecutis paroxysmi indiciis. Quanquam si ullo in morborum genere temperantia ciborum necessaria est, certè in febribus requiritur, quæ unica fuit causâ quartanarum diuturnitatis. Cum enim quartanæ binos relaxationis dies indulgeant, pauci sunt qui, juxtâ regulam decimam, bene huic inservire tempori sciant; ubi contrâ pro certo affirmare possum, præsentè me aliquando continuò fuisse cuipiam febre laboranti quartanâ vehementissimâ, quæ accessum fortiebatur horâ meridianâ duodecimâ: hic verò prudenti in victûs cautelâ, quanquam nullo neque medicamento, neque sudore usus, id effecit, ut biduo elapso horâ secundâ pomeridianâ, post aliud biduum quartâ, tum sextâ, porrò octavâ, & ultimum decimâ paroxysmus rediens singulis vicibus duarum horarum inducias faciendo hoc ipso planè cessaret. Brevi ergo temporis spatio hic febricitans post senos tantum febriles accessus toleratos planè revaluit: ubi contrâ alii hoc morbi genere afflicti magnum temporis spatium, quicquid medicamentorum in auxilium vocaverint, exigant: nec ambigendum quin, si dictus febricitans ultrâ diætâ sudare etiam in animum induxisset, eoque, quem mox illaturus sum, modo, multò citius malo fuerit levatus. Adhuc in memoriâ versari arbitror, quod de apoplexiâ, seu, ut vulgò dici solet, catarrho apoplectico, suprâ in regulâ sextâ monui, & quomodo ab ejus periculo tutos nos reddere possimus. Jam quale auxilium, si contra talia aliquid peccatum fuerit, à jam sæpius dicto remedio expectandum sit, ostendam. Hic rogatum velim Lectorem, bene attendat, an ullo id alio, præter eum, quem jam profero, modo, effectum dare liceat. Et primò quidem observavi, effoetæ ætatis homines, tametsi aliquandiu diæticè vixerint, in uno tantum convivio magnis edendi excessibus commissis, illicò malè se habere, præcipuè de capitis dolore conquestos esse, tametsi, inquam, omnia eo, quo fieri posse arbitratus sum modo, fuerint institu-



ta, & in regulâ sextâ dictum sit, alios apoplexiâ fuisse correptos; attamen eorum nihil hic contigit, brevique ad pristinam redire valetudinem, eò quod sine morâ calido intrato lecto obvelatoque capite vehementer, me suadente, sudarent, & postridie modico pascerentur, omni posthabito medicamento; quod nemo miretur: quamvis enim simili in casu magna nutrimenti superfluitas subtiles capitis venulas, ut suprâ dictum, disrumpere & aperire conaretur; nihilominus luce meridianâ clarius est, si remedium tunc suppeteret venulas istas naturali modo distendendi, id est, absque læsione ampliandi, omni malo sic præventum fore. Jam meritò dubitaverim, an remedium tunc uspiam inveniatur, nisi cum natura sudatione bene astringitur. Æstivis enim temporibus venas nobis calore fervidioris magis expandi, & intumescere quam hyeme, vel ipsi oculi nostri testes sunt: ut taceam, in hoc præterea curationis genere sudoribus omnia superflua copiosè expelli, nec nutrimenta, dum aliquantulum abstinetur, ulterius augeri. Porrò, quod magis est, etiam disruptis jam ventulis, loquelâ cessante, & paralyti tunc membra invadente, reperi, dictâ nihilominus curatione absque ullius alterius rei adminiculo ægros tam perfectè fuisse restitutos, ut solitus aliàs capitis aut brachiorum motus, sive tremor in illis nullus cerneretur, quod nemini incredibile futurum est, cui notum fuerit, quantus eorum sit numerus, quorum caput manusque similis tremor occupat, quod claro indicio est, eorum venulas jam tum dissiliisse, atque hinc læsionem aliquam effectam, valetudinem tamen neque ex sudore, neque ex aliâ causâ recuperasse, quam quod sufficienti calore semper fuerint foti, & quod neque eorum constitutio, ut multa comederent, neque egestas, ut medico uterentur, passâ fuerit. Mul-  
tò itaque id citius & melius absque dubio obtineri posset sudore insigni, eâque instituto ratione, quam in sequentibus indicabo. Si enim solus calor, ut in hoc præsentis exemplo memini, serosum ejusmodi cruorem progressu temporis adeò dissipavit, ut sanitati non ita multum officeret, quid non effici putas posse

posse sudore, utpote cujus ope natura nostra materias, ut suprà dictum, tractu temporis lapidescentes à se arcere queat. Sed juvat singulare quippiam revelare iis, qui hâc sudandi curatione sæpius utuntur: quod videlicet illis, qui ad eam multum se assuefecerunt, de consimili malo non adeò sit metuendum, cum quosdam noverim, quorum majores & cognati hoc accidente (unde patet eos huic malo plus aliis fuisse obnoxios) prope modum omnes decesserint, ipsi nihilò secius eo restiterunt immunes, ut maximè ad senium vergentes admodum largiter victitârint, quia scilicet naturam eorum tali curationi assuefecerant. Nec sanæ rationi inconueniens videtur, eos qui venas suas sæpius laxare, velut sudore fit, soliti sunt, istiusmodi faciliè non habere quod metuant. Quam horrenda lues sit pestilentia, nemini ignotum est, adeò ut ipsorum medicorum pauci tali se tempore conservare sciant: quam incredibile verò hic asferri emolumentum sudando possit, multi hoc malum experti testes mihi confirmârunt. Imò ex ore viri alicujus fide digni, qui bubone pestilentiali jam laboraverat, habeo, solo se sudore exquisito sine ullorum medicamentorum adminiculo à tam diro malo liberatum fuisse, quod tali obtinuit modo: dum scilicet sex horis continuis totum lecto involutum se tenuit, humiditas sudoris bubonem reddidit perquam mollem: & quia materiam in eo contentam naturâ à se propellere aliquantum conata, (hinc enim ortum duxissè credendum est) postea verò jam multò sudore adjuncta, externaque cutis mollior magis magisque reddita est, faciliè aperturam fortiri, & maligna materia expelli potuit. Ex his quoque adductis rationibus contra litem venerem hoc ipso melius fortasse sperare remedium non posse videtur. Sed ut redeamus ad priora, ne verbis tantum meis fidem hâc in parte habendam esse contendam, videantur Ephemerides eruditorum (Journal des Sçavans) anni 1680. editionis Hollandicæ p. 178. ubi vera alicujus in loco pestilentia tunc famoso versati recensentur ista: *D'autant plus, que l'experience luy avoit fait voir, que de tous les malades, qui avoient*  
sué

*fué beaucoup, il n'en étoit mort aucun, & qu'au contraire ceux ci, en qui la sueur n'avoit été excitée, ny naturellement ny artificiellement, avoient tous perdu la vie:* id est, eoque magis, quod experientia ipsi ostenderat, ex omnibus ægrotis, qui multum sudassent, mortuum fuisse neminem, & contra, illos, in quibus sudor neque naturaliter, neque artificialiter excitatus fuisset, omnes vitam perdidisse. Si itaque nullo alio in exemplo, certè in hoc isthoc tantum clarè lectorem comprehensurum arbitror, quam incredibilia effici sudore possint, & an remedium melius & universalius sperari possit? Tandem eadem pariter viâ lepra perfectè curari posse videtur. Ea enim speciem fere præbet, ac si aliud non esset, quam omnium superfluitatum in corpore reperimentarum per proprias naturæ vires expulsio, ut itaque nil hîc requireretur, nisi naturæ in re, quam orla jam est, succurrere. Hæc igitur, ut hactenus ostensâ est, curandi methodus, multò evadit universalior, ex eo quod non solum toti jam corpori, ut hucusque monstratum fuit; sed etiam certis ejus tantum partibus applicari æquali facilitate possit. Celebris alicujus curationis peractæ ipsemet spectator fui, intabescente cuipiam uno pede, qui altero jam notabiliter erat minor. Quia verò aliunde ista tabes oriri non videbatur, quam ab aliquâ materiâ in pede coacervatâ, ejusque nutritionem impediente, ideo ad eam tollendam prudenter ordinavit medicus pedem adipe liquato inunctum, quò lenitudinem induceret, multis devincire linteis: cumque ita per continuum sextiduum aut octiduum calore sufficienti fatus absque involucri revelatione fuerit relictus, miratus sum postea materiæ inde expulsæ copiam. Hic fateor plus tunc quidem crevisse tabitudinem, at cutis iis etiam in locis, in quibus induruerat, præmollis reddita, & quasi renovata cernebatur, hocque ipso brevi post tempore decumbens planè restitutus fuit. Quod certè non video potuisse ullo medicis aliàs usitato modo obtineri. Contra etiam videre licuit alij, cui pedes admodum intumuerant, eadem ratione perfectè fuisse subventum. Quibusdam certa membra adeò contusa-

fue-

fuerunt, ut cruore maximè tuberosa redderentur, qui tamen cruor telarum calidiorum applicatione, & circumvolutione brevi dissipatus est. Imò tandem tussi & rauedine, dum nihil frigidi, sed omnia potius calida ex alimentis assumantur, aer frigidus evitetur, aut ad minimum per os respiratione non interruptum, collumque linteolis multipliciter nocte dieque involutum continuo calore foveatur, facilè levabimur. Firmiter igitur mihi persuadeo, tam rationibus quam experientià adductus, si ejusmodi apud ægrotos experimenta dictâ ratione fuerint inita, multa inde perquam salutaria detectum pluribusque subventum iri non tantum infantium, (cum insuper multis illos gravari medicamentis consultum non videatur) sed etiam majoris momenti morbis, quos ullis curare pharmacis aut evacuationibus medici nequeunt, eosque ob id incurabiles in se esse profitentur: præcipuè si in his satis maturè, secundum regulam octavam, provideatur. Cumque hâc ratione omne superfluum continuò & sensim elicitur, id saltem fortasse obtinebitur, ut mobilioribus & agilioribus crescente ætate membris simus futuri, secus ac nunc experimur. Ea enim mihi res magni momenti & probè ponderanda videtur, totius naturæ nostræ in se consideratæ stabilitatem in hoc uno sitam esse, ut veteribus omnibus continuò sublati nova per nutritionem semper succedant, quandoquidem totius corporis membra, id est, caro & ossa ex meris consistunt fibris, id est, ex particulis oblongis, quarum uni termino semper aliquid additur, alteri adimitur, aut in quibus hoc fieri non potest, major soliditas & durities inducitur, id quod vel ad oculum patet, dum quâ parte cutis nostra fuerit læsa, brevi per se ipsam sensim consumitur, succrescente aliâ plane novâ: imò in unguibus, ut ut duris, maculæ cernuntur subalbidæ, ultro tantisper pedetentim procedentes, donec progressæ ad oram unâ cum extantioris unguis parte rescentur; adeò ut unguis inde non tantum planè novi formetur, sed etiam verisimile quasi sit, (cum omnia ex ejusmodi fibris, ut dictum est, consistent) totum eo ipso corpus tractu tem-



poris quasi renovari, atque hâc ratione pedetentim omnia vetera planè aboleri. Hæc autem omnia per se ipsam naturam nostram operatur, nullius alterius nisi solius caloris auxilio adjuta, multosque per hoc ad provectiorem perducit ætatem. Ideoque non dubitandum, quin ad summam perventuri simus senectutem, si satis maturè suppetias hac in parte paulatim & successivè naturæ feramus, id est, nisi per se ipsam suffecerit, ejus calorem augeamus. Quæ omnia hæcenus dicta, si ad exactum rationis examen revocavero, aliam planè sententiam inire non potero ab eâ, quâ firmiter persuadeor, quod, si ulla unquam potuerit detegi medicina, longiorem consuetò nobis vitam promittens, pariter & intellectum, imaginationem, & memoriam nobis firmam conservans, illa demum ab hoc solo remedio derivanda & deducenda sit. Cum enim aliquando per universum octiduum tam vehementer indies sudare constituissem, ut in regulâ sextâ mentionem feci, homo non tantum novus, quod singularem virium corporalium concernit multiplicationem & agilitatem, mihi sum visus, sed quâvis etiam in re ingens mihi cogitationum copia magnâ facilitate succrevit; quod adeò mirum non est, tot videlicet sublatiis rebus, operationes nostras plus impediens, quam juvantibus, idque ex omnibus totius corporis membris, idemque tantâ in quantitate.

Jam nullus dubito, quin, si vel maximè frustra fuerim in verâ illâ & ingenti istarum rerum utilitate aliis satis persuadendâ, id saltem obtinuerim, ut ne istiusmodi iis jam nunc tam parum probabilia, tamque incongrua & absurda, sed potius diligenti consideratione digniora apparitura sint, quàm primò incuitu viderentur. Quapropter progredior, ostensurus quo pacto tertia præsentis hujus regulæ pars ad praxin sit transferenda. Initio hic quidem fortè quæsierint: quodnam præ aliis adhibendum sit præcipuum remedium, quod sudorem alliciat? Hic me ipsum hac in re fateor adeò fuisse præoccupatum, ut sudorem convenienter & aptè produci non posse crederem, nisi prius internè aliquid reciperetur: hinc ideo (cum quid de sudori-

feris

feris usitatis sentiam ex regulâ decimâ haud difficulter colligatur) juscula carniû calidiora, aliaque sorbilla antehac assumebam, postea tamen deprehendi quoties sudare præsumpsi, (etiam in multis aliis, qui aliâ nullo se modo adigi ad sudorem, unquam posse conquesti sunt) dummodo totus lecto implicitus bono, atque etiam uno & altero, si unum non suffecerit, superimposito undique circumdatus, & ab omni aëre munitus, nisi solâ facie ad respirandum exceptâ, absque motu supinus cubârim, intra horæ unius spatium, plerumque sudorem se exerere cepisse, quo postmodum situ aliam denuo adhuc horam commorari sudoriquè satisfacere ut plurimum solitus sum. Hac vero ratione decumbenti singulis diebus procedendum sentio, maximè autem quo tempore affectus non fuerit adeò vehemens, sicque tantisper continuandum esse, dum morbi qualitas ægrotique vires id tulerint. Quod si verò quorundam pori ad eò fuerint obstructi, ut per horam lectis prædicto modo licet involuti frustra tamen sudorem expectaverint, cessari quidem tunc à sudandi conatu potest, hoc verò non obstante nihilominus singulis porò diebus idem processus tentandus est: haud enim est ambigendum, quin calore tantopere & toties alito pori intra aliquot dierum spatium se tandem sint aperturi, nec renuo, quò minus, si visum fuerit, jusculum aliquod calidum forbeat, sed singillatim hic notandum moneo, ut omnia ista fiant in loco calefacto, aut saltem ab omni aëre externo optimè munito. Quibus omnibus licet ritè ita institutis, attamen post duas horas, eâ ratione, ut modò dixi, sudando emensas, quam potest fieri lentissimè à sudore cessandum, & dimidium quasi horæ spatium consumendum est, priusquam lectus planè relinquatur juxta regulam quartam. Calor enim hypocausti, collatus ad calorem in corpore nostro tunc existentem, instar frigoris se habet, ad quod communiter non attenditur, nimisque præcipitanter è lecto à sudatione prodeundo omnium virium debilitas postea persentitur; ubi contrâ accuratissimè hæc exequendo observavi contrarium prorsus evenire. Dolendum ta-

men est, omnes ferè homines communiter talia ægerrimè, & non nisi magnâ cum animi aversione & fastidio suscipere. Quandoquidem ipsi medici mihi facti sunt, licet sudorifera aliis medicamentis præstantiora experti fuissent, coactos se tamen fuisse ea adhibere quàm parcissimè, eò quod ægrotos viderent suos abrogasse medicos, non aliâ de causâ, quam quod eos ad sudorem nimis incitaverint. Hic autem error ex eo ut plurimum procedit, quia pauci ad id se assuefecerunt, postquam igitur initio hoc ipsis molestum aliquomodo fuit visum, perpetuò sic fore credunt, id quod falsissimum est. Pori enim tractu temporis magis magisque aperiuntur, adeò ut nullâ post incommoditate hoc effectum dari possit. Equidem interdum dum valetrem, ultra tres horas sudorem plenum continuare non dubitavi, ut, quamdiu id mea possit ferre natura, periculum facerem, nullumque inde incommodum, quin potius me ipsum tantâ intrinsecus valetudine gaudentem, quantâ unquam, sensi: quam sensibile verò incolumitatis incrementum ex eò perceperim, alios expertos esse mallet. Hi procul dubio non tantâ isthæc aversione susciperent, omnibusque reliquis evacuationibus, quæ & ipsæ non sine incommoditate (veluti quidam purgationibus vehementer cruciantur) sunt, præferrent; præcipuè, cum juxtâ istam curandî methodum nullis opus sit sudoriferis, aliisve medicamentis, quæ maximâ sæpe nausæâ, summoque assumuntur fastidio; utilitas verò ex omnium membrorum vigore & agilitate, nec non singulari ciborum appetitu tam sensibilibiter tantâque celeritate innotescat, ut valde dubitem, an auxilium ullis medicamentis tam optatò impetrari possit. Porro, circa medicamenta non levis animum cura angit, an justè à pharmacopœis sint præparata, an medicus dosin ad naturæ nostræ habitudinem ordinaverit, an nimio eorum usu fortè excedamus: hæc enim omnia faciliè possunt evenire, non absque singulari vitæ nostræ discrimine, cum ex adverso ea, quorum hætenus facta est mentio, animum nullâ ex parte habeant anxium. Quin imò, si vel maximè in excernendo sudore modum excedere

con-

contigerit, non ideo aliud sequetur (veluti sedulâ sæpius disquisitione exploravi) nisi ciborum appetentiâ sitisque augmentatio, cui quidem malo (si tamen malum dicendum est) bonis subveniri alimentis faciliè potest. Tandem, licet medicamenta adhibita medicorum in se spectata apprimè quoque bona seu fructuosa essent, adeò tamen nostra natura iis assuescit, ut, qui nimium iis utuntur, haud absimiles mihi videantur illis, qui conspiciiliis se applicant. Postquam enim ad ea semel oculos assuefecerunt, eorum adminiculo postea continuè opus habent, adeo ut iis destituti vix legere quicquam possint, quod inconueniens in sudationibus non reperi, cum eos interdum per universum triennium aut quadriennium intermittere oportuerit, nullo inde accidente subsecuto; contrà verò sanguinei, postquam aliquoties sanguinem miserunt, nisi quotannis id ad minimum continuaverint, gravibus sint morbis obnoxii, quorum multa succurrunt exempla. Sæpius cum celeberrimis & expertissimis medicis de medicamentorum, quæ præscribere solent, ratione disserui, qui eorum incertitudinem ingenuo candore mihi fassi sunt, attamen & hoc addiderunt, se nisi de manifestâ eorum ope, saltem de indemnitate securos esse: id ipsum verò de remediis jam propositis asseverare longè majori certitudine ausim, ea nimirum omnium, quæ nobis suppetunt, tutissima, &, nisi omnimodè profutura, ad minimum nullo modo obfutura esse. Addere possem ea ubique passim obvia esse, non tantas requirere impensas, nec denique alia fortè occurrere, de quibus demonstrari tantâ probilitate possit, quod eorum, quæ quidem hætenus innotuerunt, optima sint, & consequenter, si horum ope ægroti salus non obtineri deprehensum fuerit, certò firmiterque judicare liceat, ullâ humanâ industriâ, ulloque alio hætenus nobis cognito modo non faciliùs eam fuisse sperandam.

## REGULA DUODECIMA.

*Quamvis pristini jam redire vigores inceperint, morboque liberatos nos esse reapse persenserimus, domi tamen per biduum adhuc*



*vel triduum nos continendos, publicisque conventibus tantisper nobis abstinentum esse, donec de plenâ salutis restitutione planè tuti reddamur. Tunc igitur consueta nostra negotia non nimis debementer adeunda esse: quod si verò contrà morbus incruduerit, eoque res processerit, ut decumbens spiritu deficere videatur, non ideo pro jam mortuo habendum esse, maximè, si dolores, quos perpeffus est, excessivi fuerint, aut non adeò dudum sit, quod agrotavit, &c. vel si compertum fuerit, membra, ut plerumque fit, nondum obriguiffe, calore aliquamdiu refocillando tentandum esse, an spes ulla meliorationis affulgeat.*

PROBATIO.

**R**atio ejus, quod in primâ hujus regulæ parte dicitur, per quartam patet, abundanter etiam aliàs notum est, recidivòs à subitâ mutatione ortos morbos maximè noxios esse; adeò ut perfectæ reconvalescentiæ jam proximi, vel hoc solo vitam sibi postmodum abbreviârint. Si igitur duorum triumve dierum spatio ab omni opere abstinemus, tempus ideo non inutiliter perdimus, sed potius lucramur: ad posteriorem partem, quod attinet, ægrotos non illico pro mortuis accipiendos esse, quod animam ipsis deficere videamus, satis docent exempla frigore gelatorum, suspensorum, aquâ submerforum, &c. ex quibus apparet, quam incredibili diuturnitate respiratio cessare possit: postquam enim ipsis debito modo subventum est, perfectè spiritus recolligere comperti sunt: quid quod in sepultis etiam post sepulchrorum suorum adaptionem clarissima recuperatorum sub terrâ halituum indicia se manifestârunt. Hinc gravissimè hallucinatur, qui simul ac aliquos viderint respirare desiisse, continuò eos è lecto calido extractos, ad eorum artus decenter & ordine componendos (qui post ob nimium rigorem ægrè flecti ad placitum possunt) frigori exponunt. Nec enim veritati consentaneum videtur, tam ob exempla jam allata, quam ob rationes in regulâ commemoratas, posse tunc forsitan quibusdam amissos remeare spiritus, si in conclavi calido, per biduum, plurimumve per triduum fuerint reservati. Multò etiam

etiam probabilius id videtur in parturientibus. Sæpius enim nullum in earum sectione postmodum præ constitutionis signum se exeruit, nec aliud fuisse suspicandum est, quam ex nimis doloribus perpeffis, ut ipsis etiam prospera valetudine fruentibus evenit, vehemens animi deliquium. Et quia justò cautius similibus in casibus procedi non potest, ut ut sæpe frustratus quis fuerit tentando, sat multum tamen hoc ipso fuisset obtentum, si eorum pauci saltem per hoc fuerint conservati, cum insuper non tam difficilis executionis res sit, fovere quempiam ægrotum per biduum aut triduum.

## APPENDIX.

**H**isce omnia ad finem perducta erunt, quæ ad valetudinem humanam contra communiora symptomata, modo perquam securo, conservandam pertinent. Ad rara & insolita symptomata quod attinet, quæ non ex victu, quem capimus, originem sortiuntur, quædam singularia hic afferre possem. Cum verò penuria temporis hætenus non fuerit passa tales inire experientias, quales ad certum quid inde concludendum maximè necessarias esse scio, generalem saltem hic felici successu procedendi modum ostendam, & nonnullis exemplis confirmabo.

*Primò necesse est, ut Anatomia probè addiscenda, iisque, quæ in eâ adhuc latent, accuratè explorandis operam demus.*

Quantum laudabilis recentiorum industria hoc in studio omnia retrò secula superaverit, notum; at multa etiam adhuc latere certum est. Id ipsum verò in symptomatibus, de quibus jam sermo est, ad quid specialiter prolit, ex hoc patet: quod licet ægrotus conquerens, quâ parte corporis doleat, innuat, in quo tamen sita sit ratio morbi, medicus, ut ut satis expertus, assequi non statim poterit, cum ægrotus sedem doloris ab extrâ tantum indicare queat, quâ parte intrinsecus diversa sunt viscera, variisque modis symptoma evenire potest; prout experientia sæpissimè comprobavit, quod sectione post institutâ planè diversum ab eo, quod ferè omnes judicaverant, fuerit observatum. In accidentibus verò extrinsecus advenientibus, cum locus affectus,

ctus, modusque quo fuit læsus, necessariò nobis notior sit, habita anatomia exactiori cognitione, sanæque rationis adhibito dictamine, ex his duobus notis, quomodo auxilium sit præstandum, multò (quam ubi utrumque quasi incognitum fuerit) consilium comminisci poterit facilius.

*Secundò necesse erit, ut ex membri læsi naturâ modoque quo læsum fuerit videamus, num possibile sit absque ullo medicamento curationem aggredi.*

Hæc per exempla declarabo: si quispiam contusione, scissione, cæsione, percussione, &c. læsus fuerit, haud difficulter adjuvabitur hoc procedendi modo: *Primò*, externa quævis, à quibus læsio ista procescit, si præsentia adhuc fuerint, aut manuum, aut convenientium ad id instrumentorum opere removenda. *Secundò*, omnia in pristinum situm quantò ocyus remittenda sunt. Id quantum proffit, patet, dum quibusdam nasum semirefectum per appressionem, ubi satis maturè tentata fuit, conservatum fuisse constat. Hinc in scissionibus nullà opus est aperturâ ad magnitudinem vulneris indagandam sanguinemque exprimendum, sed ipso momento omnia dissecta eò quo prius fuerant modo recondenda sunt. Attamen nihil tunc magis noxium est, quam ulteriorem insuper separationem fieri, quod sæpius chirurgis præter ullam necessitatem usitatum est, præcipuè cum vulnere sanationem turundarum immisione sæpius remorantur. *Tertiò*, membrum affectum non multum esse movendum, neque contrectandum: per ejusmodi enim motionem nova subinde vulneris apertura renascitur, & credi vix potest, quam diu interdum vilissima quæque læsio (ut si quâ parte cutis saltem fuerit avulsa) crebrâ contrectatione, attritu, pressione, &c. sanationis moram pati cogatur, adeò ut leviusculum quippiam malum in deterrimum excrescere nocumentum possit. *Quartò*, locum affectum probè esse muniendum ad sanguinem sistendum, ut ab omni aëre, exteriorique impuritate arceatur, & absque ullâ aperturâ usque ad plenæ sanationis terminationem relinquendum. Quantum de-

trimen-

trimenti afferat frequens ejusmodi apertura, præcipuè vesperi & manè renovatis emplastris, experietur is, qui antè dicta probè observaverit, & talibus in casibus omnia, quo à principio condita erant modo ad finem usque, dum suà sponte decidant, integra reliquerit. Non ignari hujus rei aliquibus in locis ipsi rustici, quâcunque læsi fuerint corporis parte, liquatæ picis calidæ quantitatem superfundunt, (quod ipsorum quidem indurata pellis qualitercunque sustinere valet) eamque ita coagulatam loco haud movent, quousque ipsa recens succreta cutis eam divellat, sicque sine ullius alius medii ope curantur. Ubi contrà in multis læsionibus aër exterior, impuritasve admittatur, sæpius gangræna aliave dinturna succedunt mala. *Quintò*, calor sustentandus est, quia sanguinem coactum faciliè dissipat, sanationem mirum quantum promovet. Modus medendi jam dictus, quam subitaneum præstet in vulnerationibus maximè considerabilibus absque ullâ unguentorum applicatione, admirandus animadvertet, cui periculum facere fuerit constitutum. Quoties verò contra id, quod dictum est, peccatur, vilissimum expertus sum malum, ad tempus usque incredibile protractum esse, maximo subjecti patientis dolore, tantum in malum excrevisse, ut digitorum, brachiorum, pedum, &c. resectione opus fuerit. Imò quosdam ex solâ verrucarum unguiumve pedum amputatione meminisse mortem sibi per negligentem hujusmodi curam conscivisse, quod horum in expertis incredibile videbitur.

Porro, aliud adhuc ad meliorem hujus regulæ explicationem exemplum adducam, quò nimirum pactò ophthalmiæ facili negotio mederi possit in iis, quorum oculi nimio exercentur usu. Notandum ergò, quia oculi ad eorum motum faciliorem reddendum certam habent humiditatem, tanta ejus copia, dum vel ad studia, vel ad alios labores nimium applicantur, quandoque promanat, ut acredine rubescant, gravibusque afficiantur doloribus: porro, talis humiditas cum lachrymis unum idemque esse videtur, quas celeberrimus anatomicus Steno ex superioribus palpebris, per certos se demittere ductus, ostendit: in primis enim eodem cum lacrymis falso sapore prædita est, cum ejus acredine eandem oculis rubedinem,



& superioribus denique palpebris tumorem, utiis accidere solet, qui multum lacrymantur, inducit. Ex his igitur faciliè perspexi, quare, cum oculos, & præcipuè superiores palpebras, frigidâ tunc crebrò abluimus aquâ, aut si ita videatur, in eâ Sacchari Saturni, aut Vitrioli Cyprii non nihil dissolvimus, notabile id nobis levamen afferat. Omnia quippe refrigerantia, aut poros constringentia efficiunt, ut pori meatuum, quos ejusmodi humor penetrat, arctiores reddantur, atque ita humor minori copiâ promanet, & dum frequenter abluitur, non adeo possit oculos amplius arrodere, ideoque rubor remittere incipiat: quanquam maturius id contemplantus cognovi, omiſſis his omnibus & similibus externis remediis, multò mederi posse huic malo convenientius, ut oculis, tametsi continuo usu valde adstringantur, ejusmodi incommoditas faciliè non sit metuenda, idque in hoc consistit; quia humor iste apud illos, qui oculos crebrâ exercitatione fatigant, majori quam apud alios quantitate affluere assuescit, non est quod aliud agamus, quam, simul ac oculorum vel minimum dolorem incipere persenserimus, (non verò postquam jam tum irrubuerunt) studiis, lectioni librorum, scriptioni aliisque exercitiis majori, quam antea, assiduitate incumbere, quo ipso fiet, ut superfluous oculorum humor frequentiori usu subito consumtus nocere non possit, dolorque oppidò cesset: quâ in re experientiâ ita confirmatus sum, ut, qui aliàs non paucis inde incommodis obnoxius fui, multis jam annis, licet oculis multò jam quam ante plus usus fuerim, id unum observans nihil mihi molestiæ ulterius fuerit sufferendum. Nec amplius miror, quod oculorum usus, licet frequens ferme, nihil jam mali mihi inferat, ut primum verò aliquamdiu laborem intermitto, illico oculi malè habere incipiant. Ex quibus etiam apparet, quam noxium sit ab omni prorsus studio aliove consueto labore, simul ac à multâ oculorum exercitatione, malum illis ingruere sentiat, cessare, in loca obscuriora se recipere, & id genus alia. Et forsitan hoc unice in causâ fuit, quod in Analyticâ Mathematicâ recentiorum (quod studium industrios præcipuè oculos requirit) versatissimus Dominus de Beaune eorum usu planè fuit privatus. Si verò tandem hac ratione res succedat,

hoc

hoc est, eo non obstante humor ille nocivus pergat magnâ quantitate affluere, non dubitem, quin hic bene sudando, penitus possit tolli, quanquam si priora observaverim, eo remedio hæcenus uti, nullo modo coactus fuerim.

*Tertiò, si cognoscatur absque externorum medicamentorum applicatione nihil obtineri posse, ea quidem adhibenda; at talia, quæ rationi valde consentanea esse videantur, aut si talia quæpiam excogitari facile non possint; saltem ea, quæ evidens & sensibile (non obscurum, non quod tardius advertitur) auxilium ferant, quæ simplicissima (non ex multis ingredientibus composita) sint: & postquam horum semel quid electum fuerit, huic unicè ad perfectæ curæ terminum, usque stetur, (non hoc cum alio commutetur per vices alternando, prout communiter inconstantissimè hac in re, & ex rationibus interdum ficulneis proceditur) nisi sana fortè ratio aliud quippiam clare docuerit.*

Compertum sic erit, si in aliquo corporis membro magna inflammatio orta fuerit, vel ex unctione, vel ex vehementi externâ compressione &c. per adipis saltem applicationem (cujuscunque demum generis sit, sive canini, sive leporini &c. dummodo bene fluidus) notabilem dolorum mitigationem procurari, sique ab omnibus externis bene munita conservetur, brevi omnia salva fore. Propterea probè notandum, quod, licet, observatis (ut in secundo loco jam dictum) quinque illis requisitis, maxima sæpe mala facillimo negotio cùrentur, repererim tamen, curationem citius & melius expeditam dari, si locus afflictus linteo pinguedine calefactâ macerato bene contegatur, cæteroquin, si postmodum tenacius adhaerit, ita quidem, prout superimpositum est, immotum relinquitur; (nec quotidie detractum, ut Chirurgi vulgares emplastra sua solent, removeatur, & cum novo aliquo commutetur) attamen recenti, ejusdem pinguedine calidâ, indies perfusum rigetur. Porro si, quæ membra admodum calefacta fuerint, repentino frigore afficiantur, tubera inde prorubra & fervescentia (quæ ex aliis quoque multis possunt causis oriri) generantur, successive magis magisque crescentia, vehementesque excitantia dolores: quod nemo miretur. Tunc enim natura, quod operationibus suis impedimento est conatur expellere, idque per solidam, ut fas est, pellis substantiam: priusquam verò id effectum detur, pellis utique per malignam isthanc materiam satis corrodati oportet, quod absque magno dolore & fervore fieri sanè non potest: quapropter Chirurgi, ut materia hæc liberiores sortiatur egressum, promptissimi sunt ad dissecandas partes inflammatas, & ad turundas ingerendas, ne scissura, dum naturæ aliquid materiæ malignioris expellendæ superest, concreascit, quæ certè acerbissima & cruciaria cura est. Contrà in diversis ejusmodi casibus notavi, si simplicissima quoque applicentur (cujuscunque tandem generis fuerint)

dummodo sub formâ sit massæ cujusdam densioris & humidioris, præsertim verò satis calidæ: cum primum verò induruisse compertum fuerit, rursus ejusdem massæ satisque calefactæ, quantum opus sit, superimponatur, loco afflicto, in sufficienti aliâs calore conservato; hinc, inquam, notavi, naturam non tantum sat cito, & sine singulari dolore suâ sponte aperturam sibi procurare; (quia hoc ipso pellis extrinsecus satis emollefcit) sed etiam continuato hoc processu ultra egressæ totius materiæ tempus, tam feliciter omnia consanescere, ut quâ parte materia aperturam sit nacta, dignosci vix queat. Tandem si quis hominum viperâ, aspidæ, aut aliâ quapiam bestiâ venenatâ ictus fuerit usque ad intumescen-  
tiam subinde increfcentem, multum oleo utuntur, in quo scorpii, scarabæi nigri, aliaque ejusmodi insecta venenata suffocata sunt. Equidem in tali aliquando tumore, manum prius, mox brachium quoque occupante, atque ita quotidie ulterius progresso, vehementem etiam calorem excitante reperi, simul ac simplici tantum & communi olivarum oleo (quod nullus planè scorpius intraverat) tumor hic ungeretur, haud aliter, ac si frigidissimam superfudisses aquam ægrotum affectum fuisse, calorem sensibiliter remisisse, tumoremque indies decrevisse: in multis itidem aliis subjectis eundem effectum secutum esse observavi. Quin imò si pinguedines ad minimum bene fluidæ, quæ, ut applicantur, illico perfrigidæ videantur, fuerint adhibitæ, tam fervido crescenti tumori mox quoque accretur.

Id igitur demum est, quod cum ingeniis veritatem amantibus & inquirentibus impræsentiarum communicare volui: ubi præcipuus intentionis meæ scopus fuit, ut iis prospiciam, qui scenæ, ut dicitur, servire tenentur, & quibus de rebus suis disponere vix quicquam ex sententiâ licet. Quæ enim regulæ à multis præscriptæ fuerunt illis, qui omnia ad proprium gerere nutum possunt, eæ, meâ quidem sententiâ, inventu sat faciles fuerint: cum verò exiguus horum in mundo sit numerus, parum utilitatis habent. Contrâ verò ubi aliis, quibus admodum inordinatè vivendum est, ponendæ veniunt regulæ, quæ notabilem valetudini opem præstent, longè diversæ requiruntur meditationes. Et quia istorum infinitus reperitur numerus, longè ideo majoris quam priores utilitatis sunt. Quanquam, ut à principio mox dixi, ingenuè fateor, non omnia (in materiâ adhuc tam obscurâ maximeque difficili) modo irrefutabili demonstrata esse; haud tamen diffido, quin veritati tam sint analogæ, ut multi aliis rebus, licet valde consuetis, nullo tamen nixis fundamento, longè sint præferenda. Veruntamen hæc loci non acquiescendum arbitreris; sed hæc nobis tantisper modò inserviant, quoad præclara ingenia, quorum præsens hoc seculum fertilissimum est, horum veritatem perfectè detexerint, id quod animitus exopto, eique tunc, ut maximè assertis hiscæ meis planè adversaretur, me ipsum lubens submittere non recusabo.









